

Jusiñamui uai: Jusiñamui jito rafue illa rabenico

Murui Huitoto

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

MATEO	4
MARCOS	40
LUCAS	62
JUAN	98
HECHOS	122
ROMANOS.....	151
1 CORINTIOS	165
2 CORINTIOS	181
GÁLATAS	190
EFESIOS	195
FILIPENSES.....	200
COLOSENSES	204
1 TESALONICENSES	208
2 TESALONICENSES.....	211
1 TIMOTEO.....	213
2 TIMOTEO.....	217
TITO	220
FILEMÓN	222
HEBREOS.....	223
SANTIAGO	235
1 PEDRO	239
2 PEDRO	243
1 JUAN	246
2 JUAN	250
3 JUAN	251
JUDAS.....	252
APOCALIPSIS	254

MATEO

Jesucristo ie usumatiai (Lc 3.23-38)

1 Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. ² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. ³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. ⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. ⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. ⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñaona ollena, David micori Urías micorina jobaimemo orede. Jobaimemo naimie fiodailla mei, naiñaiñaona ote. ⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori. ⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori. ⁹ Uzías micori jitodi Jotam. Jotam micori jitodi Acáz. Acáz micori jitodi Ezequías micori. ¹⁰ Ezequías micori jitodi Manasés. Manasés micori jitodi Amón. Amón micori jitodi Josías. ¹¹ Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. ¹² Naie meinomo Jeconías micori Salatiel micorina comuitate. Salatiel micori jitodi Zorobabel micori. ¹³ Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. ¹⁴ Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. ¹⁵ Eliud micori jitodi Eleazar micori. Eleazar micori jitodi Matán. Matán micori jitodi Jacob micori. ¹⁶ Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo. ¹⁷ Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniamoo ite nairai anamo cai jaiaagai illa facaisemo catorce nanoramaci mameci jiai ite. Babiloniamoo ite nairai anamo cai jaia-

gai illa facaisemona Jesús jeicia facaisemo catorce nanoramaci mameci jiai ite.

Jesús jeicia rafue (Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiñaona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñaona uruesitate. ¹⁹ José micori maremie. María jai uruesillana naimie micori fidianona, naiñaiñaona meidaitañellena jira, naiñaiñaona bainino dotaacade. Jiaimie diga illamona urueside raillanona comecina facajanona, naiñaiñaona dotaacade.

²⁰ Naimie micori comecina iemo facaia, naimie micori nicairillanona, naimie micorimo Jusiñamui jaienici bairiano raite:

—José, David micori jito, Maríana jaciruiñeno ono, o aina illena. Jusiñamui Joreño naiñaiñaona jai uruesitate.

²¹ Iimana jocoite. Ie comini naimaci jeacinomona naimie jilloitajaibilla jira, Jesúsna o jitalle naimie mamecidi —raite. ²² Bie rafue suide, Jusiñamuidi ie llo- raima micori jaiie llotataga uaina suillena. ²³ Jaiie llotatate:

Iimana uiñoñediñaiño comuite uruedi.

Iimana jocoite.

Emanuel ie mameci jitalle.

Bie mameci oni dobañuamona raite: “Jusiñamui cai diga ite”.

²⁴ José micori casidemo, Jusiñamui jaienici lloga uaina finode. Maríana ote, ie aina illena; ²⁵ iadedi nai jitona naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jitate naimie mamecina Jesúsna.

Monamo ite ramo comeciaina facaidino rafue

2 Judea railla enruemo Jesús jeiciga. Naimie jecianodi Belén. Naie facaiseconi ite illaimadi Herodes micori. Monamo ite ramo comeciaina facaidino naie facaiseconi Jerusalémo jitoma billafo dinena bitimaci. Jerusalémo itinomo jicanotimaci:

² —¿Ninomo como jeiciga omoi judúuai illaimadi? Jitoma bisoillafomo como bairede ucuduna ciodicaí. Naiemona naimie jeicana jai uiñoticaí. Naimiemo iobillacinona fecallena biticaí.

³ Herodes micoridi naicinona cacajanona, ie comeci jarire ite. Jiaimie naimie meifomo illana jitañede. Jerusalémo itinodi jiai jarire itimaci. ⁴ Ie facaise Herodes micori judúuai illacomina uaiduanona,

naimacimo Cristo raillamie jeiciana jicanote. ⁵ Uai otimaci:

—Judea railla eniruemo. Belémo. Iena Jusiñamui facaina micoridi jaie cueda:

⁶ Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illaicomini baifemo faite cueda. ⁷ Iena cacaja mei, Herodes micoridi monamo ite ramo comeciai facauidino bainino uaidote. Naie ucudu bairia facaise raise uifollena jicanote.

⁸ Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillasa. Naimiemo iobilacinona jiai fecaacaducue —llote.

—Jii —fairiotimaci. ⁹ Iena naimie micori llua mei, jaidimaci. Ucuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. ¹¹ Fo jaillano uruena, ie ei María diga, cidimaci. Naimiemo iobillacinona fecallena, caifitici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiai fecadimaci.

¹² Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micori inia anamo nicairite. Nicairillanona, Jusiñamui jaienici di naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide. ¹⁵ Herodes micori fioidaille dinori nainomo ite. Ie muidona Jusiñamui ie facaina lloraíma micori llotataga uai jai suide. Jaie lloga: “Egiptomona cue Jitona jai uaidoticue”.

Mena años itisaiai dierisedena faia rafue

¹⁶ Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jiai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite isaiai diese faetate. Belén ecimo itino uruaina jiai faetate. Naie ucudu mena años jaie nano bairana jira, mena años itisaiai dierisedena faetate. ¹⁷ Raquel micori jaie eia isoi, Belén itino birui eedimaci. Jeremías micori iena jaie cueda:

¹⁸ Ramá railla nairai dinena Raquel micori eo eiana cacadicue.

Caí usuño Raquel micori eede.

Naiñaiño micori uruai micoriai facaina eede.

Jiaie cominimona firaduacinona jitaifede, naiñaiño uruai micoriai jai fioidaille jira.

¹⁹ Digarui illanona, Herodes micori fioidaille mei, Egiptomono José micori dane nicairillanona, Jusiñamui jaienici naimiemo baireda. ²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fioidaite.

²¹ Ie jira ie eniruemo naie urue diga, ie ei diga, abido jaide. ²² Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquela. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillana naimiemo llote. ²³ Nazaret railla nairai dine jaide, nainomo illena. Iemona Jusiñamui facaina lloraíni micoriai jaie cueda: “Jai suide. Cristona jaie cuetimaci: “Naimiedi Nazaret imie”.

Jofue iñenanomo Juan Bautista micori illa rafue

(Mr 1.1-8; Lc 3.1-9, 15-17; Jn 1.19-28)

3 Diga años illanona, Juan Bautista raillamie micoridi jofue iñenanomo illanona, cominina dafafia, Jusiñamui rafuena naimacina llofueuide. ² Comini naimie micori dine billanona, naimacimo llote:

—Omoi jeacinona fainonocada, omoi comeciai iuailai meido. Jusiñamui dibemo omoi i. Naimie anamo omoi illana naimie jitailla jira, omoimo iena lloiticue —llote. ³ Isaías micoridi Jusiñamui facaina lloraíma. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Caí Nama biite.

Naimie naiso atona raise fino” llote.

Iese llote; iadedi naimie uaina naimaci feifollena, naimaci comeciai marena finuana ñaite. ⁴ Juan micoridi camello itiraiai ie nilla iniroina jitate. Igoi iena ie moilligaina jitate. Fioduaina rite. Cifona mete. Jamai rana guite. ⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fueomona jai jaisoidimaci. ⁶ Jusiñamuimo naimaci jeacinona naimaci llua meino, naimacidi Juan micori bautizaga. ⁷ Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori cuano llote:

—Maraiñede rafuena finocana omoi jailla jira, jai nairai isoidomoi. ¿Niese Jusiñamui riicailifueomona jilloitomoi? Cue dine omoi billena, ¿bu omoimo llua?

⁸ Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uifoiticaí. Ie mei omoi bautizallomoi.

⁹ Omoi comeciaina facañeno: “¿Bue ñellena o llua isoi fnoiticaí? Jusiñamui Abraham micorina jaie eo raise nabaide. Abraham micori caí moo illamona, Jusiñamui riicailifueomona jilloiticaí”. Ero, omoimo lloiticue: Cue

llua isoi omoi finoñenia, naimie riicaillifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite nofici-mona naimiedi Abraham micori facaina uruiaina comuitarede. ¹⁰ Ero, llisiñede riana tiedomoi. Tia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoina jai duere finoacade. Ie riicaillafue anamo jai itomoi. Omoi comeciai iuai omoi meidoñenia, omoina duere finoite. ¹¹ Jusiñamui dibeimo omoi comeciai iuai omoi meidoia, jinui diga omoina bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoina duere finoite. ¹² Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailla meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue

(Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite.

¹⁴ Juan dinena naimiemo llote:

—Bautizallena cuemo bitio; ia dama ite. Cueno o bautizaia, cuemona mare.

¹⁵ Jesús uai ote:

—Cueno mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. ¹⁶ Jesús bautizaja mei, jinui mona bite. Mona bojodena ciode. Jusiñamui Joreño, ucugi isoi, naimie emodomo ana bilana ciode. ¹⁷ Ie facaise monamona Jusiñamui llote:

—Bimie cue eo isiruiga jito. Naimieri iobidicue.

Jesúna Taife ramo faia rafue

(Mr 1.12-13; Lc 4.1-13)

4 Naie facaise nainomo naimiena ramo Taife failena, jofue iñenanomo Jusiñamui Joreño Jesúna uite. ² Cuarenta digarui Jesús guiñede. Naie facaise fuilla mei, guiñeno illamona, aimetaite. ³ Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiódena, naimiemo llono: “Ore Moo, cue guillesa, bie nofici llomenicono jaita”. ⁴ Jesús uai ote:

—Dama ite. O llua finañoiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵ Ie mei Jerusalémo Jusiñamui jofo muidomo Taife Jesúna uite. ⁶ Raite:

—Jusiñamui Jitodiódena, eniruemo mai ana uai.

David micori ona jaie cuega:

Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci

cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facañeno”. Naimie cuena raise eenuana jai uiñoticue. Jamai ebena naimiena facañeiticue. O llua finañoiticue.

⁸ Ie mei a ite anedumo Taife naimiena uite, naie anedumona nana nairaiaia cioillena. Naie nairaiaia eo ebire eruaide. ⁹ Naimiemo llote:

—Nana bie nairaiaia cue anamo birui illamona, cuena o sedaia, nana bie nairaiaia omo iiticue. O cañici ifodo ana rainada, cuemo iobillacino o fecallena.

¹⁰ Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai. ¹¹ —Ie facaise naimiemona Taife jaide. Naimie jailla mei, Jusiñamui jaienisaia Jesús dine bitimaci. Naimiena ecallena bitimaci.

Galileamo Jesús illa rafue

(Mr 1.14-15; Lc 4.14-15)

¹² Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide. ¹³ Nainomo rilla mei, Capernaumo jaide. Capernaum nairaia jorai fuemo ite. Nainomo Zabolón railla enirue ite. Neftalí railla enirue jiaia ite. ¹⁴ Nainomo Jesús jailla jira, Isaias micori jaie cuegafuiaia jai suide.

¹⁵ Naimie micori naie cominina jaie cuega: Bie eniruemo diga nairaia ite. Zabolón ite. Neftalí ite. Monaillai fuemo nairaia ite. Jordán ruicafebeimo nairaia ite.

Galileamo nairaia jiaia ite. Nainomo judúuaiñedino jai itimaci.

¹⁶ Jeacino anamo naimaci illamona, naga naie eniruemo ite comini jitiñedonomo itimaci isoidimaci

Jusiñamuina uiñoñeno fodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenite

cuega. Jusiñamuina naimaci uiñoñena jira, naimacina iese cuega. Jesús nainomo birui llofuaia jira, mare rafuena jai cacaidimaci. ¹⁷ Galileamo rilla mei, Jesús llocana jaide. Llofuate:

—Jusiñamui dibeimo illena, omoi jeacinona fainonocaida, omoi comeciai iuaina meido. Ie cominina omoi jaillena birui jitaide.

Ie llofueoicaiganona jaillena, Jesúsdi nagaamagamiena fetua rafue

(Mr 1.16-20; Lc 5.1-11)

¹⁸ Jiairuido Galilea railla jorai fuemo Jesús macaritemo, menamiena ciode. Naga ie ama iaímaiaí. Damie Simón. Jiaici naimie mamecidi Pedro. Ie ama Andrés diga ite. Lloijina fairaima iaímaiaí. Iese jaca naie iaímaiaídi maijuidiaímaiaí. ¹⁹ Iaímaiaímo llote:

—Cue diga omico jaiocaillena, cue diga mai bi. Cue llofueganona omico jaillena jitaídícue. Lliciaína birui ocabitomico; iadedi cominina oitomico, cue díbeimo naimaci illena.

²⁰ Iena cacajanona, ieconi iaímaiaí lloijina faínonocaida, naimie diga jaidiaímaiaí. Ie llofueganona jaillena, jaidiaímaiaí. ²¹ Lliai bai Jesús jaidemo, jiaie menamiena ciode. Naga ie ama iaímaiaí. Damie Jacobo. Jiaimie Juan Iaímaiaí moodi Zebedeo. Naimie diga botemo itiaímaiaí. Lloijina sigaidimaci. Jesús iaímaiaína uaidote, naimie llofueganona jaillena. ²² Ieconi iaímaiaí mooná faínonocaida, botemona ari billanona, Jesús diga jaidiaímaiaí.

Jesús ailluena cominina llofuia rafue

(Lc 6.17-19)

²³ Nana Galileamo Jesús jaide. Judíuai ofiracuaimo llofueuide. Naimie anamo comini illana Jusíñamui jitailla jira, Jesúsdi Jusíñamui díbeimo naimaci comeciá iuaina meiduana llofueite. Ie cominina naimaci illena llofueite. Naga isoide duiconá duidinona jillotate.

²⁴ Iemona nana Siria railla eníruemo naimie mameci soride. Naie comini naga isoide duiconá duidinona naimie díne atídímaci. Abi isiredinona atídímaci. Jananiaí anamo illa cominina atídímaci. Naillidinona atídímaci. Niraidanidinona atídímaci. Nana naimacina jillotate. ²⁵ Ailluena comini naimiena racadimaci. Galileamona, Decápolimona, Jerusalémóna, Judeamona, Jordán ruica díbeimona comini bitimaci.

Anedumo naimie ia, Jesús lloga rafue

(Lc 6.20-23)

5 Ailluena cominina Jesúsna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote:

—Omoína Jusíñamui ie cominina sedaacana rafuena ja llofueitícue. Naimie anamo naimaci illena llofueitícue. ³ Ero, Jusíñamui naimiena jitaídínona sedaite. Comeciána facadimaci: “Naimie jitaillacinona daní fínonidícaí; ia naimie cáina canuanona, iena fínoitícaí”. Naimie cominina naie isoidino illamona, naimie naimacina canoite. Iemona caímare iitimaci. ⁴ Jusíñamui sunaitínona sedaite. Ailluena comini jeacino fínocana jaidimaci. Iena uiñuamona, damierie sunaitimaci. Naimie cominina naie isoidino illamona, Jusíñamui naimaci comeciána ocuiñotaite. Iemona caímare iitimaci. ⁵ Jusíñamui abina íedoñedinona sedaite. Naimie cominina naie isoidino illamona, Jusíñamui nana

eníruemo naimacimo iite. Eníruemo cominina ico cue sedaia, iese iite. Iemona caímare iitimaci. ⁶ Jusíñamui naimie jitaillacino fínodínona sedaite. Jusíñamui mare rafuena naimaci fínuana canoite. Iemona caímare iitimaci. ⁷ Jusíñamui cominina duenaitínona sedaite. Naimacina naimie duenailamona, Jusíñamui naimacina ico duere fínoñeite. Iemona caímare iitimaci. ⁸ Jusíñamui jeanide comeciredinona sedaite. Naimie cominina naie isoidino illamona, naimie diga jaca iitimaci. Iemona caímare iitimaci. ⁹ Jusíñamui naimie diga uri itínona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mamecirenitimaci. Iemona caímare iitimaci. ¹⁰ Jusíñamui jitaillacinona fínuamona, damierie duere sefuitimaci. Jusíñamui naie isoidinona sedaite. Naimie cominina naimaci illamona, naimie sedajanomo jaca jainaítimaci. Iemona caímare iitimaci. ¹¹ Cuemo omoi duia, duere sefuitomoi. Jiaie comini omoína jeare ñaitimaci. Omoína duere fínoitímaci. Omoi joreñona tainona lloitimaci. Duere sefuitomoi; iadedi Jusíñamui omoína caímare itataite. ¹² Omoi isoi omoi jaiagaimona Jusíñamui facaina lloraini micoriaí jaie duere sefuidimaci. Iena omoi uiñuamona, monamo Jusíñamuimona ailluena íbana ico omoi feiñua jira, birui omoi duere sefuia, iocíre omoi jai.

Jesús comini illa rafue

(Mr 9.50; Lc 14.34-35)

¹³ Jesús llote:

—Jusíñamui ie cominina sedaacalle rafue nia llofueitícue. Llicisi rífaia, jai marañede. Iena rífaíñellena, llicisimo sal jonetici. Sal isoidomoi. Jusíñamui jitailla isoi omoi illamona, jiaie comini marañede rafuena eo fínoñedimaci. Sal ie caimano jai íñenia, ¿ñiese dane níbaíamona caímarenite? Jai marañede. Jitaiñena jira, iena oni faiga. Ie isoide. Jusíñamui jitailla isoi omoi íñenia, naimie omoína duere fínoite.

¹⁴ ‘Cuemo omoi duilla jira, jiaie cominina Jusíñamuina omoi uiñotajamona, lligaiñora isoidomoi. Anedumo ite nairai jaca bairede. Ie illanona jaca uiñotici. Jusíñamui jitailla isoi omoi illamona, jiaie comini naimiena uiñoitimaci. ¹⁵ Lamparín unia mei, cirígaí anamo buna raiñaíega. Jaca ie rainarafomo rainaca, nana jofo jeraina lligaiñollena. ¹⁶ Ie isoide. Cue rafuena jamaíñeno; iadedi omoi marena illamona, cominina Jusíñamuina uiñota. Omoi marena illamona, comini omoi mare fínoca rafuena uiñoitimaci. Iemona: “Juiñamui maremiena” raitimaci.

Jesúsdi Moisés micorina llofuia rafue

¹⁷ Jesús llote:

—Jusíñamui ie cominina sedaacalle rafue nia llofueitícue. Iena cue llofuia jira, omoimona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacínuaí marañede” raiñedícue. “Jusíñamui facaina lloraini micoriaí jaie llogacínuaí marañede” jiaí raiñedícue; iadedi omoína naie llogacínaina raise uiñotaacadícue. ¹⁸ Biemo omoi

comeciaina faca. Mona, enirue diga, nia ia, nana naie llogacinuai jaca suite. ¹⁹ Omoi einamací raitimaci: “Dajerie llogacino jiaie llogacino baifemo faite”. Cue raiticue: Naga llogacino omoi inoñenia, naga omoi llofueñenia, nana Jusiñamui jitaillacinona finoñedomoi. ²⁰ Ero, Jusiñamui jitailla rafuedo judíuai illaicomini baifemo omoi jaiñenia, Jusiñamui sedajanomo jaca iñeitomoi. Naimaci naie jaie llogacinuai uiñotimaci; iadedi naimaci comečiai Jusiñamui dibeimo iñedimaci.

Jusúdi iciriñena llofuia rafue

(Lc 12.57-59)

²¹ Jesús llote:

—Omoi llofuerañimona bie jai cacadomoi. Moisés micori omoi jaiagaimo llote: “Comena meineño. Comena bu meineia, jeacino jai finode. Naimie fiodailena juez llua”. ²² Naie llogacino jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

²³ Jerusalémo Jusiñamui jofomo omoi jeacino facaina naimiemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra fañonocaida, naimie dine nano mai jai. Naie rafue raise finollena, naimie dine jai. Ie mei Jusiñamui omoi rana feca.

²⁵ Omoína bu llogidoia, juez dine nia omoi riñenia, omoína llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoína oretaite. ²⁶ Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitaño. Jeacino finoñellena, jiaimie diga iciriñeno.

Jesúdi iima ie aiñede riño diga illa llua rafue

²⁷ Jesús llote:

—Omoi llofuerañimona bie jai cacadomoi. Moisés micori jaie llote: “Omoi aiñede riñoñiaí diga iñeno. Omoi iniñede iñiaí diga iñeno”. “Iena bu finoia, jeacino jai finode” raitomoi. ²⁸ Jiaie rafue birui lloiticue. Ie aiñede riñoñero eruaiñamona naiñaiñoña bu nicidoia, naiñaiño diga jamai iniacananona naimie começi facajamona, jeacino jai finode. Naiñaiño diga iñede; ia naiñaiño diga jamai iniacananona naimie começi facajamona, jeacino jai finode. ²⁹ Biena ñaiticue. Nie isoide rafue omoína jeacino finotaia, iemo eruaiñeno. Iena linoñoño. Iemo começina facañeno. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onolli jaita. Omoi começina ñaiticue. Omoi abina omoi raise namatallena, omoi começi nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoñoño.

Jesúdi iima ie aina dotaja llua rafue

(Mt 19.9; Mr 10.11-12; Lc 16.18)

³¹ Jesús llote:

—Omoi llofuerañimona bie jai cacadomoi. Moisés micori jaie llote: “Ie aina bu dotaacania, naiñaiñoño dotajacanabena fecaja”. Iedo jai jaicabidomoi. Iena bu finoia, omoimona mare. ³² Jiaie rafue birui lloiticue. Jiaimie diga naiñaiño iñenia, ie aina bu dotaja, maraiñede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñoña ie aina illena bu ua mei, naimiedi jeacino jai finode. Jeacino finoñellena, aina dotañoño.

Jesúdi Jusiñamui mameçi jamai ebena linoñenana llua rafue

³³ Jesús llote:

—Omoi llofuerañimona bie jai cacadomoi. Moisés micori omoi jaiagaimo llote: “Taino lloñoño; ia Jusiñamui omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uiñoñella, Jusiñamui mameçina llinotomoi. “Iena cai linoia, cai lloga uaina cai finoñenia, Jusiñamui caina duere finoite” raitomoi. Jusiñamui mameçi omoi linoñenia, omoi lloga uai omoi finoñenia, omoimona mare. “Jusiñamui caina duere finoite” raitomoi. Iemona monamo ite ra mameçina jamai ebena llinotomoi. Eniruemo ite ra mameçina jamai ebena llinotomoi. Jerusalén railla nairaí mameçina jamai ebena llinotomoi. Omoi ifogí mameçina jamai ebena jiaí llinotomoi. Jusiñamui mameçina jamai ebena linoñedomoi; ia jiaie ra mameçina jamai ebena llinotomoi. Ero, monamo ite ra mameçina omoi linoia, Jusiñamui mameçina jiaí llinotomoi, nainomo ie illano illa jira. Eniruemo ite ra mameçi omoi linoia, iena Jusiñamui finua jira, iena naimie sedaja jira, naimie mameçina jiaí llinotomoi. Jerusalén railla nairaí mameçina omoi linoia, Jerusalén naimie nairaína jira, naimie mameçina jiaí llinotomoi. ³⁶ Omoi jitrede ifotiraína usere omoi jaitanina jira, omoi ifogí mameçi jiaí linoñoño. Dama Jusiñamui iena usere itataja jira, dama naimie iena jitre itataja jira, ifotiraí mameçina omoi linoia, Jusiñamui mameçina jiaí llinotomoi. ³⁷ Ie jira Jusiñamui mameçi jamai ebena linoñoño. Jiaie ra mameçi jamai ebena linoñoño; iadedi nie isoide rafuena omoi finoia, omoi lloga uaina taino lloñoño fino. Uanaicóna jaca llono. Uanaicóna omoi lloñoña, Taifemona omoi uaina otomoi.

Jesúdi iba oñenana llofuia rafue

(Lc 6.29-30)

³⁸ Jesús llote:

—Omoi llofuerañimona bie jai cacadomoi. Moisés micori jaie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana

llua. Jiaimie ona duere finoia, o duere sefuilla isoi, juez naimiena duere finua". Iedo birui jai jaicabidomo; ³⁹ iadedi birui omoimo lloticue: İbana oĥeno. Maraiĥede rafue finodimemona omoi abina riidoĥeno. Omoi cacaina naimie dutaia, naimie diga iciriĥeno. Enefebeimo omoi uieco dobaiĥo, enefebei omoına naimie dutallesa. Naimie omoına duere finoia, İbana oĥeno. ⁴⁰ Omoi ĥiroi bairollena omoına bu llogidoia, juez nia omoimo lloĥenia, naimie jitailla ĥiroi baiĥemo naimiemo feca. ⁴¹ Daje kilómetro naimaci raruiĥi omoına uillana illaicomini ocuia, iena uiĥo. Nibai omoi comeci jitaĥede; ia naimacina canollena, iena mena kilometros uiĥo. Naimaci ocuilla baiĥemo uiĥo. ⁴² Omoimo ite rana bu jicaia, iena caidiĥeno. Omoi rana bu jamai jicuano uia, abido atillena, iena caidiĥeno feca.

Jesúdi omoına gaiĥenanano isiruillena llua rafue

(Lc 6.27-28, 32-36)

⁴³ Jesús llote:

—Omoi llofueraimona bie jai cacadomo. Llotimaci: "Omoi cominina isirui; iadedi omoi nairaiĥedinona enoi". Iedo jai jaicabidomo. ⁴⁴ Omoimo birui lloticue: Omoi nairaiĥedinona isirui. Omoi gaiĥenanona isirui. Omoına duere finodino facaina Jusiĥamuimo jĥi. Naimaci comeciĥi iuai meiduana naimiemo jicano. ⁴⁵ Jusiĥamui cominina omoi illamona, naimaci facaina jĥi. Ero, Jusiĥamui nana cominina daje isoi canode. Nana cominina daje isoi isiruilla jira, naimiedi jitomana maraiĥedinona lligaiĥotade. Mareuidinona jiaĥi lligaiĥotade. Maraiĥedino dine noci deitate. Mareuidino dine jiaĥi noci deitate. ⁴⁶ Naimie comini omoi illamona, nana comini daje isoi isirui. Omoına isiruitinona omoi isiruiĥi, mare; iadedi omoına gaiĥenanona omoi isiruiĥenia, Jusiĥamui omoına: "Mare" raiĥeite. Maraiĥede finoraini naimacina isiruitinona isiruitimaci. Nana cominina omoi isiruiĥenia, maraiĥede finoraini baiĥemo faiĥedomoi. Naimaci isoi itomoi. ⁴⁷ Dani omoi cominina omoi uaidoia, mare; ia omoına gaiĥenanona omoi uaidoĥenia, naimaci baiĥemo faiĥedomoi. Jusiĥamuina ĥinoĥedino baiĥemo faiĥedomoi. Naimaci isoi itomoi. ⁴⁸ Iena omoi uiĥuamona, omoi Moo Jusiĥamui finua isoi, mare rafuena finocana omoi jai.

Jesúdi mare rafue finuana llua rafue

6 Jesús llote:

—Omoına nia llofueiticue. Jiaie comini iena cioillena, mare rafuena omoi finoiadedi, omoına: "Mareuidinodimaci" naimaci raillena, Jusiĥamuimona İbana feiĥoĥitomoi. Ie jira mare rafuena finoĥeno, iena jiaie comini jamai cioillena. Iena ja ĥaiticue. ² Dueredinomo rana omoi jamai fecaia, iena uainino feca. Jiaie cominimona iobillacinona omoi feiĥollena, iena fecaĥeno. Ofiracomo maredinona abi caitadino isoi omoi iĥeno. Naisomo maredino abi caitadino isoi iĥeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiĥotimaci. Jusiĥamuimona İco feiĥoĥeitimaci.

³ Dueredinomo rana omoi fecaia, jiaie cominimo iena lloĥeno. ⁴ Iena bainino feca. Bainino iena omoi fecaia, Jusiĥamui iena uiĥote. Naimiemona İbana feiĥoĥitomoi. Omoına: "Mare" raite.

Jesús Jusiĥamuimo jĥa rafue

(Lc 11.2-4)

⁵ Jesús llote:

—Jusiĥamuimo omoi jĥia, maredinona abi caitadino isoi omoi iĥeno. Ofiracomo naimacina comini cioillena, marefodo jĥidimaci. Jĥcabilla facaiseconi naisomo naimaci ia, naimacina comini cioillena, marefodo jĥai jĥidimaci. Naimacina: "Jusiĥamuina eo sedadimaci" comini raillana jitaidimaci. Cominimona iobillacinona birui jai feiĥotimaci. ⁶ Omoi jĥacania, omoi jofomo fo jai. Nainomo Jusiĥamuimo anado omoi jĥi. Iena Jusiĥamui uiĥuamona, omoi jicaca rafue naimiemona feiĥoĥitomoi.

⁷ Jusiĥamuimo omoi jĥia, naimiena ĥinoĥedino isoi jamaicinona ĥaiĥeno. Naimaci comeciĥa facadimaci: "Daje jĥiracinona diga icaiĥo cai jĥa jira, ja muidomo cai Moo caina raise cacaiĥe". ⁸ Naimaci isoi iĥeno. Nia omoi jicaĥenia, naimie omoi jitaill rafuena uiĥote.

⁹ Naimiemo omoi jĥacania, iese jĥi:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata. O jaienisaĥi o jitaillacinona finua isoi, cominina o jitaillacinona finota.

¹¹ Nagarui guille caimo itata.

¹² Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

¹³ Caimo ramo bu faia, caina cano, iena cai ĥnoi railano. Jeacinona finuamona caina jillota.

Iese omoi jĥi. ¹⁴ Omoına jiaie comini jeare finoia, iena omoi feitaia, omoi monamo ite Moo omoi jeacinona iena feitajanona, jiaĥi oni dotaite; ¹⁵ iadedi jiaie comini finoca jeacinona omoi feitaĥenia, omoi Moo Jusiĥamui omoi jeacinona feitaĥeite. Iena oni dotaĥeite.

Jesús guiĥenaruina llua rafue

¹⁶ Jesús llote:

—Omoına nia llofueiticue. Raitomoi: "Jusiĥamuina eo raise cai sedajanona, birui cai guiĥeiticaĥi. Iemona naimie caina eo duenaite" raitomoi. Iese Jusiĥamuina omoi sedajia, sunaiĥeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiĥenarui facaise illana comini uiĥollena, naimacina comini cioillena, iese itimaci. Naimacina: "Mare" comini raillamona, iobillacinona birui jai feiĥotimaci. Jusiĥamuimona İco iena feiĥoĥeitimaci. ¹⁷ Ero, naimaci isoi omoi iĥeno; iadedi omoi guiĥenarui ia, omoi abiaĥi raise fino. ¹⁸ Iemei cominidi omoi guiĥenarui illana uiĥoĥeitimaci. Naimacimona iobillacinona feiĥoĥeitomoi. Dama Jusiĥamui iena uiĥoite. Bainino omoi finoca rafue naimie uiĥua jira, naimiemona İba feiĥoĥitomoi.

Jesúdi Jusiñamuimo comecina facaja rafue

(Lc 12.33-34)

19 Jesús llote:

—Omoï jofomo ailluena rana eenocana uiñeno. Giireco iena guicabite. Dajerie ra nemuide. Omoï jofomona jiaie comini iena fiicadimaci. Ailluena ra eenuamo omoï comeciaina facañeno; ²⁰ iadedi Jusiñamui dine monamo omoï ra illa isoi, iemo omoï comeciaina faca. Naimiemo comeciaina cai facajamona, nainomo cai iobillacino iite. Giirecuaimona, nemuillamona, fiirainimona, iena nainomo faifiñeitomoi. ²¹ Aillue ra omoïmo ia, Jusiñamuimo comeciaina facañedomoi; iadedi naimie jitaillacinona omoï finoia, naimiemo comeciaina facadomoi.

Jesús cai comecina llua rafue

(Lc 11.34-36)

22 Jesús llote:

—Cai uisi diga rana ciodicai. Cai uisi maraiñenia, rana raise cioiñedicai. Ie isoide. Cai comeci maraiñenia, maraiñedicinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiena nabaiñedicai.

Jesús raruiaina llua rafue

(Lc 16.13)

24 Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise finoite. Ie isoide. Raruiaï ollemo comecina omoï eo facaia, Jusiñamui jitaillacinomo comecina raise facañeitomoi.

Jesúdi Jusiñamui cai sedajana llua rafue

(Lc 12.22-31)

25 Jesús llote:

—Jusiñamui jitaillacinomo omoï comecina facaia, omoï illamo omoï comecina jarire facañeitomoi. Bue omoï guillemo jarire comecina facañeno. Omoï jitalle iniroimo jarire comecina facañeno. Jusiñamui omoïna itataja muidona, guille omoïmo iite. Naimie omoï abi finua muidona, iniroidi omoïmo iite. ²⁶ Silliñiaimo comecina faca. Buena riñedimaci. Nie isoide guillena eenoñedimaci; iadedi omoï Moo Jusiñamui naimacina sedajamona, naimaci guille ite. Naimaci baifemo omoï faia jira, naimie omoïna canoite. ²⁷ Omoïmona, ¿bu ie comeci jarire facajamona a sairite? Iese jaca buna a sairifede. Dama Jusiñamui omoïna a sairitarede. ²⁸ ¿Bue ñellena iniroimo jarire comecina facadomoi? Safiamo omoï comecina faca. ¿Niese sicodimaci? Maijiñedimaci. Iniroina tiferiñedimaci; ²⁹ iadedi Salomón micorï naimaci isoi jaie iñede. Naimie illaimana jira, naimie micorï iniroi eo ebirede; iadedi safia naimie iniroi baifemo ebire eruaide. ³⁰ Jusiñamui safiana ebiretacabide. Dallu facaise illanona, safiadi duide. Safia baifemo omoï ualla jira, Jusiñamuidi iniroina

omoïmo jaca iite. Safiana naimiedi ebiretaja muidona, omoïmo iniroidi jaca iite. Omoï ra omoïmo illena, naimiena ñino. ³¹ Omoï comeci jarire finoñeno. “¿Buena guiticaï? ¿Buena jitaïticaï?” rañeno. Iemo comeciaina eo facañeno. ³² Jusiñamuina ñinoñedino iemo comeci-na facacabidimaci. Nana omoï jitaillacinona omoï Moodi uiñua jira, naimaci isoi iñeno. ³³ Jusiñamui anamo raise omoï i. Naimie jitaillacinona finocana omoï jai. Naimiemo omoï comeci facaia, omoï illamo omoï comecina jarire facañeitomoi. Iemona guille omoïmo iite. Iniroi omoïmo iite. ³⁴ Jusiñamui omoï birui jitailla ra omoïmo iite. Iena uiñuamona, jiairuido suille rafuemo jarire comecina facañeno. Ico omoï jitailla ra omoïmo jiai iite.

Jesúdi jiaie cominina mameriñenana llua rafue

(Lc 6.37-38, 41-42)

7 Jesús llote:

—Omoïna nia llofueiacadicue. Jiaie cominina mameriñeno. Jiaie cominina omoï mameria, omoïmo ite maraiñede rafue facaina Jusiñamui omoïna duere finoite. ² Jiaie cominina omoï mamerilla diese Jusiñamui omoïna duere finoite. ³ Omoï ecimo itimiemo janore maraiñedicino illana omoï uiñoia, iemo comeci-na facañeno; iadedi omoïmo ailluena ite maraiñedicinomo nano omoï comecina faca. ⁴ Omoïmo maraiñedicino illamona, ¿ñiese omoï ecimo itimiemo mameritomoi? ⁵ Omoïmo ite maraiñedicinomo omoï comecina facaaciñena jira, maredinona abi caitadinodomoi. Omoï comeciaina nano raise fino. Iemei omoï ecimo itimiemo canorenitomoi. Naimie comecina raise canorenitomoi.

⁶ Ero, eo mare rana omoï jiconiaimo fecañeno. Eo raifide rana omoï chanchuaimo fecañeno. Naimacimo omoï fecaiadedi, iena feiñoñeitimaci. Omoïna gaiñenamona, jiconiaï omoïna ainitimaci. Chanchuaï iena jamaillamona, iena saïtaïtimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoï llocabia, omoïna duere finoitimaci. Omoï rafuena jamaitimaci.

Jesúdi cai jitailla ra jicaja llua rafue

(Lc 6.31; 11.9-13)

7 Jesús llote:

—Daje ra omoï faifia, iena jenodomoi. Raise jenoia, iena baitomoi. Damiena omoï jenoia, naimie illanomo jaidomoi. Nainomo naimiena baillamona, omoïna feiñoite. Ie isoide. Buena omoï jitaia, Jusiñamuimo jica. Iena omoï jicaja jira, iena naimie cacajamona, omoïmo iite. ⁹ Ero, omoïmona naimiemo llomeniconia ie moomo ie jito jicaia, noficina fecañede. ¹⁰ Lliciaïna jicaia, jaiona fecañede. ¹¹ Jeacinona finocabidomoi; iadedi mare ra omoï uruiaimo fecacabillana uiñotomoi. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecaite.

¹² Jusiñamui jitaillacinona omoi fñuamona, jiaie cominina marena fino. Jiaie comini omoina fñuana omoi jitailla isoi, naimacina fino. Naimaci omoina marena fñuana omoi jitaia, naimacina marena fino. Naimaci omoina maraiñeno fñuana omoi jitaia, naimacina ie isoi maraiñeno fino. Moisés micori ie isoidicinona jaie llofue. Jusiñamui facaina lloraini micoriai ie isoidicinona jaie jiai llofuetimaci.

Jesúdi Jusiñamui dne rille llua rafue
(Lc 13.24)

¹³ Jesús llote:

—Jusiñamui dne omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dne naie rilla jira, naiedo omoi jai. Nainomo jaidino jaca iitimaci. Naimie dne rillena eo sefuiarena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dne riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue
(Lc 6.43-44)

¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiacinodo omoi jaia, Jusiñamui rafuedo raise jaiñeitomoi. ¹⁶ Naimaci lloga rafuemona naimaci Jusiñamui llorainiñenana uiñoitomoi. Ero, eecuaimona uvas railla riara oñega. Eecuaimona higos railla riara jiai oñega. ¹⁷ Mare riaromona mare llisilla comuide. Maraiñede riaromona maraiñede llisilla comuide. ¹⁸ Mare riaromona maraiñede llisilla comuide. Maraiñede riaromona mare llisilla comuide. ¹⁹ Mare llisilla comuitañena jira, naga maraiñede riara jaitaca, iena jobaillena. ²⁰ Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusiñamui naimacina duere finoite.

Jesúdi ie Moo ie comini sedajanomo ille llua rafue
(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitailla rafue finodimiedi nainomo iite. ²² Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, cana o oretatio cai raillamona, o rafuena llocabitica. O uaido jananiaina oni oredica. O uai diga siño rafuena finodica” lloitimaci. ²³ Uai oiticue: “Omoina uiñoñedicue. Cue cominiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

Jesúdi naimiena ñnuana ñaia rafue
(Lc 6.47-49; Mr 1.22)

²⁴ Jesús llote:

—Cue lluana cacadomoi; iadedi omoimona nana ñnoñedomoi. Cue lluana ñnotimiedi abi uiñoñemie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. ²⁵ Noci deidemo, eo jinuidemo, jofomo ille toia, aifi bitemo, jofo raise finua jira, jofo goiñede. Iena faifiñede. Ie isoide. Cue lluana ñnotimie faifiñeite.

²⁶ Cue lluana ñnoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana rañede. ²⁷ Noci deidemo, eo jinuidemo, jofomo ille toia, aifi bitemo, jofo goillamona, jai eo judaisite. Iena faifide. Ie isoide. Cue lluana ñnoñedimie faifite —llote.

²⁸ Moisés micori rafue uiñoraini isoi naimie llofueñena jira, illaimamo ite uai itimie isoi naimie llofuia jira, nainomo ite cominidi naimie lluari rajicaidimaci.

Jesúdi efonaitimiena jillotaja rafue
(Mr 1.40-45; Lc 5.12-16)

8 Naimie llofuia mei, anedumona Jesús ie llofueoicaigano diga ana bite. Ailluena comini naimiena racadimaci. ² Efonaitimie naimie dne billanona, naimiena raise uaiduamona, caifiñici ifodo ana rainadate. Raite:

—Maestro, o jitaiaidedi, cuena jillotaredio.

³ Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo. —Iecon naimie jillode. ⁴ Jesús naimiemo llote:

—O jilluana bumo lloño; iadedi Jerusalémo, Jusiñamui jofomo, Jusiñamui diga ñairaima dne mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamui feca. —Iemei Jesús oni jaide.

Jesúdi capitán mullaimana jillotaja rafue
(Lc 7.1-10)

⁵ Capernaum railla nairaimo Jesús ria, capitán raillamie naimie dne bite. Naie capitán Roma railla nairaimie. Judíñedimie. Billanona, duere llote:

⁶ —Maestro, cuena cano. Cue jofomo cue mullaima ite. Ie abina nirañdanide. Naimie abi eo isirede. Naimiena jillota.

⁷ Jesús uai ote:

—Naimie dne jaiticue, naimiena cue jilloitallena.

⁸ Naie capitán dane llote:

—Jaiñeno. Jamai bue isoidicue. Iemo, ¿ñiese cue jofomo biitio? O uaido bene lluanona cue mullaima jilloite. ⁹ Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaima illa jira, naimiedi cue uaina ñnote. O anamo naie duico illa jira, o uaina o lloia, cue mullaima jilloite.

¹⁰ Iena cacajanona, Jesús rajicaide. Naimie diga jaidinomo lote:

—Bie isoi cue uaina inotimiena jaca baiñedicue. Cai judíuai cominimona biesedimiena jaca iñede. ¹¹ Ero, Jusiñamui ie cominina sedajanomo naimaci illena, diga judíuaiñedino cue llua uaina inoitimaci. Naga nairaiimona inoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci. ¹² Ailluena judíuaiñedino inoitimaci. Jusiñamui ie cominina sedajanomo duillanodi omoi judíuai. Naimiena omoi inoñena jira, omoína oni dotaite. Dotaja mei, eo duere sefuillamona eitomoi.

¹³ Capitámo Jesús llote:

—Mai jai. Cue uai siñonana o inua jira, o jitailla rafue omo jai suide. —Ieconí naimie mullaíma jillode.

Jesús Pedro jifaiñona jillotaja rafue

(Mr 1.29-31; Lc 4.38-39)

¹⁴ Oni jaillanona, Pedro jofomo Jesús ridemo, Pedro jifaiño duillana cide. Naiñaiño abi cuaride. ¹⁵ Naiñaiño dine jaillanona, naiñaiñona jetade. Jetajamona ieconí naiñaiño jillode. Abi cuariñede. Naiñaiño naidacailanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mr 1.32-34; Lc 4.40-41)

¹⁶ Naie naiona naimie dine cominí ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate.

¹⁷ Naimacina Jesús jillotajamona, Isaías micori jaie cuegafuai ie se jai suide. Naimie micori jaie cueba: “Caina jilloitajanona, cai duiconona oni oretate”.

Jesús ie llofuegamiena damie jaillana ie rafue

(Lc 9.57-62)

¹⁸ Ailluena cominí naimie ecimo illana Jesús cianona, ie llofueoicaiganomo ruica dine jaillena llote. ¹⁹ Ieconí Moisés micori rafue llofueraíma naimie dine billanona, llote:

—Maestro, o jaillinomo o diga jaiacadícue. O llofuegamiena jaiacadícue.

²⁰ Jesús uai ote:

—Janorede ocainaiadi joforedimaci. Silliñai jilainaiñedimaci; iadedi jofonidícue. Monamona billanona, imana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeitio. Iemo o começina raise faca.

²¹ Ie facaise jiaie llofuegamie Jesús llote:

—O diga jaitícue; ia cue moo nia fioidañena jira, o diga nia jaiñeitícue.

²² Jesús naimie uai ote:

—Cue diga idai mai bi. Cueno inoñedinodi o moona canoredimaci. Naimie fioidaia, naimiena naimaci raille. Cue rafue jiaie rafue baifemo faite. Cue diga mai bi.

Jesúdi joraina llícaitaja rafue

(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci.

²⁴ Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira,

²⁵ jaciruillamona, Jesúsna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cueno raise inoñedomoi. Jacinaiñeno.

Iemei Jesús naidacaillano, aifina lletade. Joraina jiai llícaitade. Ieconí llícaide. Bagoñede. ²⁷ Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

Jesúdi Gadara railla eniruemo illa rafue

(Mr 5.1-20; Lc 8.26-39)

²⁸ Ruica dine naimaci ridemo, Gadara railla eniruemo sijidimaci. Ieconí menamie Jesús dine bitiaimaiaí.

Jananiai anamo ite iaímaiaí. Cominí raioillanomo nofie moto ifuaímona bitiaímaiaí. Nai iaímaiaí eo riirena jira, jaca bu nainomo jainide. ²⁹ Jesúsna iaímaiaí ciua facaise jananiai iaímaiaína cuirioitate:

—Jusiñamui Jitodio. ¿Niese cocona nibaíacadio? Coco duere sefuille facaise nia iñede; iadedi birui cocona duere finuaíbidio —cuirioidiaímaiaí.

³⁰ Naie bai iaie ailluena chanchuai guillano itimaci.

³¹ Jananiai Jesúsno duere llotimaci:

—Oni caina o oretajanona, chanchuai abimo caina oreta.

³² Jesús uai ote:

—Mai jai.

Ieconí nai iaímaiaímona jananiai oni jaillanona, chanchuai abimo jaide. Iemona iconaído chanchuai joraimo aisicana jaillanona, corobaiside.

³³ Iena cianona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaímaiaí rafuena llotimaci. ³⁴ Ie jira ailluena cominí Jesús dine bitimaci. Naimiena ciano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

Jesús tisitaitimiena jillotaja rafue

(Mr 2.1-12; Lc 5.17-26)

9 Botemo ie llofueoicaigano diga Jesús jaillano, ruica dine abido jaide. Capernaumo ie illanomono ride. ² Nainomo rilla mei, naimie dine cominí ie biramo biide tisitaitimiena atide. Naimiena atidinodi Jesús naimiena jillotajana inote. Iena Jesús uiñuanona, tisitaitimienno llote:

—Moo, o começina ocuiño. O jeacino cue feitaja jira, iena jai oni dotadícue. Ie facai ibana jai oñeitícue.

³ Jesús dine ofidinomona dajerie Moisés micorí llogacinona llofueraini itimaci. Jesús lluana naimaci caca-jano, Moisés micorí llogacinona llofueraini comecina facadimaci: “Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade.

Jusiñamuina jai jeare ñaite”. ⁴ Naimaci comeciaina facajacinona Jesús uiñuamona, Jesús dinena jicanote:

—¿Bue ñellena omoi comecina jeare facadomoi?

⁵ Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi. ⁶ Monamona jaie cue billanona, iimana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie mo lloiticue: “Mai naidacai. O biira ferianona, o jofomo mai jai”.

⁷ Iese naimie raillamona, tisitaitimie jillode. Naidacaida, ie jofomo jaide. ⁸ Comini iena ciuanona, jacinaitimaci. Bimiemo ie uaina Jusiñamui fecajana naimaci uiñuamona, Jusiñamuimo iobillacinona fecadimaci.

Jesúdi Mateona fetua rafue

(Mr 2.13-17; Lc 5.27-32)

⁹ Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.

Naidacaida, naimie diga jaidicue.

¹⁰ Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micorí llogacinodo jaiñedino jiai guisaibitimaci.

¹¹ Nainomo fariseuai comini jamai bitimaci. Moisés micorí llogacinodo eo jaidimaci. Jesúsna ciuanona, naimie llofueoicaigano jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micorí llogacinodo ucube oraini raise jaiñenana, naie isoidino diga, fariseuai comini nabairiñena jira, iese jicanoitimaci.

¹² Iena cacajano, Jesús llote:

—Ecairedinodi médicona jitañedimaci; ia duidinodi médicona jitaidimaci. Ie isoide. Mareuidino cuena jitañedimaci; ia maraiñedino cuena jitaidimaci.

¹³ Jusiñamui facaina lloraima micorí jaie cuega rafue-mo omoi comeciaina faca: “Jusiñamui llote: ‘Rana cuemo omoi fecajana jitañedimaci; ia cominina omoi dueruilla jira, Jusiñamui díbeimo naimaci illena, mareuidinona itatajañedimaci; iadedi Jusiñamui díbeimo naimaci illena, maraiñedinona itatajañedimaci. Omoimona maraiñedino diga nabairiticue; ia naimacina uaibiticue.

Jesús dine Juan Bautista llofueoicaigano billa rafue

(Mr 2.18-22; Lc 5.33-39)

¹⁴ Naie facaise Juan Bautista llofueoicaiganodi Jesús dine bite. Naimiemo llote:

—Cai einamací llua isoi, Jusiñamuina cai raise iobitalena, guiñenaruilla illa facaiseconi guiñedimaci. Cai

jeacino facaina sunaicabiticai. Fariseuai comini jiai guiñedimaci; iadedi o llofueoicaigano guitimaci. Cai einamací llogacinodo jaidicai. ¿Bue ñellena o llofueoicaigano iedo jaiñedimaci?

¹⁵ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaide iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ¹⁶ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ¹⁷ Jacagomona finoca bolsa como finoca vino joneñega. Jonegadena, mairiñena jira, sirillamona, igoñe raire cuararite. Vino faifite. Igoñe jiai faifite. Como finoca vino comogomo jonelle. Iemei iena faifiteite. Ie isoide. Omoi einamací rafue ifomo jiaie rafue birui ite. Iena omoimo llo-cabiticue. Iedo jaidicai —llote.

Jesúdi mena duide riñona jillotaja rafue

(Mr 5.21-43; Lc 8.40-56)

¹⁸ Juan Bautista llofueoicaigano diga Jesús llotemo, jiaimie naimie dine bite. Naimiedi judíuai ofiraco sedaraima. Jesúsna duere jicanollena, caiñici ifodo ra-nadacaida llote:

—Cue jisa como fiodaite. O onolli naiñaiñomo o jonellesa, naiñaiño jilloillesa, cue jofomo cue diga mai bi.

¹⁹ Iena cacajano, Jesús naimie diga jaide. Ie llofueoicaigano jiai jaidimaci. ²⁰ Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade. ²¹ “Naimie iniroi cue jetajamona jilloiticue” comecina facajamona, naiñaiño naimie iniroina jetade. ²² Ieconí Jesús dobaidacaida, abido erodatemmo, naiñaiñona ciode. Raite:

—Ñoo, o comecina ocuiño. Cuena o ñnua jira, jai jillodio.

Ieconí naiñaiño jillode.

²³ Ofiraco sedaraima jofomo Jesús rillano, naie jofo nama jisa jai fiodailla jira, comini merire fillana cacade. Ailluena failliñailana cacade. ²⁴ Jesús dinena raite:

—Jofomona nana omoi jino jaillana jitañedimaci. Cue-mona biñaiño fiodañedes. Jamai inide.

Iena cacajano, naiñaiño jai fiodaite uiñuamona, Jesúsna jaisitimaci. ²⁵ Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide. ²⁶ Naie rafue nana naie enirue itinomo llocana jaide.

Jesúdi uisínide iaímaiaina jillotaja rafue

²⁷ Ofiraco sedaraima jofomona Jesús bai jaidemo, uisínide iaímaiaina jinafona jaidiaímaiaia. Jesúsna ado uaidotiaímaiaia:

—Cai illaïma David micorì jítodìo. Jusíñamuimona o billa jira, cocona duenai.

²⁸ Uai oñeno Jesús Capernaumo jaide. Naimie fo jailla mei, naimie ðine bitíiaïmaïaï. Iaimaïaïmo Jesús jìcan-ote:

—¿Omìcona cue jìllotajana ñnotomìco?

Fairìotíiaïmaïaï:

—Jí.

²⁹ Iaimaïaï uisina Jesús jetajano raite:

—Cuen a omìco ñnua ðiese jìllotomìco.

³⁰ Teconì iaimaïaï uisidì cìode. Jesús naie rafuena llua- na eo janotade.

—Bumo lloñeno —llote; ³¹ iadedì iena llocana jaidíiaï- maïaï. Iemona Jesús mamecì nana naie enìruemo itìnomo soride.

Jesús ñaíñedimìena jìllotaja rafue

³² Capernaumona Jesús baì jaidemo, naimie ðine Jan- aba anamo illamìena jiaie comìni atidimacì. Janaba anamo naimie illa jira, naimie ñainide. ³³ Jesús Jana- bana oni orede. Oretaja mei, naie ñima ñaite. Nainomo ite comìni rajìcaïllanona raitimacì:

—Cai comìni ðine bie isoide ñima jìlluana jaca cìoiñedìcaï.

³⁴ Ie jira fariseuai comìni ðinena raitimacì:

—Taife ðibeimo Janaba illamona, Jesúsì Taife uaido Janabana oni orede —raitimacì.

Jesúsì comìnina duenalla rafue

³⁵ Diga nairaïaïmo ie llofueoicaigano diga Jesús llo- cana jaide. Nainomo judíuai ofiracuaimo llofueuide. Naimie anamo comìni illana Jusíñamui jitailla jira, Jesúsì Jusíñamui ðibeimo naimacì comeciaï iuaina mei- duana llofue. Ailluena ðuidìnona jìllotate. Naga isoide ðuicomona jìllotate. ³⁶ Naimacìna duenaite. Naimacì comeciaï iticìno oni ðuíñoitìmie ñena jira, naimacìna duenaite. Ailluena comìnina cìode. Toïca llaudaïaï isoì ebe isoì jaidìmacì. Naimacì comeciaï ocuñonidìmacì. Jusíñamui naimacìna sedaacana uíñoñedìmacì. ³⁷ Naimacìna duenallamona, ie llo- fueoicaiganomo llote:

—Illìmo ailluena trigo ia, iena ollena, ailluena maìjìrainìna jitailla. Ie isoide. Ailluena comìni ite naimacìmo Jusíñamui rafuena cai llollena; iadedì naie rafuena llorainì eo ñnedìmacì. ³⁸ Ie rafue naimacì llo- lla, ailluena comìnina raire naimie oretallena Jusíña- muimo jìcano.

Jesúsì ie doce llofueoicaiganona fetua rafue

(Mr 3.13-19; Lc 6.12-16)

10 Ie doce llofueoicaiganona Jesús uaiduanona, naimacìmo ie uai ñnonocaide, jananiã anamona comìnina jìllotallena. Duìcona oni oretallena, iena jiaï ñnonocaide. ² Ie llofueoicaiganodì ñese mamecìredi- macì: Simón. Naimie mamecì jiaicidì Pedro. Andrés. Naimiedì Simón ama. Jacobo. Juan. Iaimaïaï Zebedeo jito iaimaïaï. ³ Felipe. Bartolomé. Tomás. Cuen a jiaï

uaidote. Mateodìcue. Gobierno ucubena oraimadìcue. Jiaie Jacobo. Naimiedì Alfeo jito. Tadeo. ⁴ Jiaie Simón. Naimiedì cananista comìni facaisemo ðuide. Judas Is- carìote micorì. Naimiedì Jesúsna gaitatate.

Jesúsì ie llofueoicaiganona oretaja rafue

(Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judíuaiñedìno ðine jaiñeno. Samaritano railla comìni ðine jaiñeno; ⁶ ia cai judíuai comìni ðine jai. Naimacìmona ailluena comìni Jusíñamui rafuena ñia ñnoñedìmacì. Faìficana ñia jaidìmacì. ⁷ Omoì jaïllanona, comìnimo llono: “Jusíñamui facaina jaie llorainì mì- coriaï llogamìe jai bene ite. Naimie anamo omoì illana Jusíñamui jitailla jira, naimie ðibeimo omoì comeciaï iuaina meido”. ⁸ Duidìnona jìllota. Fìodaitìnona jìllota. Efonaitìnona jìllota. Jananiãina oni oreta. Cue uaina ja- mai omoì feiñua jira, comìnina jìllotajana ñbatañeno. ⁹ Ucubena uíñeno. Guille ifo meidollena, rana uíñeno. ¹⁰ Ailluena rana omoì uíñellena, bolsana uíñeno. Abi meidolle ñiroina uíñeno. Meidolle zapatona uíñeno. Omoì abi rìidollena, jìguidana uíñeno. Jiaie comìnina omoì canua isoì, omoìna naimacì canua. Naimacìmona omoì jitailla rana omoì ono. Ie jira ailluena rana uíñeno. ¹¹ Nie nairaïmo omoì ria, omoì rafuena jì- taidìmìena jeno, naimie jofomo omoì illena. Naie jofom- omoì i, naie nairaïmo omoì ille ðinori. ¹² Naie jofom- omoì rìllanona, naie comìnina marena uaido. ¹³ Omoìna naimacì raise feiñoia, naimacì uri illena, naimacìmo marecìnona llono; iadedì omoì rafuena naimacì jitaïñena: “Jusíñamui omoìna canoite” naimacìmo lloñeno. ¹⁴ Omoìna bu feiñoiacaiñena, omoì uaina bu cacarefiacaiñena, naie nairaïmona omoì jaïllanona, omoì eilliaïmo ite jearacuaina jaidìno. Maraiñede rafuena naimacì fìnuana naimacì uíñollena, omoì eilliaïna jaidìno. ¹⁵ Omoìmo uanaicìnona llotìcue. Omoìna naimacì feiñoñena, Jusíñamuidì naimacìna ðuere fìnoite. Sodoma railla nairaï jaie jearcìnona eo fìnodìmacì. Gomorra railla nairaï jaie jearcìnona eo fìn- odìmacì. Ie jira Jusíñamui naimacìna jaie ðuere fìnode. Omoìna comìni birui feiñoñena, Jusíñamuidì naimacì- na Sodoma nairaï baifemo ðuere fìnoite. Gomorra nairaï baifemo ðuere fìnoite.

Jesús ðuere sefuillìfuena llua rafue

¹⁶ Jesús ie llofueoicaiganomo ñia llote:

—Naimacìna janallari fañellena, naimacì ðuere se- fuiñellena, toïca llaudaïaï raise sedajana jitaïdìmacì. Ie isoide. Eo maraiñede comìni motomo omoìna ore- taitìcue. Omoìna ðuere fìnoacanitìmacì. Raise sedajana jitaïdomoì. Jiao fìodaiñellena, aìside. Naimìena bu meineñellena, ie abina eenollena, jiao aìside. Ie isoì omoì abi uíñocana omoì jai. Ucugidì buena jeare fìnoñede. Ie isoì omoì illa. Jearcìno fìnuamona eneno omoì i. ¹⁷ Abina rairui. Dajerìe omoìna llogidoitìmacì. Omoìna gaitaja mei, naimacì ofiracomo omoìna faitì- macì. ¹⁸ Cue rafue omoì llua muidona, omoìna gaita- janona, illaicomìni ðine omoìna uitìmacì. Omoìna llogì-

doitinomo cue rafuena lloitomoi. Naie illaicominimo iena jiaí lloitomoi. ¹⁹ Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uifnotomoi. ²⁰ Dani omoi comeciái icinodo ñañeitomoi; ia Jusiñamui Joreño uaido ñaitomoi. ²¹ Cuen a ñnotomoi; ia ailluena cuena ñnoñeitimaci. Cuen omoi ñnua jira, omoina enoitimaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruiaidi naimaci moona, naimaci eina meinetallena, naimacina llogidoitimaci. ²² Cue muidona ailluena comini omoina enoitimaci; iadedi cue uaina fainonocañedimie cue Moo diga monamo ja muidomo jaca iite. Naimiena jillotaiticue. ²³ Cue rafue naimaci jitañenamona, omoina nie nairaí duere finoia, dinomona cue rafuena llollena, jiaie nairaímo raire jai. Cue rafuena omoi llollena, diga judúuai illanuaimo nia jaitomoi. Nana naie comini nia ñnoñenia, Jusiñamui dinena dane abido biiticue. ²⁴ Ero, ie llofueaima duere sefua, ie llofuegamie daje isoi duere sefuite. Ie eci illamie duere sefua, ie mullaima daje isoi duere sefuite. ²⁵ Ie isoide. Cue cominina omoi jaillamona, cue duere sefua, jiaí duere sefuitomoi. Taife mameci jiaici llinuanona, “Beelzebúdio” jiaíno cuena raitimaci. Iese cuena naimaci jeare ñaia jira, cue cominina omoi illa jira, omoina jiaí jeare ñaitimaci.

Jesúdi jaciruiñeno llofua rafue

(Lc 12.2-9)

²⁶ Jesús nia llote:

—Cuen ñnoñedino omoina jeare ñaitimaci; ia nana cue rafuena llocana omoi jailla jira, naimacina jaciruiñeno. ²⁷ Omoimo rafuena anado jai lloticue. Iena nana cominimo marefodo llono. Ado llono. ²⁸ Omoi abina meineredimaci; ia omoi joreño meinenidimaci. Omoina naimaci meinea, omoi joreño Jusiñamui dine jaite. Iena uifnuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. ²⁹ Omoina duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitañenia, naimacimona daje fiocañede. ³⁰ Ero, ñga ifotirai omoimo illana Jusiñamui uifnote. ³¹ Naimiedi omoina sedajana jiaí uifnote. Silliñiaí baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitañenia, omoimo jaca buena suiñeite.

Jesús naimiena janoñenana llofua rafue

(Lc 12.8-9)

³² Ie llofueoicaiganomo Jesús nia llote:

—Cue rafuena omoi llamona, jiaíno omoina duere finoitimaci. Cuen birui omoi janoñenia, nana comini Jusiñamui uicomo ico ia, nainomo omoina janoñeiticue. “Cue cominidomoi” omoina raiticue. ³³ Cuen birui omoi janoia, nana comini Jusiñamui uicomo ico ia, nainomo omoina janoiticue. “Cue cominiñedomoi” omoina raiticue.

Jesús muidona nana comini uri iñena rafue

(Lc 12.51-53; 14.26-27)

³⁴ Ie llofueoicaiganomo Jesús nia llote:

—Nana cominina uri itatallena enruemo biñedicue. Cuen ñnoñedinodi cuena ñnotinona enoitimaci. Enoilamona cuena ñnotinona duere finoitimaci. ³⁵ Cue lloga rafuena damerie ñnua muidona, ie moo illa díbeimo ie jito iñeite. Ie ei illa díbeimo naiñaiño jisa iñeite. Ie jifaiño illa díbeimo naiñaiño mio iñeite. Iese cominina uri itatañedicue. ³⁶ Omoi comini coninina enoitomoi. Iemona duere sefuitomoi. ³⁷ Ero, ie moona cue baifemo bu isirua, ie eina cue baifemo bu isirua, cue jitailla ra naimie finoacañena jira, cuemo raise duiñede. Ie uruiaí cue baifemo bu isirua, cuemo raise duiñede. ³⁸ Cue facaina bu fiocañenia, cuemo raise duiñede. Naimiedi cue comini naimiena lloiacañedicue. ³⁹ Cue facaina fiocañedimie ja muidomo faifite. Cue diga jaca iñeite; iadedi cue facaina fiocañedimie monamo cue diga jaca iite.

Jesús Jusiñamuimona ibana feiñua llua rafue

(Mr 9.41)

⁴⁰ Jesús llote:

—Cue rafuena omoi llocana jaia, diga jofuemo riitomoi. Cue cominina omoi illamona, omoina feiñotino cuena jiaí feiñotimaci. Omoina bu feiñoia, cuane jiaí feiñote. Cuen feiñotimiedi cuena oretatimiena jiaí feiñote. ⁴¹ Naimie cue comini illamona, damerie Jusiñamui facaina lloraímana feiñotimaci. Jusiñamui facaina lloraímana bu feiñoia, Jusiñamuimona ibana feiñoite, naie lloraíma Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite. ⁴² Cue díbeimo itinona bu janore canoia, Jusiñamuimona ibana feiñoite. Naimacimo ñbai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena llollena, orede.

Jesús dine Juan Bautista micori ie llofueoicaiganona oretaja rafue

(Lc 7.18-35)

11 Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micori Jesús finoca rafuena fidiano, iena raise uifollena, Jesús dine ie llofueoicaiganona orede. ³ Jesúmo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uifoiacañicai. Imieñediodena, jiaimie billemo nia ocuiridicai.

⁴ Jesús uai ote:

—Cue llua cacadomoi. Cue finoca rafuena ciodomoi. Juan dine abido omoi jaillanona, iena naimiemo llono. ⁵ “Uisinidino jai ciotimaci. Ñuja-ñujacaida jaidinodi jai raise macaritimaci. Efonaitino jai jil-

lodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo lono. ⁶ Jiai lono: “Ñibai nana cue rafuena raise cacaiñedio; ia cuena jaca nia ñnocana o jaia, caimare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesúdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoiñede. Nie isode rafue naimiemo ia, cue rafuena llocana jaide. ⁸ ¿Bue ñellena naimie dine jaidomoi? Mare ñiroina jitadimiena cioiñedomoi. Mare ñiroina jitadinona omoi cioacaniadedi, illaicomini dine jaidomoi. ⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ¹⁰ Malaquías micori naimiema jaie cuega:

Jusiñamui raite: “Ero, o uicodo cue rafuena llollena, damiena oretaiticue,

comini comeciaina marenona duiñollena” cuega. Malaquías Juan Bautistana cuete. ¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi. ¹² Juan llofuia tainiamona ailluena comini cue rafuena ñnuamona, Jusiñamui dibeimo birui duere iacadimaci. ¹³ Nana Jusiñamui facaina lloraini micoriadi cue billena jaie llotimaci. Moisés micori iena jiai jaie llote. Juan facaise naie llogacino jai suide. ¹⁴ Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena ñnotomoi dena, Juandi naimiema uiñotomoi. ¹⁵ Omoi jeforena jira, raise fueollena, cue lluomo cacarei.

¹⁶ Jesús nia llofue:

—Ero, omoina ñaiticue. Jifanote uruiadi isoidomoi. Uruiadi jifanoiacania, naimaci nabaiñiaina uaiduanona, raitimaci: ¹⁷ “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci. ¹⁸ Ie isoidomoi. Juan jirorainide. Caimare guiñede; ia naimie diga nabairiñedomoi. Naimiema gaiñedomoi. Ie jira omoimona dajerie naimiema raitimaci: “Janaba anamo naimie illamona, naimie uairico isoi ite” raitimaci. ¹⁹ Monamona billanona, imana jaidicue. Omoi isoi guiticue. Cai mataidicue; ia cue diga nabairiñedomoi. Cuena jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimidio”. Iese raitomoi; iadedi Jusiñamuina ñnotinodi cue finoca rafuena marenana uiñotimaci.

Dajerie nairai Jesúna ñnoñena rafue

(Lc 10.13-15)

²⁰ Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uiñotimaci; iadedi naimaci comeciadi iuai meidoñedimaci. Ie jira naimacina ñaite. ²¹ Llote:

—Omoimona damierie Corazín railla illanomona bitomoi. Omoimona damierie Betsaida railla illanomona bitomoi. Cue rafuena omoi ñnoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciadi eo isinotaillamona, naimaci comeciadi iuai meidotimaci. Naimaci comeciadi iuaina meiduana uiñotallena, ebinide ñiroina jitanonona, naimaci ifogiaimo jusefona jonetimaci.

²² Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. ²³ Omoimona damierie Capernaum railla illanomona bitomoi. Birui abina iedoiacadomoi; iadedi jiairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciadi iuai omoi meidoñenia, monamo cue Moo diga jaca iñeitomoi; iadedi naimie omoina duere finollemona sunaitomoi. ²⁴ Jusiñamui uicomo nana comini ico ia, cue rafuena omoi ñnoñena jira, Sodoma railla nairai baifemo duere sefuitomoi —llote.

Jesús ie Moo diga ñaia rafue

(Lc 10.21-22)

²⁵ Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotinona bie isode rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecacadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñotocue. Cue jitaile diese omoina naimiema uiñotadicue. Ie muidona naimiema uiñotomoi. ²⁸ Omoi jeacinomona omoi jillobillena, duere jaidomoi. Omoi comeciadi marena uri illena, cue dibeimo mai omoi i. ²⁹ Cue llucacino anamo omoi i. Cue riinina jira, cuemona omoi fueo. Iemei omoi comeciadi marena uri iite. ³⁰ Omoina cue canua jira, cue llucacino anamo omoi iacanano ia, sefuinide. Omoina cue canolle jira, cue llucacino finuana sefuinide.

Sábadoruimo Jesús llofueoicaigano majia rafue

(Mr 2.23-28; Lc 6.1-5)

12 Ie rafue lluamona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo metodo joide naido jaide. Ie llofueoicaigano aimetalla jira, trigona tijano, gollu-

ano, guicana jaidimaci. ² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijnidicai; iadedi trigona naimaci tijiamona, caimona jai maijdimaci. Iese cai abimo jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ⁴ Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede. ⁵ Moisés micori llogacinomo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijiuidimaci. Jusiñamuina naimaci sedallena, ocaimana fatimaci. Iraina bonodimaci. Iese maijiuidimaci; iadedi Jusiñamuimona jeacino finoñedimaci. Moisés micori jaie cuegafuina raise cacañedomoi. Iena raise facañedomoi. ⁶ Omoimo nia lloiticue. Jusiñamui jofomo finoca rafue baifemo faiticue. ⁷ Jusiñamui facaina lloaima iena jaie cueda: “Cuemo rana omoi fecajana jitaicue; ia omoi jitaillamona, jiaie cominina omoi duenaillacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodomoi” lloñedomoi. Cuemona cue llofueoicaigano jeacino finoñedimaci. ⁸ Monamona billanona, iimana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

Jesúdi onollina idisarodimienna jillotaja rafue

(Mr 3.1-6; Lc 6.6-11)

⁹ Bai jaillanona, nairai dine rillanona, naimaci ofiracom Jesús fo jaide. ¹⁰ Nainomo onollina idisarodimie illanona, fariseuai dinena Jesúmo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimienna llogidoiacadimaci. ¹¹ Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi. ¹² Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

¹³ Onollina idisarodimiemo lloite:

—O onolli mai oni ñuita.

Iena ñuitajamona jillode. ¹⁴ Iena ciuanona, fariseuai jino jaidimaci. Naimienna meinellena, coniniri siadotimaci.

Isaías micori jaie Jesúna ñaia rafue

¹⁵ Naimienna naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cuenallocana jaiñeno —naimacimo lloite.

Naimie mameci are sorillana jitañede. Fariseuai diga ie uai uaitaiacañede. ¹⁷ Iemona Isaías micori jaie cuegafuiai jai suide. Jusiñamui Isaías micorina jaie cuetataga:

¹⁸ Ero, cue fetoca mullaime ite.

Naimiedi cue isiruigamie. Naimieri iobidicue.

Cue joreño naimiemo cue fecajanona, judíuainedonomo naimacina cue jilloitaacanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimienna ñnotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judíuainedino naimienna ñnoitimaci.

Fariseuai Jesúna jeare ñaia rafue

(Mr 3.19-30; Lc 11.14-23; 12.10)

²² Jesús dine damieredi Janaba ie anamo illamienna atidimaci. Janaba anamo naimie illa jira, naie aticamedí cioñede. Jiai ñañede. Jesús Janabana oni oretajanona, naimienna jillotate. Naimie uaina botade. Ñaite. Cíode. ²³ Naiena cíodino rajicaillanona raitimaci:

—Ñibaí bimiedí David micori jito. Cai illaimana naimie illena, naimie micori jitomo ocuridicai.

²⁴ Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

²⁵ Naimienna naimaci enoillana Jesús uiñuanona, naimacimo lloite:

—Daje isoi comeciaina lloillamo daje nairai facañenia, danomo maijnidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi llua isoi cue oretaia, Janaba ie díbeimo itino diga jai nabairiñede. Iemona naimie comini danomo iñeitimaci. ²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañetomoi. ²⁸ Ero, mairidimie ie jofomo ite rana ñibaí fiñacadomoi. Iena fiñllena, naimienna nano raise omoi maiga. Raise maia mei, ie rana fiñredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui joreño uaido naimienna anafefitaticue. Iemona Jusiñamui rafuena cue llua jai uiñotomoi. ³⁰ Cue díbeimo

iñedimie cuena enoide. Cue dibeimo cominina itatañedimiedí naie cominina cuena ñnotañede. ³¹ Ie jira omoimo lloiticue: Jusiñamuidí nana cominí jeacinona dotarede. Naimiedí cominí marañedicinona dotarede; iadedí naimiedí ie Joreñona jeare ñaiacinona dotañeite. ³² “Jusiñamui Joreño uaido siño rafuena fñoñedio; ia Janaba uaido siño rafuena finodio” cuena raitomoi. Jusiñamuimona biticue. Cuena omoi jeare ñaia, Jusiñamui iena feitarede; iadedí naimie Joreñona omoi jeare ñaia, Jusiñamui iena birui feitañeite. Iena ico jaca feitañeite.

Jesúdi riará llisilla llua rafue

(Lc 6.43-45)

³³ Jesús llote:

—Llisillamona nie isoide riará illana uiñoticaí. Amena ie llisilla llillamona, amena marena uiñoga. Llillamona, amena marañenana jiaí uiñoga. ³⁴ Ie isoide. Omoi ñaiamona omoína uiñoticaí. Cuena omoi marañeno ñaia jira, omoi comeciaí iticinona uiñoticaí. Omoi marañena jira, jaio nairaidomoi isoidomoi. ³⁵ Mareuidimie mare ie comecimona ñaite; iadedí marañedimie marañede ie comecimona ñaite. ³⁶ Jamai ebena birui omoi ñaia, Jusiñamui uicomo nana cominí ico illa facaiseconi Jusiñamui iba oite. ³⁷ Omoi jeare ñaiaconi duere sefuitomoi; iadedí omoi mare ñaiaconi duere sefuiñeitomoi. Ie jira Jusiñamui dibeimo omoi comeciaí iuai meido.

Dajerie Jesús siño rafuena fñuana jitailla rafue

(Mr 8.12; Lc 11.29-32)

³⁸ Naie facaiseconi dajerie Moisés micorí llogacinona llofuerainí dajerie fariseuai diga Jesúsno llotimaci:

—Maestro, o lloga uaina caí ñnollena, siño rafuena o fñuana cioacadicaí.

³⁹ Jesús uai ote:

—Marañedicinona finocabidomoi. Jusiñamui dibeimo iacañedomoi; iadedí siño rafuena cioacadomoi. Iena omoi jamai cioillena, siño rafuena fñoñeticue. Ero, Jonás micorí jaie ite rafuena uiñotomoi. Naiemo omoi comeciaína omoi faca. ⁴⁰ Darui amani aillue lliciaí jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue. ⁴¹ Lliciaí jeraimona naimie jillua mei, Nínive railla nairai dine Jonás micorí jaide. Nainomo Jusiñamui rafuena llote. Naie cominí iena cajano, naimaci comeciaí icinuaina meidotimaci. Cue rafuena omoi cacajamona, omoi comeciaí icinuaina birui omoi meidoñena jira, Jusiñamui uicomo ico nana cominí illa facaiseconi: “Cue cominidomoi” omoína raiñeticue. Jonás micorí baifemo birui uaidicue; iadedí cuena ñnoñedomoi. ⁴² Ero, Saba railla nairai ie illañño micoridí Salomón micorí dine jaie aarena jaide. Naimie micorí uiñuacinona naiñañño micorí cacareillena, aarena jaide. Salomón micorí baifemo birui uaidicue; iadedí cuena ñnoñedomoi. Omoi comeciaí icinuaina birui omoi meidoñena jira, Jusiñamui uicomo nana cominí ille facaiseconi naiñañño micorí omoína ico ñaite:

“Naimiedí siño rafue fñuana ciodomoi. ¿Bue ñellena naimiena ñnoñedomoi?” omoína ico ñaite.

Janaba anamo illamie rafue

(Lc 11.24-26)

⁴³ Jesús naimacimo nia llote:

—Birui bene ite marañede cominidí Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. ⁴⁴ Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie iima comeci namanidena naimie baite. ⁴⁵ Iemei oni jaillanona, jiaie siete jananiaína naimie diga atide, naimaci anamo naie iima illena. Naie siete jananiaí naimie baifemo marañedicimaci. Iemona naie iima eo fodo jaide. Ie isoide birui ite marañede cominí. Cue rafue naimaci ñnoñenia, eo fodo jaitimaci.

Jesús ie cominí

(Mr 3.31-35; Lc 8.19-21)

⁴⁶ Jofomo cominí diga Jesús nia ñaia, naimie ei, ie amatiaí diga, bite. Naimie diga ñaiacanano, jino naidaide.

⁴⁷ Damie Jesúsno llote:

—O ei, o amatiaí diga, jino ite. O diga ñaiacade.

⁴⁸ Naimiemo Jesús dinena jicanote:

—¿Bu cue ei? ¿Bu cue amatiaí?

⁴⁹ Ie llofueoicaigano dine ie onolli ñuitajanona, raite:

—Jadi, cue ei, cue amatiaí. ⁵⁰ Cue Moo monamo ite.

Naimie jitaillacinona finodimiedí cue amana, cue miriñona, cue eina. Imaci ua cue cominina.

Trigo judaidimie rafue

(Mr 4.1-9; Lc 8.4-8)

13 Nai jofomona nairui Jesús jaillanona, jorai fue dine jaide. ² Ailluena cominí nainomo ofilla jira, botemo Jesús jaillano, ana raide; iadedí cominí jorai fueo itimaci. ³ Ailluena rafue naimacimo llote:

—Jusiñamui omoína sedaacana omoi fueollena, bie rafuena lloiticue. Damie trigona judaiaide. ⁴ Naimie judaiaimona, naisomo janore iduai juide. Naimie bai jailla mei, sillíñiaí iena guisaibitimaci. Ie jira sicoñede.

⁵ Nofiemo jiaie iduai juide. Nainomo enirue raise iñede. Sicode; iadedí enirue raise iñena jira, ⁶ raise jainañena jira, ecasillamona duide. Ie jira llisiñede.

⁷ Eecuai illanomo jiaie iduai juide. Eecuai sicuamona, riará eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo cien diga llisillana ote. Jiaínamona sesenta diga llisillana ote. Jiaínamona treinta diga llisillana ote. ⁹ Omoi jeforena jira, raise fueollena, cue lluomo cacarei. Iena ñno.

Jesús ie como lloga rafuena llofuia rafue

(Mr 4.10-12; Lc 8.9-10)

¹⁰ Ie llofueoicaigano Jesúsno jicanuaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoina ie sedaacana rafuena jai uiño-tade. Jaie iena uiñoñedomoi. Jiaie cominina iena nia uiñoñade. ¹² Jusiñamuina ñnotimie Jusiñamui rafuena ñnocana jaite. Jusiñamui naimiena uiñoñate; iadedi Jusiñamuina ñnoñedimie Jusiñamui rafuena uiñoñecana jaite. ¹³ Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uíñoñedimaci. ¹⁴ Isaías micori naimacina jaie cueba rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena ciotomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacacaiñedomoi.

Jai uisnidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue ñibeimo iacaiñedomoi, omoina cue jilloitai railanona”.

Isaías micori Jusiñamuina ñnoñedinona iese jaie cuete; ¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi ñnua jira, ni ua omoi marena ille jillaci. ¹⁷ Jusiñamui facaina jaie lloraini micoriai omoi siñona ciua rafuena jaie cioacacimaci; iadedi cioiñedimaci. Iena cacacacacimaci; ia cacaiñedimaci. Jusiñamuina jaie ñnotino micoriai iena cioacacimaci; iadedi cioiñedimaci. Iena cacacacacimaci; iadedi cacaiñedimaci.

Jesúdi trigo judaidimiena llua rafue

(Mr 4.13-20; Lc 8.11-15)

¹⁸ Jesús llote:

—Ero, omoina trigo iduaina judaidimie rafuena llofueiticue. ¹⁹ Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaimo cacaja uaina ñnotañede. ²⁰ Jiaie iduai noñemo juide. Dajerie comini comeciai naie noñe isoidimaci. Jusiñamui uai nano naimaci cacaja, iena caimare feiñotimaci. ²¹ Noñemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci. ²² Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci. ²³ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci.

Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloiticue. Naimie ñibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide. ²⁵ Naimie ñia mei, ie enoidimie trigona eruaide raiticiaina bainino judaiaide. Iemei oni jaide. ²⁶ Trigo sicuamona lliside. Naie facaise naie raiticiai como raise bairede. ²⁷ Judaidimie maijiraini iena ciuanona, naimiemo llote: “Mare iduai navui ritio. ¿Niesedeta raiticiai eo sicode?” ²⁸ Uai ote: “Cuenta enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaideo?” ²⁹ Uai ote: “Dama ite. Raiticiai omoi raitia, trigona jai jaitaitomoi. Dama iesede. ³⁰ Danomo sicoite. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

Jesúdi mostaza ido llua rafue

(Mr 4.30-34; Lc 13.18-19)

³¹ Jesús jiaie rafue llote:

—Jusiñamui ñibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riará sicode.

³² Mostaza ido eo janorede; iadedi sicua mei, eo aillue riará jaillamona, nainomo silliniñai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofuia rafue

(Mr 4.33-34; Lc 13.20-21)

³³ Jesús jiaie rafuena llote:

—Jusiñamui ñibeimo comini jailla rafuena lloiticue. Jiaie uaido iena omoimo lloiticue. Daje cirigaí raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede. ³⁵ Jusiñamui facaina lloraíma micori iena jaie cueba:

Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaisemona jaca bu iena uiñoñede.

Birui naimaci uiñollena, iena lloiticue”.

Jesús trigo motomo riga raiticiaina llofuia rafue

³⁶ Comini jino fañonocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñollena, trigo motomo riga raiticiai rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloticue. ³⁸ Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini. ³⁹ Naie maraiñede iduai judaidimiedi Taife. Ua fa-caisedi cue abido bille facaise. Trigo otinodi Jusiñamui jaienisai. Trigodi cuena innotino. ⁴⁰ Jobaillena raiticiai ofitaja isoi, ico abido cue bia, daje isoi iite. ⁴¹ Cue jaienisaina oretaiticue, nana jeacinona finoraini diese ofitallena, cue illanomona iraimo dotallena. ⁴² Nainomo eo duere sefuillamona, eetitmaci. Subicaitimaci. ⁴³ Iemei jitoma lligaiña isoi, Jusiñamui sedajanomo naimiena innotinodi marena bairenitimaci. Omoi jeforena jira, raise fueollena, cue lluomo cacarei. Bie isoi omoi duere sefuiñellena, cue lluana inno.

Jesúdi eniruemo isiruiga reica rana llofua rafue

⁴⁴ Jesús llote:

—Jusiñamui dibeimo comini jailla rafuena lloticue. Jiaie uaido iena omoimo lloticue. Eniruemo isiruiga raifide ra bu baia, ie nama jai iñena jira, naie eniruena uainino ibaacadu, naie ra ollena. Ucube ollena, naie rari iobilla jira, nana naimiemo ite raruiaina fecaite. Iemei eniruena ibaite. Ie isoide. Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

Perlas railla rafue

⁴⁵ Jesús llote:

—Jusiñamui dibeimo comini jailla rafuena lloticue. Iena omoi raise uiñollena, perlas railla rana ibaraimana lloticue. Eo mare perlas iballena jenocabide. ⁴⁶ Eo raifide perla naimie baia, naie perlana iballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

Jesús lloijina ñaia rafue

⁴⁷ Jesús llote:

—Jusiñamui dibeimo comini jailla rafuena lloticue. Iena omoi raise uiñollena, lloijina lloticue. Joraimo lloijina comini faianona, naga isoide lliciaina otimaci. ⁴⁸ Arisonua mei, mare lliciaidi diese fetodimaci. Maraiñede lliciaidi diese oni faitimaci. ⁴⁹ Ie isoide. Ico abido cue bia, iese iite. Jusiñamuina innotinomona naimiena innoñedinodi diese oni fetollena, Jusiñamui jaienisai biitimaci. ⁵⁰ Iemei iraimo Jusiñamuina innoñedinona dotaitimaci. Nainomo eo duere sefuillamona eetitmaci. Subicaitimaci.

Jesús llofueoicaiganodi mare rafuena jai uiña rafue

⁵¹ Ie llofueoicaiganomo Jesús jicantote:

—¿Nana cue lluana cacadomoi?

Uai otimaci:

—Jii, nana cacadicaí.

⁵² Naimacimo llote:

—Ie jofomo comini bia, naimacina raise nafuellena, naimacina caimare itatallena, jofo nama ie mare raruiaimona naimaci jitailla ra naimacimo fecade. Comini comeciaina lloticue. Jusiñamui facaina lloraini micoriai llogacinona uiñotomoi. Cuemona Jusiñamui ie cominina sedaja rafuena fueocana jiaí jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide. ⁵⁴ Ie eniruemo rillanona, Nazaretmo ite ofiracomo llofue. Naimona cominidi rajicaillamona raitimaci:

—¿Niese naimiedi eo abina uiñote? ¿Niese siño rafuena naimiedi finode? Naimiedi jamai bue isoidimie. ⁵⁵ Naimie amederaima jito. Naimie eidi María. Naimie amataidi Jacobo, José, Simón, Judas. ⁵⁶ Naimie miriñotiaidi cai motomo jiaí ite. Naimaci diga nagarui nabairiticaí. Naimieori cai nabairicabilla. Ie jira, ¿nina ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina innoñedomoi.

⁵⁸ Naimie uaina naimaci innoñena jira, Jesús ailluena siño rafue finoñede.

Juan Bautista micori fiodailla rafue

(Mr 6.14-29; Lc 9.7-9)

14 Naie facaiseconi Herodes railla gobernador Jesús mamecina cacade. ² Naimie ecimo maijuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluana gaiñenano, naimiena duere finode. Herodes Juan micorina gaitatajanona, cárcelmo jonetade. ⁵ Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite. ⁶ Iemei Herodes cumpleañes ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. ⁷ Ie jira naiñaiño llote:

—Nie isoide rana o jitaadedi, omo iiticue. Illaima uai cuemo illa jira, iena ua finoiticue.

⁸ Naiñaiño ei naiñaiño lluanona, naiñaiño uai ote:

—Juan Bautista ifogí bandejamo jonecaida, cuemo ine.

⁹Iena cacajano, naimie sunaite; iadedi naimie jino ie llua uaina jira, nainomo naimie uaidogano jiaí jai cacaja jira, Juan micorina meinetajana llote. ¹⁰Ie lloga uaina finollena, cárcelmo soldadona orede. Nainomo Juan micori ifogina jaitade. ¹¹Bandejamo naimie micori ifogí jonecaida, soldado atiano, Herodías jisamo fecade. Ieconí ie eimo fecade. ¹²Iena fidiana, Juan micori llofueoicaigano naimie micori abina uaíbitimaci. Iena naimaci raia mei, Jesúmo lluidimaci.

Jesús cinco mil iñiñaina ecaja rafue

(Mr 6.30-44; Lc 9.10-17; Jn 6.1-14)

¹³Juan micori meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci.

¹⁴Eniruemo Jesús sijia, ailluena cominina dafaífide. Naimacina ciuanona, naimacina duenaillanona, duidinona jillotate. ¹⁵Jitoma ana itemo, ie llofueoicaigano naimie dine lluaíbitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶Uai ote:

—Naimacina oretañeiticue. Naimacina omoi eca.

¹⁷Uai onaisite:

—Daní caimo ite cinco llomenico, mena lliciaí diga.

¹⁸Uai ote:

—Iena cuemo atí. ¹⁹Raitie illanomo comini ana raillesa llono —raite.

Naie cinco llomenicono naie mena lliciaí diga uanona, monamo eruailanona, Jusiñamui mo iobilacinona fecade. Iemei taillude. Ie llofueoicaiganomo fecade, cominina ecallena. ²⁰Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci. ²¹Cinco mil iñiñai diese guitimaci. Naimaci aitiaí jiaí guitimaci. Naimaci uruiaí jiaí guitimaci.

Jesús jinui emododo macarilla rafue

(Mr 6.45-52; Jn 6.16-21)

²²Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote. ²³Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. ²⁴Naie facaiseconi ie llofueoicaigano jorai motomo itimaci. Aifí billamona, eo bagode. Naimacimo riire aifí rilla jira, riire jaitimaci. ²⁵Nia monañedemo, jinui emododo naimaci dine Jesús bite. ²⁶Naimiena naimaci ciuanona, jacinaillamona, raitimaci:

—¿Bu joreño caimo billana ciodicai? —Jacinaillamona cuiiriidimaci. ²⁷Naie dacaño Jesús naimacimo llote:

—Omoi joreñonicañeno. Cuesa. Jaciruiñeno.

²⁸Pedro uai ote:

—Uanai caí Namadio. O dine cue billesa cuemo llono.

²⁹Jesús uai ote:

—Cue dine bi. —Ie jira botemona jinui emodo Jesús dine Pedro macarite; ³⁰iadedi aifí billana naimie ciuanona, jacinaite. Jinuimo anabaiacade. Ado cuiroi:

—Nama, cuena cano.

³¹Jesús ie onolli oni ñuitajanona, naimiena llinuana, raite:

—Eo janore cue uaina iñotio. ¿Bue ñellena eo iñoñedio? Cuena iñotiodena, jinui emododo cue dine niadedi ridio.

³²Botemo a iaimaiaí jaillamona, ie facaise aifí lliicaide. ³³Ie jira botemo itino Jesúmo iobillacinona fecadimaci.

—Odi ua Jusiñamui Jitodio —raitimaci.

Jesúdi duidinona Genesaret eniruemo jillotaja rafue

(Mr 6.53-56)

³⁴Ruica dine jaillanona, Genesaret railla eniruemo ridimaci. ³⁵Jesúna nainomo itino uíñuamona, naimie dine duidinona atillena, nana nairaimo jiaie cominina oredimaci. ³⁶Naimie dine billanona, daní ie iñiroi fuedamo jutadallena naimiemo jicanotimaci. “Naimie iñiroimo caí jutadallemona jilloiticaí” raillamo comeciaina facadimaci. Nana jutadate diese jillodimaci.

Jesúdi comini comeciaina ñaia rafue

(Mr 7.1-23)

15 Jerusalémona fariseuai comini Jesús dine bitimaci. Moisés micori llogacinona llofueraíni jiaí bitimaci. ²Naimiemo jicanotimaci:

—¿Bue ñellena o llofueoicaigano caí einamací rafuedo jaiñedimaci? Naimaci guiacania, naimaci onolli caí einamací llua isoi raise jocoñedimaci. Ie jira caí abimo jeacino finodomoí.

³Jesús uai ote:

—¿Bue ñellena nana Jusiñamui llogacinodo jaiñedomoi? Omoi einamací llogacinodo jaidomoí; iadedi nana Jusiñamui llogacinodo raise jaiñedomoi. ⁴Jusiñamui jaie llote: “O moo uai iñuanona, naimiena cano. O ei uai iñuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ⁵Iese Jusiñamui llote; iadedi omoi einamací llotimaci: “Jusiñamui mo caí ucubena caí fecajamona, caí moona, caí eina jai canonidicaí”. ⁶Iese omoi finocabilla jira, omoi einamací llogacinodo omoi jaillamona, Jusiñamui uaina jamaidomoí. ⁷Mareuidinona abí caitauidinodomoí. Isafas micori omoína jaie raise llote. Naimiedi Jusiñamui llua cuete:

⁸Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticaí” llotimaci. “Ona sedadicaí” llotimaci. Jamai ñaitimaci. Naimaci comeciái cue díbeimo raise iñede.

⁹Cue uai itena, jamai comini llucinona naimaci llofuecabilla jira, tainona cuena sedadimaci.

¹⁰ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uifollena, cue llua mo cacarei.

¹¹ Omoi einamací isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciái jearena jira, jeacinona finocabidomoi.

¹² Ie llofueoicaigano naimiemo lluaibitimaci:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite. ¹⁴ Naimacina fainonocai. Uanaicinona naimaci uifollena jira, uisinidino isoidimaci. Jiaimiena uisinidimie ifoia, dafomo uaidiaimaia. Ie isoide. Uanaicinona fariseuai uifollena jira, uanaicinona llofuenidimaci. Uanaicinodo jaiñedimaci. Ja muidomo faifitimaci.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Niese cue llua jiaí nia cacaiñedomoi? ¹⁷ Nie isoide ra guitomoina, omoi jebemo jaide. Ie mei omoi abiamona jino bite; ¹⁸ iadedi omoi comeciaino iticinomona jearedena ñaitomoi. Omoi comeciái jearena jira, jearede rafuena finocabidomoi. ¹⁹ Omoi comeciái jearena jira, jeare comeciaina facacabidomoi. Comena meinecabitomoi. Omoi aiñede riño diga icabitomoi. Omoi iniñede iima diga icabitomoi. Fñiricabitomoi. Tainona llogiricabitomoi. Jiaie comini joreña jeare ñaicabitomoi. ²⁰ Bie isoidicinuai omoi comeciaino illa jira, jearede rafuena finocabidomoi; iadedi omoi einamací llua isoi, omoi onolli jocoñenamonona jeacino comuiñede.

Jesúdi judío iñaiñediñaiñona jillotaja rafue

(Mr 7.24-30)

²¹ Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiaí jaide. ²² Ie facaiseconi naie eniruemona judíuñediñaiñodi billanona, raite:

—Maestro, David micorí jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

²³ Jesús uai oñede. Ie jira ie llofueoicaigano naimie dine billanona, duere llote:

—Naiñaiñona abido ie jofomo oreta. Caimo duere jicauaibitesa.

²⁴ Jesús uai ote:

—Faificana jaillana naimaci jai jailla jira, daní cai judíuai cominimo cue Moo cuena oretate. Naimiedi judíuñediñaiñonomo cuena oretañede.

²⁵ Ie facaise naimie dine naiñaiño billanona, naimiemo iobillacinona fecallena, caifíci ifodo ana rainada raite:

—Maestro, cuena cano.

²⁶ Judíuaiñedinona naimie canoñenana naiñaiño uifollena, naiñaiñomo Jesús llote:

—Uruiaí guillamona jiconiaina ecadicaidena, maraiñede.

²⁷ Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona guitimaci. —Iese llote; ia jiaie rafuemo comecina facade. Uruiaina llote; iadedi judíuaimo comecina facade. Jiconiaina llote; ia judíuaiñedinomo jiaí comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁸ Jesús uai ote:

—Cue uaina o ñnua jira, o jitailla rafuena finoiticue.

—Ieconi naiñaiño jisa jillode. Janaba naiñaiñomona oni jaide.

Jesús ailluena duidinona jillotaja rafue

²⁹ Nainomona Jesús bai jaillanona, Galilea railla jorai fueo jaide. Iemei aneduaimo jaillanona, nainomo ana raide. Nainomo rilla mei, ³⁰ ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruidinona, uisinidina, uainidina atidimaci. Diga duidinona naimie dine atidimaci. Iemei naimacina jillotate. ³¹ Ailli uainidino jai ñaiana cacajamona, ailli onollina idisaruidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisinidino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

Jesúdi cuatro mil iñiñaina ecaja rafue

(Mr 8.1-10)

³² Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaicaiñedicue, naisomo naimaci bai raillanona. Naimacina cue duenaila jira, naimacina canoacadicue.

³³ Jicanotimaci:

—¿Ñinomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

³⁴ Jesús jicanote:

—¿Ñiga llomenico omoimo ite?

Uai otimaci:

—Siete. Janorede llicisiriaí caimo jiaí ite.

³⁵ Comini ana raillena Jesús llote. ³⁶ Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie comini fecallena. ³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ³⁸ Nainomo cuatro mil iñiñai guitimaci. Naimaci ainiaí jiaí guitimaci. Naimaci uruiaí jiaí guitimaci. ³⁹ Iemei cominina naimaci jofuemo orede. Naimacina oretaja mei, botedo Magdala railla eniruemona Jesús jaide.

**Fariseuai comini Jesúsno siño rafuena finuana jicanu-
ano billa rafue**
(Mr 8.11-13; Lc 12.54-56)

16 Dajerie fariseuai comini Jesús dine bitimaci. Naimiena facacillena, dajerie saduceuai comini jiai bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

² Jesús uai ote:

—Jitoma sojicaidemo, mona jiairenia, raitomoi: “Íco are maremonanite”. ³ Jiai raitomoi: “Jitiramo mona jiairenia, ja noci deite”. Monamo omoi eruailamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. ⁴ Jeacinona finocabidomoi. Jusiñamui díbeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie llua mei, naimacimona Jesús ie llofueoicaigano diga oni jaide.

Jesús siritate rana llofuia rafue

(Mr 8.14-21)

⁵ Ruica dine naimaci rillanona, ie llofueoicaigano llomeniconna feillana uibiñotimaci. ⁶ Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiaicinomona abi rairuillena ñaite. ⁷ Jesús iese llua jira, iena naimaci raise cacaiñena jira, daní coniniri siadotimaci:

—Llomeniconna cai atañena jira, caimo iese llote.

⁸ Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise iñoñedomoi. Omoína canoredicue. ¿Bue ñellena daní omoi llomenico iñenana siadotomoi? ⁹ ¿Niese iñoñedomoi? ¿Niese cue navui siño finoca rafuemo comeciaina facañedomoi? Navui cinco mil iñiaí cinco diganicodemo guitimaci. Monillamona, guigamona fiebillamona, doce cirigaiaimo iraidomoi. ¹⁰ Jiaicaiño cuatro mil iñiaí siete diganicodemona guitimaci. Monillamona guigamona fiebillamona, siete cirigaiaimo iraidomoi. ¹¹ Omoína cue ecalena, ¿niese cuena birui iñoñedomoi? Llomeniconna ailí ñañedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

¹² Ie facaise naimie llua nia jai cacadimaci. Llomenico siritate rana naimie ñañede; iadedi fariseui llofuiaicinomona naimaci abina rairuillena ñaite. Saduceuai llofuiaicinomona naimaci abina rairuillena ñaite.

Pedro Jesúsna llua rafue

(Mr 8.27-30; Lc 9.18-21)

¹³ Cesarea Filipino railla eniruemo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micoridio”.

Damierie raitimaci: “Odi Elías”. Jiaíno raitimaci: “Jermías micoridio”. Jiaíno raitimaci: “Jusiñamui facaina llo-
raima micoridio”.

¹⁵ Jesús dane jicanote:

—¿Niese omoi cuena raitomoi?

¹⁶ Pedro uai ote:

—Odi cai jilloitaraimadio. Cristodio. Jusiñamui facaina llo-
raíni micoriai o billena jaie llotimaci. Cai cajede Jusiñamui Jitodio.

¹⁷ Jesús dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade. ¹⁸ Pedro, o comecina uiñotícue. Cuena como o lloga uaina meidoñeitio. Bie rafuena jiaie cominimo o lluaamona, jiai iñoitimaci. Cuena iñua-
mona, cue cominina jaitimaci. Cue díbeimo iñedino iena itatanidimaci. ¹⁹ Ailluena cominimo Jusiñamui ie cominina jailla rafuena nano llo-
raimana jaitio. O llua-
acinodo jaitino cue cominina jaitimaci. O llua-
acinodo jaiñeitino cue cominina jaiñeitimaci

²⁰ Iena llua mei, ie llofueoicaiganona rairuide:

—Cue Cristonana bumo nia lloñoeno.

Jesús ie fiodaillena llofuia rafue

(Mr 8.31-9.1; Lc 9.22-27)

²¹ Naie facaisemona ie llofueoicaiganomo Jerusalé-
mo naimie jaillena marefodo llote:

—Nainomo cai judíuai illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloitícue.

²² Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

²³ Jesús jinafo dine naimiemo erodate. Raite:

—Cuemona oni jai. Iese ñañeno, Taife isoi o comeci-
na o facaja jira. Jusiñamui isoi cuemo comecina fa-
cañedio. Comini isoi cuemo comecina facadio. Iese o
comecina facañeno.

²⁴ Ie llofueoicaiganomo llote:

—Cue cominina bu jaiacania, ie jitaille rafuedo jaiñe-
na. Cue díbeimo naimie jaillamona, duere sefuicana
jaite. Nibaí naiemona fodaite. Bu iese jaiacania, cue
díbeimo naimie iite. ²⁵ Duere sefuillana jaciruillamona
cue cominina bu jiaicaiñenia, ja muidomo faifite; iad-
edi duere sefuillana jaciruiñenamona cue cominina bu
jaia, jaca faifíñeite. ²⁶ Cue cominina bu jaiñenia, nibaí
eo duere sefuíñeite. Nibaí ailluena ra naimiemo iite; ia,
¿niese cue Moo dine riite? Nainomo naimie riñoeno fai-
fite. ²⁷ Cue jaienisaí diga cue Moo dinena monamona
íco biitícue. Cue Moo uai cuemo illanona, ebirena bi-

iticue. Nagamié imaci finoca rafue diese cue iba ollena biiticue. Cue cominiñedinona duere finoiticue. ²⁸ Ua-naicinona omoimo lloiticue. Omoimona dajerie nia fioldañeitomoimo, illaimana cue bairellena cioitomoí.

Jesús abi meidocailla rafue

(Mr 9.2-13; Lc 9.28-36)

17 Seis digarui illanona, anedumo comini ñenanomo Jesús jaide. Naimie diga jaillena, Pedrona uite. Jacobona jiaí uite. Jacobo ama, Juan, jiaí uite. Jiaíe llofueoicaiganona uifede. ² Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie ñiroi naie dacaiño eo userecaide. ³ Naie facaise naimacimo Moisés micorí joreño, Elías diga bairede. Elíadi Jusiñamui facaina jaie lloraima. Jesús diga ñaitiaimaiaí. ⁴ Jesúmo Pedro llote:

—Nama, bene caí illana mare. O jitaia, daje amani bisaini finoiticue. Daje oue; jiaíe Moisés micorí ie; jiaíe Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie lluomo cacareillanona, iena ñino —llote. ⁶ Jesús llofueoicaigana iena cacajanona, eo jaciruillanona, naimaci uieco dinena ana bitadatimaci. ⁷ Jesús naimaci dine billano, naimacina jetajanona, raite:

—Mai jaciruiñoeno naidacai.

⁸ Naimaci erorillamona, dama Jesúna ciodimaci.

⁹ Anedumona bitimacimo, naimacimo Jesús llote:

—Omoí aillí ciua rafuena bumo lloñeno, cue fiodaillanona cue jillua ñinori.

¹⁰ Naimiemo llotimaci:

—Moisés micorí llogacinona llofueraíni birui raicabitimaci: “Elías raillamie dane biite. Ie mei caí jilloitaraíma biite” raitimaci. Jusiñamuimona o billana ñinoticaí. Odí caí jilloitaraímana ñinoticaí. Odí caí jilloitaraímodímo, ¿bue ñelli íese raitimaci?

¹¹ Uai ote:

—Raise ñinotomoi. Elías isoidimie jai bite, nana Jusiñamui jitailla rafue raise lollena. Jusiñamui ñibeimo naimaci illena, comini imaci comeciá meiduanona llote. ¹² Ero, naimie jai bite; iadedí bie comini naimiena raise uifoneidimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, ñimana cue jaillena; iadedí duere sefuiticue.

¹³ Ie muidona Jesús llofueoicaigano naimiedí Juan Bautista micorína ñaiana jai uifnotimaci.

Jesúdi Janaba anamo itimiena jillotaja rafue

(Mr 9.14-29; Lc 9.37-43)

¹⁴ Ie jiaíe llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, caíñici ifodo raínadacaida raite:

¹⁵ —Maestro, cue jitona duenai. Janaba anamo naimie ite. Iemona naílicabide. Duere sefuide. Uai-uacabide. Jiaicaiñodedí iraimo uaillanona, uside. Jínuimo jiaí uaillanona, niadedí corobaite. ¹⁶ Naimiena jilloitallena o llofueoicaigano dine naimiena atidicue; iadedí naimiena jillotanidimaci.

¹⁷ Iena cacajanona, Jesús ie llofueoicaiganomo llote: —Cue uai siñonana nia ñinoñedomoi. Cue mare rafuedo nia raise jaiacaiñedomoi. Omoí diga are iticue. Raise omoí ñinollena, ¿nie dinori omoí diga iticue?

Naie duidimie moomo llote:

—O jito cue dine mai ati.

¹⁸ Naimiena atiamona, Jesús naimiemo Janaba illana uifnote. Janabana Jesús lletaja jira, naie uruemona Janaba oni jaide. Ieconí naie urue jillode.

¹⁹ Ie mei ie llofueoicaigano Jesúmo anado jicanotimaci:

—¿Bue ñellena Janabana oni oretanidicaí?

²⁰ Uai ote:

—Raise nia omoí ñinoñena jira, uanaicinona omoimo lloiticue. Janaba oni oretallena, cue uai navui omoimo iticue. Birui raise cuena omoí ñinoñenia, bie Janaba oni oretanidomoi. Jusiñamuina eo janore ñinotomoidena, diga rana finodomoi. “Oni baí jai” bie anedumo llotomoidena, omoína naimie canuamona, bie anedu oni lliái baí jaite. Jusiñamuina omoí ñinoia, naga rana finoredomoi. ²¹ Jusiñamuimo omoí comeciána facallena omoí guiñenamona, Jusiñamui diga omoí ñaíamona, bie isoide Janabana oni oretaredomoi.

Jesús ie fiodaillena dane llofuia rafue

(Mr 9.30-32; Lc 9.43-45)

²² Galileamo ie llofueoicaigano diga danomo itemo, Jesús naimacimo llote:

—Monamona billanona, ñimana jaidicue. Jusiñamui jitailla jira, cuena jiaíe comini gaitajanona, illaicominimo fecaitimaci. ²³ Naie illaicomini cuena meineitimaci; iadedí darui amani illamona, cue Moo cuena jillotaite. —Iena cacajanona, ie llofueoicaiganodí sunaitimaci.

Jesúmo Jusiñamui jofo facaina damie íbataja rafue

²⁴ Capernaumo naimaci rilla mei, Jusiñamui jofo ucube oraíni Pedro dine jicanuaíbite:

—Moisés micorí llua isoi, ¿o llofueraíma Jusiñamui jofomo ucubena fecacabide?

²⁵ Pedro dinena uai ote:

—Jii, fecacabide. —Ucube oraíni jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿níese o comeciána raitio? ¿Bumona illaicominidí imaci ucubena ocabitimaci? Imaci jitoníaímona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitonaiña ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; ²⁷ iadedi Jusiñamui jofo ucube orainina coco icifellesa, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

Jesús ie llofueoicaigano moto imiēna ille rafue

(Mr 9.33-37; Lc 9.46-48)

18 Naie facaiseconi naimie dine ie llofueoicaigano jicanuai bitimaci:

—Jusiñamui ie cominina sedajanomo ico cai ia, ¿bu cai moto imiēna ille?

² Iena cacajanona, Jesús daje urue uaiduanona, naimaci motomo jonete. ³ Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fainonocaiñenia, bie urue isoi omoi moto imieñedimienā illanona, Jusiñamui sedajanomo iñeitomoi. Cue cominina omoi ia, bie urue isoi iitomoi. ⁴ Bie urue isoi abi iedoñedimiedi Jusiñamui ie cominina sedajanomo imie moto naimiēna ille. ⁵ Bie isoidimie cuemo duillamona, naimiēna feiñotimiedi cuena jai feiñote; ⁶ iadedi cuena innotimienā jeacinona finotaiacadimie iena finoñellena, jeacinona finotaiacadimie cimaiomo aillue nofici maiānona joraimo corobaillena, naimiēna dotacadena, cuemona mare.

Jesúdi jeacinona finoñenana llofuia rafue

(Mr 9.42-48; Lc 17.1-2)

⁷ Jesús llote:

—Ramo faitino duere sefuillesa. Diga ramo omoi faitinomo riitomoi; iadedi Jusiñamui omoi ramo faitimienā duere finoite. ⁸ Biena ñaiticue. Nie isoide rafue omoina jeacino finotaiā, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi naimiēna innotinomona damie faifillana jitaiñena rafue

(Lc 15.3-7)

¹⁰ Jesús llote:

—Urue isoi omoi illena como lloticue. Iena dane lloiticue. Cue Moo naimacina uiñua jira, bie urue isoidinona jamaiñocaiñeno. Monamo cue Moo ecimo naimaci jaiēnisai jaca ite, naimacina canollena.

¹¹ Jusiñamuimona cue billanona, naimiēna innoñedinona naimaci jeacinomona jilloitallena biticue.

¹² Ero, omoimo iena jiaie rafuedo lloiticue. Damiemo cien diga toica llauda ite. Naiemona daje feiraite. Iena faifiñellena, jiaie llaudañaina fainonocaida, iena jenuaite. ¹³ Iena baillanona, ieri iobite. Baillari oni jaiñedinori baiñemo iobite. ¹⁴ Ie isoide. Jusiñamui naimiēna innotinomona damie faifillana jitaiñede. Ie jira naimacina jeacinona finotañeno.

Jesús omoi ecimo itimie omoina jeare finuana llofuia rafue

(Lc 17.3)

¹⁵ Jesús nia llote:

—O ecimo itimie ona jeare finoia, naimie dine iena lluai. Dañamaiā iena omico llono. O uai naimie fairioia, naimie o dibeimo jai iite. ¹⁶ O uai naimie fairioñenia, jiañ menamiēna uiñō, o lluomo iaimaiā cacareillesa.

¹⁷ O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina innoñedimienā omoi nabaiñena isoi, Moisés llogacinodo raise jaiñedinō omoi nabaiñena isoi, naimiēna nabaiñeno. Omoi ofiracomo naimiēna feiñoñeno. ¹⁸ Iese omoi finoia, omoi comeciañ daje isoi lloillamona, Jusiñamuimona mare.

¹⁹ Omoimo nia lloiticue. Daje isoi comecina cue Moo Jusiñamuimo jicallena menamaiā facajamona, cue Moomo iaimaiā jianona, cue Moo iaimaiā jitaile rafuena finoite. ²⁰ Menamie cue dibeimo illamona, damie amani cue dibeimo illamona, naimaci motomo iticue.

²¹ Pedro naimiemo jicanuai bite:

—Nama, cue ecimo itimie cuena jeare finoia, ¿ñiga icaiño ibana cue oñeno iena feitaiticue? Nibañ siete digacaiño.

²² Jesús dinena uai ote:

—“Nibañ siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloiticue.

²³ Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentā iballena. Damie eo debede. Diez mil ucubena debe de. ²⁵ Naimie ucube iñena jira, naie illaimadi ie cuenta iballena, naimie ai, ie uruaiā diga, nana ie raruaiā diga, fecallena llote. ²⁶ Iena cacajano, ie illaima uicomo caiñici ifodo raita duere jicade: “Nama, dama ite. Fecuisse omo ibaiticue”. ²⁷ Naimie duenailamona, naie illaima llote: “Ibatañeiticue. Cuemo jai debeñedio. Mai jai”. ²⁸ Ie mei naimie jaide. Bai jaillanona, jiaie maijiraima diga dafaifide. Jai debeñedimie mo janore debede. Cien ucubena debede. Jai debeñedimie dinena ie cimānona llinuana llote: “O debia cuemo mai iba”. ²⁹ Ie jira debedimie caiñici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”. ³⁰ Uai ote: “Ja raire jitaidicue”.

Naimiēna duenaiñena jira, cárcelmo naimiēna jonetade, ie cuenta iballe dinori. ³¹ Naimie nabaiñiañ iena fidianona, sunaitimaci. Ie jira naimaci illaima dine nana naie rafuena lluidimaci. ³² Naie illaimadi nano debedimienā abido uaiduano, naimiemo llote: “Maraiñedio. Navui o cuentana ibatañedicue, cuemo o

duere jìcanua jira. ³³ ¿Bue ñe o nabaina duenaiñedio, ona cue duenaila isoi?" ³⁴ Icirillamona, naie illaïma naimiena cárcelmo jonetade, nainomo duere sefuillena, nana ie cuenta ìballe ðinori. ³⁵ Ie isoide. Cue Moo Jusiñamui omoïna duere finoite, omoï comeciã jitaillamona omoï ecimo itimie ie maraiñede finoca rafuena omoï feitañenia —llote.

Jesús ïima ie aina dotaja rafuena llofuia rafue

(Mr 10.1-12; Lc 16.18)

19 Ie llofueoicaigano ðiga Galileamona jaillanona, Jordán railla ille ruica ðibeïmo Judeamo Jesús jaide. ² Ailluena comini naimiena racaðimaci Nainomo duidinona jillotate. ³ Naimiena facacillena, dajerie fariseuai naimie ðine bitimaci. Rafuena jìcanoiacadi-maci. Naimaci uai naimie raise oñenia, naimiena duere finoacadi-maci. Jìcanotimaci:

—¿Ïima ie aina dotajana rairuidio? ¿Nie isoide rafue muidona ðamie ie aina dotarede?

⁴ Jesús ðinena uai ote:

—Moisés micori jaie cuete: "Enirue finua facaiseconi Jesiñamuidi come iaïmaïaina finode. Ïimana finode. Riñona jiaï finode". ⁵ Ie jira Jusiñamuidi jaie llote: "Ie ai ðiga illena, ïima ie moona faïnonocaite. Ie eina jiaï faïnonocaite. Ie ai ðiga illamona, menade comedi ðaamiena jai jaide" llote. ⁶ Menade come jai ðamiena jai ite. Jusiñamui iese iaïmaïaina itataja jira, ïima ie aina dotañellesa. Riño ie ïina dotañellesa.

⁷ Dane jìcanotimaci:

—¿Bue ñe Moisés micori cuete: "Ïima ie aina dotacania, dotalle rabena nano cueite. Ie mei naiñaiñona dotaite"?

⁸ Jesús uai ote:

—Jusiñamui uaina raise omoï ïnoñena jira, Moisés micori ïima ie aina dotajana rairuiñede; iadedi nano dofoconi iese iñede. ⁹ Jiaïe riño ðiga naimie illena, ie ana bu dotaia, jiaïe ïima ðiga naiñaiñi iñenia, naimiedi jeacinona jai finode. Ie aina dotajana rairuidicue.

¹⁰ Naimiemo ie llofueoicaigano ðinena llotimaci:

—Iese ia, cai jitaillamona aina jamai cai dotanina jira, ðamamei aïnidicai.

¹¹ Naimacimo Jesús llote:

—Nana comini omoï como llucacino jainidimaci. Dani Jusiñamuina jitaïðino iedo jairedimaci. ¹² Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

Jesúdi naimie ðine uruai billana jitailla rafue

(Mr 10.13-16; Lc 18.15-17)

¹³ Jesús ðine comini naimaci jesanidena atisite. Ie onolli naimacimo naimie joniamona, naimaci facaina naimie Moo ðiga naimie ñaïllena atisite. "Naimacina raise cano" ie Moomo lloïllena jitaïðimaci. Ie llofueoicaigano iena rairuidimaci; ¹⁴ iadedi Jesús raite:

—Uruai cue ðine billesa. Naimacina rairuiñeno. Cuenã bie isoide ïnotinodi Jusiñamui ie cominina sedajanomo jainaiðimaci.

¹⁵ Ie jira ie onolli naimacimo jonete. Naimie facaina Jusiñamui ðiga ñaïte, naimaci marena illena. Ie mei ie llofueoicaigano ðiga naimie oni jaide.

Ucuberedimie Jesús ðiga ñaïa rafue

(Mr 10.17-31; Lc 18.18-30)

¹⁶ Jesús oni jaillanona, conirue Jesús ðine bite. Jìcanote:

—Maestro, Jusiñamui ðiga cue jaca illena, ¿nie isoide mare rafuena finoiticue?

¹⁷ Jesús ðinena uai ote:

—¿Bue ñe cuemo mare rafuena finuana jìcanotio? Dama ðamie maremie. Naimiedi Jusiñamui. Naimiemo jìcano; ia jaca o illena, Jusiñamui jai llogacinuaina ïnocana jai.

¹⁸ Uai ote:

—¿Nie llogacinuaina ïnoiticue?

Jesús ðinena uai ote:

—Comena meineñeno. O aïñede riño ðiga iñeno.

Fiiñeno. Jiaïmiena o llogidoia, tainona lloñeno. ¹⁹ O moo uaina ïno. O ei uaina ïno. O abina o isiruilla isoi, nana cominina isirui.

²⁰ Naie conirue uai ote:

—Nana iena jai ïnoticue. ¿Nie isoide rafuena ñaïa finoiticue?

²¹ Jesús ðinena uai ote:

—Jusiñamui jitaillacinodo o jaiacania, o raise marebicaïacania, omo ite raruiaina feca. Naie ucubena dueredinomo feca. Cuenã o ïnuamona, monamo ïco jaca iitio. Cue llofuegamiena o illena, mai cue ðiga bi.

²² Iena naimie cacajano, sunaite. Naimiemo eo ailluena ra illa jira, iena fecaacaiñede. ²³ Jesús ie llofueoicaigano llote:

—Uanaicino omoïmo lloiticue. Ucuberedimiedi Jusiñamui cominina jaïllena eo sefuiruite. ²⁴ Iena ñaïa lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiaï raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, "¿Niese dueredinodicaïdi Jusiñamui cominina jaiticai?" raillamo comeciaina facadimaci. Raijicaïllanona, raitimaci:

—Nana comini rana jitailla jira, buca jillobiti.

²⁶ Naimacimo eruaïllanona, Jesús raite:

—Nana comini ðani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana faïnonocaida, o ðiga jaicabidicai. ¿Niese Jusiñamuimona ìbana feiñoiticai?

²⁸ Jesús ðinena uai ote:

—Illaimana ïco cue ia, eo ebirede illanomona cominina sedaiticue. Cue ðiga omoï jaicabilla jira, nainomo omoï illanuai jiaï iite, nainomona omoï judíuai doce naïraïaina omoï sedallena. ²⁹ Cuenã naimie isiruillamona, ie jofona bu faïnonocaia, ie amatiaïna bu faïnonocaia, ie miriñuaina bu faïnonocaia, ie moona bu faïnonocaia, ie eina bu faïnonocaia, ie uruaiina bu faïnonocaia, ie eniruenã bu faïnonocaia, Jusiñamui-

mona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite. ³⁰ Jamai bue isoidomoí. Omoimona jiaíno jamai bue isoifedimaci; ia naimie cominina naimaci jaillamona, Jusiñamuimona naimaci diga daje isoidomoí. Naimie diga jaca iitomoí.

Jesús Jusiñamui ie cominina sedaacana llua rafue

20 Jesús lloite:

—Jusiñamui díbeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijiuidinona jenuaide. ² Dajeriena baillanona, “Omoimo daberie ibaiticue” lloite. “Jee” raitimaci. Ieconi ie illimo maijillena, naimacina orede. ³ Jitoma nia oni daidemo, mercadomo naimie jainona ciode. Jamai itimaci. ⁴ Ie jira naimacimo lloite: “Cue illimo maijiai. Raise ibaiticue” lloite. ⁵ Ie mei jaidimaci. Jitoma naidai ia, jainona ciuanona, naimacimo maijillena lloite. Jitoma oni caidemo, jainona ciuanona, naimacimo maijillena jiai lloite. ⁶ Jitoma jasicí muido itemo, jainona ciuanona, jicanote: “¿Bue ñellena namonana jamai itomoí?” ⁷ Uai otimaci: “Jaca caimo maijille rana budi lloñede”. Ie jira naimacimo lloite: “Mai. Cue illimo maijiai” lloite. ⁸ Jitoma edaciidemo, naie patrón ie mullaímamo lloite: “Maijirainina uaido. Jinafona maijiaidinona raire nano iba. Ie mei jitiramo maijiaidinona jinafo iba” lloite. ⁹ Ie jira jinafona maijiaidinona nano ibade. Dabe ibade. ¹⁰ “Naimaci baifemo feiñoiticaí” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñotimaci. ¹¹ Ie jira naie patrón joreña jeare ñaitimaci: ¹² “Jinafona maijiaidino dallu maijidimaci. Ecasilla facaise maijiñedimaci; iadedi namonana maijidicaí. Dani cai íbaja isoi íbadio” ñaitimaci. ¹³ Naimacimona damiemo naie patrón lloite: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. ¹⁴ O ucubena jai o feiñua jira, mai jai. Cue jitailla jira, da o íbaja isoi dallu maijidinona íbadicue. ¹⁵ Cue ucubena jira, cue jitailla isoi cue íbaia, ¿niese cuena jeare ñaitomoí? Jiaínona cue duenailanona, ¿bue ñellena uradoidomoí? Mai jai” lloite. Jusiñamui ie cominina sedaacana omoi raise uiñollena, bie rafue jai lloticue. ¹⁶ Jamai bue isoidomoí. Omoimona jiaíno jamai bue isoifedimaci; ia naimie cominina naimaci jaillamona, Jusiñamuimona naimaci diga daje isoidomoí. Naimie diga jaca iitomoí.

Jesúdi ie fiodaillena dane llua rafue

(Mr 10.32-34; Lc 18.31-34)

¹⁷ Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite. ¹⁸ Raite: —Ero, Jerusalémo jai jaidicaí. Monamona billanona, imana jaidicue; iadedi omoi illaicominini cuena gaitaitimaci. Gaitaja mei, cue meinellena lloitimaci. ¹⁹ Judíuaiñedino illaicominimo cuena fecaitimaci. Cueri

jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

Jesús dine Jacobo Juan iaímaiaí ei billa rafue

(Mr 10.35-45)

²⁰ Naie facaise Jesús dine Jacobo, Juan iaímaiaí ei diga, bitiaímaiaí. Iaímaiaí moodi Zebedeo. Jesús dine iaímaiaí ei illanona, naimiena raise uaidollena, caiñici ífodo ana rainadacaida lloite:

—Omo daje rafue jicanoiacadicue.

²¹ Naiñaiño mo Jesús dinena jicanote:

—¿Bue ñiaíbitio?

Naiñaiño uai ote:

—Illaimana o jailla mei, cue jito iaímaiaí o ecimo illana o llua jitaidicue. Damie o nabeimo. Jiaímie o jarifebeimo. —Jiaíno baifemo iaímaiaí illena, naiñaiño iese lloite. ²² Naimacimo eruailanona, Jesús dinena uai ote:

—O jitaillacinona raise uiñoñedio. Cue duere sefuiticue.

Naiñaiño jito iaímaiaímo jicanote:

—¿Ie isoi duere sefuiacadomico?

Uai otiaímaiaí:

—Jii.

²³ Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

²⁴ Iena jiaie llofueoicaigano cacajano, naie iaímaiaíriciritimaci. ²⁵ Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci; ²⁶ iadedi omoi dine iese iñena. Omoimona bu imiema iacania, omoi mullaímama naimie jaisoillasa. ²⁷ Omoimona bu imiema iacania, omoína naimie canocana jaisoillasa. ²⁸ Cuemona fueo. Biñedicue cominina cue ocuillena; iadedi cominina canuaíbidicue. Cue jitailla jira, nana comini facaina fiodaisaíbiticue. Naimaci jeacinomona naimaci jillobil-lena, fiodaisaíbiticue. Ailluena comini cuena inuamona jilloitimaci. Coninina omoi canua —lloite.

Jesús mena uisindiaímaiaína jillotaja rafue

(Mr 10.46-52; Lc 18.35-43)

²⁹ Jericó railla nairaimona jaidimacimo, ailluena comini naimaci jinafona racadimaci. ³⁰ Ie facaiseconi mena uisindiaímaiaí nai fueo raidiaímaiaí. Jesús naiedo jaillano cacajano, naimiena ado uaidotiaímaiaí:

—David micorí Jitona o illamona, Jusiñamuimona o billa jira, cocona duenai. Cocona cano.

³¹ Iaímaiaí Illicaillena, Jesús diga jaidino iaímaiaína lletate; iadedi eo cuirioidiaímaiaí:

—Maestro, David micorí Jitona o illamona, cocona duenai.

³² Iaímaiaína Jesús cacajano, ieconi naidadajanona, iaímaiaína uaidote. Jicanote:

—¿Niese omicono cue nibaiana jitaídomico?

³³ Uai otiaímaiaí:

—Maestro, coco uisina o cioitajana jitaídico.

³⁴ Iaimaiaina duenaillanona, iaimaiaí uisina jetade. Ieconí iaimaiaí uisidí cide. Iaimaiaí jai cianona, ie llofueganona iaimaiaí jaillena, Jesús diga jaidiaímaiaí.

Jesús illaíma isoi Jerusalémo jailla rafue

(Mr 11.1-11; Lc 19.28-40; Jn 12.12-19)

21 Oni jaillanona, Jerusalémo iaireicaídímáximo, Betfagé railla nairaímo Jesús ie llofueoicaigano diga ridímáxi. Olivos railla anedumo ite. Ie llofueoicaiganomona Jesús menamiena orede. ² Raite:

—Bie nairá illa uicomo mai omíco jai. Nainomo cuinaca burra baitomíco. Ie ecímo ie uruena baitomíco. Naie iaimaiaína suiñuano bene atí. ³ Omícomo “¿Bue ñellena bie suiñodomíco?” bu jicanoia, llono: “Coco Nama naie iaimaiaína jitaide. Naillí naimie iaimaiaína raíre abído oretaite” —raite.

⁴ Jusiñamui facaina lloaíma micorí jaie llua isoi, bie rafue suide. ⁵ Naimie micorí jaie cuete:

Jerusalén itínomo llono:

“Ero, omó illaíma omóina sedallena biite.

Abí iedoñeno biite.

Burra urue emododo naimie biite”

cuete. ⁶ Iaimaiaí jaillanona, Jesús llua isoi finodiaímaiaí.

⁷ Burra ie urue diga atidiaímaiaí. Burra urue emodomo naimie llofueoicaigano naimáxi iniroina jobianona, ie emodomo Jesús rainadate. ⁸ Naimiena iobitallena, illaíma isoi naimie jaillena, ailluena comíní imáxi iniroi diga, naiso motomo jobedímáxi. Jiaíno raforono uanona, naiso motomo jobedímáxi. ⁹ Dajerie Jesús uicomo jaidímáxi. Dajerie naimie jinafona jaidímáxi. Ado cuiriisite:

—¡Cai jilloitaráíma billa! ¡Naimiedí David micorí Jito! ¡Jusiñamui mamecido bitímie eo mare! ¡Jusiñamui cáina jilloitajasa!

¹⁰ Jerusalémo naimie ridemo, nana nainomo itino naie rafuena uíñoiacadímáxi.

—¿Buta bite? —jicanotímáxi. ¹¹ Jesús diga bitino díne-na uai otímáxi:

—Jesús bite. Naimiedí Jusiñamui facaina lloaíma. Galileamo ite Nazaret imie.

Jesúdí Jusiñamui jofomona damieriena dotaja rafue

(Mr 11.15-19; Lc 19.45-48; Jn 2.13-22)

¹² Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaína fecallena, naimiemo toíca llaudaiaína fecallena, nainomo comíní jaisoidímáxi. Naie comínina íbatajanona, ofomaiaína, toíca llaudaiaí diga, damierie fecauídímáxi. Iena Jesús cianona, naimáxi mesaiaína oni caicode. Ucugina fecauídino rairacuáí jiaí oni caicode. ¹³ Naimacímomo llote:

—Ie facaina lloaíma Jusiñamui llogacino jaie cuela: “Cue jofo ite, nainomo cuemo comíní jiaíllena” cuela. Ero, ailluena omó íbataja jira, naimie jofona fíiruidino jofona omó finoca.

¹⁴ Ie facaise uisínidino Jusiñamui jofomo naimie díne bitímáxi. Ñuja-ñujacaida macarítino jiaí bitímáxi. Naimáxi billanona, Jesús naimacina jillotata. ¹⁵ Nain-

omo Jesúdí diga mare rafuena finode. Diga comínina jillotata. Iena cianona, nainomo ite uruaí ado cuiriisite:

—David micorí Jitori iobidícaí. Jusiñamui lloaíni micorí jaie llua isoi, cáí jilloitaráíma jai ite.

Iena cianona, iena cacajanona, judíuaí illaicomíní iciritímáxi. ¹⁶ Naimiemo jicanotímáxi:

—¿Bie uruaí cuiriillana cacadó?

Jesús díne-na uai ote:

—Jii, cacadícue. David micorí iena jaie cuete. ¿Niese iena cacañedomoí? Naimie cuete:

Naimiemo Jusiñamuidí uruaína mare iobillacinona fecataite.

¹⁷ Naimacina faínonocaida, Betaniamo Jesús jaide, nainomo inillena.

Jesús higuera railla riarana faidua rafue

(Mr 11.12-14, 20-26)

¹⁸ Ie areruido Jerusalémo abído ie llofueoicaigano díga Jesús bia, aimetaite. ¹⁹ Naí fuemo higuera railla riarana cianona, iena jibuide. Naiemo naie llisilladí iñede. Dama ie ibena cide. Ie jira naie amenana llote:

—Biemona jaca llisíñeite. —Iese railla dacaíño naie riaradí duide. ²⁰ Ie llofueoicaigano iena cianona, rajijicallamona raitímáxi:

—¿Niese naie riará raíre duide?

²¹ Jesús díne-na uai ote:

—Uanaicínona omóimo lloíticue. Cue Moona raise omó inoia, bie isoide rafuena finoitomoi. Raise omó inoia, omóí comeci igireñenia, bene ite anedumo omóí lloia: “Monailaimo o illena, benomona mai jai”, Jusiñamui o jitaílle rana finoite. ²² Naimie iena finuana omóí inuamona, nie isoide rafue cue Moomo omóí jicajia, iena naimie finoite.

Jesúdí ie síño uaina llua rafue

(Mr 11.27-33; Lc 20.1-8)

²³ Jerusalémo rillanona, Jusiñamui jofomo Jesús fo jailla mei, nainomo ite comínina llofueite. Judíuaí illaicomíní naimie díne billanona, jicanotímáxi:

—¿Nie isoide uaido o finoca rafuena finodio? ¿Bu omó iga uai diga o finoca rafuena finodio?

²⁴ Jesús díne-na uai ote:

—Omóimo daje rafuena nano jicanoíticue. Raise omóí fairioia, omóimo cue uaido cue finoca rafuena lloíticue. ²⁵ Juan Bautista micoridí comínina navu bautizade. ¿Bu naimie micorína orede, comínina bautizalena? ¿Jusiñamui? ¿Comíní? Cuemo llono —llote.

Daní coníníri iena siaduanona, anado raitímáxi:

—“Jusiñamui” cáí fairioia, cáimo jicanoíte: “¿Bue ñellena naimie micorí lluaína inoñedomoí?” ²⁶ “Comíní” cáí fairioia, bene itino cáina níbaí meineítímáxi, Juan micoridí Jusiñamui facaina lloaíma naimáxi railla jira.

²⁷ Ie jira fairiotímáxi:

—Uíñoñedícaí.

Jesús díne-na raite:

—Ie muidona cuemo nie isoide uai illana omóimo llóñeíticue.

Jesúdi mena jito iaimaia illa llua rafue

²⁸ Judíuai illaicominimo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo birui maijiai”. ²⁹ Uai ote: “Jaiacaiñedicue” llote. Dally illanona, ie comecina dane facajano, maijiaide. ³⁰ Jiaie jitomo daje isoi llote. Naimie uai ote: “Jii, maijiaiticue” llote. Iese llote; iadedi maijiaifede. ³¹ ¿Nie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoína ñaiticue. Omoimona maraiñedimaci; iadedi Jusiñamui cominina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiai iitimaci; iadedi nainomo jaca iñeitomoi. ³² Marena omoi comeciaina itatallena, Juan micori navui bite; iadedi naimie micorina iñoñedomoi. Ucube oraini naimie micori rafuena iñotimaci. Callirediñaiñuui naimie micori rafuena iñotimaci. Iena uiñotomoi; iadedi omoi comeciaini iuaillaina meidoiñedomoi. iñoñedomoi.

Jesúdi maraiñede maijiraini rafuena llua rafue

(Mr 12.1-12; Lc 20.9-19)

³³ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jiaínomo fecade. Ie mei jiaie eniruemo jaide. ³⁴ Uvas jai einalla facaise riaraiaina sedaraini dine naie patrón janore mullaiaaina orede, naimie facaise iedinona naimie feiñollena; ³⁵ iadedi naie sedarainidi ie mullaiaaina duere finosite. Daje mullaimana fatimaci. Jiaimiena meinetimaci. Jiaimiena nofici na fairnotimaci. ³⁶ Ie mei patrón jiaie mullaiaaina orede. Naimacina jiai duere finodimaci. ³⁷ Ja muidomo ie jitona orede. “Cue jitona jaciruitimaci. Naimie uaina iñotimaci” comecina facade. ³⁸ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. ³⁹ Naimiena jino dotajanona, naimiena meinetimaci. ⁴⁰ Naie illi nama ico abido bille mei, ¿nie isoide rafuena naimie naie illina sedarainina finoite? Cueno llono —llote.

⁴¹ Judíuai illaicominini uai otimaci:

—Naie maraiñedinona dueruiñeno meineite. Ie mei jiaie cominimo naie illi fecate, iena sedallena, naiemona riarana feiñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraíma micori omoína jaie cuete. Ie cuezafuena raise facañedomoi. Naimie micori cueda:

Jofo finoraini jitaiñena noficidi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona, “Eo mare” raiticai cueda. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena iñuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. ⁴³ Jusiñamuidi ie cominina sedajanomo omoína itatañeite; iadedi jiaie cominina nainomo itataite, naimie jitailla rafuena naimaci finua jira.

⁴⁴ Jesús llote:

—Naie nofici naie dane ñaiticue. Noficimo bu eicaitaia, bofedaite; ia naie nofici bumo ana uaia, naimiena saitaite. Ie isoide. Cue llua omoi jamaia, duere sefuitomoi. Iena omoi iñoñena, ja muidomo faifitomoi.

⁴⁵ Jesús llua naie judíuai illaicominini cacajanona, naimiedi naimacina ñaiana jai uiñotimaci. ⁴⁶ Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraímana raillanona.

Jesúdi illaima ie jito aina ua llua rafue

22 Jusiñamui jofomo Jesús nia illanona, nainomo itinona llofuate:

² —Jusiñamui dibeimo comini jailla rafuena omoimo lloiticue. Iena omoi uiñollena, bie rafuedo iena lloiticue. Illaimadi ie jito ai ua rafue finode. ³ Naimie ie mullaini orede, rafuemo llogano uaidollena; iadedi nai llogano biacaiñedimaci. ⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. firetaiai, farediretaiai diga, jai faga. Jai nana fuite. Rafuemo mai bi’ ”. ⁵ Naimaci cacarefiacaiñede. Damie ie illimo jaide. Jiaimie ie chinganamo jaide. ⁶ Jiaíno mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. ⁷ Ie jira naie illaima eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate. ⁸ Ie meinoconi ie fiebide mullainimo llote: “Rafue guille jai nana finoca; ia llogano maraiñedimaci. ⁹ Naiso bojicaillanomo jai. Nana o ciolle diese llono: ‘Rafuemo bi’ llono”. ¹⁰ Ie jira ie mullaini jai naisona jaide. Maraiñedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaima nainomo fecaca iniroina jítadimaci. ¹¹ Illaima fo bia, mesamo itino jibuillena, dinomo daje iima rafue ie mare iniroina jitañenana ciode. ¹² Naimiemo jicanote: “Nabai, ¿niese bene rafue ie mare iniroina jitañeno bitio?” jicanote. Naimie uainicaide. ¹³ Ie jira naie illaima ie mullaiaimo llote: “Naimie cuena iñoñena jira, naimie onolli daje mo nitaicaida maino. Ie eillina daje isoi maino. Cuenomona naimie jino dota. Nainomo itino diga duere sefuite. Jiai sunaite” llote. ¹⁴ Ero, naie rafuemona omoi fueo. Illaima ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

Jesúmo gobiernomo ucubena fecajana jicanua rafue
(Mr 12.13-17; Lc 20.20-26)

¹⁵ Naimacimo Jesús llua mei, fariseuai comini abido jaillanona, coniniri siadotimaci. Naimie raise uai ofe-dena, naimiena duere finollena, Jesúna facaciacadimaci. ¹⁶ Ie jira naimie dine naimaci cominimona dajerie oredimaci. Herodianuai railla cominina jiai jaidimaci. Jesús dine rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio.

¹⁷ Omo rafuena jicanoiacadicaí. Dani Jusiñamuina sedadicaí; iadedi romanos railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —llo timaci.

¹⁸ Naimaci comecaina marañedicinona facajana Jesús uinamona, uai ote:

—¿Bue ñellena cuena facacitomoí? Maredinona abi caitadomoí. ¹⁹ Ucube cuemo acata —llote. Ie jira acatatimaci.

²⁰ Jesús dinena jicanote:

—¿Bu ie joreño nainomo ite? ¿Bumo jainaiaide bie cuega radi?

²¹ Uai otimaci:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

²² Naimie llua cacajano, rajicadimaci. Naimie jeare uai ofena jira, naimie dinomona oni jaidimaci.

Jesús dine saduceuai railla comini billa rafue

(Mr 12.18-27; Lc 20.27-40)

²³ Naie facaise saduceuai railla comini naimie dine bitimaci. Fiodaillamona jaca buna jilloñellena ñnotimaci. Jesúmo llotimaci:

²⁴ —Maestro, Moisés micori jaie cuega: “Fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

²⁵ Ero, cai motomo siete amatiaí ite. Nano doforamie ie aina ote. Naimie nia uruiainide fiodailla. Ie emodo imie ie ama feciñona ote. Uruiaínide jiai fiodailla. ²⁶ Naie siete digamiedemona iese sefuide. ²⁷ Ja muidomo naie riño jiai fiodaite. ²⁸ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llo timaci.

²⁹ Jesús uai ote:

—Moisés micori cuegafuiaína raise omoi uifioñena jira, Jusiñamui uaina raise omoi uifioñena jira, bie isoide rafuena raise uifioñedomoí. ³⁰ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi iitimaci. ³¹ Fiodaitino jilluana omoimo lloiticue. Jusiñamui omoi jaiagaímo jaie llogacinona ñnoñedomoí. Naimie llote: ³² “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi

dani cagedino imaci Jusiñamuina jira, naimaci joreñuai naimie dine itimaci. Ico naimaci abiaína jiai jillotaite —llote. ³³ Nainomo ite comini iena cacajano, naimie llofuiari rajicadimaci; ia saduceuai dinena uainicadimaci.

Jesús nanoca llogacinona llofua rafue

(Mr 12.28-34)

³⁴ Saduceuai comini uainicaillana fariseuaidi jai fidiano, Jesús dine ofidimaci. ³⁵ Naimacimona damiedi Moisés micori jaie llogacinona eo uifioñote. Jesúna facacillena, naimiemo jicanote:

³⁶ —Maestro, Moisés micori jaie llogacinuaimona, ¿nie llogacino ua nanoca llogacinona?

³⁷ Jesús dinena uai ote:

—Moisés micori jaie cuega: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”. ³⁸ Bie ua nanoca llogacino. ³⁹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. ⁴⁰ Bie mena llogacinomona nana jiaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraíni micoriaí llogacinuai naiemona comuide —llote.

Jesús dinena fariseuai cominimo jicanua rafue

(Mr 12.35-37; Lc 20.41-44)

⁴¹ Naimie dine nia fariseuai comini ia, Jesús naimacimomo llote:

⁴² —Jusiñamui lloraíni micoriaí jaie raitimaci: “Jusiñamuidi Cristo raillamiena oretaitaite, ie cominina sedallena”. ¿Niese naimiena raitomoí? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

⁴³ Jesús dinena jicanote:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai. Ona ñnoñedino o anamo itataitacue”.

⁴⁵ “Cristodi cue Nama” David micori raite. Iese naimie micori railla jira, Cristo David micori afemo faite.

Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

Jesúdi judíuai illaicominina ñaia rafue

(Mr 12.38-40; Lc 11.37-54; 20.45-47)

23 Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimomo llote:

² —Moisés micori llogacinuaina llofuerainidi naie rafuedo jai jaicabidimaci. Fariseuai comini iedo jiai jaicabidimaci. ³ Naimaci llofuiacinodo omoi jai.

Naimaci llofuiana omoi cacarefi; iadedi naimaci illa isoi

omoï iñeno, naimaci llofuiacinodo naimaci jaiñena jira. ⁴ Omoï einamaci llogacinuaido raise omoï jaillena, diga rafuena omoï finuana jitaïdimaci; iadedi iedo omoï jaillena, omoïna jaca canoñedimaci. “Jusiñamuina eo raise sedadicaï” comecina facadimaci. Iemo naimaci comecina facajamona, ⁵ iena omoï cioillena, nana naimaci finua rafuena marefodo finodimaci. Jiaie cominimo ite Jusiñamuimo jirabe baifemo faitibena uiacacabidimaci. Iniroi fuedadi aillofena jonegana gaidimaci. ⁶ Rafue ia, naimaci jamai bue isoifinedinomo comecina facajonona, rafue nama ecimo raicadimaci. Ofiracomo uicomo raicadimaci, comini naimaciri acarillena. ⁷ Nine naimaci jaia, nana comini naimacina uaiduana gaidimaci. Maestrodicinona uaiduana jiaï gaidimaci. ⁸ Jusiñamuina eo raise naimaci sedajana omoï uifnuana jitaïdimaci. Naimaci isoi iñeno. Omoï damacina jira, omoïmona damie omoï baifemo faïamo comecina facañeno. Naimiena maestrona raiñeno. Omoï baifemo cue illanona, omoï maestrodicue. ⁹ Omoï Moo Jusiñamui monamo illanona, dama naimiena seda. Jiaimiena sedañeno. Jusiñamui isoi jiaimiena “Moo” raiñeno. ¹⁰ Omoï damacina jira, omoïmona damiena “Cai illaima” raiñeno. Omoï illaimana jai iticue. ¹¹ Omoïmona bu imiena jaiacania, omoï mullaimana naimie nano jaillamona, omoïna naimie canua. ¹² Jusiñamuidi “Jiaïno afemo iticue” raillano comecina facadimiena jamai bue isoidimiena itataite; ia Jusiñamuidi “Jiaïno afemo iñedice” raillano comecina facadimiena jamai bue isoiñedimiena itataite.

¹³ Naie facaise Moisés micori llogacinona llofuerainidi fariseuai comini diga illanona, Jesús naimacimo llote:

—Jusiñamui omoïna duere finoite. Mareuidinona abi caitadinodomoï. Jusiñamui dibeimo comini illana jitaïñedomoï. Naimie dibeimo omoï illana jiaï jitaïñedomoï. Ie muidona Jusiñamuimona duere sefuitomoï.

¹⁴ “Jusiñamuina eo sedadimaci” omoïmo comini comeciaina facajana jitaïdomoï. Ie jira are jiidomoï; iadedi iese iñedomoï. Maraiñede rafuena finocabidomoï. Jifuianona feciñuai rana bairocabidomoï. Ie jira Jusiñamui omoïna eo duere finoite. ¹⁵ Damiena omoï dibeimo itatallena, omoï isoi Jusiñamui rafuedo naimie jaillena, diga rafuena finodomoï. Omoï dibeimo illa mei, omoï baifemo omoï einamaci llogacinodo naimie jaillana jitaïdomoï. Omoï diga ico naimie ua faifite. Cominina uanaïñedidinodo jaitatomoï. Iese omoï illa jira, duere sefuitomoï.

¹⁶ Omoï llofuiacino diga cominina canoñedomoï. Mareuidinona abi caitadinodomoï. Raicabitomoï: “Cai lloga uai cai finollena jiaï comini uifnollena, Jusiñamui jofomo ite oro mamecina llinoticaï; iadedi Jusiñamui jofo mamecina cai llinoia, cai lloga uaina cai finoñenia, caïmona mare. Jusiñamuimona duere sefuiñeïticaï” raicabitomoï. ¹⁷ Abi uifnoñedomoï. Omoï llofuiacino diga cominina canoñedomoï. Jusiñamui jofomo naie oro jainaïaïlla jira, naie orodi mare; iadedi naie oro naie jofo baifemo uaiñede. Abina omoï uifnoñena jira, Jusiñamui omoïna duere finoite. ¹⁸ Jiaï raitomoï: “Jusiña-

muimo faga toica ocaina jobaisoillano mamecina cai llinoia, cai lloga uaina cai finoñenia, caïmona mare; iadedi Jusiñamuimo fecaca toica ocaina mamecina cai llinoia, cai lloga uaina jaca finoïticaï”. ¹⁹ Abi uifnoñedomoï. Omoï llofuiacino diga cominina canoñedomoï. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede. ²⁰ Ero, Jusiñamuimo ocaina jobaisoillano mamecina omoï llinoia, nainomo ite ocaina mamecina jiaï llinotomoï. ²¹ Jusiñamui jofo mamecina omoï llinoia, Jusiñamui nainomo illa jira, naimie mamecina jiaï llinotomoï. ²² Monamo ite ra mamecina omoï llinoia, Jusiñamui illano nainomo illa jira, nainomona cominina naimie sedaja jira, naimie mamecina jiaï llinotomoï. Omoï llua rafuena omoï finoñenia, Jusiñamui omoïna duere finoite.

²³ Mareuidinona abi caitadinona omoï illamona, omoïmo nia lloiticue. Nana omoï illimo ite ramona, nana omoïmo ite ucubemona Jusiñamuimo janore jisa fecacabidomoï. Nana comini omoï isoi illena jitaïdomoï. Mare; iadedi nanoca rafuena jaca finoñedomoï. Jiaie cominimo omoï comecina facañedomoï. Jiaie cominina duenaïñedomoï. Omoï lloga uaina finoñedomoï. Nana naie isoide rafuena omoï jiaï finua. Iena omoï finoñenia, Jusiñamui omoïna duere finoite. ²⁴ Abina uifnoñedomoï. Jallecima jiroracomo ia, iena oni faga; ia aillue ra nainomo ia, iena cioñeno namo gutadomoï. Ie isoide. Omoï llofuiacino diga cominina canoñedomoï. Jusiñamui ie eo jitaïlla rafuedo comini jaillana llofueñedomoï. Nanocafueñededo comini jailla rafuena llofuetomoï. Nanoca rafuedo comini jaillana llofueñedomoï.

²⁵ Omoïmo nia lloiticue. Omoï einamaci llogacinodo eo jaidomoï; iadedi omoï comeciaina raise finoñedomoï. Eo fïdomoï. Jifuianona comini rana bairodomoï. Jeacinona finocana jaidomoï. ²⁶ Abina uifnoñedomoï. Da pocillos jinafo, da platos jinafo jocodino isoidomoï. Pocillos jerai, platos jerai jocoñedino isoidomoï. Omoï abina finodomoï; iadedi omoï comeciaina raise finoñedomoï. Nano omoï comecina raise fino. Mare rafue finocana jai. Omoï einamaci rafuemo comecina facañeno; ia Jusiñamui rafuemo comecina faca. Iese omoï jaiñenia, Jusiñamui omoïna duere finoite.

²⁷ Omoïmo nia lloiticue. Marena finoca raiäfo isoidomoï. Jinofe marena eruaide; iadedi nainomo mare ra iñede. Comini illaici jamai ite. Jai maraiñede. ²⁸ Ie isoidomoï. Marena eruaïdomoï; iadedi maredinona abi eo caitadomoï. Omoï comeciä eo maraisiñede. Omoï comecina raise omoï finoñenia, Jusiñamui omoïna duere finoite.

²⁹ Omoïmo nia lloiticue. Naimacimo birui omoï comeciaina raise facallena, Jusiñamui facaina lloraini micoriaï raiäfona marena eruaïllena finodomoï. Mareuidino micoriaï raiäfo emodo marena eruaïllena finodomoï, ³⁰ raillano: “Cai jiaïgai Jusiñamui facaina lloraini micoriaïna meinetimaci. Naie facaiseconi iticaïdena, naimaci isoi finoñedicaï. Cai jiaïgai isoi birui iñedicaï” raitomoï; ³¹ iadedi omoï lluamona Jusiñamui

facaina lloraini micoriai meinetino urui ai omoina uiñoticaí. ³² Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. ³³ Omoi marañena jira, jai o nairai isoidomoi. Ja muidomo iraimona jillobiñeitomoi. Nainomo duere sefuitomoi. ³⁴ Cue rafuena llo-lena, cue facaina llorainina omoi dine oretaiticue. Cue rafuena eo uiñotina omoi dine oretaiticue. Cue rafuena omoi raise uiñollena, llofueraini omoi dine jiai oretaiticue. Dajeriena meinetomoi. Naimacina coraitomoi. Omoi ofiracomu dajeriena faitomoi. Diga nairaimo naimacina duere finoitomoi. ³⁵ Abel micori jai e ite. Naimie maremie. Ie ama naimiena meinete. Naimie facaisemona omoi jaiagai ailluena mare cominina meinetimaci. Ie mei omoi jaiagai Zacariaña meinetimaci. Naimiedi Berequias jito. Jusiñamui jofomo Jusiñamui mo toica ocaina jobaisoillano ecimo naimiena meinetimaci. ³⁶ Uanaicino omoimo lloiticue. Naimacina omoi jaiagai meinia muidona, omoimona Jusiñamui birui ibana oite. Naimaci isoi marañede rafuena finocana jaidomoi. Jusiñamui omoina duere finoite.

Jesús Jerusalémo itinomo llua rafue (Lc 13.34-35)

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jai e meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie urui ai sedaja isoi, diga icañño cue anamo omoina uaidoia-cadicue; iadedi omoi dinena cuena jitaññedomoi. ³⁸ Iemona Jusiñamuidi omoi illanona jai fañnonocai e. ³⁹ Cue Moo dine jaiticue. Cue jailla mei, cuena cioññeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

Jesúdi Jerusalémo ite Jusiñamui jofu judaiana llua rafue

(Mr 13.3-23; Lc 17.22-24; 21.5-24)

24 Jusiñamui jofomona ie llofueoicaigano diga Jesús jino jaidemo, Jesúsna nai jofona eruaitatimaci. ² Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite nofici ai ico judaisite —llote. ³ Ie mei Olivos railla anedu dine rillanona, Jesúsnaie muidomo raídemo, ie llofueoicaigano naimiemo iena anado llotimaci:

—Jusiñamui jofu judaiana omo jicanoiadicai. ¿Niruido iena suite? Caimo llono. O abido billirui iaie iena, ¿nie isoide rafue suite, o abido billiruina cai uiñollena?

⁴ Uai ote:

—Omoina bie rafuena bu jifueñellena, omoi abina rairui. ⁵ Ailluena comini cue mamecido billanona: “Cristodicue” raitimaci. Diga cominina jifueitimaci. Iemona omoi abina rairui. ⁶ Jobaimiaí illena fidiitomoi;

iadedi jaciruiñeno. Iese suite; iadedi abido nia biñeiticue. ⁷ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo comini aime guitimaci. Diga illanuaimo ñuisañuaí suite. ⁸ Iese suia, omoi duere sefuillifue omoimo suite.

⁹ Cueno ññoñedino omoina gaitatajanona, omoina meinetimaci. Cue cominina omoi illamona, nana nairai ai omoina enoitimaci. ¹⁰ Naie facaise cue dibeimo itinomona ailluena abido danomo jaitimaci. Iemona duere omoi sefuillena, omoina janoñeitimaci; iadedi omoina enoillamona, omoina llogidoitimaci. ¹¹ Naie facaise diga comini raitimaci: “Jusiñamui facaina llorainidicaí”; iadedi Jusiñamui facaina llorainiññedimaci. Uanaicinona lloñeitimaci. Diga comini naimaci dibeimo itaitaitimaci. ¹² Jeacino eo comunicana jailla jira, ailluena comini conini isiruiñeitimaci; ¹³ iadedi cuena fañnonocaiññedimie ja muidomo monamo jaca iite. Naimiena jillotaiticue. ¹⁴ Diga cominidi Jusiñamui dibeimo comini ille rafuena nana nairaimo lloitimaci, nana nairai ai iena cacaillena. Ie mei abido biiticue.

¹⁵ Cue lluomo cacarei. Daniel micori Jusiñamui facaina lloraíma. Naimie micoridi jiaimie jearede rafue finollena jai e llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, ¹⁶ naiemona omoi jillobillena, duere omoi sefuiñellena, Judeamo omoi illamona, aneduai dine omoi aisí. ¹⁷ Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. ¹⁸ Aneduai dine raire rillena, illimo omoi ia, abido jofomo biñeno, omoi iniroi omoi diga uillena. ¹⁹ Naie rafuemono jillobillena, naie facaise urueside riño duere sefuite. Uruena nia jirode riñodi jiai duere sefuite. ²⁰ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jai e rairuide. Sábadoruimo bie rafue suiñellena, Jusiñamuimo jicano. ²¹ Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci. ²² Naie facaise ianori fo Jusiñamui oñeítana, buna jaca jillobiñeite. Naimie fetocano muidona, naie facaise Jusiñamui ianori fo oite.

²³ Ie facaise omoimo bu raia: “Jai, Jusiñamui facaina lloraíma benomo birui bairede. Naimiedi Cristo”, iena ññoñeno. Jiaimie raia: “Oni batine Cristo birui bairede”, iena ññoñeno. ²⁴ Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²⁵ Ero, bie rafue nia suiñenia, iena omoimo jai lloticue. ²⁶ Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ññoñeno. ²⁷ Mona borillamona mona jillacidi usere cide. Nana cominimo bairede. Ie isoide. Cue abido bia, nana comini iena uiñoitimaci. ²⁸ Urujaisai rifaide ramo ofillana uiñua isoi, nana cuena ñnotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

²⁹ Jesús llote:

—Naie duere sefuilla facaise meinocni jitoma lli-gaiñoñeite. Fivui jiai lligaiñoñeite. Monamona ucuai llujite. Nana naie radi jaidisite. ³⁰ Ie mei monamo baireiticue. Ieconí nana nairaiaí jarire iitimaci. Jacinaitimaci. Uillie motodo cue billena cioitimaci. Ebire biticue. Naimacina cue sedallena, illaimana biiticue. ³¹ Cue jaienisaína cue ecimona oretaiticue. Ado trompeta ficiretajano, cue fetocano diese naganomona ofitaitimaci.

³² Higuera railla riaromona omoi fueo. Bie eniruemo naie riará firuillamona, femona raire illana uiñotomoi. ³³ Ie isoide. Bie rafue ico suia, cue billirui iaiei illena uiñotomoi. ³⁴ Uanaicinona omoimo lloiticue. Nana bie rafue suille facaiseconí bie nairaí nia iite. ³⁵ Mona enirue diga fuite; iadedi cue lloga uai jaca suite. ³⁶ Cue abido billirui jaca bu uiñoñede. Jusiñamui jaienisaí iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. ³⁷ Abido cue billirui iaiei ia, Noé micori facaiseconí itino isoi comini iitimaci. Naimaci duere sefuillemo Noé micori facaise itinodi comeciaina facañedimaci. ³⁸ Naie facaiseconí nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. ³⁹ Nia noci deiñenia, Noé micori lloga uaina iñoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ⁴⁰ Naie facaiseconí menamie illimo danomo iitiiaimaiaí. Damie Jusiñamui dine jaite. Jiaimie fiebillanona, Jusiñamuimona duere sefuite. ⁴¹ Mena riño danomo doberitiaiñuaí. Dañaiño Jusiñamui dine jaite. Jiañaiño fiebillanona, Jusiñamuimona duere sefuite. ⁴² Cue billirui omoi uiñoñena jira, iemo ocuri. ⁴³ Bie rafuemo omoi comeciaina omoi faca. Jofo namadi firiraima nie naiona billena uiñotena, ie rana faifiñellena, ie jofona raise sedade. ⁴⁴ Ie isoi cue billemo ocuri. Monamona ico abido biiticue. Omoi ocuriñena facaisemo riiticue. Ie jira cue billemo nagarui ocuri.

Jesúdi patrón ie mullaimana ie jofona sedataja llua rafue

(Lc 12.41-48)

⁴⁵ Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaima inogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide. ⁴⁶ Patrón ico abido bia, ie jofona ie mullaima raise sedaia, mullaimari naimie iobillamona, ie mullaima marena iite. ⁴⁷ Iobillamona, patrón ie mullaimana nana ie raruiaína

sedatataite; ⁴⁸ iadedi ie mullaima maraiñenia, ie comecina facaite: “Cue patrón are biñeite. Naimie lloga uaina finoñeiticue”. ⁴⁹ Ie comecina iese facaja jira, naimie anamo ite mullaiaína faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafue na finoite. ⁵⁰ Ie ocuriñena facaise ie patrón abido billanona, naimiena duere finoite. ⁵¹ Ie isoide. Cue abido bia, cuena inotinori iobiticue; ia cuena inotinona abi caitadino dine cuena inoñedinona dotaiticue. Nainomo duere sefuillano eetitimaci.

Jesúdi diez jitañuaina llua rafue²⁵ Jesús llote:

—Abido cue bia, Jusiñamui ie cominina sedaite. Cue billemo ocuritinona sedaite. Naie facaise ite cominidi diez jitañuaimo ite rafue isoidimaci. Naiñaiñuaí lamparínai llinuanona, iima ie aina ua meinomo finoca rafuemo jaiacadimaci. ² Lamparínai unellena, farena naiñaiñuaí uilla jira, cinco diga abina uiñotimaci. Farena naiñaiñuaí uiñena jira, cinco diga abina uiñoñedimaci. ⁵ Iima diga ie rafue dine jaillemo ocuridimaci. Iima are biñena jira, inidimaci. ⁶ Daje dberuisse damie ado llua cacadimaci. Llote: “Jai, naie iimadi jai bite. Mai bi, naimie uicomo naimiemo cai dafañillesa”. ⁷ Casillanona, naie jitañuaí lamparínai unedimaci. ⁸ Abi uiñoñediñaiñuaí dinena abi uiñotiñaiñuaimo jicadimaci: “Farena caimo feca. Cai lamparínai boacañedesa”. ⁹ Uai otimaci: “Fecacañedicaí. Omoimo cai fecaiadedi, caimo baiñeite. Omoi jitaia, chinganomo ibajai”. ¹⁰ Naiñaiñuaí ibajaila mei, naie iima ride. Naimiemo ocuridiñaiñuaí diese naimie diga nainomo guillena, rafuemo jaidimaci. Naimaci fo jailla mei, nase naie iima ibaide. ¹¹ Ie mei naie farena ibajaidiñaiñuaí abido billano, raitimaci: “Nase econo”. ¹² Naie iima uai ote: “Uanaicinona omoimo lloiticue. Omoína uiñoñedicue. Econoñeiticue”. ¹³ Ie isoide. Cue billiruina omoi uiñoñena jira, nagarui cue mo omoi ocuri.

Jesúdi patrón ie mullaiaimo ucubena fecaja llua rafue¹⁴ Jesús llote:

—Abido cue bia, Jesiñamui ie cominina sedaite. Naie facaise ite comini daje patróno ite rafue isoide. Patrón jiaie enirue jiacana jira, ie mullaiaína ie ucubena eenotade. ¹⁵ Damie cinco diga ucubena fecade. Jiaimie menacubena fecade. Jiaimie dacubena fecade. Nagamie ie maijille dinori fecade. Ie mei oni jaide. ¹⁶ Cinco diga ucubena feiñotimie jaillanona, iena fecallena, rana ibade. Iemona jiaie cinco diga ucubena ote. ¹⁷ Menacubena feiñotimie iena fecallena, rana ibade. Iemona jiaie menacubena ote. ¹⁸ Dacubena feiñotimie eniruemo naie ucube eenote. Iena fecallena, rana ibañede. Iemona buena oñede. ¹⁹ Digarui illanona, naie patrón abido bite. Naimaci cuentas siadollena, ie mullaiaína uaidote. ²⁰ Cinco diga ucubena feiñotimie bite. Ie ucube atiano raite: “Patrón, cinco

diga ucubena cuemo fecadio. Jiaie cincona oticue".
²¹ Patrón uai ote: "Raise marena maijidio. Eo mare mul-
 laimadio. Janore ucube o raise sedaja jira, ona ailluena
 rana sedataiticue. Cue diga caimare jaca iitio".²² Men-
 acubena feiñotimie bite. Raite: "Patrón, cuemo men-
 acubena fecadio. Iemona jiaie menacube oticue".
²³ Naimie patrón uai ote: "Raise marena maijidio. Eo
 mare mullaimadio. Janore ucube o raise sedaja jira,
 ona ailluena rana sedataiticue. Cue diga caimare jaca
 iitio".²⁴ Daucubena feiñotimie bite. Raite: "Patrón, o
 riirenana uiñoticue. O mullaiaí maijiamona
 ganacabidio.²⁵ Ucubena cue faifiñellena ona
 jaciruiticue. Ie jira eniruemo o cuemo iga ucubena
 eenoticue. Jadi, iena jai abido atidicue".²⁶ Patrón uai
 ote: "Marañedio. Rairaidio. Cue mullaiaí maijiamona
 cue ucube uana uiñotio.²⁷ Bancomo naie ucubena
 jonetiodena, naie ucubemona jiaie ucube janore ua-
 mona, abido cue bia, iena feiñoticue".²⁸ Ie mullaiaímo
 llote: "Naimiemona ie ucubena bairo. Diez ucube il-
 lamie mo iena feca. Bie marañiede mullaíma
 jitiñedinomo cuemona oni dota. Nainomo comini
 duere sefuillanona eetitmaci". Jusiñamui ie jitailla ra-
 fuena finodinona: "Mare" raite; iadedi ie jitailla ra-
 fuena finodinona duere finoite. Jusiñamui omoína duere
 finoñellena, cue abido billirui omoi uiñoñena jira,
 Jusiñamui jitaillacinona finocana omoi jai.

Jesúdi cominina duere finolle llua rafue

³¹ Jesús llote:

—Omoína nia llofueiticue. Abido cue bia, nana cue
 jaienisaí diga biiticue. Illaímana ico cue bia, illaíma illa
 ifomo iiticue. Eo siño uaido biiticue.³² Cue uicomo
 nana nairaiái ofitimaci. Toica llaudaiaí sedaraima ie
 chivos motomona ie llaudaiaí oni fetua isoi, naimacina
 fetoiticue.³³ Cue jitaillacinona finodino diese cue fetu-
 anona, cue nabeimo itataiticue. Cue jitaillacinona
 finoñedino diese cue fetuanona, cue jarifebeimo
 itataiticue.³⁴ Cue illaímana jira, cue nabeimo itinomo
 lloiticue: "Cue Moo omoiñi iobillanona, omoína jai cai-
 mare itatate. Cue Moo cominina omoi illa jira, cue
 sedajanomo mai bi. Nainomo duidomoí.³⁵ Cue jitaill-
 acinona omoi finuamona navui aimetaiticue, cue-
 na eadomoí. Jiroacaducue, jinui cuemo fecadomoí.
 Omoi nairai dine cue macaria, cuena omoi uiñoño
 omoi jofomo cuena feiñotomoí.³⁶ Iniroiniducue,
 iniroi cuemo fecadomoí. Duiducue, cuena canol-
 lena, cuena jibuisaíbidomoí. Cárcelmo iticue, cuena
 canollena, cuena jibuisaíbidomoí".³⁷ Cue jitaillacinona
 finodino dinena cuemo jicanoitimaci: "Nama, ¿niruido
 aimetaitiomo, ona eadicaí? ¿Niruido jiroacadiomo,
 jinui omo fecadicaí? ³⁸ ¿Niruido ona ciodicaí, cai jofomo
 ona feiñollena? ¿Niruido iniroina omo fecadicaí?
³⁹ ¿Niruido duidiomo, ona jibuisaidicaí? ¿Niruido cárcel-
 mo itiomo, ona jibuisaidicaí?"⁴⁰ Uai oiticue: "Ua-
 naicinona omoímo lloiticue. Cuena ñnotinomona jamai
 bue isoidimiena canodomoímo, cuena jiaí canodomoí"
 lloiticue.

⁴¹ Temei cue jarifebeimo itinomo lloiticue: "Cuemona
 oni mai jai. Cue cominiñedomoí. Jai faifidomoí. Duere
 omoi sefuillena, iraimo mai jai. Naie irai jaca duíñede.
 Jusiñamuidi naimana Taife iena jai finode. Jusiñamuidi
 Taife comini iena jiaí jai finode.⁴² Cue jitaillacinona
 omoi finoñenamona, navui aimetaiticue, cuena
 ecañedomoí. Jiroacaducue, jinui cuemo fecañedo-
 moí.⁴³ Omoi nairai dine cue macaria, omoi jofomo
 cuena feiñoñedomoí. Iniroiniducue, iniroi cuemo fe-
 cañedomoí. Duiducue, cuena canollena, cuena
 jibuisaíbiñedomoí. Cárcelmo iticue, cue canollena,
 cuena jibuisaíbiñedomoí".⁴⁴ Cuemo jicanoitimaci:
 "¿Niruido aimetaitiomo, ona ecañedicaí? ¿Niruido jiroa-
 cadiomo, jinui omo fecañedicaí? ¿Niruido ona ciodicaí,
 cai jofomo ona feiñollena? ¿Niruido iniroinidomo,
 omo fecañedicaí? ¿Niruido duidiomo, ona jibuisaíñedi-
 caí? ¿Niruido cárcelmo itiomo, ona jibuisaíñedicaí?"
⁴⁵ Uai oiticue: "Uanaicinona omoímo lloiticue. Diga
 comini cuena ñnotimaci. Naimacimona jamai bue
 isoidimiena omoi canoñena jira, cuena canoñedomoí"
 lloiticue.⁴⁶ Naimaci jaca isi cacaitimaci; iadedi cue jitaill-
 acinona finodino cue Moo sedajanomo jaca iitimaci.

Judíuai illaicomini Jesúsna gaitallena siadua rafue

(Mr 14.1-2; Lc 22.1-2; Jn 11.45-53)

26 Ie llofueoicaiganona llofuia mei, naimacimo
 Jesús llote:

² —Pascua railla rafue illena, menarui fiebide. Iena
 uiñotomoí. Monamona jaie cue billamona, iimana
 jaidicue. Cue fiodaillena cue Moo cuena oretate. Illaí-
 comini cuena coraillena, birui cuena gaitaitimaci
 —llote.³ Naie facaiseconi Jusiñamui diga nanoca
 ñairainidi, jiaie illaicomini diga, nanoca ñairaima jof-
 omo ofidimaci Nanoca ñairaimadi Caifás.⁴ Jesúsna j-
 fuiano gaitallena coniniri siadotimaci. Naimiena
 meinellena jiaí siadotimaci.⁵ Raitimaci:
 —Pascua railla facaise naimiena nia gaitañeiticai.
 Naie facaise naimiena cai gaitataia, iena gaiñena-
 mona, comini cai diga fuiritimaci. Nia sedaiticaí.

Jesúmo riño caimare soride ra totaja rafue

(Mr 14.3-9; Jn 12.1-8)

⁶ Betania railla nairaimo Jesús jaillanona, Simón jof-
 omo jaide. Simódi jaie efonaitimie.⁷ Naifomo mesamo
 Jesús guitemo, daje riñodi noticimona finoca frasco
 atiano, naie frasco llaillanona, nainomo ite caimare
 soride ra naimie ifogimo totade. Naie ra eo raifide.
⁸ Jesús llofueoicaigano iena ciuanona, iciritimaci. Con-
 iniri dani ñaitimaci:
 —Naie caimare soride ra jamai dotade. Jai faifide.
⁹ Iena fecacadena, eo ailluena raifide. Naie ucube
 dueredinomo fecadena, caimona mare.
¹⁰ Naimaci ñañana Jesús uiñua jira, naimacimo llote:
 —¿Bue ñellena naiñaiñoña jeare ñaitomoí? Mare ra-
 fuena cuemo finode.¹¹ Omoi diga dueredino jaca iti-
 maci; iadedi omoi diga jaca iñeiticue.¹² Cue abimo bie
 caimare soride ra naiñaiño totajamona, cue fiodaillirui
 facaina naiñaiño iese finode.¹³ Omoímo uanaicinona

lloiticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño fino-ca rafuena lloite.

Judas micorí raillamie Jesúna gaitataiacana rafue
(Mr 14.10-11; Lc 22.3-6)

¹⁴ Ie facaise Jesús llofueoicaiganomona Judas Iscariote micorí raillamiedí Jusiñamui diga nanoca ñairaini dine jaide. ¹⁵ Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci. ¹⁶ Naie facaiseconimona Jesúna gaitatalliruimo naimie ocuride.

Jesúdi ie fiodaille rafuena llua rafue
(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pascua railla rafue ia, siritaga rana guiñedimaci. Dani llomenicono guitimaci. Egiptomona cai jaigai jillobillana comecillena, naie rafue ite. Naie rafue tai-niaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

¹⁸ Uai ote:

—Jerusalémo omoi jaillanona, omoimo cue llogamienona omoi ciuanona, naimiemo llono: “Cai llofueraima fiodaille facaise iaiei ite. O jofomo ie llofueoicaigano diga pascua rafuena finoacade” llono.

¹⁹ Ie muidona ie llofueoicaiganodí ie llua finodimaci. Pascua railla rafue guille finodimaci. ²⁰ Nairui jitoma ana itemo, Jesús ie doce llofueoicaigano diga nainomo guisaide. ²¹ Naimaci mesamo guitimacimo, Jesús llote:

—Omoimona damie cuena gaitataite —llote. ²² Iena cacajanona, eo sunaitimaci. Damierie naimiemo jicanoside:

—¿Cuena ñaitio?

²³ Uai ote:

—Omoimona damie bie platomo cue diga llomenico diga mutade. ²⁴ Jusiñamui facaina lloaima cuega isoi, monamona jai billamona fiodaiticue; iadedí cuena gaitatitímie eo duere sefuite. Naimie jeicifegadena, cuemona mare.

²⁵ Jesúna gaitatitímiedí Judas micorí. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

²⁶ Naimaci nia guitimacimo, llomenicono Jesús llinuonona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodí cue abí facai ie. Cue abimo omoi comecina facajano, iena guiño.

²⁷ Ie mei naimie jiroracoma jiaí llino. Jusiñamuimo iobillacinona llua mei, naie jiroracoma jai totaca vino naimacimo fecajano, raite:

—Biemona nana omoi jiro. ²⁸ Cue fiodaillamona, dama cue diaillamona, naimaci jeacino anamona aillu-

ena biruimona jilloitímaci. Jusiñamuidí omoimo jiaie rafue birui itatajanona, omoi jeacino oni dotajana jai llote. Bie vinodí naie rafue facai ie. Cue llua isoi bie vinona omoi jiruamona, cue fiodaillamo omoi comeci. ²⁹ Omoína bene dane iese caimare nabaiñeticue. Cue Moo sedajanomo omoi diga cue ia, nainomo omoína dane iese caimare marena nabaiticue. —Iena jirodimaci.

Jesúdi Pedro naimiena januana llua rafue
(Mr 14.26-31; Lc 22.31-34; Jn 13.36-38)

³⁰ Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. ³¹ Jesús naimacimo llote:

—Cuemo suille rafue muidona, ja naio cuena fainonocaitomoi. Jusiñamui facaina lloaima micorí iena jaie cuega: “Toica llaudaiaí sedaraimana meinetaiticue. Naimie toiniaí uaficaida jaitimaci” cuega. Naimie micorí caina cuete. ³² Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

³³ Pedro uai ote:

—O finolle rafue muidona nana jiaíno ona fainonocaiena, ona jaca fainonocaiñeticue.

³⁴ Jesús dinena raite:

—Uanai omo lloiticue. Ja naio iitava nia ñaiñenia, daciño amani cuena janoitio.

³⁵ Pedro uai ote:

—O diga cue fiodaiadedí, ona janoñeticue.

Nana ie llofueoicaigano daje uaido jiaí raitimaci.

Jesúdi Getsemanímo Jusiñamuimo jiaí rafue
(Mr 14.32-42; Lc 22.39-46)

³⁶ Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana raí. Omoimona oni baí janore jaiticue. Cue Moo diga ñaillena, jaiticue.

³⁷ Pedrona uite. Zebedeo ie jito iaímaiaina jiaí uite.

Naimie sunaicaide. Ie comeci uri iñede. ³⁸ Naimacimo llote:

—Cue comeci sunaicaide. Niadí fiodaiticue. Benomo fiebi; ia nia iníñeno cue facaina omoi jii.

³⁹ Naimie janore baí jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedí cue comeci jitaillacinona finoñeno. Cuemo o jitaillacino fino —jiide. ⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia iñedemo.

⁴¹ Iníñeno. Taife ramo omoína faí raillano, iena omoi inoñellena, Jusiñamuimo jii. Omoi comeci mare rafuena finoacade; iadedí omoi comeci dani ocuiñoñede. Ie muidona Jusiñamuimo jii, omoína naimie ocuiñoñotal-

lona —llote. ⁴² Ie mei dane jiiillena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi llirioilla jira, naimaci inisitemo ride. ⁴⁴ Abido jailanona dane jide. Ailli daje isoiduaido jide. ⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, iimana jaidicue; ia ja fioidaiticue. Cuenaj gaitajanona, Jusiñamui jitailla jira, naimiena inoñedino anamo ja iiticue. ⁴⁶ A naidacai. Maiña. Cue gaitataitimie jai bite.

Jesúna gaitalle rafue

(Mr 14.43-50; Lc 22.47-53; Jn 18.2-11)

⁴⁷ Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairaimona bitimaci. Eina-maci dinena jiai bitimaci. ⁴⁸ Jesús dine naimaci nia riñenia, Judas micori naimie diga bitinomo jai llote:

—Jesúna omoi uifollena, naimiena llibanoiticue. Ie mei naimiena gaita —llote. ⁴⁹ Jesús dine naimaci ril-lanona, Judas micori Jesús dine raire jaide. Naimiena uaidote:

—Maestro, jai biticue. —Ieconi naimiena llibanote.

⁵⁰ Jesús dinena raite:

—¿Bue ñiaibitio?

Ie mei Judas micori diga bitinodi Jesúsna gaitadimaci.

⁵¹ Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaima ie mullaima jefona jaibonote. ⁵² Jesús naimiemo llote:

—O fuiriacania, o jiai fioidaitio. O lloebi dane eeno. Cue riiduanona, fuiriñeno. ⁵³ Cuenaj riidollena, cue Moomo cue jicaia, eo ailluena jaienisai cue dine naimie oretaitie; ⁵⁴ iadedi iese cuena riidoia, Jusiñamui facaina lloraini micoriai cuegafuiai suiñeite. Cue fioidaille rafuena cuetimaci —llote. ⁵⁵ Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Firiraimadicueta cuena omoi gaitajabilla. Jusiñamui jofomo nagarui llofuecabiticue; iadedi cuena gaitañedomoi. ⁵⁶ Nana bie rafue suide, Jusiñamui facaina lloraini micoriai cuegafuiai suillena —llote. Ie facaise nana naimie llofueoicaigano naimiena fainono-caillano, aisidimaci.

Jesúdi judúuai illaicomini dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesúsna gaitadinodi Caifás jofomo Jesúsna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamac jiai ofidimaci. ⁵⁸ Jesús jinafona Pedro aarena jaide. Caifás jofonairairimo jaide. Naie rafue fuiduana naimie uifollena, nainomo ite jofomo maijiraini diga raide.

⁵⁹ Naimiena meinellena, nana naie illaicomini Jesúsna nicino illana uifoiacadimaci. ⁶⁰ Iena coniniri siadotimaci; iadedi naimiemo jaca nie isoide marañede rafue illana uifoiñedimaci. Diga comini Jesúsna ñaitimaci; iad-

edi taino llotimaci. Ie mei menamie bitiaimaiaia.

⁶¹ Raitiaimaiaia:

—Bimie llote: “Jusiñamui jofona judairedicue. Judaia mei, darui amani illanona, iena dane finoredicue” —llotiaimaiaia.

⁶² Jusiñamui diga nanoca ñairaima Jesúsna jicanote:

—¿Niese iaimaiaia uai oitio? ¿Nie isoide rafue ona llogidotiaimaiaia?

⁶³ Jesús uai ofede. Naie ñairaima dinena llote:

—Cai Jusiñamui cajede. Naimie caina uifua jira, uanaicinona cai lloñenia, caina duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

⁶⁴ Jesús dinena uai ote:

—Jii, naimiedicue. Iena raise llotio. Monamona jaie cue billamona, iimana jaidicue; iadedi ico jairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiai cioitimaci.

⁶⁵ Iena cacajanona, naimiemo Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitaifedicaia. Ie ñaiamona dama naimie abina llogidote. ⁶⁶ ¿Niese naimiena raitomoi?

Jiai illaicomini dinena uai otimaci:

—Naimie fioidillesa.

⁶⁷ Ie mei naimie uiecona tuallaitimaci. Naimiena ducoidimaci. Jiai bucoidimaci. ⁶⁸ Raitimaci:

—O Cristodiodena, ¿bu o bucoia? caimo llono.

Jesús uai ofede.

Pedrodi Jesúsna janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofonairairimo ite. Naie jofonama mullaiño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite. ⁷⁰ Nana nainomo itinomo Pedro llote:

—O lluana uifoiñedicue.

⁷¹ Nase fuemo Pedro jaidemo, naimiena jiaie mullaiño ciuanona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uifote. O llogamiena uifoiñedicue.

⁷³ Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

⁷⁴ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uifote. Ero, Jesúsna uifoiñedicue. —Ieconi itava ñaite. ⁷⁵ Iena cacajano, Pedro Jesús lluana uibiñote. Jaive Jesús Pedromo llote: “Fitava nia ñañenia, dacaiño amani cuena janoitio” llote. Iena uibiñuanona, Pedro jino jaillano, sure eede.

Pilato dine Jesús illa rafue
(Mr 15.1; Lc 23.1-2; Jn 18.28-32)

27 Monaidemo, nana Jusiñamui diga nanoca ñairainidi, nana einamací diga, Jesúsna siadotimaci. Naimiena meinellena siadotimaci. ² Siadua mei, Jesúsna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fiodailla rafue

³ Judas micori Jesúsna jai gaitatate. Naie illaicomini Jesúsna meiniana lluaana naimie micoridi uiñuamona, ie comece iuaina meidote. Illaicominimo ie treinta diga ucubena abido atide. ⁴ Raite:

—Jesús marañede rafuena jaca finoñede. Naimie fiodañeite. Naimiena cue gaitatajamona, marañedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵ Ie mei Judas micori Jusiñamui jofojeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llirinote raona.

⁶ Jusiñamui diga nanoca ñairaini naie ucubena iraiamei, iena siadotimaci. Coniniri raitimaci:

—Naie isoide ucube nainomo joniana Moisés micorijai rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicaí. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci. ⁸ Naie ucube muidona damie fiodailla jira, birui naie enirue mamecidi dirue ie enirue.

⁹ Iemona Jeremías micorijai cueda rafue jai suide. Naimie micoridi Jusiñamui facaina lloraíma. Naimie micorí cueda: “Caí Israel railla cominimona damierie rail-la jira, naimiena meinellena, treinta ucubena fecaitimaci. ¹⁰ Naie ucube diga jiñora ocabilla eniruena ibaitimaci, caí Nama Jusiñamui llua isoi” cueda.

Pilato dine Jesús illa rafue
(Mr 15.2-5; Lc 23.3-5; Jn 18.33-38)

¹¹ Pilato railla gobernador uicomo Jesúsna atia mei, Pilato Jesúsno jicanote:

—¿Judíuai comini illaimadío?

Jesús uai ote:

—Jii. Raise llotio.

¹² Ie mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Ie abina riidoñede. ¹³ Ie muidona Pilato naimie-mo llote:

—Diga rafuena ona llogidotimaci. ¿Niese uai oñedio?

¹⁴ Jesús nia uai oñede. Ie jira Pilato uainicaide.

Pilatodi Jesús fiodaillana llua rafue
(Mr 15.6-20; Lc 23.13-25; Jn 18.38-19.16)

¹⁵ Naga año pascua railla rafue facaiseconi cárcelmo itinomona Pilatodi comini jicacamienna jamai jino orede. ¹⁶ Bie año cárcelmo Barrabás raillamie ite. Naimie mameci eo are soride. ¹⁷ Naie rafue illa jira, ail-luena comini naimie dine ofillano, naimacimo Pilato jicaneote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiaí ite. Naimiedi Cristona jiaí mameciredo.

¹⁸ Iese jicaneote; iadedi naimiedi Jusiñamui diga nanoca ñairaini Jesúsni uradoillana uiñote. Naimaci Jesúsna meineiacanana jiaí uiñote. ¹⁹ Ie maijiracomonaimie nia illanona, naie facaise Pilato ai naimie dine rabe orede. Cuete: “Bimiedi marañede rafuena jaca finoñede. Naimiena duere finoñeno. Jaive naio cue nicairillano, naimie muidona cue comece jarire ite”. ²⁰ Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —llotimaci. ²¹ Comini ofilla mei, naimacimo Pilato dane jicaneote:

—¿Nimie cue jino oretajana jitaidomoi?

Uai otimaci:

—Barrabás.

²² Pilato dinena jicaneote:

—¿Niese Jesúsna cue finuana jitaidomoi? Naimiedi Cristona jiaí mameciredo.

Nana uai otimaci:

—Naimiena cruzmo corai.

²³ Pilato dane jicaneote:

—¿Nie isoide marañede rafuena finode?

Naimaci dinena ado ibi llonoidimaci:

—Naimiena corai.

²⁴ Jesúsna jino oretajana jitañedimaci. Iena Pilato uiñuamona, comini jai uri iñenana naimie ciuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuedo jai duiñede. Naimie fiodaite omoí muidona.

²⁵ Uai otimaci:

—Dama iesede. Naimie fiodaite caí muidona. Jiaí caí uruai muidona.

²⁶ Ie mei Pilatodi Barrabás naimaci jitailla jira, jino orede; iadedi Jesúsna sechedotajanona, naimiena coraillena orede. ²⁷ Dajerie soldaduai Pilato jofomo Jesúsna uite. Nana soldaduai nainomo ofidimaci.

²⁸ Naimie iniroi duiñuano, naimie jiduirede iniroina jitañedimaci. ²⁹ Eecuaímona niga nuiciraina naimie ifogimo jitañedimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judíuai illaima. —Iese raillanona naimiena jifanododimaci. ³⁰ Naimiena tuallaitimaci. Naimie onollimo ite radosina naimaci llinoicaída, naiedo naimie ifogina buta-butadimaci. ³¹ Jesúsna naimaci jifanodua mei, naimie jiduirede iniroina duiñodimaci. Nano

naimie iniroina dane abido naimiemo jitadimaci. Ie mei naimiena coraillena oni uitimaci.

Jesúna coraia rafue

(Mr 15.21-32; Lc 23.26-43; Jn 19.17-27)

³² Jerusalémona naimaci jaillanona, Cirene railla eniruemona bitimiemo dafaifidimaci. Naimie mameci Simón. Naimiena Jesús uiga cruzna rocatatimaci. ³³ Gólgota raillanomo jaidimaci. Ifocoraína eruaiilla jira, iese mamecirede. ³⁴ Nainomo rillanona, ie abi isirena cacaiñellena, vinomo erirede rana faianona, naimiemo fecadimaci; iadedi iena naimie facajano, iena jiroñede. ³⁵ Naimie coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uñollena, jifanododimaci. ³⁶ Ie mei ana raidimaci, naimiemo eruaillena. ³⁷ Naimie ifogi afebeimo ie llogiduafluena jonetimaci. Iese cuega: “Bimiedi Jesús. Judíuai comini illaíma”. ³⁸ Ie mei mena firiruide iaímaiaína coraidimaci. Damie Jesús nabeimo coraica. Jiaímie Jesús jarifebeimo coraica. ³⁹ Naisodo jamai jaidino Jesúna mameritimaci. Mamerillanona, ifogiaína jaididimaci. ⁴⁰ Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio. Ie muidona dama o abina mai jilloita. Jusiñamui Jitodidena, cruzmona ana bi.

⁴¹ Ie facaise Jusiñamui diga nanoca ñairaini naimiena mameritimaci. Moisés micori llogacino llofueraini naimiena jiaí mameritimaci. Einamaci naimiena jiaí mameritimaci. Raitimaci:

⁴² —Jiaie cominina jillotate; iadedi dama naimie abina jilloitanide. Naimiedi cai judíuai comini illaíma raillamiedena, cruzmona naimie ana niade billasa. Ie mei naimiena ñnoíticai. ⁴³ “Jusiñamui Jitodíicue” naimie railla jira, naimiedi Jusiñamuina ja ñnotena, Jusiñamui jitaia, Jusiñamui naimiena jillotaite. —Iese naimiena mameritimaci. ⁴⁴ Naimie diga coraica iaímaiaí daje isoi naimiena mameritiímaiaí.

Jesús fiodailla rafue

(Mr 15.33-41; Lc 23.44-49; Jn 19.28-30; Heb 9)

⁴⁵ Jitoma naidai itemona, daje amani horas mona jitiábicaide. ⁴⁶ Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobañuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

⁴⁷ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraíma Elíana uaidote —raitimaci. ⁴⁸ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. ⁴⁹ Ieconi jiaíno raitimaci:

—Ina nai. Dallu seda. Elías naimiena jilloitajaíbillena sedaiticai.

⁵⁰ Ieconi Jesús dane ado cuirioita, fiodaite.

⁵¹ Naie facaise Jusiñamui jofomo ie fetaca iniroife ana anaba jillacimo metodo menafe cuararide. Ieconi

ñuisaño suide. Iemona noñie oni bojode. ⁵² Diga raiafuaí econote. Jesús jillua mei, raiafomona, fiodaillanona, ailluena Jusiñamuina ñnotinodi jillodimaci. ⁵³ Ie mei Jerusalémo naimaci jaillanona, diga comini naimacina ciodimaci. ⁵⁴ Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena cianona, eo jaci-naillanona, naimie raite:

—Uanai bimiedi Jusiñamui Jito.

⁵⁵ Ailluena riñoniaí naie rafuena aarena ciodimaci. Naimiena canollena, Galileamona Jesús diga navui bitimaci. ⁵⁶ Naimaci motomo María Magdalena ite. Jiaie María jiaí ite. Naiñaiñodi Jacobo ei. Naiñaiño jiaí José ei. Zebedeo uruaí ei jiaí ite.

Jesús raiafomo jonia rafue

(Mr 15.42-47; Lc 23.50-56; Jn 19.38-42)

⁵⁷ Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús díbeimo jaidimie. ⁵⁸ Jesús abina jicallena, Pilato dine jaide. Pilato “Jee” raillanona, Jesús abina naimie ollena llote. ⁵⁹ Ie mei Jesús abina cruzmona ana José uanona, jeanide mare userede iniroi diga naimie abina ferinote. ⁶⁰ Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo íbaide. Ie mei oni jaide. ⁶¹ María Magdalena raiafo uico dine jiaie María diga rainadatiíañuaí.

Soldaduai Jesús raiafo sedaja rafue

⁶² Ie areruido, pascua railla rafue illarui, dajerie judíuai illaicomini Pilato dine jaidimaci. ⁶³ Raitimaci:

—Ero, naie abi caitadimie nia fiodaíñenia, navui llote: “Cue fiodaillanona, darui amani illanona, jilloíticue”.

⁶⁴ Ie jira o uai oreta, darui amani raifi naie raiafo raise íbaillena, naimie llofueoicaigano nainomo jaillanona, naimie abi ari oi raillano. Naimie abina naimaci fíñanona lloítimaci: “Naimie jai jillode”. Iese suia, cominina eo jifueítimaci.

⁶⁵ Pilato uai ote:

—Soldaduai omoído oreíticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise íbaidimaci. Naiena sedallena, soldaduaina nainomo fainonocaidimaci.

Jesús fiodaillanona jillua rafue

(Mr 16.1-8; Lc 24.1-12; Jn 20.1-10)

28 Sábado fuilla mei, monaiacania, María Magdalena, jiaie María diga, raiafona jibuisaidiíañuaí. ² Ieconi ñuisaño suide. Monamona billanona, Jusiñamui jaienici raiafomo ibaica noficina oni ñuitade. Naie noficimo raide. ³ Eo queniredena eruaide. Naimie iniroi eo userede. ⁴ Nainomo ite soldaduai naimiena eo jacinailanona, abi docaidimaci. Iemona fiodaitino isoi dallu itimaci. ⁵ Ie facaise naie jaienicidi dinena naie riño iaíñuaimo llote:

—Jaciruiñeno. Coraica Jesúna omuiño jenuana uiñoticue. ⁶ Naimie bene iñede. Naimie llua isoi, fiodaillamona naimie jai jillode. Naimie ifo jeraimo biillano mai jibuisaibi. ⁷ Ie mei ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoi uicomo naimie jaité” llono. Bie rafue omuiño jai lloticue —llote. ⁸ Ie jira raiafomona rajicaillanona, eo iobillanona, raire jaidiañuai. Ie llofueoicaigano dine aisidiañuai. ⁹ Ie llofueoicaigano dine iañuai nia riñenia, Jesús iañuaimo dafaifillano, raite:

—Itomuiño. —Naimie dine iañuai rillanona, naimiena sedallena, naimie eillina llinotiañuai. ¹⁰ Jesús dinena raite:

—Jaciruiñeno. Cue llofueoicaiganomo llono: “Galileamo jai. Nainomo omoina cioiticue” llono.

Soldaduai raiafona sedademo suide rafue

¹¹ Jaidiañuaimo, nainomo ite soldaduaïmona dajerie Jerusalémo jaide, nanoca Jusiñamui diga ñairainimo nana naimacimo suide rafue llollena. ¹² Iena cacajano, einamací diga iena siadotimaci. Ie mei naie soldaduaïmo ucubena fecadimaci. ¹³ Raitimaci:

—Jiaie cominimo llono: “Cai inia mei, ie llofueoicaigano ie abina fiano uitimaci” llono. ¹⁴ Iena cai

governador fidiia, naimie diga ñaiticaí, omoina naimie duere finoñellena —raitimaci. ¹⁵ Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

Jesús ie llofueoicaiganomo iraicaiño lloga rafue

(Mr 16.14-18; Lc 24.36-49; Jn 20.19-23)

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci. ¹⁷ Naimiena naimaci cianona, naimiena sedadimaci; iadedi dajerie Jesús jilluana raise nia ñnoñedimaci. ¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. ¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza. ²⁰ Nana omoimo cue lloga rafuena naimaci iena ñnollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

MARCOS

Jofue iñenanomo Juan Bautista micori illa rafue

(Mt 3.1-12; Lc 3.1-9, 15-17; Jn 1.19-28)

1 Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micori Jusiñamui facaina jaie lluamona, Juan Bautista micori llofuellena llote. Iena suillamona, Jesucristo enruemo ite rafue tainede. Iena nano lloiacadicue. Isaías micori cuete:

“Ero, o uicodo cue rafuena llollena, damiena ore-taiticue” Jusiñamui raite.

3 Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

4 Isaías micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide. Cominina dafaifia, naimacimo llote:

—Omoi jeacinona fainonocaida, Jusiñamui dibeimo omoi comeciai iuaillai meido. Iemona omoi jeacinona feitaite. Omoi comeciai iuaillai omoi meidoia, cominina iena uiñotallena, mai omoi bautizallomoi.

5 Diga comini naimie micori dine jai jaisoidimaci. Jerusalémoma, nana Judeamona, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micori bautizaga.

6 Juan micoridi camello itiraijaie ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. **7** Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue.

8 Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreño omoimo itataite.

Jesús bautizaja rafue

(Mt 3.13-17; Lc 3.21-22)

9 Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúsdi Juan bautizaga. **10** Bautizaja mei, jinui mona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode. **11** Monamona Jusiñamui llote:

—Cue isiruiga Jitodio. Ori iobidicue.

Jesúna Taife ramo faia rafue

(Mt 4.1-11; Lc 4.1-13)

12 Jesús bautizaja mei, Jusiñamui Joreño jofue iñenanomo naimiena uite. **13** Comini nainomo iñede. Difai ocainaijaie itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

Galileamo Jesús illa rafue

(Mt 4.12-17; Lc 4.14-15)

14 Naie facaise Juan Bautista micorina Herodes gaitaja mei, Galilea railla enruemo Jesús jaide. Jusiñamui ie mare rafuena llocana jaide. **15** Llote:

—Jusiñamui birui omoina sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fainonocaida, omoi comeciai iuaina meido. Bie rafuena mai omoi ñino.

Ie llofueoicaigano jaillena, Jesúsdi nagaamagamienna fetua rafue

(Mt 4.18-22; Lc 5.1-11)

16 Jiairuido Galilea railla jorai fuemo Jesús macaritemo, menamienna ciode. Naga ie ama iaimaiaia. Damie Simón. Jiaimie Andrés. Llojjina fairaima iaimaiaia. Iese jaca naie iaimaiaiaidi maijjuiddiaimaiaia. **17** Iaimaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitaidicue. Lliciaina birui ocabitomico; iadedi cominina oitomico, cue dibeimo naimaci illena.

18 Iena cacajanona, ieconi iaimaiaia llojjina fainonocaida, naimie diga jaidiaimaiaia. Ie llofueganona jaillena, jaidiaimaiaia. **19** Lliai bai Jesús jaidemo, jiaie menamienna ciode. Naga ie ama iaimaiaia. Damie Jacobo. Jiaimie Juan. Iaimaiaia moodi Zebedeo. Botemo iaimaiaia llojjina sigaidiaimaiaia. **20** Jesús iaimaiaina uaidote, ie llofueganona jaillena. Ie maijiraini diga iaimaiaia moona fainonocaida, botemona ari billanona, Jesús diga jaidiaimaiaia.

Jesúdi Janaba anamo itimie jillotaja rafue

(Lc 4.31-37)

21 Bai jaillanona, Capernaumo ie llofuegano diga Jesús ride. Nainomo naimie ia, sábadoruimo juduaia ofiracomo jaide. Nainomo llofue. **22** Moisés micori llogacino llofueraini isoi llofueñede. Illaia uai isoi naimie llofuia jira, nainomo ite comini naimie llofuia-

mona rajjicaidimaci. ²³ Janaba anamo illamie nainomo ite. ²⁴ Jesús llofuiana cacaita, Janabadi ñimana ado cuiri-
oitate:

—Odi Nazaret ie Jesús. ¿Bue ñeacadio cai diga? Caina duere finuaibidio. Ona uifnoticue. Odi Jusiñamui ie mare fetocamiedio.

²⁵ Jesús naimiena lletade:

—Lliicai. Naimiemona oni jai.

²⁶ Janaba naimiena docaitajanona, ado cuirioillanona, naimiemona oni jaide. ²⁷ Iena cianona, nana nainomo itino rajjicaidimaci. Coniniri siadotimaci:

—¿Ñiese ite? Bimie jiaie uaido llofujete. Janabamo naimie llua mei, ñimamona Janaba oni jaide. Janaba Jesús uaina ñnote.

²⁸ Iemona nana Galilea eniruemo Jesús mameci are soride.

Jesús Pedro jifaiñona jillotaja rafue

(Mt 8.14-15; Lc 4.38-39)

²⁹ Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiaide. Jacobo, Juan diga jiai fo jaide. ³⁰ Ie facaise Simón jifaiño duide. Abi cuaride. Nainomo itino Jesúmo naiñaiño duillana llote. ³¹ Iena cacajanona, naiñaiño dine jailanona, Jesús naiñaiño onollina llinote. Naiñaiñona naidacaitade. Ieconí abí cuarilla fainonocaide. Guille finuanona, ie jofomo itinona ecade.

Jesúdi ailluena duidinona jillotaja rafue

(Mt 8.16-17; Lc 4.40-41)

³² Navuida, jitibicaidemo, Jesús dine comini ailluena duidinona atidimaci. Janaba anamo itinona jiai atidimaci. ³³ Nana Capernaum comini naie jofo nasemo ofidimaci. ³⁴ Jesúdi diga duicono ailluena duidinona jillotate. Ailluena comini Janaba anamona jillotate. Naimiena jananiai uifua jira, Jesús naimaci ñaiana rairuide.

Galileamo Jesús llofuia rafue

(Lc 4.42-44)

³⁵ Ie areruido nia monañenia, Jesús casillanona, Capernaumona comini ñenanomo Jesús jaide. Nainomo Jusiñamuimo jide. ³⁶ Monaia, casidemo, jofomo Jesús ñena jira, Simón, ie nabaiñai diga, Jesúsna jenuaide.

³⁷ Baillanona, raite:

—Nana comini ona jenodimaci.

³⁸ Jesús uai ote:

—Jiaie naiaiaie dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

Jesúdi efonaitimiena jillotaja rafue

(Mt 8.1-4; Lc 5.12-16)

⁴⁰ Ie facaise efonaitimie Jesús dine billanona, naimiena raise uaiduamona, caifñici ifodo ana rainadate. Raite:

—O jitaiaidedi, cuena jillotaredio.

⁴¹ Naimiena duenaillamona, Jesús ie onolli naimiemona ñuitajanona, naimiena jetade. Raite:

—Ona jillotaiacadicue. Mai o jillo. ⁴² —Ieconí naimie jillode. ⁴³ Ie facaise Jesús naimiena oretaiacanano, naimiemona riire llote:

⁴⁴ —O jilluana bumo lloñoeno; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uifollena, naimiemona o abina acatajai. Moisés micori jaie lloga rana Jusiñamuimo fe-
ca.

⁴⁵ Iese Jesús naimiemona llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini ñenanomo jaisoide; Iese jaisoide; ia naganomona naimie dine biñoidimaci.

Jesús tisitaitimiena jillotaja rafue

(Mt 9.1-8; Lc 5.17-26)

2 Nigarui illanona, Capernaumona Jesús dane abido ride. Comini iena fidianona, ² ie risoillacomo naimie dine ofidimaci. Ailluena billa jira, fo illino ñede. Nasemo jiai eo ofidimaci. Jesús naimacimo Jusiñamui rafuena llofujete. ³ Cominina Jesús llofuetemo, naimie dine nagaamagamie ie biiramo biide tisitaitimiena atidimaci. ⁴ Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuado a jaidimaci. Jofo emodo econuano, Jesús ecimo naimiena ie biiramo biide diga, rao diga, ana ñuitadimaci. ⁵ Iena Jesús cianona, tisitaitimie jilluana naimaci ñnuana Jesús uifnote. Tisitaitimiemona llote:

—Nabai, o jeacino cue feitaja jira, iena jai oni dotadicue. Ie facai ñbana jai oñeiticue.

⁶ Nainomo itinomona damierie Moisés micori llogacinona llofueraini nainomo raidimaci. Comecina facadimaci: ⁷ “¿Ñiese bimiedi iese llote? Dama Jusiñamui jeacina dotarede. Bimie Jusiñamuifede; ia Jusiñamui ifomo iacade. Jusiñamuina jai jeare ñaite”.

⁸ Naimaci comeciai facajacinona Jesús uifuanona, naimacimo jicanote:

—¿Bue ñellena omoi comeciaina iese facadomoi?

⁹ Bimie: “O jeacina jai oni dotadicue” cue lloia, cue uai siñonana uifnoñeitomoi; ia bimie: “Mai naidacaillanona, o biira ferinocaide, mai macari” cue lloia, cue uai siñonana uifnoñeitomoi. ¹⁰ Monamona jaie cue billanona, ñimana jaidicue. Ie jira jeacino oni dotaja uai cuemo ite. Iena omoi uifollena, tisitaitimiemona lloiticue: ¹¹ “Mai naidacai. O biira ferianona, o jofomo mai jai”.

¹² Iese naimie raillamona, tisitaitimie jillode. Naidacaida, ie biira feria mei, naimacimona jino jaide. Nana nainomo itino rajjicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedícaí.

Jesúdi Levína fetua rafue

(Mt 9.9-13; Lc 5.27-32)

¹³ Jiairuido jorai fuemo Jesús dane jaide. Ailluena comini naimie dine ofillanona, naimacina llofue. ¹⁴ Llofua mei, Jesús bai macaritemo, Leví raillamiena ciode. Levídi Alfeo jito. Gobierno ucube ouillanomo naimie maijiuide. Nainomo raidena Levína ciode. Naimiemo llote:

—Cue llofuegamiena o jaillena, cue diga bi. —Naida-caida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci. ¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci. ¹⁷ Iena cacajano, Jesús llote:

—Ecairedinodi médicono jitañedimaci; ia duidinodi médicono jitaidimaci. Ie isoide. Mareuidino cuena jitañedimaci; ia maraiñedino cuena jitaidimaci. Jusiñamui díbeimo mareuidinona uaibíñedicue; iadedi maraiñedino uaibiticue. Omoimona maraiñedino diga nabairiticue; ia naimacina uaibiticue.

Jesúmo comini guiñenana jicanua rafue

(Mt 9.14-17; Lc 5.33-39)

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Caí einamací llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca guitimaci. ¿Bue ñellena caí einamací rafuedo jaiñedimaci?

¹⁹ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi ite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ²² Jacagomona finoca bolsa como finoca vino joneñega. Jonegadana, mañiñena jira, sirillamona igoí raire cuararite. Vino faifite. Igoí jiai faifite. Como finoca vino comogomo

jonelle. Iemei iena faifiñeite. Ie isoide. Omoi einamací rafue ifomo jiaie rafue birui ite. Iena omoimo llo-cabiticue. Iedo jaidicai —llote.

Sábadoruimo Jesús llofueoicaigano maijia rafue

(Mt 12.1-8; Lc 6.1-5)

²³ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, guicana jaidimaci. ²⁴ Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijdidimaci. Iese caí abimo jeacinona jai finodimaci.

²⁵ Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomenicono uanona, guitimaci. Jamai bue isoidino naie llomenicono guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede. ²⁷ Jusiñamui sábadona finuamona, sábadu ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabit-omoi. ²⁸ Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

Jesúdi onollina idisarodimiena jillotaja rafue

(Mt 12.9-14; Lc 6.6-11)

3 Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite. ² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode. ³ Onollina idisarodimiemo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodice. Cuena birui omoi meineiadedi, birui maraiñede rafue finodomoi. Sábadoruimo, ¿nie isoide rafue finuana rairuidomoi?

Comini dinena uai oñedimaci. ⁵ Naimie uaina naimaci inoñena jira, riicaillanona, Jesús naimacimo erodate. Duidimiemo llote:

—O onolli mai oni ñuita.

Iena oni ñuitajamona jillode. ⁶ Iena ciuanona, fariseuai jino jaidimaci. Naimiena meinellena, illaima

Herodes díbeimo itinona baillanona, naimaci díga con-
iniri siadotimaci.

Jorai fuemo Jesúsdi ailluena cominina llofuia rafue

⁷ Naie nairaimona jorai fuemo Jesús, ie llo-
fueoicaigano díga, oni jaide. Galilea railla eniruemona
ailluena comini naimie díne bitimaci. Judeamona jiaíno
bitimaci. ⁸ Jerusalémona, Idumeamona, Jordán
ruicafabellemona, Tiro jinofemo ite eniruemona, Sidón
jinofemo ite eniruemona ailluena bitimaci. Nana
naimie siño finoca rafuena cacajanona, naimiena cioa-
cadimaci. ⁹ Comini naimiena meetasii raillanona, ie llo-
fueoicaiganomo daje botemo naimie jaillena
eenogana llote. ¹⁰ Ailluena duidinona naimie jai jillota-
ja jira, nana duidino naimiemo riacadimaci. Jilloillena
naimiena jetaacadimaci. Iemona naimie illa bote eenu-
ana jitaide. ¹¹ Jananiai anamo itino Jesúsna cioia, Jesús
uicomo ana bitadajanona, jananiai naimacina ñaitata-
jamona, raitimaci:

—Jusiñamui Jitodío. ¹² —Ia Jesús naimiena naimaci
lluana rairuide.

Jesúdi ie doce llofueoicaiganona fetua rafue

(Mt 10.1-4; Lc 6.12-16)

¹³ Naie facaise anedumo Jesús jaide. Ie jitaillano
diese naimie díne uaidote. Naimie díne billa mei,
¹⁴ doce dígamiena fetode. Naimie díga jaicabillena,
naimacina fetode. Ie rafuena llollena, naimacina oreta-
iacade. ¹⁵ Janaba anamo itinomona Janabana oni ore-
tallena, ie uai naimacimo ite. ¹⁶ Iese mameciredimaci:
Simón; naimie mameci jiaicidi Jesús jítaca Pedrona.
¹⁷ Jacobo, Juan; iaímaiaí Zebedeo jito iaímaiaí. Jiaíe
mameci iaímaiaína Jesús jonete Boanergesna. Naie
mameci oni dobaiñuamona mona guruama. Iciriruilla
jira, iese mameciredíiaímaiaí. ¹⁸ Andrés, Felipe, Bar-
tolomé, Mateo, Tomás, jiaíe Jacobo; naimiedi Alfeo jito.
Tadeo, jiaíe Simón; naimiedi cananista comini facaise-
mo duide. ¹⁹ Judas Iscariote micori; naimiedi Jesúsna
gaitatatie.

Fariseuai Jesúsna jeare ñaia rafue

(Mt 12.22-32; Lc 11.14-23; 12.10)

²⁰ Ie llofueoicaiganona fetua mei, ie risoilla jofomo
naimaci díga Jesús abido jaide. Ailluena comini naimie
díne billa jira, naimie guillena, naimie abí juanide.
²¹ Naimiena ie comini fidiano: “Naimiedi jai uairico isoi
iacade” raillanona, comecina facadimaci. Ie jira naimie-
na ie ei jofomo isaíbiacadimaci. ²² Jerusalémona
Moisés micori llogacinona llofueraíni naie facaise bil-
lanona, raitimaci:

—Beelzebúdi Janaba comini. Beelzebú anamo Jesús
illamona, Beelzebú uaido Janaba illa cominimona
Jesúdi Janabana oni oretate —raitimaci.

²³ Naimaci raillana naimie cacajanona, naimie díne
Jesús naimacina uaidote. Llote:

—Janaba díbeimo Beelzebú illamona, dama ie abina
oretanide. ²⁴ Ero, daje isoi comeciaina lloíñenamo daje

nairai facañenia, danomo maijñidimaci. Oni jaidimaci.
²⁵ Daje isoi comeciaina lloíñenamo daje jofomo itino
facañenia, danomo jainaiñidimaci. Oni jaidimaci. ²⁶ Ie
isoide. Beelzebú uaido jananiaína omoi llua isoi cue
oretaia, Janaba ie díbeimo itino díga jai nabairíñede.
Iemona naimie comini danomo iñeitimaci. Ie uai ieconi
saite. ²⁷ Ero, mairidimie ie jofomo ite rana nibai fña-
cadomoi. Iena fñillena, naimiena nano raise omoi mai-
ga. Raise maíga mei, ie rana fñiredomoi. Ie isoide. Jana-
ba anamona cominina jillotacabiticue. Naimie afemo
nano cue iñenia, cominina jillotanidicue. Naimie afemo
cue illa jira, iena finoredicue. ²⁸ Ie jira bie omoi-
mo lloiticue. Jusiñamui nana comini jeacinona dotarede.
Naimiedi naimaci jeare ñaiacinona dotarede; ²⁹ iadedi
naimiedi ie Joreñoña jeare ñaiacinona jaca dotañeite.
Jusiñamui iena jaca feitañeite —llote.

³⁰ —Beelzebú anamo Jesús ite. Jusiñamui Joreño uai-
do siño rafuena finoñede; ia Janaba uaido siño rafuena
finode —Jesúna raitimaci. Iese naimaci railla jira,
“Jusiñamui naie isoide ñaiacinona jaca dotañeite” iese
Jesús llote.

Jesús ie comini

(Mt 12.46-50; Lc 8.19-21)

³¹ Jesús comini naimie díne rillanona, naimie díga
ñaiacanano jino naidaidimaci. ³² Ie facaise ailluena
comini naimie ecimo raidimaci. Naimie comini rillana
naimaci cacajano, naimiemo llotimaci:

—O ei, o amataí díga jino ite. O díga ñaiacade.

³³ Jesús dinena uai ote:

—¿Bu cue ei? ¿Bu cue amataí?

³⁴ Naimie ecimo itinomo erodajanona, llote:

—Jadi, cue ei, cue amataí. ³⁵ Jusiñamui jitaillacinona
finodimie cue amana, cue miriñoña, cue eina. Imaci ua
cue cominina.

Jesúdi trigona judaidimiena llua rafue

(Mt 13.1-9; Lc 8.4-8)

4 Jiaíruído jorai fuemo dane jaillanona, ailluena
comini naimie díne ofillamona, Jesús naimacina
llofuate. Ailluena comini nainomo ofilla jira, botemo
Jesús jaillano, ana raide; iadedi comini jorai fuemo iti-
maci. ² Ailluena rafuena naimacina llofuate. Raite:

³ —Omoi fueollena, bie rafuemo raise cacarei. Damie
trigona judaíaide. ⁴ Naimie judaíamona, naisomo
janore iduai juide. Naimie bai jailla mei, sillíñiaí iena
guisaíbitimaci. Ie jira sicoñede. ⁵ Nofíemo jiaíe iduai
juide. Nainomo enirue raise iñede. Sicode; iadedi
enirue raise iñena jira, ⁶ raise jainañena jira, ecasillam-
ona duide. Ie jira llisiñede. ⁷ Eecuai illanomo jiaíe iduai
juide. Eecuai sicuamona riara eecuai íbaica. Ie jira
llisiñede. ⁸ Mare eniruomo jiaíe iduai juide. Sicode.
Llisillamona danademo treinta díga llisillana ote. Jiaí-
namona sesenta díga llisillana ote. Jiaínamona cien dí-
ga llisillana ote. ⁹ Omoi jeforena jira, raise fueollena,
cue lluamo cacarei. Iena íno.

Jesús ie como lloga rafuena llofuia rafue

(Mt 13.10-23; Lc 8.9-15)

¹⁰ Ailluena cominimona jailla mei, naimie diga jaisoidinodí, ie doce llofueoicaigano diga, Jesúmo ie llofuiana jicanotimaci. ¹¹ Uai ote:

—Jusiñamuidí omoína ie sedaacana rafuena jai uiño-tade. Jaié iena uiñoñedomoi. Jiaie cominina iena nia uiñoñade. ¹² Ie jira bie isoidicinodo naimacimo lloticue. Cue siño finoca rafuena ciotimaci; iadedí iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedí naimaci ñnoñena jira, raise cacaiñedimaci. Uiñoñedimaci. Jusiñamui díbeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. ¹³ Cue como llo-fuiacinona omoi raise cacaiñenia, dane cue llofuia, iena jiaí raise níbaí cacaiñeitomoi; ¹⁴ ia iena omoína llo-fueitícue. Trigona judaidimiedí Jusiñamui rafue llorai-ma isoide. ¹⁵ Dajerie iduai naisomo juide. Dajerie cominí comeciái naie naiso isoidimaci. Jusiñamui uaina cacadimaci; ia Taife naimaci comeciáimo cacaja uaina ñnotañede. ¹⁶ Jiaie iduai noñemo juide. Dajerie cominí comeciái naie noñe isoidimaci. Jusiñamui uai nano naimaci cacai, iena caimare feiñotimaci. ¹⁷ Noñemo riga iduai jainaonidedí raise sicoñede. Naie cominí janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci. ¹⁸ Jiaie iduai eecuái illanomo juide. Naie iduai sicua mei, iena eecuái ibailla jira, raise llisiñede. Dajerie cominí comeciái naie illano isoidimaci. Jusiñamui uaina cacadimaci. ñnotimaci; ¹⁹ iadedí naimaci comeciái jarire illamona, naimaci raruaiña ebiruillamona, naie uai naimaci comeciáimo itabiñede. Jusiñamui jitailla rafuena finocana jaiñedimaci. ²⁰ Jiaie iduai mare eníruemo juide. Dajerie cominí comeciái naie enírué isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Jesúdi lamparína ñaia rafue

(Lc 8.16-18)

²¹ Jorai fuedo Jesúdi cominina nia llofuete:

—Jai uneca lamparín jiaie illanomona atia mei, jiaie ra biide anamo rainañega; iadedí jofo jeraimo lligaiñol-lena, nainomo bite cominí raise cioillena, ie rairanomo rainade. ²² Ie isoide. Cue rafue llocana jaia, cominí comeciái iticinona uiñotade. Uanaicino naimaci cacajamona, damíerie ñnotimaci. Damíerie ñnoñedimaci. ²³ Omoi jeforena jira, raise fueollena, cue lluamo cacarei. Iena ñno.

²⁴ Cue lluamo raise cacarei. Omoi cacaja diese Jusiñamui omoína uiñotaite. ²⁵ Iena omoi ñnoia, Jusiñamui omoína canoite. Omoína uiñocana jaitaite. Jiaimie iena janore cacajamona, iena ñnoñenia, Jusiñamui naimie-na faifitaite.

Jesúdi Jusiñamui ie cominina sedaacana llofuia rafue

²⁶ Jesús llote:

—Jusiñamui díbeimo cominí jailla rafuena nia lloticue. Naimie díbeimo cominí jaillena, naimie rafue llocana jaidicue. Jiaie uaido iena omoímo lloticue. Damie ie illímo judaiaide. ²⁷ Judaia mei, ie illímo nagarui ie maijicabilla isoi naimie jaide. Niese iduai denuana naimie raise uiñoñede; ²⁸ ia eníruemona nano sícode. Monaiilla mei, lliside. Iemona naicuai comuide. ²⁹ Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

Jesúdi mostaza ido llua rafue

(Mt 13.31-35; Lc 13.18-19)

³⁰ Jesús jiaie rafuena llote:

—Jusiñamui díbeimo cominí jailla rafuena nia lloticue. Jusiñamui rafuena janore cominí birui cacajamona, ailluena cominí naimie cominina íco jaitimaci. ³¹ Jiaie rafuedo iena omoímo lloticue. Damie mostaza idona rillamona, naiemona eo aillue riará sicode. Mostaza ido eo janorede; ³² iadedí sicua mei, eo aillue riará jaillamona, ie onogaillái jegairiena jira, icairo anamo manaidinomo sillíñai jicaiciaina finodimaci. Ie isoide. Jusiñamui rafuena janore cominí birui cacajamona, ailluena cominí naimie cominina íco jaitimaci.

³³ Naie isoide rafuaido Jesúdi Jusiñamui ie cominina sedaacana rafuena cominimo llote. ³⁴ Naimaci cacaja diese llote. Naimacimo jiaie rafuedo lloñede; ia ie llo-fueoicaiganomo iena eneno llofuete.

Jesúdi jorai baguana llícaitaja rafue

(Mt 8.23-27; Lc 8.22-25)

³⁵ Ailluena cominí llofuia mei, jítoma jai sojicaidemo, ie llofueoicaiganomo Jesús llote:

—Ruica enefebeimo maí caí jaillí.

³⁶ Cominina fañonocaida, botemo naimie jai illamona, naimie llua isoi, oni jaidimaci. Jiaie botes jiaí jaide.

³⁷ Baí jaillanona, jillacimo Jesús inide. Ie ifogí almo-hadamo biide. Ie facaise aifí eo riire bite. Joraidí eo bagode. Baguamona, botemo jinui a uaide. Oruiacana jira, jacinaillamona, Jesúna casitatimaci. Raitimaci:

—Maestro, ¿niese itío inioilla? Caína cano. Jai buisaidicái. Corobaisaidicái.

³⁹ Naimie casillano, aifina lletade. Jinui baguana llícaitade. Ieconí aifí llícaide. Bagoñede. ⁴⁰ Ie llo-fueoicaiganomo jicanote:

—¿Bue ñllena jacinaitomoi? ¿Niese cuena raise ñnoñedomoi?

⁴¹ Uai oñeno eo raíjicaidimaci. Coniníri ñaitimaci:

—Bimiedí ¿nie isoidimie? Aifí naimie uaina ñnote. Jorai naimie uaina jiaí ñnote. —Baí jaillanona, ruica díne ridimaci.

Jesúdi Gadara railla eniruemo illa rafue

(Mt 8.28-34; Lc 8.26-39)

5 Ruica dine naimaci ridemo, Gadara railla eniruemo sijidimaci. ² Botemona ari Jesús jaidemo, naimie dine damie bite. Naimiedi Janaba anamo itimie. ³ Comini raioillanomo nofie moto ifuaimo naimie isoide. Janaba anamo naimie illamona, comini diga marena jaca irainide. ⁴ Diga icaiño lloeo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide. ⁵ Nagarui nofie motomo ite. Anedumo jaisoide. Cuiricuirisoide. Dama ie abina nofici diga jaidode. Iese naimie isoide. ⁶ Nofiemona Jesúna ciuanona, aisicana Jesús dine bite. Naimiena sedallena, ie caiñici ifodo ana rainadate. ⁷ Jesús llote:

—Janaba, bimiemona oni jai.

Janabadi iimana ado llotatate:

—Nanoca Jusiñamui Jitodio. ¿Niese cuena nibaia-cadio? Jusiñamui mamecido cuena duere finoño.

⁹ Jesús Janabamo jicanote:

—¿O mameci bu?

Uai ote:

—Aillosiedicaí.

¹⁰ Bie illanomona naimacina oretañellena Jesúsno duere jicanotimaci. ¹¹ Naie facaise nainomo ite anedumo ailluena chanchuai itimaci. ¹² Chanchuai abimo naimaci jaillena Jesúsno duere jicanotimaci. ¹³ Jesús dinena:

—Jee —raite. Iecon iima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aisiano corobaisidimaci.

¹⁴ Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena.

¹⁵ Jesús dine naimaci ridemo, jaive Janaba anamo illamiena Jesúsno ecimo raillana cioidimaci. Naimie iniroina jai jitate. Naimie jai uairicoñede. Iena ciuanona, Jesúsna jaciruitimaci. ¹⁶ Naie rafuena cioidino jaive Janaba anamo illamie jilluana llotimaci. Chanchuai mo suide rafuena jiai llotimaci. ¹⁷ Naie enirue itinodi Jesúsno naimaci eniruemona oni jaillena duere jicanotimaci.

¹⁸ Botemo Jesús jaiacania, jaive Janaba anamo illamie Jesúsno jicanote, naimie diga jaillena; ¹⁹ ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

²⁰ Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

Jesúdi mena duide riñona jillotaja rafue

(Mt 9.18-26; Lc 8.40-56)

²¹ Ruica dibeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia, ²² Jairona mameciredimiedi Jesús dine bite. Naimiedi judíuai rafue ofiraco sedarima.

Jesúmo duere jicanollena, ana bitadate. ²³ Duere jicanote:

—Cue jisa jai fiodiacade. Cue jofomo cue diga bi, o onollí naiñaiño o jonellena, naiñaiño jilloillena.

²⁴ Iena cacajano, ie llofueoicaigano diga, naimie diga Jesús jaide. Ailluena comini Jesúsno ñaijillanona jaidimaci. ²⁵ Bai jaillanona, duidiñaiño Jesús jinafona jaide. Naiñaiño jeraimona doce años jaca díaide. ²⁶ Diga manorainimona duere sefuede. Jilloñede; ia fodo jaide. Nana ie ucube jiai fuite. ²⁷ Jesús duidinona jilluana naiñaiño fidiamona, jinafo dinena billanona, naimie iniroina jetade. ²⁸ “Naimie iniroi cue jetajamona jil-loiticue” comecina facajamona, naiñaiño naimie iniroina jetade. ²⁹ Iecon diailladi fainonocade. Ie abi jilluana naiñaiño jai uifote. ³⁰ Ie abimona ie uai oni jail-lana Jesús uifuanona, dobaicaide. Cominimo jicanote:

—¿Bu cue iniroina jetade?

³¹ Ie llofueoicaigano dinena uai otimaci:

—Ailluena comini o ecimo jaidimaci. Omo ñai-jidinona: “¿Bu cue iniroi jetade?” raitio.

³² Raise uifollena, Jesús ie ecimo itinomo erodate.

³³ Duidiñaiño ie jilluana uifua jira, Jesús dine jacirucana bite. Naimie uicomo ana bitadajanona, nana naiñaiño ite rafuena llote. ³⁴ Naiñaiño Jesús llote:

—Ñoo, cuena o ñnua jira, jai jillodio. Mai marena o jai. O duicomona jai jillobidio.

³⁵ Naiñaiño diga Jesús nia ñaitemo, Jairo jofomona jaino bite. Jairomo llote:

—O jisa jai fiodaite. Maestrona ñaidoño.

³⁶ Iena cacajano, Jairomo Jesús llote:

—O comeci jarire ifeno; ia cuena nia ñno.

³⁷ Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. ³⁸ Jairo jofomo rillanona, nainomo itino eecuinaillana cacade. Failliñailana cacade. ³⁹ Jesús fo jailla mei, nainomo itinomo jicanote:

—¿Niese itomoi eecuinailla? Cuemona naiñaiño fiodiacañedes. Jamai ñnde.

⁴⁰ Iena cacajano, naiñaiño jai fiodaite uifuanona, Jesúsni jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide. ⁴¹ Naiñaiño onollina llinocaida, judíuai uaido raite:

—Talita, cumi. —Iena oni dobaifuanona: “Jitañbici, mai naidacai” raite.

⁴² Iecon jilluanona naidacaide. Jai jilluano macarite. Naiñaiño doce años jai ite. Nana nainomo itino ieri eo rajicaidimaci.

⁴³ —Bumo bie rafuena lloño —naimacimo Jesús llote. Guillena naiñaiño eajana jiai llote.

Nazaretmo Jesús illa rafue

(Mt 13.53-58; Lc 4.16-30)

6 Naie illanomona Jesús oni jailla mei, ie llofueoicaigano diga Nazaretmo ride. ² Rilla mei, sábadoruimo nainomo ite ofiracomo llofuede. Iena cacajanona, nainomo itino rajicaidimaci. Raitimaci:

—¿Niese eo abina uiñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie. ³ Naimiedi amederaima. María jito. Ie amatiaidi Jacobo, José, Judas, Simón. Naimie miriñotiaidi cai motomo jiaí ite. —“Cai comena naimie ite” raillanona naimie uaina jamaidimaci.

⁴ Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoia-casiñede. Jamaisite. Ie isoide. Cue cominidomoina jira, cue uaina ñnoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotate; ⁶ ia naimaci ñnoñenari rajicaide. Ie mei diga nairaiamomo Jesús llofuecana jaide.

Jesúdi ie llofueoicaiganona oretaja rafue

(Mt 13.53-58; Lc 4.16-30)

⁷ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Ie rafuena lollena, jiaie illanuaimo naimacina menamierie oretaiacade. ⁸ Raite:

—Ailluena rana uiñeno. Omoi abi riidollena, jiguidana uiño. Llomenicono uiñeno. Ailluena rana omoi uiñellena, bolsana uiñeno. Ucubena uiñeno. ⁹ Zapatona jitajano jai. Abi omoi meidolle ñiroina uiñeno. ¹⁰ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i. ¹¹ Omoína bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

¹² Jesús naimacimo llua mei, jaidimaci.

—Omoi jeacinona fañonocaiñanona, Jusiñamui díbeimo omoi comeciái iuai meiduana omoi jai —llofuecana jaidimaci. ¹³ Janaba anamo ite cominimona Janabana oredimaci. Duidino abimo farena gia mei, naimacina jillotate.

Juan Bautista micori fiodailla rafue

(Mt 14.1-12; Lc 9.7-9)

¹⁴ Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

¹⁶ Jesúsna fidiano, Herodes comequina facade: “Juan micori ie ifogina navui jaitataticue. Fiodaillamona naimie jai jillode”.

¹⁷ Iese comequina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño

mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio.

Jusiñamui iena rairuide.

¹⁹ Ie muidona Herodías dinena Juan Bautista micorina jearuite. Naimiena meinetaiacade; ²⁰ ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micori Jusiñamui rafuedo jaillana jiaí uiñote. Ie muidona naimie Juan micorina raise eenote. Diga icaiño naimie micori lluaana cacade. Iena gaide; ia iena raise cacaiñede. Ie muidona Herodías naimie micorina meinetanide; ²¹ ia ja muidomo naiñaiño sedallirui ride. Herodes cumpleañes ie rafuena finode. Ailluena illai-cominina ie rafuemo uaidote. Eo ucuberedinona jiaí uaidote. ²² Rafuemo Herodías jisa saillamona, Herodesna iobitade. Ie uaidoganona jiaí iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. ²³ Illai-ma uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

²⁴ Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes dine raire abido billanona, llote:

—Juan Bautista ifogi bandejamo ja joncaida, cuemo ine.

²⁶ Iena cacajano, Herodes sunaite; iadedi naimie llua jira, nainomo naimie uaidogano jiaí illa jira, ie lloga uaina janoiacaiñede. ²⁷ Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. ²⁸ Bandejamo naimie ifogi joncaida, iena atiano, Herodías jisamo fecade. Ieconí ie eimo fecade.

²⁹ Iena fidianona, Juan micori llofueoicaigano naimie micori abina uaibitimaci. Iena raitimaci.

Jesús cinco mil iñiaina ecaja rafue

(Mt 14.13-21; Lc 9.10-17; Jn 6.1-14)

³⁰ Jesús llofueoicaigano abido bia, Jesúsno nana naimaci finoca rafuena llotimaci. ³¹ Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiaí abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

³² Ie muidona botedo comini iñenanomo dani jaidimaci. ³³ Ailluena comini naimaci oni jaillana cioidimaci. Naimacina uiñuamona, diga nairaiamona aisicana jaidimaci. Jesús nia riñenia, uicodo ie jaillanomo ridimaci. ³⁴ Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofue. ³⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade.
³⁶ Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

³⁸ Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

³⁹ Iena cacajano, cominimo raitie illanomo dajerise ana raillena Jesús llote. ⁴⁰ Naimaci cien digamierie ana raisite. Jiaino cincuenta digamierie ana raisite. ⁴¹ Naie cinco llomenicono, naie mena lliciai diga, Jesús uanona, monamo eruaillanona, Jusiñamui mo iobil-lacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade. ⁴² Nana guillanona monidimaci.

⁴³ Monillamona, fiebide guillena iraidimaci. Doce cirigaiaimo oruitatimaci. ⁴⁴ Cinco mil iñiaia diese guitimaci. Naimaci ainiaia, imaci uruiaia diga, jiaia guitimaci.

Jesús jinui emododo macarilla rafue

(Mt 14.22-27; Jn 6.16-21)

⁴⁵ Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote. ⁴⁶ Cominina facadua mei, aneduaimo dane jaide, Jusiñamui diga ñaillena. ⁴⁷ Jitibicaide-mo, nainomo dama ite. Ie llofueoicaigano jorai moto-mo jai itimaci. ⁴⁸ Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide; ⁴⁹ ia naimiena naimaci ciuanona, comecina facadimaci: “¿Bu joreño caimo billana ciudica?” ⁵⁰ Naimiena ciuamona, nana jacinallamona cuiroidimaci. Naie dacaño Jesús naimacimo llote:

—Omoj joreñonicañeno. Cuesa. Jaciruiñeno.

⁵¹ Botemo Jesús jaide. Ie facaise aifi llicaiide. Ieri eo rajjicaidimaci. ⁵² Janore guillemona ailluena cominina naimie ecajana jaive cioidimaci; ia naimie uai siñonana nia raise uiñoñedimaci. Naimiena nia raise iñoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci. ⁵⁴ Botemona ari jaidemo, nainomo itino Jesúsna uiñotimaci. ⁵⁵ Nana naie eniruemo aisicana jaidimaci, duidino naimie dine atillena. Naimaci birra emododo duidinona atisite. Jesús illana naimaci fidiano, iese atiuidimaci. ⁵⁶ Diga nairaiaimo naimie jaide. Nie nairaimo Jesús ria, naimaci illano motomo duidinona atisite. Jilluana jitaideo. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

Jesúdi comini comeciaina ñaia rafue

(Mt 15.1-20)

7 Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiaia bitimaci. ² Jesús llofueoicaiganomona damierie naimaci isoi guiñenana cioidimaci. ³ Fariseuai dinena Jesúsno jicanotimaci: —¿Bue ñellena omoj llofueoicaigano cai einamací rafuedo jaiñedimaci? Naimaci guiacania, naimaci onolli cai einamací llua isoi, raise jocoñedimaci. Ie jira cai abimo jeacino finodomoj.

Iese jicanotimaci, naimaci einamací rafuedo naimaci jailla jira. Maraiñede rafue naimacimo suiñellena, iese ailluena judíuai jaidimaci. Naimaci guiacania, naimaci einamací llua isoi, onollina diga icaiño jocuano, guitimaci. Mercadomona bia, naimaci einamací llua isoi, abina lleredimaci. Naimaci einamací llua isoi, tazones, ollas, bandejas jiaia jocodimaci. Iese jaisoidimaci. Comecina facadimaci: “Iese cai finoia, Jusiñamui mona mare. Iese cai finoñenia, Jusiñamui mona maraiñede. Naimie caina duere finoite”. Jearede rafue naimaci abimo oñellena, iese finouidimaci.

⁶ Jesús uai ote:

—Mareuidinona abi caitauidinodomoj. Isaías micori jaie omoina raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruitica!” llotimaci.

“Ona sedadica!” llotimaci.

Jamai ñaitimaci. Naimaci comeciaini cue díbeimo raise iñede.

⁷ Cue uai itena, jamai comini llucacinona naimaci llofuecabilla jira, tainona cuena sedadimaci cuete. ⁸ Isaías micori llua isoi itomoj. Jusiñamui llogacinona fainonocaida, omoj einamací rafuedo jaidomoj. ⁹ ¿Bue ñellena nana Jusiñamui llogacinodo jaiñedomoj? Omoj einamací llogacinodo jaidomoj; iadedi nana Jusiñamui llogacinodo raise jaiñedomoj.

¹⁰ Moisés micori jaie llote: “O moo uai iñuanona, naimiena cano. O ei uai iñuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

¹¹ Iese Moisés micori llote; iadedi omoj einamací llotimaci: “Jusiñamui mo cai ucubena cai fecajamona, cai moona, cai eina jai canonicai”. ¹³ Iese omoj finocabilla jira, omoj einamací llogacinodo omoj jaillamona, Jusiñamui uaina jamaidomoj. Bie isoide rafuedo jaca jaidomoj.

¹⁴ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoj uiñollena, cue llua mo cacarei.

¹⁵ Omoj einamací isoi omoj guiñenia, naimaci isoi omoj onollina omoj jocoñenia, omoj comeciaina jearetañedomoj. Omoj guillamona, omoj onollina jocuamona. Jusiñamuina nabaiñedomoj. Omoimo jeacino illa jira, Jusiñamuina nabaiñedomoj. Omoj comeciaini jearena ji-

ra, jeacinona finocabidomoi. ¹⁶ Omoi jeforena jira, raise fueollena, cue lluomo cacarei. Iena ñino.

¹⁷ Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie lluana jicantimaci. ¹⁸ Uai ote:

—¿Niese cue lluana jiaí nia cacaiñedomoi? Nie isoide ra guitomoina, omoi comeciáimo jeare iñede. ¹⁹ Omoi comeciáimo jaiñede; ia omoi jebemo jaide. Ie mei omoi abiaimona jino bite.

Jesús lluamona, nana guille radi mare uiñoticaí.

²⁰ Jesús llote:

—Omoi comeciá jearena jira, jearede rafuena finocabidomoi. ²¹ Omoi comeciá jearena jira, jeare comeciáina facacabidomoi. Omoi aiñede riño diga icabitomoi. Omoi iniñede iima diga icabitomoi. Fíri-cabitomoi. Cominina meinecabitomoi. ²² Jiaí comini rana nicidocabitomoi. Jearede rafuena finocabidomoi. Iena eburitomoi. Jifuericabidomoi. Abina uradoicabidomoi. Jiaie comini joreña jeare ñaicabitomoi. Abina ñedocabitomoi. Ebena jaicabidomoi. ²³ Bie isoidicinuai omoi comeciáimo illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuiñede.

Jesúdi judío iñaiñoñediñaiñoña jillotaja rafue

(Mt 15.21-28)

²⁴ Nainomona Jesús jaillanona, Tiro railla eniruemo jaide. Sidón railla eniruemo jiaí jaide. Nainomo jofomo jaillanona, iena buna fidiana jitañede; ia iena janonide. ²⁵ Ie facaise judío iñaiñoñediñaiño dañi bite. Naiñaiñodi sirofenicia nairaí iñaiño. Ie jisa Janaba anamo ite. Jesúsna fidianona, naimie dine bite. Naimie-na raise uaiduanona, naimie ecimo ana bitadate. Ie jisamona Janabana oni oretallena Jesúsno duere jicade. ²⁷ Judíuaiñedinona naimie canoñenana naiñaiño uiñol-lena, naiñaiñoño Jesús llote:

—Uruiaí guillamona jiconiáina ecadicaídena, maraiñede. Uruiaí nano ecadicaí.

²⁸ Naiñaiño ñinena uai ote:

—Jií, maestro; iadedi jiconiáidi uruiaí guillamona fie-bide guillemona guitimaci. —Iese llote; ia jiaie rafue-mo comeciána facade. Uruiaína llote; iadedi judíuaiño comeciána facade. Jiconiáina llote; ia judíuaiñedinomo jiaí comeciána facade. Comeciána facade: “O cominimo o rafue duide; ia caí Namana o illa jira, nibaí o rafue caímo janore duide”.

²⁹ Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa biiramo biide-na ciode. Janaba naiñaiñoñomona oni jaillana jai uiñote.

Jesús jefona cacaiñedimiena jillotaja rafue

³¹ Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiaí jaide. Ja muidomo Galilea railla jorai fuemo ride.

³² Iena fidiano, naimie dine comini jefona cacaiñedimiena atide. Naimie gogoma. Naimiena jilloital-

lena, naimiemo ie onolli jonellena Jesúsno jicadimaci.

³³ Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade.

³⁴ Jusiñamui dine monamo eruaita, naimiena duenail-lamona, jafaicína faite. Judíuai uaido naimiemo llote:

—¿Efata! —Oni dobaíñuamona: “¿Ecoricaí!” raite.

³⁵ Ieconí ie jefodi ecoricaide. Jai raise cacade. Jai raise ñaite. ³⁶ Cominimo:

—Bimie jai jilluana bumo lloñeno —Jesús diga icaiño llote; ia naimie uaina iñoñedimaci. Iena llocana uiti-maci. ³⁷ Naimieri eo raíjicaídímaci. Coninina naimiena raitimaci:

—Naga rafuena raise finode. Jefona cacaiñedimiena jai jillotata. Gogonaitimiena jai jillotata.

Jesúdi cuatro mil iñaiña ecaja rafue

(Mt 15.32-39)

8 Naie facaise naimie dine ailluena comini illanona, naimaci guille jai iñena jira, Jesús ie llo-fueoicaigano naimie dine uaidote. Raite:

² —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baií raillano. Naimacina cue duenaila jira, naimacina canoiacadie.

⁴ Jicanotimaci:

—¿Niese naimacina bene ecaiticaí? Jofue iñenanomo iticaí.

⁵ Jesús jicanote:

—¿Niga llomenico omoimo ite?

Uai otimaci:

—Siete.

⁶ Comini ana raillena Jesús llote. Naie llomeniconu uanona, Jusiñamuimo iobillacinona fecade. Taillu-anona, ie llofueoicaiganomo fecade, naie cominimo fe-callena. Iena finodimaci. ⁷ Naimacimo janore llicisiraí jiaí ite. Ie facaina Jusiñamuimo iobillacinona fecaja mei, cominimo fecallena Jesús llote. ⁸ Nana guitimaci. Monidimaci. Monillamona, fiebide guillena iraidimaci. Siete cirigaíaimo oruitatimaci. ⁹ Nainomo cuatro mil iñaiñai guitimaci. Naimaci ainiaí, imaci uruiaí diga, jiaí guitimaci. ¹⁰ Guilla mei, cominina naimaci jofuemo Jesús orede. Ie llofueoicaigano diga, botemo jail-lanona, Dalmanuta railla eniruemo jaide.

Fariseuai comini Jesúsno siño rafuena finuana jicanu-ano billa rafuena

(Mt 16.1-4; Lc 12.54-56)

¹¹ Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñede-na, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena caí cioillena, Jusiñamuina siño rafuena finota.

¹² Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

¹³ Ie llua mei, naimacimona oni jaidimaci. Ie llofueoicaigano dıga, botemo dane jaillanona, ruica dıne Jesús jaide.

Jesús siritate rana llofuia rafue

(Mt 16.5-12)

¹⁴ Ruica dıne rilla mei, Jesús llofueoicaigano llomeniconona feillana uibiñotimaci. Naimacimo daje llomenicono ite. ¹⁵ Iena naimie uiñuamona, naimacimo Jesús llote: —Fariseuai siritate ramona abına rairui. Illaıma Herodes siritate ramona abına rairui. —Iese Jesús llote; iadedı naimaci llofuiaicinomona abı rairuillena ñaite.

¹⁶ Jesús iese llua jira, iena naimaci raise cacaiñena jira, danı coninıri siadotimaci:

—Llomeniconona cai atıñena jira, caımo iese llote.

¹⁷ Naimaci siaduana Jesús uiñua jira, naimie llua naimaci raise nia cacaiñena jira, naimacimo jıcanote:

—¿Bue ñellena iese siadotomoi? ¿Ñiese cuena ñnoñedomoi? Cuemo siño uai illana nia raise cacaiñedomoi. ¹⁸ Uisiredomoi. Jeforedomoi. ¿Ñiese cue navui siño finoca rafuemo comeciaina facañedomoi? ¹⁹ Navui cinco mil iñıiaı cinco dıga llomeniconona guitimaci. Monillamona, guigamona fiebillamona, ¿nıga cirıgaıaimo iraidomoi?

Uai otimaci:

—Doce.

²⁰ Jesús llote:

—Jıaicaiño cuatro mil iñıiaı siete dıga llomeniconona guitimaci. Monillamona, guigamona fiebillamona, ¿nıga cirıgaıaimo iraidomoi?

Uai otimaci:

—Siete.

²¹ Jesús dınena jıcanote:

—¿Ñiese cuena nia raise ñnoñedomoi? Siño uai cuemo illana nia raise ñnoñedomoi.

Jesús uisınidımıena jillotaja rafue

²² Oni macarillanona, Betsaidamo Jesús, ie llofueoicaigano dıga, ride. Ie facaise naimie dıne cominı uisınidımıena atıde. Naimıena jilloitallena, naimıena jettallena, Jesúmo jıcanote. ²³ Iena Jesús cacajanona, ie onollına llınuanona, nairaı illa jinofemo uisınidımıena uite. Ie mei ie uisına tuade. Ie uisına jıai jetade. Naimıemo jıcanote:

—¿Buena cıodıo?

²⁴ A eruailanona, uai ote:

—Cominı macarillana cıodıcue; ia amena isoi eruaidımacı. Nia raise cıonidıcue.

²⁵ Ie uisına Jesús dane jetade. Iemona oni erocaillamona, jai jillode. Jai raise cıode. ²⁶ Jai jillua jira, ie jofomo naimıena abıdo orede. Jesús llote:

—Betsaidamo itıno o jilluana lloñeno; ia nainomo jaiñeno o jofomo mai abıdo jai.

Pedro Jesúsna llua rafue

(Mt 16.13-20; Lc 9.18-21)

²⁷ Cesarea Filipo enıruemo ite nairaıaimo Jesús jaide-mo, ie llofueoicaiganomo jıcanote:

—¿Ñiese jıaie cominı cuena raitimaci?

²⁸ Uai otimaci:

—Damıerie raitimaci: “Juan Bautista micorıdıo”.

Damıerie raitimaci: “Odı Elıadıo”. Jıaino raitimaci: “Jusiñamui facaina jaie ite llorainımona damıe jai jillode. Imıedıo”.

²⁹ Jesús dane jıcanote:

—¿Ñiese omoi cuena raitomoi?

Pedro uai ote:

—Odı cai jilloitarımadıo. Jusiñamui facaina llorainı micorıaı o billena jaie llotımacı

³⁰ Jesús iena bumo llua nairaıde.

Jesús ie fiodaillena llofuia rafue

(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofuate. Llote:

—Cai judıuai illaıcominı cuena eo duere fınoitimaci. Cuena jıtaiñellemona, cuena meineıtımaci; iadedı darui amani illanona, fiodaillamona jilloıtıcue.

³² Iena marefodo naimacimo llote. Iena cacajano, Pedro dınena lletade:

—Dama ite. Iese lloñeno. Bie isoide rafuena lloñeno.

³³ Ie llofueoicaiganomo erodajanona, Jesús Pedromo riıre llote:

—Cuemona oni jai. Iese ñaiñeno, Taıfe isoi o comeci-na o facaja jira. Jusiñamui isoi cuemo comeci-na facañedıo. Cominı isoi cuemo comeci-na facadıo.

³⁴ Naimie dıne ailluena cominı uaidua mei, ie llofueoicaigano nainomo jıai illanona, naimacimo llote:

—Cue comınına bu jaiacania, ie jıtaille rafuedo jaiñena. Cue dıbeımo naimie jaillamona, duere sefuıcana jaite. Nıbaı naiemona fiodaite. Bu iese jaiacania, cue dıbeımo naimie iite. ³⁵ Duere sefuıllana jacıruıllamona, cue comınına bu jaiacaiñena, ja muidomo faıfite; iadedı duere sefuıllana jacıruıñenamona, cue comınına bu jaia, jaca faıfıñeite. Cue comınına bu jaiñena, nıbaı eo duere sefuıñeite. Nıbaı ailluena ra naimıemo iite; ia, ¿ñiese cue Moo dıne riıte? Nainomo naimie riñeno faıfite. ³⁸ Birui ite cominı Jusiñamuına jıtaiñedımacı.

Naimıena jai faınonocaidımacı. Jeacınona finocana jaidımacı. Cuena bu meıruıa, cue rafuena bu meıruıa, dane cue bıa, naimıena meıruitıcue. Cuena meıruıllamona: “Cristomo dıuidıcue” bu lloıacaiñena, ıco cue bıa: “Naimıedı cue cominı” lloñeıtıcue. Jusiñamui jaienisai dıga, cue Moo dınena, monamona ıco bııtıcue. Cue Moo uai cuemo illanona, ebıre bııtıcue.

9 ‘Omoımo uanaicınona llotıcue. Omoımona dajerie nia fiodaıñeıtomoımo, illaımana ebıre cue bıarellena cıoitomoi.

Jesús abi meidocailla rafue

(Mt 17.1-13; Lc 9.28-36)

² Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiaí uite. Juan jiaí uite. Jiaie llofueoicaiganona uifede. Nainomo rilla mei, naimaci uicomo naimie abi meido-caide. ³ Naie dacaiño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. ⁴ Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiaimaia. ⁵ Iaimaia jiaicania, Pedro Jesúsimo lloite:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

⁶ Eo jaciruilla jira, naimie ñaia rafuena raise uifnoño jamai ebena ñaite. ⁷ Ie facaise uillie billamona, naimacina ibaide. Uilliemona Jusiñamui lloite:

—Bimie cue isiruiga jito. Naimie lluomo cacareillanona, iena ñno —lloite.

⁸ Ieconí oni erodajanona, dama Jesúsna ciodimaci. Jiaínona cioifedimaci.

⁹ Anedumona bitimacimo, naimacimo Jesús lloite:

—Omoi aillí cúa rafuena bumo lloño, cue fiodaillamona cue jillua dinori. ¹⁰ Jesús llua isoi finodimaci. Iena bumo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci. ¹¹ Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai jilloitaraima biite” raitimaci. Jusiñamuimona o billana ñnoticai. Odi cai jilloitaraimana ñnoticai. Odi cai jilloitaraimadomo, ¿bue ñellí iese raitimaci?

¹² Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise llollena. Jusiñamui díbeimo naimaci illena, comini imaci comeciá meidua-na lloite. Jusiñamui facaina lloraini micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiaí faca. ¹³ Elías isoidimie jai bite; iadedi Jusiñamui facaina lloraima micori jaie cuega isoi, naimaci jitailla jira, naimiena jai meinetimaci.

Jesúdi Janaba anamo itimiena jillotaja rafue

(Mt 17.14-21; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comini itimacimo ride. Moisés micori llogacinona llofueraini dinena ie llofueoicaigano uaina uaitaside. ¹⁵ Jesús billana comini ciuanona, jacinaisidimaci. Naimiena feñollena, naimie dine aisida jaidimaci. ¹⁶ Moisés micori llogacinona llofuerainimo Jesús jicanote:

—¿Niese cue llofueoicaigano uaina uaitatomoi?

¹⁷ Uai oñedimaci; ia cominimona damie uai ote:

—Maestro, Janaba anamo cue jito illa jira, o dine naimiena atidicue. Cue jito Janaba anamo illamona

ñainide. ¹⁸ Nagarui Janaba bille diese, naimiena eniruemouaitate. Iemona fuedi mullede. Ie isidodi murude. Ie abi jiaire jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micori llogacinona llofueraini bie rafuena, o llofueoicaigano diga, uaina uaitatimaci.

¹⁹ Iena cacajanona, Jesús ie llofueoicaiganomo lloite:

—Cue uai siñonana nia ñnoñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo lloite:

—O jito cue dine mai ati.

²⁰ Naie urue Jesús dine atianona, Janaba naimiena naillitate. Iemona urue eniruemouaide. Jabi-jabide. Fue mullede. ²¹ Jesús dinena naie urue moomo jicanote:

—¿Nie dinori o jitodi bie isoi ite?

Uai ote:

—Naimie uruenamona. ²² Janabadi, diga icaiño iraimo usillena, naimiena uaitate. Corobaillena, diga icaiño jinuimo jiaí uaitate. Janaba oni o oretarenia, cocona duenaillamona, cocona cano.

²³ Jesús uai ote:

—“O oretarenia” raitio. Ero, o jito jillotaredicue. Cueno o ñnoia, o jito jilloite.

²⁴ Naie urue moo ieconí lloite:

—Ona ñnoticue. Raise nia cue ñnoñena, cuena raise ñnota.

²⁵ Naie facaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitañedio. Naimiena cacaitañedio.

Naimiemona oni jai. Naimie dine dane biñeno.

²⁶ Adu cuirioillanona, naimiena eo riire naillitajanona, Janaba oni jaide. Iemona naie urue fiodaitimie isoi ero-caide. Naimiena ciuanona, nainomo itino raitimaci:

—Naimie jai fiodaite; ²⁷ —ia Jesús naimie onollina

llinocaida, naimiena a naidanete.

²⁸ Iemona oni jaillanona, damie jofomo Jesús naillí ria, naimiemo ie llofueoicaigano anado jicanotimaci:

—¿Bue ñellena Janabana oni oretanidicai?

²⁹ Jesús uai ote:

—Jusiñamuimo omoi jiamona, naimiena raise omoi ñnuamona, bie isoide Janabana oretaredomoi. Naimiena omoi raise ñnoñena jira, bie uruemona Janabana oni oretañedomoi.

Jesús ie fiodaillena dane llofuia rafue

(Mt 17.22-23; Lc 9.43-45)

³⁰ Ie llofueoicaigano diga Jesús oni jaillanona, Galilea railla eniruemouaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimo lloite:

—Monamona billanona, iimana jaidicue. Jusiñamui jitailla jira, cuena jiaie comini gaitajanona, illaicomnimo fecaitimaci. Naie illaicomini cuena meinetimaci; iadedi darui amani illanona, jilloiticue.

³² Ie llofueoicaigano iena raise cacaiñedimaci; ia naimiemo iena jicanuana meiruitimaci.

Jesús ie llofueoicaigano moto imiēna ille rafue

(Mt 18.1-5; Lc 9.46-48)

³³ Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

³⁴ Uai oñedimaci. Naimaci moto imiēna illena, naisodo siadocana bitimaci. Meiruillanona, uai oñedimaci.

³⁵ Naimie ana rainadaja mei, ie ecimo naimacina uaidote. Raite:

—Omoi moto imiēna bu iacania, jamai bue isoidimie-na naimie illa. Omoi muillaimana naimie jaiila isoilla.

³⁶ Iena naimaci raise uiñollena, nainomo ite cominimona daje urue bai jainanocaida, naimaci motomo naimiēna jonete. Naimiēna menioita, naimacimo llote:

³⁷ —Jusiñamui mona bie urue jamai bue isoide. Abina iedoñede. Bie isoidimie cuemo duillamona, naimiēna feiñotimiedí cuena jai feiñote. Cuena feiñotimie Jusiñamuina jiaí jai feiñote, Jusiñamui cuena oretaja jira.

Jesúdi ie díbeimo itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimienaciodícaí. Cai díga naimie jaicabiñena jira, iena finuana rairuidícaí.

³⁹ Jesús uai ote:

—Naimiēna rairuiñeno. Cue mamecido siño rafuena bu finoia, cuena jeare raire ñaiñeite. ⁴⁰ Cai díbeimo itimiedí cai facaisena ite. ⁴¹ Ero, cuemo omoi duillamona, omoi na bu janore canoia, Jusiñamui mona ibana feiñoite. Omoi mo nibai jamai jinuina fecaite; iadedí omoi na naimie canuamona, Jusiñamui mona ibana feiñoite. Ie jira naimie isoidino siño rafuena finuana rairuiñeno.

Jesúdi jeacinona finoñenana llofuia rafue

(Mt 18.6-9; Lc 17.1-2)

⁴² Jesús nia llofue:

—Cuena como inotinona jeacinona finotaiacadimie iena finoñellena, naimie cimaiomo aillue nofici maianona, joraimo corobaillena naimiēna dotacadena, mare. ⁴³ Biena ñaiticue. Nie isoide rafue omoi na jeacino finotaia, iena linoñeno. Naie rafue díne jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui díne daje onollí díga, daje eillí díga, daje uisí díga riitomoi; ia jeacino omoi finoia, iraimo jaitomoi. Nana omoi abí díga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iramo omoi jaiñellena, jeacino finoñeno. Naimacimo ite aiaí fiodañena jira, naie irai jaca duiñenamona, nainomo itino jaca duere sefuitimaci.

⁴⁹ Ero, birui omoi duere sefuillamona, cue cominina jai jaidinona uiñoiticue. ⁵⁰ Guille caimaretallena, sal mare; iadedí ie caimano jai iñenia, iena dane caimaretañedicaí. Ie isoide. Jeacino omoi finoia, omoi comeciaí caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

Jesús iima ie aina dotaja rafuena llofuia rafue

(Mt 19.1-12; Lc 16.18)

10 Capernaumona ie llofueoicaigano díga, Jesús oni jaillanona, Judea railla enirue díne jaide.

Jordán railla ille ruica díbeimo jaide. Ailluena comini naimie díne ofillamona, naimie llofueuilla isoi, naimacina llofue. ² Naimiēna facacillena, dajerie fariseuai naimie díne bitimaci. Rafuena jicanoiadimaci. Naimaci uai naimie raise oñenia, naimiēna duere finoacadimaci. Jicanotimaci:

—¿Iima ie aina dotajana rairuidio?

³ Uai ote:

—¿Niese Moisés micorí llote?

⁴ Uai otimaci:

—Moisés micorí jaie cuete: “Iima ie aina dotaacania, dotalle rabena nano cueite. Ie mei naiñaiñona dotaite”.

⁵ Jesús uai ote:

—Jusiñamui uaina raise omoi inoñena jira, Moisés micorí iima ie aina dotajana rairuiñede; ⁶ iadedí nano dofoconi iese iñede. Enirue finua facaiseconi Jusiñamuidí come iaimaiaina finode. Iimana finode. Riñona jiaí finode. ⁷ Ie jira Jusiñamuidí jaie llote: “Ie aí díga illena, iima ie moona fainonocaita. Ie eina jiaí fainonocaita. Ie aí díga illamona, menade comedi daamiēna jai jaide” llote. ⁸ Menade come jai daamiēna jai ite. ⁹ Jusiñamui iese iaimaiaina itataja jira, iima ie aina dotajana rairuidicue. Riño ie inina dotajana rairuidicue. ¹⁰ Jofomo ie llofueoicaigano díga, naimie nailí illanona, naimiēmo bie rafuena jicanotimaci. ¹¹ Jesús dínenona llote:

—Jiaie riño díga naimie illena, ie aina bu dotaia, naimiedí jeacinona jai finode. Ie aina jeare jiaí finode.

¹² Ie inina fainonocaillanona, jiaimiēna nie riño uamona, naiñaiño jeacino jai finode.

Jesúdi naimie díne uruiaí billana jitailla rafue

(Mt 19.13-15; Lc 18.15-17)

¹³ Naie facaise Jesús díne comini naimaci jesanide diese atidimaci. Ie onollí naimacimo naimie joniana jitaídimaci. “Naimacina raise cano” ie Moomo llollena jitaídimaci. Ie llofueoicaigano iena rairuidimaci; ¹⁴ iadedí iena cacajano, Jesús icirite. Jesús raite:

—Uruiaí cue díne billesa. Naimacina rairuiñeno. Cuena bie isoi inotinodí Jusiñamui cominidimaci. ¹⁵ Bie uruiaí abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiēna sedallena, Jusiñamui cominina naimie jaiñeite.

¹⁶ Naie uruiaí dasarie meni-menioicaída, naimaci ifogimo ie onollina joneta:

—Jusiñamui omoına canoite —llote.

Ucuberedimie Jesús diga ñaia rafue

(Mt 19.16-30; Lc 18.18-30)

¹⁷ Ie llofueoicaigano diga Jesús oni jai jaillanona, aiscana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

¹⁸ Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano.

¹⁹ Moisés micori llogacinuaina inocana jai. Jaie cuete: “Comena meineño. O aiñede riño diga iñeno. Fiiñeno. Jiaimiena o llogidoia, tainona lloño. O moo uaina ino. O ei uaina ino”.

²⁰ Uai ote:

—Maestro, uruena cue illa facaisemonana nana bie llogacinuaina inoticue.

²¹ Jesús dinena naimiemo eruailanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuena o inuamona, monamo ico jaca iitio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie feacaaiñena jira, sure jaide. ²³ Naimie jailla mei, ie llofueoicaiganomo eruailanona, naimacimo llote:

—Ucuberedinodi Jusiñamui cominina jaillena eo sefuiruitimaci.

²⁴ Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiaí raise jainide.

²⁶ Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruailanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodicaí. Nana cai rana fainonocaida, o diga jai jaicabidicaí.

²⁹ Jesús uai ote:

—Uanaicino lloiticue. Cuena naimie isiruillamona, cue rafuena naimie lluaamona, ie jofona bu fainonocai, ie amatiaina bu fainonocai, ie miriñuaina bu fainonocai, ie moona bu fainonocai, ie eina bu fainonocai, ie uruiaina bu fainonocai, ie eniruena bu fainonocai, ³⁰ Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie

miriñuái, ie eitíai, ie uruíai, ie enírué biruí iite. Monamo naimie ico caimare iocire jaca iite. ³¹ Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoñedimaci; ia Jusiñamuimona ico jamai bue isoitimaci jiaínomo ailluena ra birui iñede; ia Jusiñamuimo comecina facadimaci. Naimacimona jamai bue isodimaci; ia Jusiñamuimona ico jamai bue isoñeitimaci.

Jesús ie fiodaillena dane llua rafue

(Mt 20.17-19; Lc 18.31-34)

³² Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano rajicaidimaci. Naimaci diga jaidino jaciruiocaida jaidimaci. Naimacina jiaí meiniana jaciruitimaci. Ie llofueoicaigano diga ñaianona, naimiemo suille rafuena llote:

³³ —Ero, Jerusalémo jai jaidicaí. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. Judíuaiñedino illaicominimo cuena fecaitimaci. ³⁴ Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue —llote.

Jesús dine Jacobo Juan iaimaiaí billa rafue

(Mt 20.20-28)

³⁵ Naie facaise Jesús dine Jacobo, Juan diga bitiaimaiaí. Iaimaiaí moodi Zebedeo. Raitiaimaiaí:

—Omo coco jicalle rafue cocoena finuana jitaídico.

³⁶ Jesús uai ote:

—¿Nie isoide rafuena jitaídico?

³⁷ Uai otiaimaiaí:

—Illaimana o jailla mei, o ecimo coco illena o llua jitaídico. Damie o nabeimo. Jiaimie o jarifebeimo.

—Jiaino afemo iaimaiaí illena, iese llotiaimaiaí.

³⁸ Jesús dinena llote:

—Omico jicanuana raise uiñoñedomico. Cue eo duere sefuiticue. Llegi cacaiticue. ¿Ie isoi duere sefuiacadomico? ¿Ie isoi llegi cacaiacadomico?

³⁹ Uai otiaimaiaí:

—Jii. Sefuiacadomico.

Jesús dinena raite:

—Cue isoi duere sefuitomico. Llegi cacaitomico; ⁴⁰ iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

⁴¹ Iena jiaie llofueoicaigano cacajano, naie iaimaiairi iciritimaci. ⁴² Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci; ⁴³ iadedi omoi dine iese iñena. Omoi mona bu imiema iacania, omoi mullaimana naimie jaisoillasa. ⁴⁴ Omoimona bu imiema iacania, omoína naimie canocana jaisoillasa. ⁴⁵ Cuemona fueo. Biñedicue, cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobil-

lena, fioldaisaibitícue. Ailluena comini cuena inuana, jilloitimaci. Coninina omoi canua —llote.

Jesúdi Bartimeona jillotaja rafue

(Mt 20.29-34; Lc 18.35-43)

⁴⁶ Oni jaillanona, Jericó railla nairaimo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fue-mo uisnidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena.

⁴⁷ Nazaret ie Jesús jaillana naimie cacajano, ado cuiri-
oide:

—David micori Jitona o illamona, Jusiñamui mona o billa jira, cuena duenai. Cueno cano.

⁴⁸ Naimie lliscaillena, Jesús diga jaidino naimiena lletade; iadedi eo cuirioido:

—Maestro, David micori Jitona o illamona, cuena duenai.

⁴⁹ Naimiena cacajano, Jesús naidadajanona, llote:

—Naimiena cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

⁵⁰ Iena cacajano, ie emodomo itiroina duiñuanona, raire naidacaida, Jesús dine bite. ⁵¹ Naimiemo Jesús jicante:

—¿Niese ona cue nibaiana jitaideo?

Uai ote:

—Maestro, cioacadicue.

⁵² Jesús dinena uai ote:

—Cueno o inua jira, jai jillodio. Mai jai. —Iecon naimie jai ciode. Jesús diga jaidino diga naimie jiai jaide.

Jesús illaima isoi Jerusalémo jailla rafue

(Mt 21.1-11; Lc 19.28-40; Jn 12.12-19)

11 Oni jaillanona, Jerusalémo iaireicaidimacimo, Betfagé railla nairaimo ie llofueoicaigano diga Jesús ride. Betania nainomo jiai ite. Olivos railla anedumo naga nairai iaiaiaia ite. Ie llofueoicaiganomona Jesús menamiena orede. ² Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. ³ Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaito llote”.

⁴ Naimie llua isoi, jaidiaiaiaia. Naisomo jofo nasemo burritona baillanona, iena suiñodiaiaiaia. ⁵ Ie facaise nainomo itino jicante:

—¿Bue ñellena burritona suiñodomico?

⁶ Jesús llua isoi uai otiaiaiaia. Ie muidona:

—Jee —raitimaci.

⁷ Burritona atidiaiaiaia. Ie emodomo naimie llofueoicaigano naimaci iniroi jobianona, ie emodomo Jesús rainadate. ⁸ Naimiena iobitallena, illaima isoi naimie jaillena, diga comini, imaci iniroi diga, naiso motomo jobedimaci. Jiaino nai fue-mona raforona

uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¿Cai jilloitaraima billa! Jusiñamui mamecido bitimie eo mare. ¹⁰ Cai illaiaima David micori ifomo caina sedallena, damie billemo birui ocuiridicaia. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamona inillena jaide.

Jesús higuera railla riarana faidua rafue

(Mt 21.18-19)

¹² Ie areruido Betaniamona Jerusalémo abido ie llofueoicaigano diga Jesús bia, aimetaite. ¹³ Arena higuera railla riarana cuanona, iena jibuide. Como firuide; ia naie llisilladi ñede. Ie llisilla facaise nia ñede. ¹⁴ Ie jira naie riarana llote:

—Biemona jaca llisñeite. —Ie llofueoicaigano naimie llua cacadimaci.

Jesúdi Jusiñamui jofomona damieriena dotaja rafue

(Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamui ofomaiaia fecallena, naimiemo toica lladaiaia fecallena, nainomo comini jaisoidimaci. Naie cominina ibatajanona, ofomaiaia, toica lladaiaia diga, damierie fecaidimaci. Iena Jesús cuanona, naimaci mesaiaia oni caicode. Ucugina fecaidino raicacuai jiai oni caicode. ¹⁶ Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide.

¹⁷ Naimacina llofue:

—Ie facaina lloraia micori Jusiñamui llogacino jaie cuega: “Cue jofo ite, nainomo nana comini cuemo jillena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁸ Judiaia illaicomini naimie finoca rafuena fidianona, naimiena meinellena, coniniri siadotimaci. Ailluena comini naimie llofuiana eburuillanona, rajicadimaci. Ie jira judiaia illaicomini naimiena jaciruillanona, naimiena nia meinenidimaci. ¹⁹ Nairui navuida ie llofueoicaigano diga, Jerusalémona Jesús oni jaide.

Jesús faidoca riaru duilla rafue

(Mt 21.20-22)

²⁰ Ie are ie llofueoicaigano diga, Jerusalén dine Jesús jaillanona, higuera railla riaru duillana cidimaci. Nana ie jainao diga duillana cidimaci. ²¹ Jesús navui are llua Pedro uibuñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina ñnocana jai. ²³ Uanaicinona omoimo lloiticue. Jusiñamui llua raise bu ñnoia, naimie comece igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie

jitaille rana finoite. ²⁴ Nie isoide rafue Jusiñamuimo omoí jicajia, naimie iena finuana omoí ñnuamona, iena naimie finoite. ²⁵ Jusiñamuimo o jiacania, jiaimie diga o rafue ia iena feita. Ie isoi caí Moo Jusiñamui omoimo ite jecino jiaí feitaite; ²⁶ iadedi jiaie comini finoca jecinona omoí feitañenia, omoí Moo Jusiñamui omoí jecinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micorí llogacino llofueraini. Naimacidi einamací. Diese billanona, ²⁸ jicanotimaci: —¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁹ Jesús dinena uai ote:

—Omoimo daje rafuena nano jicanoiticue. Raise omoí fairioia, omoimo cue uaido cue finoca rafuena lloiticue. ³⁰ Juan Bautista micorí cominina navui bautizade. ¿Bu naimie micorina orede, cominina bautizalena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” caí fairioia, caimo jicanoite: “¿Bue ñelena naimie micorí lluaña ñnoñedomoi?” ³² “Comini” caí fairioia, bene itino caina nibai meineitimaci, Juan micorí Jusiñamui facaina lloraima naimaci railla jira.

³³ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi marañede majiraini rafuena llua rafue

(Mt 21.33-46; Lc 20.9-19)

12 Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruallena, tidacana finode. Iena sedallena, ibatajanona, jiañonomo fecade. Ie mei jiaie eniruemo jaide. ² Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riarai llisilla ollena; ³ iadedi naie sedarainidi ie mullaimana fatimaci. Ie mei naimiemo riarai fecaño naimiema abido oredimaci. ⁴ Ie mei patrón jiaie mullaimana orede. Naimie ifogina bofedimaci. Naimiema jeare finodimaci. ⁵ Ie mei patrón jiaimiena orede. Naimiema meinetimaci. Ie mei ailluena mullaiana orede. Damierena fatimaci. Damierena meinetimaci. ⁶ Patrómo ie isiruiga jito ite. “Cue jitona jaciruitimaci. Naimie uaina ñnoitimaci. Naimiema oretaiticue” patrón comequina facade. ⁷ Riaraiaina sedaraini naimiema cuanona, coniniri raitimaci: “Bimiemo bie illi fiebiite, naimie moo fiodailla mei. Naimiema caí meinelli, bie illi caimo fiebillesa” raitimaci. ⁸ Naimaci dine naimie rilla mei, naimiema meinetimaci. Ie mei ie abina illimona ji-

no dotadimaci. ⁹ Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Ie mei jiañona ie illina sedataite.

¹⁰ Naimacimo Jesús llote:

—Naie illi sedaraini isoidomoi. Jusiñamui facaina lloraima micorí omoína jaie cuete. Ie cufafuena raise facañedomoi. Naimie micorí cuela:

Jofu finoraini jitañena noficidi nana naie jofomo ite nofici baifemo jai uaide.

Jusiñamui iena finotate.

Iena caí uiñuamona: “Eo mare” raiticaí cuela. Jusiñamui cominina damierie jaillana naimie micorí cuete. Jusiñamui oretagamiema damierie jitañenamona, naimie cominina jaiñeitimaci; iadedi Jusiñamui oretagamiema ailluena ñnuamona, naimie cominina jaitimaci. Ero, Jusiñamui facaina lloraima micorí caína cuete. Naie jofona finoraini isoidomoi. Naie nofici isoidicue. Cue rafuena omoí jitañena jira, naimie cominina jaiñetomoi.

¹² Judíuai illaicomini iena cacajanona, Jesús naimacina ñañana naimaci uiñuamona, naimiema gaitaacadimaci; ia cominina jaciruitimaci. Ie jira naimiema oni jaidimaci.

Jesúmo gobiernomo ucubena fecajana jicanua rafue

(Mt 22.15-22; Lc 20.20-26)

¹³ Judíuai illaicomini jailla mei, dajerie fariseuai cominina Jesús dine oredimaci. Illaima Herodes dibeimo itinona oredimaci. Naimie raise uai ofenia, naimiema duere finollena, Jesúsna facaciacadimaci.

¹⁴ Naimiemo llotimaci:

—Maestro, uanaicinsona llofuecabitio. Jusiñamui rafuedo caí marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí; iadedi romanuai railla nairai anamo birui caí illa jira, ¿naimaci illaima Césaromo ucubena caí fecajana rairuidio? Caimo llono —lloitimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoi? Ucube cuemo acata.

¹⁶ Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiade bie cuela radi?

Uai otimaci:

—César.

¹⁷ Jesús dinena raite:

—César iena itedi, Césaromo ille. Jusiñamui iena itedi, Jusiñamuimo ille —raite.

Naimie lluaña cacajano, naimie raise uai ua jira, ieri raijicadimaci. Naimie iese llua jira, naimiema duere finonidimaci.

Jesús dñe saduceuai railla comini billa rafue

(Mt 22.23-33; Lc 20.27-40)

¹⁸ Naie facaise saduceuai railla comini naimie dñe bitimaci. Fiodaillamona jaca buna jilloñellena ñnotimaci. Jesúmo llotimaci:

¹⁹ —Maestro, cai facaina Moisés micori jaie cuega: “Ii-ma fiodailla meinocni, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁰ Bie rafuena uiñoiacadica. Siete amatiai ite. Nano doforamie ie aina ote. Naimie nia uruiainide fiodailla. ²¹ Ie emodo imie ie ama feciñoa ote. Naimie uruiainide jiai fiodailla. Naie siete digamiedemona iese sefuide. ²² Uruiaínide nana fiodailla. Ja muidomo naie riño jiai fiodaite. ²³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

²⁴ Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. ²⁵ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisai ainidimaci. Ininidimaci. Ie isoi naie siete amatiai iitimaci. ²⁶ Fiodaitino ico jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui lloite: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” lloite. ²⁷ Jai fiodaitimaci; ia naimaci joreñuai nia itimaci. Jusiñamuidi daní cajedino imaci Jusiñamuina jira, naimaci joreñuai naimie dñe itimaci. Ico naimaci abiaina jiai jillotaite. Fiodaillamona jilluana omoi raise uiñoñedomoi —lloite.

Jesús nanoca llogacinona llofua rafue

(Mt 22.34-40)

²⁸ Naie facaise Moisés micori llogacinona llofueraima Jesús dñe billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacinuaimona, ¿nie llogacino ua nanoca llogacinona?

²⁹ Jesús dinena uai ote:

—Moisés micori jaie cuega: “Israel comini, bie rafue-mo cacarei. Cai Nama Jusiñamui jaca dajede. ³⁰ Omoi jitailla jira, nana omoi comeciái diga, cai Nama Jusiñamuina isirui. Naimiemo omoi comeciaina eo faca”. ³¹ Ie emodomo ite llogacino janore daje isoide: “Daní omoi abí omoi isiruilla isoi, omoi ecimo itinona jiai isirui”. Bie mena llogacino jiaie llogacinuai baifemo faite.

³² Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede. ³³ Cai jitailla jira, nana cai comeciái diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadica. Bie rafuedo

naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús lloite:

—Iese o ñnocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

Jesús dinena fariseuai cominimo jicanua rafue

(Mt 22.41-46; Lc 20.41-44)

³⁵ Jusiñamui jofomo Jesús jailla mei, nainomo itinomo jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci? ³⁶ Jusiñamui Joreñodi David micorina ñaitatajanona, David micori lloite:

Jusiñamuidi cue Namamo lloite: “Illaimana o illamona, cue nabei dñe ana rai.

Ona ñnoñedino o anamo itataiticue”.

³⁷ “Cristodi cue Nama” David micori raite. Iese naimie micori railla jira, Cristo David micori afemo faite.

Naimiedi jamai David micori jitoñede; ia jiai ie Nama. —Nainomo itino naimie llofuiana iocire cacareidimaci.

Jesúdi judíuai illaicominina ñaia rafue

(Mt 23.1-36; Lc 11.37-54; 20.45-47)

³⁸ Jusiñamui jofomo Jesús nia llofuianona, raite:

—Moisés micori llogacinona llofueraimona abina rairui. Illaicominina naimaci itimaciden, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoíñedina itimaciden, comini naimacina uaiduana gaidimaci.

³⁹ Comini naimacimo acarillena, ofiracomo uicomo raiacadimaci. Rafue ia: “Jamai bue isoíñedica” raillamo comecina facajanona, rafue nama ecimo raiacadimaci.

⁴⁰ Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

⁴¹ Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci. ⁴² Ie facaise eo duerede feciño menaruñu jonete.

⁴³ Iena ciuanona, naimie dñe ie llofueoicaiganona uaiduanona, naimacimo lloite:

—Bie eo duerede feciño nana jiaie comini jonia baifemo jonete. ⁴⁴ Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaino baifemo jonete.

Jesúdi Jerusalémo ite Jusiñamui jofu judaiana llua rafue

(Mt 24.1-2; Lc 21.5-6)

13 Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesús-mo damie raite:

—Maestro, bie jofomo ite noficiái co ebirede. Bico eo ebire ciode.

²Jesús dinena uai ote:

—Bie jofu birui eo mare; ia nana bie jofomo ite noficiái ico judaisite —llote.

³Ie mei Olivos railla anedu dine rillanona, Jusiñamui jofu uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesús-mo llotimaci:

⁴—Jusiñamui jofu judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵Uai ote:

—Omoína bie rafuena bu jifueñellena, omoí abina rairui. ⁶Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoí abina rairui. ⁷Jobaimiaí illena fidiitomoí; iadedi jaciruiñeno. Iese suite; iadedi abido nia biñeiticue. ⁸Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaímo ñuisañuaí suite. Diga illanuaímo comini aime gutimaci. Iese suia, omoí duere sefuillifue omoímo suite. ⁹Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cueno omoí duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitoimoí. ¹⁰Diga comini cue rafuena nana nairaímo lloitimaci, nana nairaíai iena cacallena. Ie mei abido biiticue. ¹¹Naie illaicomini dine omoí ia, juez dine omoí ia, omoí abi ridollicinomo omoí comeciaina jarire facañeno. Naie facaise omoí ñaillicinona uiñoitomoí. Dani omoí comeciái icinodo ñaíñeitomoi; ia Jusiñamui Joreño uaido ñaitomoí. ¹²Cuena ñnotomoí; ia ailluena cuena ñnoñeitimaci. Cuena omoí ñnua jira, omoína enoitimaci. Iemona dajerie ie amana meinetalena, naimiena llogidoite. Dajerie moodi ie uruena meinetalena, naimiena llogidoite. Dajerie uruaídi naimaci moona, naimaci eina meinetalena, naimacina llogidoitimaci. ¹³Cue cominina omoí illamona, nana nairai omoína enoitimaci; iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁴Cue llua amo cacarei. Jusiñamui facaina lloraímadi jiaímie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo ite jearede rafue finuana omoí ciuanona, naiemona omoí jillobillena, duere omoí sefuiñellena, Judeamo omoí illamona, aneduaí dine omoí aisi. ¹⁵Jofu emodomo omoí ia, ana billanona, aneduaí dine raire rillena, jofomo jaiñeno. Nainomo ite rana omoí diga uiñeno. ¹⁶Aneduaí dine raire rillena, illimo omoí ia, abi-

do jofomo biñeno, omoí iniroi omoí diga uillena.

¹⁷Naie rafuemona jillobillena, naie facaise urueside riño duere sefuite. Uruena nia jirode riñodi jiaí duere sefuite. ¹⁸Eo duere sefuiñellena, Jusiñamuimo omoí jicano, rollime facaiseconi bie rafue suiñellena. ¹⁹Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñeitimaci. ²⁰Naie facaise ianori fo Jusiñamui oñeítana, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹‘Ie facaise omoímo bu raia: “Jadi, Jusiñamui facaina lloraíma benomo birui bairedede. Naimiedi Cristo”, iena ñnoñeno, jiaímie raia: “Oni batine Cristo birui bairedede”, iena ñnoñeno. ²²Cristona abi caitadino biitimaci. Jusiñamui facaina lloraínina abi caitadino jiaí biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²³Ie jira omoí abina rairui. Ero, bie rafue nia suiñenia, iena omoímo jai lloticue.

Jesús abido ie bille rafue

(Mt 24.29-35, 42-44; Lc 21.25-36)

²⁴‘Naie duere sefuilla facaise meinoconi, jitoma lligaiñoñeite. Fivui jiaí lligaiñoñeite. ²⁵Monamona ucuaí ana llujite. Nana naie radi jaidisite. ²⁶Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaímiana biiticue. ²⁷Cue jaienisaína cue ecimona oretaiticue. Cue fetocano diese naganomona ofitaitimaci.

²⁸‘Higuera railla raramona omoí fueo. Bie eniruemo naie rira firuillamona, fiemona raire illana uiñotomoí. ²⁹Ie isoide. Bie rafue ico suia, cue billirui iaírei illena uiñotomoí. ³⁰Uanaicinona omoímo lloiticue. Nana bie rafue suille facaiseconi bie nairaí nia iite. ³¹Mona enirue diga fuite; iadedi cue lloga uai jaca suite. ³²Cue abido billirui jaca bu uiñoñede. Jusiñamui jaienisaí iena uiñoñedimaci. Jusiñamui Jitodicue; iadedi cue abido billiruina jiaí uiñoñedicue. Dama cue Moo iena uiñote. ³³Abina rairuicana jai. Naimie omoína canollena, Jusiñamuimo jiaí jicabi. Cue billirui omoí uiñoñena jira, iemo ocuri.

³⁴‘Tena omoí raise uiñollena, bie rafuena lloiticue. Patrón jiaie eniruemo jaide. Nia jaiñenia, ie mullaína ie jofona sedatate. Nagamie ie maijille ocuide. Jofu naseña sedadimemo naimie billemo raise ocurillena llote. ³⁵Naie patrón abido billena naimaci uiñoñena jira, naga hora iemo ocuritimaci. Nibaí navuida baífe biite. Nibaí daferuise biite. Nibaí atava ñaía facaise biite. Monaia, nibaí biite. ³⁶Ebena naimie biite. Inidimacimo naimaci baisaíbi raillanona, naimaci jaca ocurilla. ³⁷Ie isoide. Ebena biiticue. Cue abido billirui omoí uiñoñena jira, iemo jaca omoí ocuri.

Juduaí illaicomini Jesúsna gaitallena, siadua rafue

(Mt 26.1-5; Lc 22.1, 2; Jn 11.45-53)

14 Naie facaise pascua railla rafue illena, menarui fiebide. Naie facaise llomenico guille rafue jiaí

ite. Naie rafue ia, siritaga rana jaca guiñedimaci. Egiptomona naimaci jaiagai jillobillana começillena, naie rafue ite. Judíuai illaicomini Jesúsna jifuiano gaitaacadimaci. Naimiena meineiacadimaci. Iena siadua mei, ² raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamon, comini cai diga fuitimaci. Nia sedaiticai.

Jesúmo riño caimare soride ra totaja rafue

(Mt 26.6-13; Jn 12.1-8)

³ Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

⁴ Damierie iena cianona, iciritimaci. Coniniri dani ñaitimaci:

—Naie ra jamai dotade. Jai faifide. ⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

⁶ Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiñona jeare ñaitomoi? Mare rafuena cuemo finode. ⁷ Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. ⁸ Cue facaina naiñaiño finoacana diese jai finode. Nia fioidañedicue; ia cue fioidailirui facaina naiñaiño iese finode. ⁹ Omoimo uanaicinona lloiticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño finoca rafuena lloite.

Judas micori raillamie Jesúsna gaitataiacana rafue

(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúsna gaitatallena, Jusiñamui diga nanoca ñairaini dine jaide. ¹¹ Iena cacajano, iobidimaci.

—Iena o finoia, omo ucubena fecaiticai —llotimaci. Iemona Jesúsna gaitatalliruiimo Judas ocuride.

Jesúdi ie fioidaille rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llaudaiaia fajarui illanona, Jesúsna ie llofueoicaigano jicanote:

—¿Ninomo pascua railla rafue ie guille finuana jitaidio?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca. ¹⁴ Naimie jailla jofonamamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guticue, cue llofueoicaigano diga?’ ” ¹⁵ Ie mei omicomomo afebebamo ite aillue cuartona acataite. Na raruiaí diga ite. Nainomo cai guille fino.

¹⁶ Jesús llua isoi jaidiaimaia. Jerusalémo rilla mei, naimie llua isoi baitiaimaia. Pascua rafue guille fioidiaimaia. ¹⁷ Nairui jitoma ana itemo, ie llofueoicaigano diga, Jesús nainomo guisaide. ¹⁸ Mesamo gutimacimo, Jesús llote:

—Omoimona damie cuena gaitataite. Naimie cue diga bene jai quite.

¹⁹ Iena cacajanona, sunaitimaci. Damierie naimiemo jicanoside:

—¿Cuena ñaitio?

²⁰ Uai ote:

—Omoimona damie bie platomo cue diga llomenico diga mutade. ²¹ Jusiñamui facaina lloraíma micori cuega isoi, monamona jai billamona, fioidaiticue; iadedi cuena gaitataitimie eo duere sefuite. Naimie jeiciñegadena, cuemona mare.

²² Naimaci nia gutimacimo, llomenicon Jesús llinuanona, Jusiñamuimo iobillacinona fecaja mei, llomenicon tairude. Naimacimo fecajano raite:

—Iena llinuano guiño. Bie llomenicodi cue abi facaie. Cue abimo omoi começina facajano, iena guiño.

²³ Ie mei naimie jiroracona jiaí llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci. ²⁴ Naimie raite:

—Cue fioidaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facaie. ²⁵ Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue.

Jesúdi Pedro naimiena januana llua rafue

(Mt 26.30-35; Lc 22.31-34; Jn 13.36-38)

²⁶ Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide.

²⁷ Naimacimo llote:

—Cuena fainonocaitomoi. Jusiñamui facaina lloraíma micori iena jaie cuega: “Toica llaudaiaí sedaraimana meinetimaci. Naimie toinaiaí uaficaida jaitimaci” cuega. Naimie micori caina cuete. ²⁸ Ero, fioidaillamona cue jillua mei, omoi uicodo Galileamo jaiticue, nainomo omoi diga dafaifillena.

²⁹ Pedro uai ote:

—Nana jiaíno ona fainonocaia, ona jaca fainonocaiñeiticue.

³⁰ Jesús dinena raite:

—Uanaí omo lloiticue. Ja naíno itava menacaiño nia ñaiñenia, dacaiño amani cuena janoitio.

³¹ Pedro dinena riire llote:

—O diga cue fioidiadedi, ona janoñeiticue.

Nana ie llofueoicaigano daje uaido jiaí raitimaci.

Jesúdi Getsemanímo Jusiñamuimo jia rafue

(Mt 26.36-46; Lc 22.39-46)

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede.

³⁴ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jiiide:

³⁶ —Ore Moo, nana rana finoredio. Cuenaa llogi ca-caitañeno. Cue jitailla isoi cuena finoñeno; iadedi o jitailla isoi cuena fino.

³⁷ Ie mei ie llofueoicaigano dine abido billanona, naimaci inisitemo ride. Naimacina casitajano, Pedro m jicanote:

—Simón, ¿niese raire inidio? daje hora nia iñedemo.

³⁸ Iniñeno. Taife ramo omoina fai raillano, iena omoi iñoñellena, Jusiñamuimo jii. Omoi comeci mare rafue-na finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñoñotal-lena —llote.

³⁹ Ie mei dane jiiillena jaide. Ailli naimie jiaa isoi, dane jiiide. ⁴⁰ Ie llofueoicaigano dine dane billanona, naimaci uisi lliñoilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. ⁴¹ Dane jiaa mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodaille facaise jai ite. Jusiñamui jitailla jira, cuena ja gaitajanona, naimiena iñoñedino anamo ja iiticue. ⁴² A naidacai. Maiña. Cue gaitataitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci.

Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci. ⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵ Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote.

⁴⁶ Ie jira Jesúna gaitadimaci.

⁴⁷ Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote. ⁴⁸ Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuenaa gaitallena, fñiraimadicueta cuemo omoi billa. ⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuenaa jai omoi gai-

tajamona, Jusiñamui facaina lloraini micoriai cuega-fuia suite.

⁵⁰ Ie facaise nana naimie llofueoicaigano naimiena fainonocaillano, aisidimaci.

Jesús jinafona conirue racaja rafue

⁵¹ Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci; ⁵² ia ie iniroina fainonocaillanona, taimiena aiside.

Jesúdi judíuai illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

⁵³ Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai illaicomini itimaci. Nanoca ñairaini itimaci. Einamaci jiai itimaci. Moisés micori llogacinona llofueraini jiai itimaci. ⁵⁴ Pedro naimaci jinafona aarena racade. Jusiñamui diga nanoca ñairaima nairairimo jaide. Jofono sedadino diga nainomo ite iraimo agaide.

⁵⁵ Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci. ⁵⁶ Diga comini Jesúna llogidotimaci; ia tainona llotimaci. Daje isoi lloñedimaci. ⁵⁷ Damierie billanona, tainona llogiduanona, raite:

⁵⁸ —Bimie lluanaa cacadicai. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaianona, darui amani illanona, jiaie finoiticue. Comini iena finoñeitimaci”. ⁵⁹ —Iese llotimaci; ia daje isoi lloñedimaci.

⁶⁰ Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

⁶¹ Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

⁶² Jesús uai ote:

—Jii, naimiedicue. Monamona jaie cue billamona, iimana jaidicue; ia ico jiairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiai cioitimaci.

⁶³ Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitañedicai.

⁶⁴ Jusiñamuina naimie jeare ñañana jai cacadomoi. ¿Niese naimiena raitomoi?

Jiaie illaicomini dinena:

—Naimie fiodaillesa —llotimaci.

⁶⁵ Ie facaise damierie naimiena tuallaitimaci. Ie uiecona iabaila mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoidimaci.

Pedrodi Jesúna janua rafue

(Mt 26.69-75; Lc 22.56-62; Jn 18.15-18, 25-29)

⁶⁶ Naie facaise Pedro nairaibirimo ite. Naie nanoca ñairaima mullaiñuaimona dañaiño nainomo billanona,

⁶⁷ Pedro agaillana ciode. Raite:

—Nazaret ie Jesús cominidío.

⁶⁸ Pedro iena januano, raite:

—O lluana uiñoñedicue. Iena raise cacaiñedicue.

Ie mei nase fuedo jaide. Naie facaise itava dacaiño ñaite. ⁶⁹ Naie mullaiño naimiena dane ciuanona, nainomo jamai itinomo llote:

—Bimiedi Jesús ie llofueoicaigano imie.

⁷⁰ Iena Pedro dane janote. Dallu illanona, nainomo jamai itino Pedromo llote:

—Odi Galilea imiedío. Jesús diga jaicabidío.

⁷¹ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, omoi llogamiena uiñoñedicue.

⁷² Ieconí itava dane ñaite. Iena cacajano, Pedro Jesús lluana uibiñote. Jaive naio Jesús Pedromo llote: “Itava menacaiño nia ñaiñenia, dacaiño amani cuena janoitío”. Iena uibiñuamona, Pedro eo eede.

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

15 Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador. ² Pilato naimiemo jicanote:

—¿Judíuai comini illaimadio?

Jesús uai ote:

—Jii.

³ Ie muidona Jusiñamui diga nanoca ñairaini Jesúsna llogidotimaci:

—Naimie diga maraiñede rafuena finode —llotimaci.

⁴ Pilato dinena naimiemo jicanote:

—¿Niese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodi Jesús fiodaillana llua rafue

(Mt 27.15-31; Lc 23.13-25; Jn 18.38-19.16)

⁶ Naga año pascua railla rafue facaiseconi cárcelmo itinomona Pilatodi comini jicacamienna jamai jino orede. ⁷ Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite. ⁸ Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. ⁹ Pilato jicanote:

—¿Bu jino cue oretallena jitaidomoi? Omoi judíuai railla illaimana nibai jitaidomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci

Jesúna meiniacanana jiai uiñote. ¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. ¹² Iena cacajano, Pilato naimacimo jicanote:

—¿Niese bimiena cue finuana jitaidomoi? Naimiedi omoi judíuai illaima raillamie.

¹³ Ado llotimaci:

—¡Naimiena corai!

¹⁴ Pilato dane jicanote:

—¿Nie isoide maraiñede rafuena finode? —Iena cacajano, ado ibi llonoidimaci:

—¡Naimiena corai!

¹⁵ Naimacina iobitallena, naimaci jitailla jira, Barrabás jino orede; iadedi Jesúsna sechedotaja mei, naimiena coraillena orede.

¹⁶ Soldaduai naimiena gobernador jofo fo uillanona, nana soldaduai nainomo ofidimaci. ¹⁷ Jiduirede iniroi naimiemo jitaadimaci. Eecuaimona niga nuiciraina naimie ifogimo jitaadimaci. ¹⁸ Naimiena jifanoduanona, naimiena uaidotimaci:

—¡Jai, judíuai illaima!

¹⁹ Radosi diga ie ifogimo buta-butadimaci. Naimiena tuallaitimaci. Naimie illaimana itena, naimiena sedallena, caiñici ifodo raiedimaci. ²⁰ Jesúsna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitaadimaci. Ie mei naimiena coraillena oni uitimaci.

Jesúna coraia rafue

(Mt 27.32-44; Lc 23.26-43; Jn 19.17-27)

²¹ Jerusalémona naimaci jaillanona, jamai bitimiemo dafaifidimaci. Naimiedi Simón. Cirene railla enirue imie. Naimie jito iaiaiaidi Alejandro iaiaiaidi Rufo diga. Jerusalén onifemona naimie billanona, naimiemo dafaifidimaci. Naimiena Jesús uiga cruzna rocatatimaci. ²² Gólgota raillanomo jaidimaci. Ifocoraina erualla jira, iese mameciredede. ²³ Nainomo rillanona, ie abi isirena cacaiñellena, vinomo eriredede rana faianona, Jesúsno fecadimaci; iadedi naimie iena jiroñede. ²⁴ Ie mei naimie cruzmo coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uiñollena, jifanododimaci.

²⁵ Jitoma nia fuiri daidemo, naimiena coraidimaci.

²⁶ Cruzmo ie llogidua fuena jonetimaci. Jai cuega: “Judíuai comini Illaima”. ²⁷ Ie mei mena firiruide iaiaiaina coraidimaci. Damie Jesús nabeimo coraica. Jiaimie Jesús jarifebeimo coraica. ²⁸ Iemona Jusiñamui facaina lloraíma micori jaie cuegafue suide. Cuega: “Maraiñedino isoi naimie jai ite”.

²⁹ Naisodo jamai jaidino Jesúsna mameritimaci.

Mamerillanona, ifogiaina jaididimaci. Raitimaci:

—Navui raisoidio: “Jusiñamui jofona judaiticue.

Darui amani illanona, iena dane fñoiticue” raisoidio.

³⁰ Ie muidona dama o abina mai jillota. Cruzmona ana bi.

³¹ Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. ³² Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iena cai cioia, naimiena ñnoiticaí. —Iese naimiena jifanododimaci. Naimie diga coraicamie iaimaiaí naimiena jiai jeare ñaitiaímaiaí.

Jesús fiodailla rafue

(Mt 27.45-56; Lc 23.44-49; Jn 19.28-30)

³³ Jitoma naidai itemona, daje amani horas mona jitiñicaide. ³⁴ Ie meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni doñañuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

³⁵ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloaíma Elíana uaidote —raitimaci. ³⁶ Naimacimona damie jarire jailanona, fibecode ramo vinona faite. Radosimo jillillano jirrollena, naimiemo a fecade. Raite:

—Dallu sedaiticaí. Elías naimiena jillotajaíbillena uiñoiacadicaí.

³⁷ Ie facaise ado cuirioita fiodaite. ³⁸ Naie facaise Jusiñamui jofomo ie fetaca iniroife ana anaba jillacimo motodo menafe cuararide. ³⁹ Jesúsna sedallena, nainomo capitán ite. Jesúsna eruaillanona, Jesús fiodaillana ciode. Raite:

—Uanai bimiedi Jusiñamui Jito.

⁴⁰ Dajerie riñoniaí naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite. ⁴¹ Galileamo Jesús navui illa facaise naie riñoniaí naimie diga jaisoidimaci. Naimiena canouidimaci. Jerusalémo Jesús billanona, ailluena riñoniaí naimie diga jiai bitimaci. Ie fiodaillana jiai cioidimaci.

Jesús raiafomo jonia rafue

(Mt 27.57-61; Lc 23.50-56; Jn 19.38-42)

⁴² Jitoma ana itemo, sábado rille jai iaírei illanona, ⁴³ Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina íco sedajanomo illemo ocuride. Ie comecina ocuiñocada, Pilato dine jaide. Iena raillena, Jesús abina jicade. ⁴⁴ Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúsna sedade capitána uaiduanona, naimiemo Jesús fiodaillana jicane.

⁴⁵ —Jesús jai fiodaite —capitán railla mei, Pilato Jesús abina Josémo fecallena llote. ⁴⁶ José mare userede iniroi íbaja mei, cruzmona Jesús abí ana ua mei, naie iniroi diga ie abina ferinote. Nofici motomo finoca raiafomo jonete. Naifona íbaillena, aillue nofici nain-

omo bai ñuitade. ⁴⁷ María Magdalena, jiaie María diga, naimie raiana ciode. María José ei.

Jesús fiodaillamona jillua rafue

(Mt 28.1-10; Lc 24.1-12; Jn 20.1-10)

16 Sábadoruimo jitoma sojicaidemo, María Magdalena caimare soride rana íbade. Jacobo ei, María jiai íbade. Salomé jiai íbade. Jesús abímo jonellena, ie abina raise finollena naimaci einamací finocabilla isoi, naiñaiñuai iena íbade. ² Domingo jitiñamo jitoma como bairedemo, Jesús raiafo dine naiñaiñuai jaide. ³ Jaillanona, coníñuaimo jicanote:

—¿Bu noficina caina oni ñuitalle raiafomona?

⁴ Raiafo dine rillanona, iemo eruaillanona, nofici oni ñuitacana ciode. Naie nofici eo aillue. ⁵ Raiafomo jailanona, naiñaiñuai conirruena eruaidimiena nabeimo raillana ciode. Naimie are userede iniroina jítade. Naimiedi Jusiñamui jaíenici. Naiñaiñuai jacinaite.

⁶ Nainomo itimie dinena raite:

—Jacinaíñeno. Nazaret ie Jesúsna jenodomoí. Naimiena coraidimaci; ia fiodaillamona naimie jai jillode. Bene jai íñede. Naimie jonianomo mai eroda. ⁷ Naimie llofueoicaiganomo iena lluaí. Ua Pedromo llono. Galileamo omoí uicomo naimie jaite. Omoímo naimie llua isoi, naimiena cioitomoí.

⁸ Naiñaiñuai jino jaillanona, raiafomona aisicana jaide. Jacinaillamona abí jaidisite. Jaciruillamona, iena bummo lloñede.

Jesús María Magdalenamona bairia rafue

(Jn 20.11-18)

⁹ Domingo jitiñamo Jesús jillua mei, María Magdalenamona Jesús nano bairedo. Naiñaiño Janaba anamo navui illamona, Jesús naiñaiñomona siete jananiaí navui oni orede. ¹⁰ Naiñaiñomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai ciodicue —naimacimo naiñaiño llua mei, iena ñnoñedimaci.

Mena llofueoicaiganomo Jesús bairia rafue

(Lc 24.13-35)

¹² Ie meinoconi Jesús mena llofueoicaiganomo bairedo. Naimie eruaísoilla isoi, eruaíñede. Iaímaiaí naisomo macaria, iaímaiaímo bairedo. ¹³ Jerusalémo abído iaímaiaí rilla mei, jiaie llofueoicaiganomo iena llotiaímaiaí; ia ñnoñedimaci.

Jesús ie once llofueoicaiganomo bairia rafue

(Mt 28.16-20; Lc 24.36-49; Jn 20.19-23)

¹⁴ Ie once llofueoicaigano danomo guitimacimo, Jesús naimacimo bairedo. Naimie jillua mei, damierie naimiena ciuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote. ¹⁵ Naimacimo llote:

—Nana nairaíaimo jai. Nana cominimo cue mare rafue llocana jai. ¹⁶ Cueno ñnuamona, bautizagano diese Jusiñamuimona duere sefuiñeitimaci; iadedi Jusiñamui

cuena ñinoñedinona duere fñoite. ¹⁷ Cuena ñinotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. ¹⁸ Jaiona naimaci linoia, naimacina ñiese ñibaiñeite. Bainode ra naimaci jiroia, naimacina ñiese ñibaiñeite. Duidinona naimaci jetajamona, jilloitimaci.

Jesús monamo jailla rafue

(Lc 24.50-53)

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiña-

mui nabeimo naimie raide. ²⁰ Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena fñotate. Iemona comini dinena Cristomona naimaci rafue illana uiñotimaci. Macaibaite. Cue cueba rafue jai fuite. Marcodicue.

LUCAS

Lucas Teófilomo cartana orede

1 Teófilo, cue isiruiga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciotimaci. Iena llocana jiai jaidimaci. Naimacimona bie rafue raise uiñoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uiñua jira, uanaicinona o raise uiñollena, bie cartana jai cueticue. Iese birui cue comeci jitaide.

Jusiñamui jaienici Juan Bautista micori jeicillena llua rafue.

⁵ Jesucristo nia jeicifienia, Zacarías illa facaise Herodena mameciredede illaimadi. Judea railla enruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijjuide. Naimie aidí Elisabet. Naiñaiño jaie ite usumadi Aarón micori. Aarón micoridi Jusiñamui diga nano ñairaima. ⁶ Jusiñamuimona iaimaiaí mare, nana naimie lloga uaina raise iaímaiaí ñnua jira. ⁷ Naiñaiño oiniñona jira, uruenidiaimaiaí. Jiai jai uaicima iaimaiaí.

⁸ Zacarías facai ite comini maijja facaise ia, Jusiñamui jofo dine naimie maijjaide. ⁹ Nainomo naimie maijja, caimare soride ra fo jobaillena, naimiena fetodimaci. Naimaci finouilla isoi, jobaillanona daní Jusiñamui diga ñairainí naimiena fetodimaci. Iemei naimie fo jaide.

¹⁰ Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci. ¹¹ Ieconí cai Nama Jusiñamui jaienicidi naie ra boano nabeimo Zacaríamo bairede.

¹² Naimiena ciuanona, Zacarías jacinaite. ¹³ Jaienici naimiemo llote:

—Zacarías, jacinaifeno. Jusiñamui o jiacinona jai cacade. Iemona o ai uruesite. ñimana jocoite. Juan o jitalle naimie mamecidi. ¹⁴ Iemona o comeci caimare iite. Iobitio. Ailluena comini naimie jeiciari iobitimaci. ¹⁵ Jusiñamuimona naimie jamai bue isoiñeitimiena jaite. Jifaitate rana jiroñeite. Naimie jeiciamona Jusiñamui joreño naimiena namataite. ¹⁶ Cai Nama Jusiñamui díbeimo ailluena Israel cominina naimie itataite.

¹⁷ Jusiñamui jitaillacinona finocana jaite. Elíamo Jusiñamui joreño jaie siño uai illa isoi, naimiemo iite. Jusiñamui rafuena naimie lluamona, damierie, naimaci jaigaí isoi, Jusiñamuina ñnoitimaci. Ailluena Jusiñamui uaina jai ñnoñedimaci; ia damierie birui ñnoitimaci. Naimaci comeci Jusiñamui díbeimo meidoitimaci.

Iemona cai Nama Jesucristo bia, naimiena ñnoitimaci.

¹⁸ Zacarías dinena jicanote:

—¿Ñiese o llua suillena uiñoticue? Jai uaicimadicoco.

¹⁹ Jusiñamui jaienici dinena uai ote:

—Gabrieldicue. Jusiñamuimona biticue. Cuenaa orete, bie mare rafuena omo llollena. ²⁰ Ero, cue uaina o ñnoñena jira, uainitio, o jito jeicille dinori. Jiairuido bie rafue suite.

²¹ Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicadimaci. ²² Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai lluana uiñotimaci. Naimie ñaiñeno ite.

²³ Jusiñamui jofomo naimie maijja facaise fuilla mei, ie jofomo abido jaide. ²⁴ Digarui illanona, ie aidí urueside. Ie jira jofomo naiñaiño cinco fivui fiebide, comecina facajanona: ²⁵ “Cue uruesilla jira, iena nia buna lloia-caiñedicue. Cue Nama cuena jai duenaillana uiñoticue. Navui cue urue iñena jira, meiruiticue. Jai meiruiñeiticue. Comini cue joreño jai ñaiñeitimaci”.

Jusiñamui jaienici Jesús jeicillena llua rafue

²⁶ Elisabet seis fivui uruesilla mei, Jusiñamuidí Galileamo ie jaienici Gabrielna orede. Nazaretmo María dine naimiena orede. María nia ñinide; ia jai José jicanogañaiño. Naimie usumadi David micori.

²⁸ Rillanona, naiñaiñomo llote:

—Itio. Cai Nama Jusiñamui ona eo duenaite. Ona jai fetuamona, nana jaie riñonai baifemo naimiedi ona marena itatate.

²⁹ Iena cacajanona, naiñaiño jacinaite. Iena naiñaiño raise cacaiñena jira, iemo comecina facade. ³⁰ Gabriel dinena llote:

—Jacinaifeno. Jusiñamui ona duenaite. ³¹ Birui uruesitio. ñimana jocoitio. Naimie mamecina jitaite Jesúna.

³² Siño jitona jaite. Nanoca Itimie jitona jaite. Ie usuma David micori illaima illa isoi, Jusiñamuidí naimiena illaimana itataite. ³³ Illaimana illamona, Israel railla nairaina jaca sedaite. Naimie ifomo jiaimie jaca iñeite.

³⁴ María uai ote:

—Ñima diga nia iñedicue. ¿Ñiese bie nibaille?

³⁵ Gabriel llote:

—Jusiñamui joreño omo iite. Ie siño uai diga iena fínoite. Jusiñamui marena isoi naimie jiai marenite. Naimiedi Jusiñamui jito. ³⁶ O comini iñaiño, Elisabet, ie uaicitaila facaise jiai jai urueside. Naiñaiño jai jionaide;

ia jai seis fivui naiñaiño uruesilla ite. ³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo iticue. O llucacino cuemona mare.

Ie facaise Gabriel naiñaiñomona oni jaide.

Maríadi Elisabet dine jailla rafue

³⁹ Ie facaiseconi María aneduai dine Judea railla enruemo Zacarías illanomo raire jaide. Elisabetna cioillena, jaide. ⁴⁰ Zacarías jofomo rillano:

—Itio —raillanona, Elisabetna uaidote. ⁴¹ Elisabet naiñaiño uaina cacajano, ieconi naiñaiño jeraimo ite urue iena jiai uiñuamona, niraide. Ie facaise Jusiñamui Joreño anamo Elisabet jai ite. ⁴² Iese illamona, María uruesillana uiñote. Naiñaiño ado llote:

—Jusiñamui ona eo marena canoite. O uruena marena itataite. ⁴³ Jamai bue isoidicue; ia, odi cue Jilloitaraima ei illanona, cue dine bitio. Iena cuemo nia lloñedio; ⁴⁴ ia, cuena o uaiduanona, iobillamona cue jeraimo ite uruedi niraide. ⁴⁵ Cai Nama omo llotataga uaina suillana o ñnua jira, Jusiñamui ona eo marena canoite. —Jusiñamui Joreño naiñaiñomona illamona, iena llote.

⁴⁶ María dinena uai ote:

Caiñai Nama eo mare. Naimiemo iobillacinona fecaa-cadicue.

⁴⁷ Naimiedi cue Jilloitaraimana jira, naimieri iobidicue.

⁴⁸ Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

⁴⁹ Naimiedi siño. Naimiedi mareuidimie. Cue facaina eo mare rafuena finode.

⁵⁰ Naimiema ñnotinona jaca duenaite. Cai jaiagaina jaca duenaite. Caina birui jaca duenaite. Ua nana naimiema ñnotinona duenaite.

⁵¹ Diga siño rafuena finoite. Abi ñedotino comeciái facajacinona llucaitaite.

⁵² Naimiedi illacomina oni dotaite; ia jamai bue isoidinona jamai bue isoiñedinona itataite.

⁵³ Dueredinona eo canoite; ia duenidinomo buena fe-cañeite.

⁵⁴ Duenailamona, cai Israel comina feitañeite.

⁵⁵ Cai jaiagaimo naimie jaie llua isoi, birui caina canoite.

Abraham micorimo jaie llote: “Ona duenaiticue. O comina jaca duenaiticue”

María llote. ⁵⁶ Elisabet diga davui amani naiñaiño fie-bide. Ie mei ie jofomo abido jaide.

Zacarías jito jeicia rafue

⁵⁷ Elisabet jocularui jai ridemo, imana jocode.

⁵⁸ Naiñaiño ecimo ite comini, naiñaiño comini diga, iena fidiamona, cai Nama naiñaiñona eo duenailana uiñotimaci. Naiñaiño diga iobidimaci. ⁵⁹ Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci; ⁶⁰ iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

⁶¹ Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

⁶² Jefona cacaiñena jira Zacarías onolli diga jican-otimaci, ie jito mamecina jitalle. ⁶³ Onolli diga Zacarías fairuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jitate?” comeciaina facadimaci. ⁶⁴ Iecon Zacarías jai dane ñaite. Ie jira Jusiñamuimo iobillacinona fecade. ⁶⁵ Nana iaiaiaia ecimo itino rajicaidimaci.

—Jusiñamui muidona naie rafue suide —lloitimaci. Bie rafuena fidiano, nana Judea railla aneduaimo itin-odi iena ñaoidimaci. ⁶⁶ Iena cacajano, comeciaina facadimaci: “Bimie jamai bue isoiñeitimiena jaite”. Cai Nama naimiema marena jaca canua jira, iese llotimaci.

Zacarías Jusiñamuimo iobillacinona fecaja rafue

⁶⁷ Ie facaise Jusiñamui Joreño Zacarías llotataganona, Zacarías llote:

⁶⁸ Cai Nama Jusiñamuidi mare.

Cai Israel comini dine biite, caina jilloitallena.

⁶⁹ David micori Jusiñamuina jaie sedade.

David micori cominimona siño Jilloitaraimana cai dine oretaite.

⁷⁰ Ie facaina llorainido naimie jaie llua isoi, cai Jilloitaraimana oretaite,

⁷¹ Taifemona, Janabamona cai jilloillena.

⁷² Cai usumatiaia micoriaimo: “Omoia duenaiticue” llote.

Cai usuma Abraham micorimo jaie llogacinona feitañede.

⁷⁴ Taifemona cai jilloillena, cai Jilloitaraimana oretaite. Nana cai ille dinori Jusiñamuina jaciruiñeno sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaraimana oretaite.

⁷⁶ Cue jito, ona lloiticue. Jusiñamui ie lloraimana jaitio. Cai Nama uicomo jaitio, comini comeciái o raise finollena.

⁷⁷ Ie cominimo jeacinomona jilluacinona lloitio. Iena naimaci ñnoia, Jusiñamui naimaci jeacinona feitaite.

⁷⁸ Jeacino anamo jai cai illa jira, jitreidinomo iticai isoidicai.

Jusiñamuina cai nia ñnoñenia, fiodaillana jaciruiticai. Naimie caina duenailamona, cai Jilloitaraima billena o llofuellena, ona oretaite.

Naimiema cai ñnoia, jitreidinomo iñeiticai; ia Jusiñamui diga cai comeciái uri iite.

⁸⁰ Zacarías jito sairide. Jusiñamuina ñnocana jaide. Cominimo naimie nia marefodo lloñenia, jofue iñenanomo ite.

Jesús jeicia rafue
(Mt 1.18-25)

2 Jesús jeicia facaise César Augusto anamo ailluena nairaiaí ite. Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaímo illana naimie uiñollena, nana comini mameciaí cuellena ocuide. Jaca bu iese jaie finoñede. 3 Naimaci jaiaí illanomo mameciaí cuiana ocuide. 4 Ie jira José Galileamona Nazaretmona jaide. Judeamo Belémo jaide. David micori cominimo naimie jainaiaílla jira, David micori illanomo jaide. 5 Ie ai María diga jaide. Naiñaiño fenai jai eo aillue. 6 Belémo iaímaiaí rillanona, naie facaise comini jofomo inillino iñena jira, jurareta jofomo ridiiaímaiaí. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisaí toica llaudaiaí sedaraini dine jailla rafue

8 Jesús jeicia facaise naie naio Belén ecimo ite pastomo damierie toica llaudaiaína sedaraini itimaci. Naimaci toinaína sedadimaci. 9 Ieconí caí Nama Jusiñamuimona daje jaienici naimacimo ebena bairede. Jusiñamui ie siño uai diga naimacina quetiñote. Jacinaitimaci. 10 Jaienici llote:

—Jacinaíñeno. Mare rafue lloiacadicue. Nana comina iobitallena, iena lloiacadicue. 11 David micori illanomo damie como jeiciga. Jusiñamui facaina lloraini micoriaí naimie billena jaie llouidimaci. Naimiedi Cristo caí Nama. Naimie omoi jilloitaraíma. Jeacinomona omoína jillotaite. 12 Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue lluana uanaicinona uiñoitomoi —llote.

13 Ie facaise naie jaienici dine ailluena jaienisaí bitimaci. Jusiñamuimo iobillacinona fecajano rotimaci:

14 Monamo Jusiñamui illanona, naimiemo iobillacinona feaacadicaí.

Cominina naimie duenaillamona, naimie diga uri iitimaci rotimaci. Ie mei abido jaidimaci.

15 Monamo jaienisaí jailla mei, toica llaudaiaí sedaraini coniniri ñaitimaci:

—Belémo mai caí jailli, caí Nama caímo como lloga rafuena caí jibuisaillena.

16 Ieconí raíre jaidimaci. María José diga baitimaci. Iaímaiaí urue jurareta ecaranomo biillana cioidimaci.

17 Naimiena ciua mei, nana naimacimo jaienici lloga rafuena llotimaci. 18 Nana naie rafuena cacadinodi ieri rajicadimaci. 19 Iaímaiaí uruena ciua mei, llaudaiaí sedaraini imaci toinaí dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

Jerusalémo Jusiñamui jofomo Jesúna iaímaiaí uilla rafue

21 Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

22 Moisés micori jaie llua isoi Jerusalémo Jesúna uitiaímaiaí. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaíma iena faja mei, riño facaina Jusiñamuimo jobaica”. Jiaí cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaímaiaí.

25 Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inocana jaide. Naimie cominina Cristo jilloitallena, Cristo billemo ocuride. Naie facaise Jusiñamui Joreño anamo naimie ite. 26 Iemona Jusiñamui Joreñodi, naimiena Cristona cioillena, navui uicodo uiñotade. O nia fioidañenia, Cristona cioitio raillanona llote.

27 Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode. 28 Naimaci dine jaiillanona, Jesúna meniñote. Jusiñamuimo iobillacinona fecajano jide:

29 Nama, o anamo iticue.

Cuomo o lloga uai jai suilla jira, uri fioidaiticue.

30 O oretaga jilloitaraímana jai cioidicue.

31 Naimiena oredio, nana comini jilloillena.

32 Naimiedi judiaíñedinona uanaicinona uiñotaite.

O cominina iobitaite

jide. 33 Iena cacajamona, iaímaiaí jitona lloga uairi rajicadiaímaiaí. 34 Simeón iaímaiaímo caímaredicinona llote:

—Jusiñamui omoína raise canoite —llote.

Maríamo llote:

—Ero, ie rafuena llollena, Jusiñamui o jitona jai fetode. Naimie illamona, comini comecina facajacina uiñotaite. Naimiemo suille rafuemono o comeci sure iite. Caí cominimona ailluena naimiena jitaíñeitimaci. Ailluena jitaítimaci.

36 Nairuido Jusiñamui jofomo Ana railla feciño ite. Jusiñamui naiñaiño lloga rafuena llouide. Naiñaiño moo Fanuel micori. Naiñaiño nairaídi Aser. Jitaiño facaisemona ie ini diga siete años illanona, naimie fiodaite. 37 Naiñaiño jai eo uaciño. Ochenta y cuatro años naiñaiñodi jai ite. Jusiñamui jofomo jaca isoide. Nargarui Jusiñamuimo jianona guicabiñeno naimiena sedauide.

38 Simeón ñaiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ocurilla jira, naiñaiño naimaci jilloitaraímana nainomo itinomo llocana uite.

Nazaretmo abido naimaci jailla rafue

³⁹ Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiiaimaia. ⁴⁰ Nainomo Jesús sairicana mairicana jaide. Eo abina uiñote. Naimieri iobillamona, Jusiñamui naimiena canouide.

Jerusalémo Jusiñamui jofomo Jesús illa rafue

⁴¹ Naga año Jerusalémo pascua railla rafue dine Jesús moo iaimaia jaisoidiiaimaia. Egiptomona naimaci jaigai jillobillana comecillena, naie rafue ite. ⁴² Naimiemo doce años illa facaise Jerusalémo iaimaia jaisoilla isoi, jaidiiaimaia. Naimie doce años illa jira, Jesúna uitiaimaia. ⁴³ Rafue fuilla mei, abido bitiaimaia. Ailluena comini jia billa jira, Jesús billana raise uiñoñediiaimaia. “Cai comini diga naimie bite” raillanona comecina facadiiaimaia; ia Jesús Jerusalémo fiebide. Darui raifi billa mei, iaimaia cominimo naimiena eo jenodiiaimaia. ⁴⁵ Baiñena jira, inia mei, Jerusalémo darui jailanona, abido jaidiiaimaia. ⁴⁶ Ie are Jusiñamui jofomo naimiena baitiaimaia. Moisés micori llogacinona llofueraini motomo naimie ite. Naimaci llofuiana cacade. Iena naimaci diga jia siadote. ⁴⁷ Nana cacadino naimie uiñogacinori rajicaidimaci. Naimie raise siadogacinori jia rajicaidimaci. ⁴⁸ Naimiena iaimaia baia, rajicaidiiaimaia. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

⁴⁹ Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Niese bene cue illana uiñoñedomico?

⁵⁰ Naimie lluaana raise cacaiñediiaimaia. ⁵¹ Iemei iaimaia diga Nazaretmo naimie abido jaide. Iaimaia uai inuanona, iaimaia anamo ite. Ie ei María nana naie rafue ie comecimo facauide. ⁵² Naimie sairicana abina uiñocana jaide. Jusiñamui naimieri iobide. Comini dinena naimiena jia gaidimaci.

Jofue iñenanomo Juan Bautista micori illa rafue

(Mt 3.1-12; Mr 1.1-8; Jn 1.19-28)

3 Jofue iñenanomo diga años Juan illanona, Jusiñamui mona ie uaina feiñote. Naimiedi Zacarías jito. Naie facaiseconi Romamo quince años Tiberio César di nanoca illaimana jai ite. Judea railla enirue gobernador di Poncio Pilato. Galilea railla enirue gobernador di Herodes. Naimie amadi Felipe. Iturea railla enirue, Traconite railla enirue diga, gobernador di Felipe. Abilinia railla enirue gobernador di Lisania. Jusiñamui diga nanoca ñairaima iaiaiaidi Anás, Caifás diga. ³ Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fañonocaida, Jusiñamui dibeimo omoi comecia iuai meido. Iemona Jusiñamui omoi jeacinona feitaite. Omoi comeci iuai omoi meidoia, comini iena uiñollena, mai omoi bautizallomoi.

⁴ Isaías micori ie rabemo naimiena jaie cuete: Jofue iñenanomo damie jidai-jidaillana cacadicue. Naimie llote: “Cai Nama biite. Naimie jaillino atona fino.

⁵ Nana iconi oruita.

Naga aneduai diese eniruen judai.

Neicairuai joide naisona atona fino.

Naimo itaicuai illa diese eniruen oruita, daje facai illena.

⁶ Nana comini Jusiñamui naimacina jillotaiacanana uiñoitimaci”

cuete; ia naimaci comeciaina ñaite. Cai Namana inuanana ñaite. Abina iedoñenana ñaite. Jeacino finocana jaiñenana ñaite. Cai Nama Jesús bia, Jesús uaina naimaci feiñollena, naimaci comecia marena finuana ñaite.

⁷ Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jai naira isidomoi. ¿Niese jilloitomoi? Cue dine omoi billena, ¿bu omoimo lloga? ⁸ Omoi comecia iuailla meido. Omoi jeacinona fañonocai. Iemona Jusiñamui jitaillacinona fino. Mare rafuena finocana jai. Naiemona omoi comecia iuailla meiduana uiñoitica. Ie mei bautizallomoi. Omoi comeciaina facañeno: “¿Bue ñellena o llua isoi finoitica? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicailifue mona jilloitica”. Ero, omoimo lloiticue: Cue llua isoi omoi finoñenia, naimie riicailifue mona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. ⁹ Ero, llisiñede riana tiedomoi. Tia mei, maraiñena jira, iena jobaidomoi. Ie isidomoi. Omoi maraiñena jira, Jusiñamui omoina jai duere finoacade. Ie riicallafue anamo jai itomoi. Omoi comecia iuai omoi meidoñenia, omoina duere finoite.

¹⁰ Iena cacajanona, comini dinena naimiemo jicanotimaci:

—Cai bautizaja mei, ¿niese iitica? ¿Nie isoide mare rafuena finoitica?

¹¹ Juan uai ote:

—Ailluena iniroiredimiedi iniroinidimie mo iniroina feca. Guilleredimiedi guillenidimie mo guillena feca.

¹² Naimacina bautizallena, gobierno ucubena oraini jia bitimaci. Jicanotimaci:

—Llofueraima, cai bautizaja mei, ¿niese iitica? ¿Nie isoide mare rafuena finoitica?

¹³ Uai ote:

—Gobierno facaina omoi ibataia, cominimona gobierno llua baifemo oñeno.

¹⁴ Naimie dine billanona, soldaduai jicanotimaci:

—Cai bautizaja mei, ¿niese iitica? ¿Nie isoide mare rafuena finoitica?

Uai ote:

—Cominimona rana bairoñeno. Riicinodo rana oñeno. Tainona llogiduamona, cominimona rana

oñeno. Omoi ucube illa diese feiño. Ie baifemo ucubena nicidoño.

¹⁵ Juan llofuiamona naie facaise cominidi Cristo bille-mo ocurilla jira, “Juandi nibai Cristo” raillanona, Juan-mo comeciaina facaidimaci. ¹⁶ Iena fidiano, Juan llo-te: —Cristoñedicue. Jusiñamui dibeimo omoi illamona,

jñui diga omoina bautizadicue. Cai baifemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoi-mo itataite. Omoi comeciái iuai omoi meidoñenia, omoina duere finoite. ¹⁷ Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciái iuailla meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llo-te.

¹⁸ Bie isoidicinodo cominimo ie mare rafuena llo-fueuide. ¹⁹ Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade. ²⁰ Maraiñede rafuena Herodes finocana jaillamona, Juan cárcelmo jonetade.

Juandi Jesúna bautizaja rafue

(Mt 3.13-17; Mr 1.9-11)

²¹ Ailluena cominina Juan bautizaja facaise, Jesúna jiaie bautizade. Bautizaja mei, Jesúsdi ie Moo diga ñaianona, mona bojode. ²² Ieconí Jusiñamui Joreño ucugina eruaillano, naimie emodomo ana bite. Monamona Jusiñamui llo-te:

—Cue isiruiga Jitodio. Ori iobidicue.

Jesucristo ie usumatiai

(Mt 1.1-17)

²³ Jesús treinta años illamona, Jesús ie maijille rafue tainede. “Naimiedi José micorí jito” raillano naimiemo cominidi comeciaina facaidimaci. Josédi Elí micorí jito. ²⁴ Elídi micorí Matat micorí jito. Matat micorí Leví micorí jito. Leví micorí Melqui micorí jito. Melqui micorí Jana micorí jito. Jana micorí José micorí jito. ²⁵ José micorí Matatías micorí jito. Matatías micorí Amós micorí jito. Amós micorí Nahum micorí jito. Nahum micorí Esli micorí jito. Esli micorí Nagai micorí jito. ²⁶ Nagai micorí Maat micorí jito. Maat micorí Matatías micorí jito. Matatías micorí Semei micorí jito. Semei micorí José micorí jito. José micorí Judá micorí jito. ²⁷ Judá micorí Joana micorí jito. Joana micorí Resa micorí jito. Resa micorí Zorobabel micorí jito. Zorobabel micorí Salatiel micorí jito. Salatiel micorí Neri micorí jito. ²⁸ Neri micorí Melqui micorí jito. Melqui micorí Adi micorí jito. Adi micorí Cosam micorí jito. Cosam micorí Elmodam micorí jito. Elmodam micorí Er micorí jito. ²⁹ Er micorí Josué micorí jito. Josué micorí Eliezer micorí jito. Eliezer micorí Jorim micorí jito. Jorim micorí Matat micorí jito. Matat micorí Leví micorí jito. ³⁰ Leví micorí Simeón micorí jito. Simeón micorí Judá micorí jito. Judá micorí José micorí jito. José micorí Jonam micorí jito. Jonam

micorí Eliaquim micorí jito. ³¹ Eliaquim micorí Melea micorí jito. Melea micorí Mainán micorí jito. Mainán micorí Matata micorí jito. Matata micorí Natán micorí jito. Natán micorí David micorí jito. ³² David micorí Isai micorí jito. Isai micorí Obed micorí jito. Obed micorí Booz micorí jito. Booz micorí Salmón micorí jito. Salmón micorí Naasón micorí jito. ³³ Naasón micorí Aminadab micorí jito. Aminadab micorí Aram micorí jito. Aram micorí Esrom micorí jito. Esrom micorí Fares micorí jito. Fares micorí Judá micorí jito. ³⁴ Judá micorí Jacob micorí jito. Jacob micorí Isaac micorí jito. Isaac micorí Abraham micorí jito. Abraham micorí Taré micorí jito. Taré micorí Nacor micorí jito. ³⁵ Nacor micorí Serug micorí jito. Serug micorí Ragau micorí jito. Ragau micorí Peleg micorí jito. Peleg micorí Heber micorí jito. Heber micorí Sala micorí jito. ³⁶ Sala micorí Cainán micorí jito. Cainán micorí Arfaxad micorí jito. Arfaxad micorí Sem micorí jito. Sem micorí Noé micorí jito. Noé micorí Lamec micorí jito. ³⁷ Lamec micorí Matusalén micorí jito. Matusalén micorí Enoc micorí jito. Enoc micorí Jared micorí jito. Jared micorí Mahalaleel micorí jito. Mahalaleel micorí Cainán micorí jito. ³⁸ Cainán micorí Enós micorí jito. Enós micorí Set micorí jito. Set micorí Adán micorí jito. Adándi Jusiñamui comuitagamie.

Taife ramo Jesús faia rafue

(Mt 4.1-11; Mr 1.12-13)

4 Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede. ² Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. ³ Jesús aimetaillana Taife uiñuamona, naimiemo llo-te:

—Jusiñamui Jitodiodena, naimiemo llono: “Ore Moo, bie nofcina llomenicono jaita”.

⁴ Jesús uai ote:

—Iena lloñeiticue. Jusiñamui facaina lloraima micorí iena jaie cueda: “Jiaie rafuedi llomenico guilla baifemo faite”.

⁵ Ie mei a ite anedumo Taife Jesúna uillano, dallu illanona, naimiemo nana nairaiaina acatate. ⁶ Llo-te:

—Nana bie nairaiái cue anamo ite. Iena cue iacagamie itataredicue. Cueno o sedajamona, iobil-lacinona cuemo o fecaia, nana bie nairaiái omo fe-caiticue. Bie nairaiái illaimana jaitio.

⁸ Jesús uai ote:

—Dama ite. Ona sedañeiticue. Moisés micorí jaie cueda: “Cai Nama Jusiñamuina seda. Dama naimiemo iobillacinona feca”.

⁹ Ie mei Jerusalémo Jusiñamui jofo muidomo Taife Jesúna uite. Raite:

—Jusiñamui Jitodiodena, eniruemo mai ana uai.

¹⁰ David micorí ona jaie cueda:

Ona eenollena Jusiñamuidi ie jaienisaimo lloite. Eniruemo o uaiñellena, o abi bofedaiñellena, ona feiñoitimaci

cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominimo Moisés micorí jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluana fiñoñeiticue.

¹³ Taife naimiena ramo faia mei, naimiemona ie jittaille dinori oni jaide.

Galileamo Jesús ie rafue llolle jillaci

(Mt 4.12-17; Mr 1.14-15)

¹⁴ Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. ¹⁵ Ailluena judúuai ofiracuaimo naimie llofueuide. Iena cacajanona, cominí: “Naimie llofuiacino mare” raitimaci.

Nazaretmo Jesús illa rafue

(Mt 13.53-58; Mr 6.1-6)

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuega-fuiaina ado facallena, naimie a naidadate. ¹⁷ Naie lloraco nama mullaímadí Isaías micorí jaie cuegafuiaí jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸ Jusiñamui Joreño cuemo ite.

Dueredinomo mare rafuena lollena, cuena fetode.

Taife anamo ailluena cominí illa jira, Jusiñamui naimacina jillotaiacana uiñoñedimaci.

Jusiñamui rafuena ailluena cominí uiñoñena jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenaillana birui uiñuana jitaide.

Naimacimo mare rafue lollena, cuena jai oretate.

²⁰ Naie rafue facaja fuillamona, cuegafuiaí abido fecade. Naimacina llofuellena, dane ana raide. Nana nainomo ite cominí naimiemo eo eruaidimaci. ²¹ Iemei naimie naimacina llofueite. Raite:

—Omoi como cacaja cuegafuiaí omoi motomo jai suide. Cuena ñaite.

²² Naimie lluana cominí cacajano, coninina raitimaci:

—Naimie fue mare. Naimie marena llofueite.

—Iemona rajjicaillamona, coniniri raitimaci—, Naimiedi jamaí José jito. ¿Ñiese naie rafue birui suide?

²³ Iena uiñuamona, Jesús dinena llote:

—Cue lluana ññoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiaí finoia, naimiena ñnoiticaí. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi. ²⁴ Uanaicinona omoimo lloiticue. Naimie cominí nairaimo Jusiñamui facaina lloraima ia, ie

cominí naimie uaina feiñoiacasiñede. Iena jamaisite. Ie isoide. Cue nairaimo cue illa jira, cue uaina ññoñedomoi. ²⁵ Jaie ie isoide. Elías facaiseconi daje amani años abimo atomonado noci deiñede. Aime guitimaci. Naie facaiseconi bie eniruemo cai cominí dine ailluena feciñuai itimaci; iadedí omoi jaiagaí Jusiñamui uaina ññoñedimaci. ²⁶ Jusiñamuidí Elíana cai cominí dine oreñede; iadedí jiaie eniruemo ite feciño dine naimiena orede. Sarepta railla nairaimo orede. Sidón railla eniruemo naie nairai ite. Cai cominiñede feciñomo orede. ²⁷ Jiaie rafuena lloiticue. Eliseo micoridí Jusiñamui facaina jaie llote. Eliseo micorí facaiseconi bie eniruemo diga efonaitino ite; iadedí naimacimona Jusiñamui buna jillotañede. Omoi jaiagaí Jusiñamui uaina ññoñena jira, Eliseo micorí duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina ñnoiacaiñedomoi —llote.

²⁸ Jesús lluana cacajano, naie ofiracomo itino eo iciritimaci. ²⁹ Naidacaillano, naimiena jino uitimaci. Naie illanodí iconimo ite. Nainomo naimiena uillanona, iconimona naimiena ana dotaacadimaci. ³⁰ Naimiena meineiacadimaci; iadedí naimaci motomo naimie jaillanona, naimacimona naimie jillobillano oni jaide.

Jesúdí Janaba anamo itimie jillotaja rafue

(Mr 1.21-28)

³¹ Jesús Capernaumo jaide, Galilea railla eniruemo ite. Nainomo naimie ia, sábadoruimo judúuai ofiracomo jaide. Nainomo llofueite. ³² Illaíma uai isoi naimie llofuaia jira, nainomo ite cominí naimie llofuiamona rajjicaidimaci. ³³ Janaba anamo illamie nainomo ite. Jesús llofuiamona cacaíta, Janabadí iimana ado cuirioitate:

³⁴ —Odí Nazaret ie Jesús. ¿Bue ñeiacadió cai diga? Caina duere finuaíbidio. Ona uiñoticue. Odí Jusiñamui ie Mare Fetocamiedio.

³⁵ Jesús naimiena lletade:

—Lliícaí. Naimiemona oni jai. —Iena cacajanona, naimaci motomo Janaba iimana ana dotade; ia naimiedi bofedaiñede. Ie mei Janaba naimiemona oni jaide. ³⁶ Iena ciuanona, nana nainomo itino rajjicaidimaci. Coniniri siadotimaci:

—¿Ñie isoide Jesús uai? Janabamo naimie llua mei, iimamona Janabadí oni jaide.

³⁷ Jesús finoca rafue muidona, naimie mamecidí nana naie eniruemo soride.

Jesúdí Simón Pedro jifaiñona jillotaja rafue

(Mt 8.14-15; Mr 1.29-31)

³⁸ Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiñona jilloitallena, nainomo itino Jesúmo jicante. ³⁹ Naiñaiño dine Jesús jaillanona, ie uai lluamona, naie duicodí oni jaide. Ieconí naiñaiño jillode. Abí cuaríñede. Naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mt 8.16-17; Mr 1.32-34)

⁴⁰ Nairuido jitoma ana itemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate. ⁴¹ Jananiaina jiai oni oretajano, jananiai dinena raite: —Odi Jusiñamui Jitodio. —Naimiena naimaci uifua jira, Jesús naimaci ñañana rairuide. Naimiedi Jusiñamui Jitona uifotimaci.

Judeamo Jesús llofua rafue

(Mr 1.35-39)

⁴² Ie areruido jitaro jofue iñenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci. ⁴³ Naimacimo llote: —Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena llollena, Jusiñamui cuena orede. Oni jaiticue. Omoi diga fiebiñeiticue. ⁴⁴ Ie mei Judeamo ite ofiracuaimo Jesús llocana jaide.

Jesús muidona, naimaci ailluena lliciaina ua rafue

(Mt 4.18-22; Mr 1.16-20)

5 Jiairuido Genesaret railla jorai fuemo Jesús ia, ailuena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci. ² Ie facaise jorai fuemo Jesús mena sijide botena cide. Naimaci lloijina naimaci jocua jira, naie botemo lloiji fairaini iñede. ³ Comini ie llofuiacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raia, botemona cominina llofue. ⁴ Llofua mei, Simómo llote:

—Aforedinomo jai. Nainomo omoi lloijina faino.

⁵ Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedica. ¿Niese ja oitica? Iadedi o llua jira, lloijina faiticue.

⁶ Iena naimaci faia mei, ailluena lliciaina jiatimaci. Ie jira naimaci lloiji cuaranoiacade. ⁷ Iena ciuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade. ⁸ Iena ciuano, Simón Pedro Jesús mo iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jeacinona finouidimedicue.

⁹ Ailluena lliciaina naimaci ua jira, naimaci rajicaillamona, iena naimie llote. ¹⁰ Naimie nabaiñiaimona Zebedeo jito iaiaiaite. Juan diga Jacobo iaiaiaite. Simómo Jesús llote:

—Cuen jaciñuñeno. Lliciaina birui ocabitomoi; iadedi cue dibeimo naimaci illena, biruimona cominina oitomoi.

¹¹ Eniruemmo sijiano, naimaci raruaite fainonocaida, Jesús diga jaidimaci.

Jesúdi efonaitimiena jillotaja rafue

(Mt 8.1-4; Mr 1.40-45)

¹² Jiairuido Jesúsdi jiaie nairaimo ia, efonaitimie naimie dine bite. Naimie eo fodo jaide. Jesúsna naimie ciuano, naimiena raise uaiduamona, ana bitadate. Llote: —Maestro, o jitaiededi, cuena jillotaredio. ¹³ Jesús ie onolli oni ñuitajanona, naimiena jetade.

Raite:

—Ona jillotaiacadie. Mai o jillo. —Iecon jillode.

¹⁴ Jesús naimiemo llote:

—Omo suide rafue jaca bumo lloñeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micori jiaie lloga rana feca Iemona comini o jilluana uifotimaci.

¹⁵ Iese Jesús naimiemo llote; iadedi Jesús finoca rafue llocana eo uite. Ie muidona naimie lluaana cacaillena, duidinona Jesús jillotallena, ailluena comini naimie dine bitimaci. ¹⁶ Bitimaci; iadedi Jusiñamui diga ñaillena, jofue iñenanomo Jesús jaide.

Jesúdi tisitaitimiena jillotaja rafue

(Mt 9.1-8; Mr 2.1-12)

¹⁷ Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate. ¹⁸ Ie facaise ie biramo biide tisitaitimiena Jesús dine damierie atidimaci; ¹⁹ iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuideo a jaidimaci. Jofo emodo econocaida ifodo naimiena ie biramo biide diga, comini motomo Jesús ecimo ana ñuitadimaci.

²⁰ Iena Jesús ciuana, tisitaitimie jilluana naimaci ñuana Jesús uifote. Tisitaitimiemo llote:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

²¹ Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”. ²² Naimaci comeciaina facajacinona Jesús uifuanona, naimacimo jicanote:

—¿Bue ñellena omoi comeciaina iese facadomoi?

²³ Bimiemo: “O jeacinona jai oni dotadicue” cue lloia, cue uai siñonana uifoneitomoi; ia bimiemo: “Mai naidacaillanona macari” cue lloia, cue uai siñonana uifoneitomoi. ²⁴ Monamona jiaie cue billanona, iimana jaidicue. Ie jira jeacino oni dotaja uai cuemo ite. Iena omoi uifollena, tisitaitimiemo lloiticue: “Mai naidacai. O biira ferianona, o jofomo mai jai”.

²⁵ Iese naimie raillamona, tisitaitimie jillode. Iecon naimaci motomo naimie naidaide. Ie biira feriano,

Jusiñamuimo iobillacino fecajano, ie jofomo jaide.

²⁶ Nana naiena ciolino eo raijcaidimaci. Iemona Jusiñamuimo iobillacinona fecadimaci. Eo raijcaillamona, raitimaci:

—Bie isoide siño comena jaca cioñedicai.

Jesúdi Levína fetua rafue

(Mt 9.9-13; Mr 2.13-17)

²⁷ Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiena o jaillena, cue diga bi.

²⁸ Naidacaida, Jesús diga jaillanona, ie maijiana fañonocaide. ²⁹ Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiaí guisaibitimaci. Jesús diga danomo guitimaci. ³⁰ Nainomo fariseuai cominidi, Moisés micori llogacino llofueraini diga, jamai bitimaci. Jesúna cianona, ie llofueoicaiganomo jicanotimaci:

—¿Bue ñelli ucube oraini diga guitomoi? Marañede comini diga guitomoi.

Moisés micori llogacinodo ucube oraini raise jaiñenamonona, naie isoidino diga fariseuai comini nabairiñena jira, iese jicanotimaci. ³¹ Jesús iena cacajano, llote:

—Ecairedino médicono jitañedimaci; iadedi duidinodi médicono jitañedimaci. ³² Jusiñamui díbeimo mareuidinona uaibñedicue; iadedi marañedinona uaibiticue.

Jesúmo comini guiñenana jicanua rafue

(Mt 9.14-17; Mr 2.18-22)

³³ Naie facaise fariseuai dinena Jesúmo llote:

—Cai einamaci llua isoi, Jusiñamuina cai raise iobitalena, guiñenaruillaí illa facaiseconi guiñedicai. Jusiñamuimo jicabidicai. Cai jeacino facaina sunaicabiticai. Cai einamaci rafuedo Juan Bautista llofueoicaigano jaidimaci. Cai llofuegano iedo jiaí jaidimaci; iadedi o llofueoicaigano jaca guitimaci. ¿Bue ñellena cai einamaci rafuedo jaiñedimaci?

³⁴ Jesús uai ote:

—Jiaie rafuedo iena lloiticue. Coniruedi ie aina uarui ia iobilla jira, ie nabaiñiaí sunañedimaci. Iobillamona guitimaci. ³⁵ Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaídi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ³⁶ Jiaie rafuedo iena lloiticue: Nia jocoñega comue iniroidi jacaie iniroimo jilliñega. Jilliadi joca mei, comue iniroi jacaie iniroimona fo llirite. Eo fodo cuararite. Jai marañeno cioite. ³⁷ Jacagomona finoca bolsa como finoca vino joneñega. Jonegadana, mairiñena jira, sirillamona igoí raire cuararite. Vino faifite. Igoí jiaí faifite. ³⁸ Como finoca vino comogomo jonelle. Iemei iena faifiñeite. ³⁹ Navui finoca vino jirua mei: “Navui finoca vino nia mare” raillamona, como finoca vino buna jiroacañede. Ie isoide. Omoi einamaci rafue ifomo jiaie rafue birui ite. Iena omoimo llo-

cabiticue. Iedo jaidicai; ia omoi einamaci rafuemo omoi fibilla jira, jiaie rafuedo birui jaiacañedomoi —llote.

Sábadoruimo Jesús llofueoicaigano maijia rafue

(Mt 12.1-8; Mr 2.23-28)

6 Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijjano, golluano, guicana jaidimaci. ² Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijnidicai; iadedi trigona naimaci tijjamonona, caimona jai maijñedimaci. Caimona jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeci raise facañedomoi. David micori guille iñenia, naimie aimetaia, ie nabaiñiaí diga Jusiñamui jofomo fo jaide. ⁴ Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede. ⁵ Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

Jesúdi onollina idisarodimiena jillotaja rafue

(Mt 12.9-14; Mr 3.1-6)

⁶ Jiaie sábadoruimo judíuai ofiracomo Jesús jaiillanona, llofue. Ie facaise nainomo nabellimo idisarodimie ite. ⁷ Moisés micori llogacinona llofueraini, fariseuai diga, Jesúmo eruaidimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode. ⁸ Naimaci comeciaina facajacinona Jesús uiñuamona, onollina idisarodimiemo llote:

—Cue ecimo naidada. —Iemei Jesús ecimo naidada.

⁹ Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaíadedi, birui mare rafuena finodicue. Cuen birui omoi meineíadedi, birui marañede rafue finodomoi. Sábadoruimo ¿nie isoide rafue finuana rairuidomoi?

¹⁰ Naimacimo eruaiñanona, duidimiemo llote:

—O onolli mai oni ñuita. —Iena ñuitajanona jillode.

¹¹ Nainomo itino iena cianona, eo iciritimaci.

—¿Niese Jesúna nibaiiticaí? —naiemona coniniri siadotimaci.

Jesúdi ie doce llofueoicaiganona fetua rafue

(Mt 10.1-4; Mr 3.13-19)

¹² Nairui aneduaimo Jesús jaide, Jusiñamui dıga ñail-lena. Namona naio jıde. ¹³ Monaidemo, ie llo-fueganona naimie dıne uaidote. Naimacimona doce digamiena fetode. Naimie dıga icabillena, naimacina naimie facaina llorainına naimaci jaillena, naimacina fetode. ¹⁴ Iese mameciredimaci: Simón; naimie mameci jiaicıdı Jesús jıtaca Pedrona. Andrés; naimiedi Pedro ama. Jacobo, Juan, Felipe, Bartolomé, ¹⁵ Mateo, Tomás, jıaie Jacobo; naimiedi Alfeo jıto. Jıaie Simóna fetode. Naimiedi cananista comını facaisemo duide. ¹⁶ Judas; naimiedi Jacobo jıto. Judas Iscariote micorı; naimiedi Jesúna gaitatımie.

Jesúdi ailluena comınına llofuia rafue

(Mt 4.23-25)

¹⁷ Aneduaimona siniaidınomo ie doce llo-fueoicaigano dıga Jesús bite. Ie jıaie llofuegano naimie dıne bitımaci. Ailluena jıaie comını bitımaci. Nana Judeamona bitımaci. Jerusalémona bitımaci. Tiromona bitımaci. Sidómona bitımaci. Tiro monailai fuemo ite. Sidón monailai fuemo jıaı ite. Naimie lluamo cacareil-lena bitımaci. Naimaci duicomona jıaı jilloiacadımaci. ¹⁸ Jananiaı anamo itınomona Jesús jananiaına oni orede. ¹⁹ Nana comını naimiena jetaacadımaci. Naimie-mo sıño uai illa jıra, naimiena jetajamona, naimaci duicomona jillodımaci.

Jesús lloga rafue

(Mt 5.1-12)

²⁰ Ie llofueganomo eruaıllanona, Jesús llote: —Naimie anamo omoi jai illamona, Jusiñamui omoi-na sedaacana rafuena omoiına llofueitıcue. Naimiena jıtaidomoiına, omoiına sedaite. Comeciaina facadomoi: “Jusiñamui jıtallacınona danı fınonıdıcaı; ia Jusiñamui caına canuamona, iena fınoıtıcaı”. Naimie comını omoi illamona, naimie omoiına canoite. Iemona caımare iitomoı. ²¹ Naimie jıtallacınono omoi fınuamona, Jusiñamui omoiına sedaite. Naimiedi mare rafuena omoi fınuana canoite. Iemona caımare iitomoı. Omoi sunaia, Jusiñamui omoiına sedaite. Ailluena comını jeacınono fınocana jaidımaci. Iena uiñuamona, sunaitomoı. Naie isoidıno omoi illamona, Jusiñamui omoi comeciaina ocuiño-taite. Iemona iocıre iitomoı. ²² Cuemo omoi duia, duere sefuitomoı. Jıaie comını omoiına enoitımaci. Omoiına oni dotaitımaci. Omoiına jeare ñaitımaci. Cuemo omoi duilla jıra, omoiına jamaitımaci; ia Jusiñamui omoiına caımare itataite. ²³ Omoi isoi omoi jıaıgaimona Jusiñamui facaina llorainı micorıaı jaie duere sefuidımaci. Iena omoi uiñuamona, monamo Jusiñamuimona ailluena ibana ıco omoi feiñua jıra, birui omoi duere sefuia, iocıre omoi jai. ²⁴ Iese iitomoı; ia Jusiñamuina jıtaiñedıno ıco duere sefuitımaci. Comeciaina facadımaci: “Jusiñamuina jıtaiñedıcaı. Marena birui itıcaı. Nana caı comeciadı jıtallacınono birui caımo ite”. Iese birui itımaci; ia Jusiñamui naimacına ıco duere fınoite.

²⁵ Jusiñamuimona buena birui jıtaiñedıno ıco duere sefuitımaci. “Nana caı comeciadı jıtalla rafue caımo birui illa jıra, Jusiñamuimona buena jıtaiñedıcaı” raitımaci. Iese birui itımaci, ia Jusiñamui naimacına ıco duere fınuamona, buenıtımaci. “Caı comeciaina iocıre itatal-lena, Jusiñamuina jıtaiñedıcaı” damıerie birui raitımaci. Naimaci jeacınono facaina sunaiñedımaci. Birui ite rafuena ebıruitımaci. Iese birui itımaci; ia Jusiñamui naimacına ıco duere fınuamona, sunaitımaci. Eeıtımaci. ²⁶ Naimacırı iobıllamona, omoi jıaıgadı Jusiñamui facaina llorainına abı caitadınona marena ñaitımaci. Damıerie birui daje isoidımaci. Jusiñamuina iobıtaiacaiñedımaci; ia comınına iobıtaiacadımaci. Iemona comını naimacına marena ñaitımaci; ia Jusiñamui naimacına ıco duere fınoite.

Jesúdi iba oñenana llua rafue

(Mt 5.38-48; 7.12)

²⁷ Jesús llote:

—Cue lluana cacajamona, iena ĩno. ĩnuamona omoiına enoidınona isirui. Naimacına cano. ²⁸ Omoi jeare ñaitınona marena ñaino. Omoiına jeare fınodıno facaina Jusiñamuimo omoi jıı. ²⁹ Omoi cacaina bu dutaiade, iba oñeno; iadedı enefebeımo dobaida, enefebeımo jıaı dutallena. Omoi ĩnıroına bu baıroiacana, omoiına naimie nıa jıcañenia, naimie jıtalla ĩnıroi baıfemo naimıemo feca. ³⁰ Omoiına ite rana bu jıcaia, iena caıdıñeno feca. Omoiına rana bu baıroia, iena abıdo jıcañeno. ³¹ Jusiñamui jıtallacınona omoi fınuamona, jıaie comınına marena fıno. Jıaie comını omoiına fınuana omoi jıtalla isoi, naimacına fıno. Naimaci omoiına marena fınuana omoi jıtaiıa, naimacına mare-na fıno. Naimaci omoiına maraiñeno fınuana omoi jıtaiıa, naimacına ie isoi maraiñeno fıno. O fınoacaga ra isoi jıaie comınımo fıno. ³² Naimie comınına omoi illamona, nana comını daje isoi isirui. Omoiına isıruitınona omoi isıruia, mare; iadedı omoiına gaiñenanona omoi isıruıñenia, Jusiñamui omoiına: “Mare” raıñeıte. Maraiñede rafuena fınorainı naimacına isıruitınona isıruitımaci. Nana comınına omoi isıruıñenia, maraiñede rafuena fınorainı baıfemo faıñedomoi. Naimaci isoi itomoı. ³³ Naimie comınına omoi illamona, nana comını daje isoi cano. Omoiına canodınona omoi canoia, mare; iadedı omoiına canoñedınona omoi canoñenia, Jusiñamui omoiına: “Mare” raıñeıte. Maraiñede rafuena fınorainı naimacına canodınona canodımaci. Nana comınına omoi canoñenia, maraiñede rafuena fınorainı baıfemo faıñedomoi. Naimaci isoi itomoı. ³⁴ Naimie comınına omoi illamona, nana comınımo daje isoi rana feca. Omoiına ra fecadınomo rana omoi fecajıa, mare; iadedı omoiına rana fecañedınomo rana omoi fecañenia, Jusiñamui omoiına: “Mare” raıñeıte. Maraiñede rafuena fınorainı naimacımomo rana fecadınomo rana jıaı fecadımaci. Nana comınımo rana omoi fecañenia, maraiñede rafuena fınorainı baıfemo faıñedomoi. Naimaci isoi itomoı. ³⁵ Omoiına gaiñedınona isirui. Naimacımomo mare rafuena fıno. Naimacımomo rana jamai feca. Naimaci-

mona iba uamo ocuiriñeno; ia Jusiñamui omoi raise íbaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona, maraiñedinodi naimie cominina omoi illana uiñoitimaci. Jusiñamuidi cominina duenailla isoi, cominina omoi jiaí duenai.

Jesúdi jiaie cominina mameriñenana llua rafue

(Mt 7.1-5)

³⁷ Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoína duere finoite. Omoimo maraiñede rafuena bu finoia, iena feita. Iena omoi feitañenia, Jusiñamui omoimo ite maraiñede rafuena feitañeite. ³⁸ Jiaie rafuedo iena lloiticue. Rana omoi fecaia, iena raise omoi gaieia, ico íbana omoi oia, raise gaiecana feiñoitomoí. Ie isoide. Jiaínomo maraiñede rafuena finoñeno; ia naimacina duenailamona, naimacimo rana jamai feca. Iena raise feca. O fecaja diese Jusiñamuimona eo raise íbana feiñoitomoí.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoi illamona, bie rafuena cacarei. Uanaicínodo omoi jaiñenia, uisinidimie isoi iitomoí. Uisinidimie jiaie uisinidimiena ifonide. Ifo iade, nagmaiaí dafomo uaidiaímaiaí. ⁴⁰ Fueotimie ie llofueraima baífemo uaiñede; iadedi naimie raise fueoia, ie llofueraima isoi jaite. Raise fueollena, cue uaimo cacarei. ⁴¹ Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoimo ailluena ite maraiñedicinomo nano omoi comecina faca. ⁴² Omoimo maraiñedicino illamona, ¿ñiese omoi ecimo itimiena mameritomoí? Omoimo ite maraiñedicinomo omoi comecina facacaiñena jira, maredinona abí caitadinodomoí. Omoi comeciaina nano raise fino. Iemei omoi ecimo itimiena canorenitomoí. Naimie comecina raise canorenitomoí.

Jesúdi riará llisilla llilla llua rafue

(Mt 7.17-20; 12.34-35)

⁴³ Jesús nia llofueite:

—Mare riará maraiñede riará isoi llisiñede. Maraiñede riará mare riará isoi jiaí llisiñede. ⁴⁴ Llisillamona nie isoide riará illana uiñoticaí. Amena ie llisilla llillamona amena marena uiñooga. Llillamona, amena maraiñenana jiaí uiñooga. Eecuaimona uvas railla riarana oñedicaí. Monaigimona higos railla riarana jiaí oñedicaí. ⁴⁵ Ie isoide. Naimaci comeciaino iticinomona comini ñaitimaci. Mare comeci iticinomona maremiedi mare rafuena finocabide. Maraiñede comeci iticinomona maraiñedimie maraiñede rafuena finocabide.

Jesúdi naimiēna ñnuana ñaia rafue

(Mt 7.24-27)

⁴⁶ Jesús nia llofueite:

—Omoi mona damierie cuena: “Caí Nama” raitomoí; iadedi cue llogacinona finoñedomoí. ⁴⁷ Diga comini cue dine bitimaci. Cue uaina cacadimaci. ⁴⁸ Cue uaina ñnotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa ñnori eo ana raite. Noci deidemo, eo jinuidemo, jofomo ille toia, jofo raise finua jira, jofo goiñede. Iena faifiñede. Ie isoide. Cue lluaña ñnotimie faifiñeite. ⁴⁹ Cue uaina ñnoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana rañede. Noci deidemo, eo jinuidemo, jofomo ille toia, jofo goillamona, jai eo judaisite. Iena faífide. Ie isoide. Cue lluaña ñnoñedimie faífite —llote.

Jesúdi capitán mullaimana jillotaja rafue

(Mt 8.5-13)

7 Ie llua fuillamona, Jesús Capernaumo jaide.

² Nainomo romanos railla nairaimo duide illaima ite. Cien soldaduaina sedauide. Naimiedi capitán. Judíuñedimie. Ie mullaima eo duide. Niade fiodaicade. Capitán naimiēna eo gaide. ³ Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaimana jillotajabillena jitaide. ⁴ Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caimona maremiena jira, naimiēna o canuana jitaídicaí. ⁵ Caí nairaina isiruite. Ie ucube diga caí ofiracona finotate.

⁶ Iena cacajamona, Jesús naimaci diga jaide. Capitán jofomo iaírei Jesús ría, capitádi Jesús dine ie nabaiñiaína orede, Jesúsno llollena:

—Maestro, biñeno. Jamai bue cue isoilla jira, cue jofomo biñeno. ⁷ Jamai bue cue isoilla jira, o dine jiaí jaiñedicue. O illanomona o uaido cue mullaima jilloita. ⁸ Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaima illa jira, naimiedi cue uaina ñnote. O anamo naie duico illa jira, o uaina bene o lloia, cue mullaima jilloite.

⁹ Iena cacajano, Jesús raíjicaide. Oni dobaidajano, naimie diga jaidinomo llote:

—Bie isoidimie cue uaina ñnotimiena jaca baiñedicue. Caí judíuai cominimona bie isoidimiena jaca iñede. Mai abido jai.

¹⁰ Capitámoma bitino abido capitán jofomo rillano, mullaima jai jilluana cioidimaci.

Jesúdi feciño jitona jillotaja rafue

¹¹ Jiaíruído Naín railla nairaimo Jesús jaide. Ie llofueoicaigano jiaí jaidimaci. Ailluena comini jiaí jaidimaci. ¹² Naie nairai ie nasemo naimie iaíreicaia, jai fio-

daitimiena comini jino atiana ciode. Naie fiodaitimiedi conirue. Ie eidi feciño. Dajede ie jitodi jai fiodaite. Ailluena Naín itino naie feciño diga jaidimaci. ¹³ Jesús naiñaiñoa ciuanona, naiñaiñoa duenaite.

Naiñaiñoa raite:

—Mai eeñeno.

¹⁴ Fiodaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fiodaitimiemo Jesús llote:

—Mai a rainada.

¹⁵ Iena Jesús llua mei, naie fiodaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite. ¹⁶ Naieri nana jacinaitimaci. Jusiñamui iobillacinona fecadimaci. Raitimaci:

—Jusiñamui facaina lloraíma cai motomo ite. Naimie uai eo siño. Naimiena Jusiñamui oretaja jira, Jusiñamui caína birui canoacana jira, iobidicai.

¹⁷ Nana Judeamo itino Jesús finoca rafuena fididimaci. Judea enirue fuemo ite nairaiaidi jiai fididimaci.

Jesús dine Juan Bautista micori ie llofueoicaiganona oretaja rafue

(Mt 11.2-19)

¹⁸ Juan Bautista micori llofueoicaiganodi nana Jesús finoca rafuena fidiano, iena naimiemo llote. Ie llofueoicaiganomona Juan micoridi menamiēna uaidote. ¹⁹ Llote:

—Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuriticaí?” naimiemo jicano.

²⁰ Jesús dine iaímaiaí rillano, Jesúsimo llotiaímaiaí:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabiticue. Juan llofuegamiena o illana uifoiacadicai. Imieñediōdena, jiaimie billemo nia ocuriticaí. Cocomo llono.

²¹ Jesús dine iaímaiaí billa facaiseconi, Jesús diga isoide duicuai illanona jillotate. Jananiaí anamo itinomona jananiaína oni jiai orede. Uisinidinona uisina dane ciotate. ²² Ie jira Jesús iaímaiaímo llote:

—Cue llua cacadomico. Cue finoca rafuena ciodomico. Juan dine abido omico jaillanona, iena naimiemo llono. “Uisinidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillanona damierie jai jillodimaci. Dueredino mare rafuena jai cacadimaci”. Iese naimiemo llono. ²³ Jiai llono: “Nibai nana cue rafuena raise cacaiñedio; ia cuena jaca nia ñnocana o jaia, caimare iitio”.

²⁴ Iaímaiaí abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comequina facadimiena ciodomoi. Ero, fuirina aifi billanona, raitire afai bijide. Afaina aifi billanona, raitire fuiri bijide. Naimie ie isoifede. Nie isoide rafue naimiemo ia, cue rafuena llocana jaide. ²⁵ ¿Bue ñellena

naimie dine jaidomoi? Mare iniroina jítadimiena cioifedomoi. Mare iniroina jítadinona omoi cioacaniadedi, ilaicomini dine jaidomoi. Naimacimo ailluena ra ite.

²⁶ Jusiñamui facaina lloraímana ciodomoi. Naimie Jusiñamui facaina llocabite. Jiaie lloraíni baífemo faite, cue billena omoi naimie llua jira. ²⁷ Malaquíás micori naimiena jaie cuega: “Jusiñamui raite: ‘Ero, o uicodo cue rafuena llollena, damiena oretaiticue, comini comequina marecinona duiñollena’ ” cuega. Malaquíás Juan Bautistana cuete. ²⁸ Juan Bautista nana Jusiñamui facaina lloraíni baífemo faite; iadedi Jusiñamui cominina birui bu illanona, Juan baífemo birui faite. Juan cue billena llofueite; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioifede. Iemona naimie baífemo faitomoi.

²⁹ Naimacina navui Juan bautizaja jira, nainomo ite comini iena cacajano, Jusiñamui iobillacinona fecadimaci. Gobierno ucube orainidi jiai fecadimaci;

³⁰ iadedi fariseuai iobillacinona fecañedinomoi. Moisés llogacinuaina llofueraini jiai fecañedinomoi. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede. ³¹ Jesús llote:

—Cueno ñnoñedinona lloiticue: Ero, omoina ñaiticue.

³² Jifanote uruiaí isoidomoi. Uruiaí jifanoiacania, naimaci nabaiñaiña uaiduanona, raitimaci: “Omoi diga jifanoiacadicaí; iadedi cai diga jifanoiacañedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicai” raitimaci. ³³ Ie isoidomoi. Juan jirorainide. Caimarede guifede; ia naimie diga nabairiñedomoi. Naimiena gaiñedomoi. Ie jira omoi mona dajerie naimiena raitimaci: “Janaba anamo naimie illanona, naimie uairico isoi ite” raitimaci. ³⁴ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cueno jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimidio”. ³⁵ Iese raitomoi; iadedi Jusiñamuina ñnotinodi cue finoca rafuena marenana uifotimaci.

Jesús Simón jofomo illa rafue

³⁶ Jiairuido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite.

³⁷ Jesús guitemo, daje riño fo jaide. Naiñaiñodi marañede rafuena finoraíño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga. ³⁸ Judíuai aciaíta jaca guisoidimaci. Jinafo dine eilli jonesuidimaci. Fo jailano, naie riño Jesús abimo naidaide. Naiñaiño eiamona, naiñaiño uisimona uaide uillinociaí diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascomona soride rana totade. Naimiena naiñaiño isiruillanona, iese naiñaiño finode. ³⁹ Iena ciuanona, Simón dama comequina facade: “Bimie Jusiñamui facaina llo-

raimadena, nie isoide naimiena jetade riñona niade uiñote. Naimiedi naiñaiño maraiñede rafuena fino-raiñona uiñote. Iena naimie uiñuamona, naiñaiñona jinore orede. Naimiedi Jusiñamui facaina llorai-mañede".⁴⁰ Jesús naimie comecina facajacinona uiñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damie mo quinientos diga ucubena fecade. Jiaimiemo cincuenta diga ucubena fecade.⁴² Ie iade, naiena abido meidonidiaimaia. Ie jira ucubena fecadimiedi raite: "Dama omico meidoñega. Naiena jai feitaticue". Ero, Simón, ¿naimie ucubena fecadimiena eo isiruite?

⁴³ Simón dinena uai ote:

—Cue comeci raite: Ailluena ucube faitaja jira, eo ail-luena ucubena igamie.

Jesús dinena raite:

—Raise cue uaina fairiotio.

⁴⁴ Temei Jesúsdi riño dine dobaidajanona, Simómo llote:

—Biñaiñona ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabil-la isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote.⁴⁵ Naiñaiño cue ecimo fo billanona, cue eillina diga icaiño llibanote.⁴⁶ Naiñaiño cue eillimo soride rana totade.⁴⁷ Naiñaiñomo eo jeacino ite; ia cuena naiñaiño eo isiruillamona, nana ie jeacinona jai oni dotajana uiñotica. "Jeaicno cuemo raise iñede" comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiñomo llote:

—O jeacino jai oni dotaca. Iena jai feitaticue.

⁴⁹ Jiaimo nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riñomo llote:

—Cuena o ñnua jira, o jeacinomona jai jillodio. Mai uri o jaillano o i.

Dajerie riñoniai Jesúsna canua rafue

8 Ie facaise diga nairaimo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciai uaina meiduana llofue. Ie doce llofueoicaigano naimie diga jaidimaci.² Dajerie riñoniai jiai jaidimaci. Naiñaiñuamona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate.³ Juana ite. Naiñaiño inidi Chuza. Herodes railla illaima ecimo naimie maijuide. Susana

ite. Jiaie riñoniai jiai itimaci. Naiñaiñuai ramona Jesúsna canouidimaci.

Jesúdi trigona judaidimiena llua rafue

(Mt 13.1-9; Mr 4.1-9)

⁴ Diga nairaiaimona ailluena comini Jesús dine billanona, naimacimo llote:

—Jusiñamui omoina sedaacana omoi fueollena, bie rafuena lloiticue.⁵ Damiedi trigona judaiaide. Naimie judaiaimona naisomo janore iduai juide. Comini nainomo jaillano, iena saitadimaci. Bai jailla mei, sillinñiai iena jiai guisaibite. Ie jira sicoñede.⁶ Nofiemmo jiaie iduai juide. Sicode; iadedi jinui raise iñena jira, duide.

⁷ Eecuai illanomo jiaie iduai juide. Eecuai sicuamona, riana eecuai ibaica. Ie jira llisiñede.⁸ Mare eniruemo jiaie iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluamo cacarei. Iena ñno.

Jesús ie como lloga rafuena llofuia rafue

(Mt 13.10-23; Mr 4.10-20)

⁹ Jesúsimo ie llofueoicaigano ie como lloga rafuena jicantimaci:

—¿Bue ñellena bie isoide rafuedo cominina llofuetio?

¹⁰ Uai ote:

—Jusiñamuidi omoina ie sedaacana rafuena jai uiñotade. Jiaie iena uiñotedomoi. Jiaie cominina iena nia uiñotañede. Ie jira bie isoidicnodo naimacimo lloiticue. Cue siño finoca rafuena ciodimaci; iadedi iena naimaci ñnoñena jira, uiñoteno jaidimaci. Cue llofuiana jamai cacadimaci; iadedi naimaci ñnoñena jira, raise cacañedimaci. Uiñotenedimaci.

¹¹ 'Omoina cue como lloga rafuena llofueiticue. Naie iduidi Jusiñamui uai.¹² Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naiemona jilloi raillanona, Taife naimaci comeciamo cacaja uaina ñnotañede.¹³ Jiaie iduai nofiero juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. Nofiero riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci.¹⁴ Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciamo itabiñede. Jusiñamui jitailla rafuena finocana jaiñedimaci.¹⁵ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciamona ñnocana jaidimaci. Eo lliside isoidimaci. Jusiñamui jitailla rafuena sefuiruiñeno ñnocana jaidimaci.

Jesús ie rafue llocana jailla llua rafue

(Mr 4.21-25)

¹⁶ Jesús nia llote:

—Lamparín bu unia meinoconi, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainaca. ¹⁷ Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie ñnotimaci. Damierie ñnoñedimaci. ¹⁸ Cue llua amo raise cacarei. Iena omoi ñnuamona, Jusiñamui omoína canoite. Omoína uiñocana jaitaite. “Jusiñamui rafuena uiñotacue” raitimiedi ñnoñenia, Jusiñamui naimiena faifitaite.

Jesús dibeimo itinona ñaia rafue

(Mt 12.46-50; Mr 3.31-35)

¹⁹ Cominina Jesús nia llofuia, naimie dine Jesús ei, ie amatiaí diga bitimaci; ia ailluena comini illa jira, naimiemo riñedimaci. ²⁰ Nainomo itino naimiemo llote:

—O ei, o amatiaí diga jino naidaidimaci. O diga ñaia-cadimaci.

²¹ Jesús uai ote:

—Jusiñamui uaina cacajamona, iena ñnotino ieca cue eidi, cue amatiaidi.

Jesúdi jorai baguana llícaitaja rafue

(Mt 8.23-27; Mr 4.35-41)

²² Jiairuido botemo Jesús jailla mei, ie llo-fueoicaiganomo llote:

—Ruica dibeimo mai caí jailli. —Ie mei jaidimaci.

²³ Naimaci jaidemo, Jesús ñide. Baí jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci. ²⁴ Jesúsna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llícaitade. Ieconí aifi llícaide. Bagoñede. ²⁵ Naimacimo jicanote:

—¿Bue ñellena cuena ñnoñedomoi? —Naimiena jacinailamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiaí ñnote.

Jesúdi Gadara railla eniruemo illa rafue

(Mt 8.28-34; Mr 5.1-20)

²⁶ Ruica dibellemo ridemo, Gadara railla eniruemo sijidimaci. Galilea facaisemo ite. ²⁷ Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo noñe moto ifuaimo i-isoide. Ebena cominina naimie faei rail-lanona, lloeo diga ie onollidi maiga. Ie eilli jiaí maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie ciuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Niese cuena nibaiacadio? Cuena duere finoñeno.

Iese raite, Janaba naie ñimamona oni jai oretajana Jesús llua jira. ³⁰ Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. ³¹ Jesúsno duere jicanoside, iraimo naimacina nia oretañellena. ³² Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúsno duere jicanotimaci. Jesús dinena:

—Jee —raite. ³³ Ieconí ñimamona jaidemo, chanchuai abimo jaidimaci. Iena suidemo, iconí jillacimo joraimo chanchuai aisidimaci. Dinomo corobaiside.

³⁴ Iena ciuanona, chanchuai sedarainí naimaci nairai dine aisicana jaidimaci. Naie rafuena llocana jaidimaci. ³⁵ Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamie-na Jesús ecimo raillana ciodimaci. Naimie iniroina jai jítade. Naimie jai uairicoñede. Iena ciuanona, Jesúsna jaciruitimaci. ³⁶ Naie rafuena ciodinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúsno jicanotimaci. Ie jira botemo Jesús jaide, ruica dibeimo abido jaillena. ³⁸ Ieconí jaive Janaba anamo illamie Jesúsno jicanote, naimie diga jaillena; iadedi Jesús raite:

—Dama ite. ³⁹ Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

Jesúdi mena duide riñona jillotaja rafue

(Mt 9.18-26; Mr 5.21-43)

⁴⁰ Ruica dibeimo Jesús abido ria, naimie abido bille-mo naimaci ocurilla jira, ailluena comini naimiena feiñotimaci. ⁴¹ Jairona mameciredimiedi Jesús dine bite. Naimiedi judíuai rafue ofiraco sedaraima. Jesúsno duere jicanollena, ana bitadate. Naimie jofomo Jesús billena duere jicanote. ⁴² Dañaiñode ie jisa. Doce años naiñaiñodi ite. Niadedi fiodaicade. Ie jira Jesúsno jicauaibite. Iena cacajano, naimie diga Jesús jaide. Ie llofueoicaigano jiaí jaidimaci. Jesús jaillano, diga comini naimiemo ñaijisaide.

⁴³ Baí jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiñoña jaca buna jillotanide. ⁴⁴ Jinafo dinena billanona, Jesús iniroi fueda jetade. Iemona diailladi fainonocaide. Jil-lode.

⁴⁵ Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicai.

Ie nabaiñiaí diga Pedro dinena raite:

—Maestro, ailluena comini o ecimo jaidimaci. Omo ñaijidimaci.

⁴⁶ Jesús uai ote:

—Damie cuena jetade. Cue abimona cue uai jaillamona, naimie jai jillode.

⁴⁷ Jaive duidiñaiñodi Jesús naiñaiñona uiñuana uiñote. Ie jira Jesús dine jaciruicana bite. Naimie uicomona bitadajanona, nana comini uicomona naimiena jetaja rafuena lloste. Naiñaiño ieconi jilluana lloste.

⁴⁸ Jesús dinena naiñaiñona raite:

—Ñoo, cuena o ñnua jira, jai jillodio. Mai jaillanona, uri o i.

⁴⁹ Naiñaiño diga Jesús nia ñaitemo, Jairo jofomona damie bite. Jairomo lloste:

—O jisa jai fiodaite. Maestrona ñaidoñeno.

⁵⁰ Iena Jesús cacajano raite:

—O comeci jarire iñeno; ia cuena nia ñno. Naiñaiño jilloite.

⁵¹ Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. ⁵² Nana nainomo itino eecuinaidimaci. Failliñaidimaci. Jesús dinena raite:

—Omoi eeñeno. Cuemona naiñaiñodi fiodañedesa. Jamai inide.

⁵³ Jai fiodaitedi: “¿Bue ñelli inide raitio?” raillanona jaisitimaci. ⁵⁴ Jesús fo jailla mei, naiñaiño onollina llino-caida, raite:

—Jitaibici, mai naidacai.

⁵⁵ Teconi naiñaiño joreño abido bite. Naidacaide. Jesús lloste:

—Guillena naiñaiñona eca. ⁵⁶ —Naiñaiño moo, ie ei diga, rajicaidiaimaia. Jesús iaiaimaiaimo lloste:

—Bie rafuena bumo lloñeno.

Jesúdi ie llofueoicaiganona oretaja rafue

(Mt 10.5-15; Mr 6.7-13)

9 Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiñanona anamona cominina jilloitallena. Duicuaína oni oretallena, iena jia iñonocaide. ² Naimacimo lloste:

—Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeci iuaina meido”. Duidinona jillota. ³ Omoi jaia, buena uiñeno. Omoi abina riidollena, jiguidana uiñeno. Ailluena rana omoi uiñellena, bolsana uiñeno. Llomeniconona uiñeno. Ucubena uiñeno. Guille ifo meidollena, rana uiñeno. Meidolle ñniraina uiñeno. ⁴ Nie nairaimo omoi jaia, dacomo omoi ri. Naie nairaimo omoi ille ñnori, dacomo omoi i.

⁵ Omoi comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uiñollena, omoi eilliaína oni jaidino.

⁶ Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

Juan Bautista micori fiodailla rafue

(Mt 14.1-12; Mr 6.14-29)

⁷ Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede.

⁸ Jiaie comini raisoidimaci:

—Elías jai bairedo.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

⁹ Jesúsna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúsna cioacade.

Jesús cinco mil iñiaína ecaja rafue

(Mt 14.13-21; Mr 6.30-44; Jn 6.1-14)

¹⁰ Jesús llofueoicaigano abido bia, Jesúsno naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide; ¹¹ iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui dibeimo naimaci comeci iuaina meiduaana llofue. Duidinona jia jillotate.

¹² Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaimo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai ñballena ñbai jitaideo?

¹⁴ Cinco mil iñiaí nainomo illa jira, ailluena guille jitaillana uiñotimaci. Naimaci ainiái, imaci uruai diga, jiaí itimaci. Ie llofueoicaiganomo Jesús lloste:

—Comini ana raillesa llono. Cincuenta digamierie ana imaci raillesa llono.

¹⁵ Iena finodimaci. ¹⁶ Naie cinco llomeniconona, naie mena lliciai diga Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ¹⁷ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

Pedro Jesúsna llua rafue

(Mt 16.13-19; Mr 8.27-29)

¹⁸ Jiairuido Jesús ie Moomo jia facaiseconi, ie llofueoicaigano naimie diga illanona, naimacimo jicantote:

—¿Ñiese cominidi cuena raitimaci?

¹⁹ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci:

“Jusiñamui facaina jaie ite llorainimona damie jai jillode. Imiedio”.

²⁰ Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai jilloitaraimadio. Jusiñamui facaina lloraini micoriai o billena jaie llotimaci. Jusiñamui ona orede.

Jesús ie fiodaillena llofuia rafue

(Mt 16.20-28; Mr 8.30-9.1)

²¹ Jesús naimaci como llogacino bumo lluana rairuide. ²² Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloitícue.

²³ Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue díbeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue díbeimo naimie iite. ²⁴ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruñenamona cue cominina bu jaia, jaca faifíñeite. ²⁵ Cue cominina bu jaiñenia, nibai eo duere sefuíñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite. ²⁶ Cuena bu meiruia, cue uaina bu meiruia, dane cue bia, naimiena meiruitícue. Cuena meiruillamona: “Cristomo duidícue” bu lloiacaiñenia, ico cue bia: “Naimiedi cue comini” lloñeítícue. Jusiñamui jaienisaí siño uai isoi illanona, cue Moo dinena monamona ico biitícue. Cue Moo uai cuemo illanona, ebire biitícue.

²⁷ Uanaicnona omoimo llotícue. Omoimona dajerie nia fiodaiñeitomoi, illaimana cue bairellena cioitomoi.

Jesús abi meidocailla rafue

(Mt 17.1-8; Mr 9.2-8)

²⁸ Ocho dígarui illanona, Jusiñamuimo jüillena, anedumo Jesús jaide. Naimie diga jaillena, Pedrona uite. Juan jiaí uite. Jacobona jiaí uite. Jiaie llofueoicaiganona uíñede. ²⁹ Naimie jüamona naimie abi meidocaide. Naimie iniroi naie dacaiño eo userecaide. ³⁰ Ieconí menamie bairiano, Jesús diga ñaitíaiamaiaí. Moisés micorí joreño ite. Elías jiaí ite. ³¹ Ebire bairediaíamaiaí. Jesús Jerusalémo fiodaill rafuena ñaitímaci. ³² Ie facaiseconi Pedro ie nabaiñiaí diga jai inidímaci; ia casillamona, Jesús ebirenana ciódimaci. Jesús ecimo itiaíamaiaina jiaí ciódimaci. ³³ Iaimaiaí jaiacania, Pedro Jesúsmo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micorí ie, jiaie Elías ie. —Iese raite; ia ie ñaia rafuena raise uíñoñoño jamai ebena ñaite.

³⁴ Iena naimie nia lluanona, uillie billamona, naimicina ibaide. Uillie ibaibillaconi jacinaitímaci. ³⁵ Uilliemona Jusiñamui naimacimo llote:

—Bimiedi cue Jito. Naimiena fetodícue, cue jitaille rafue finollena. Naimie lluana omoi cacareillanona, iena ñino —llote.

³⁶ Jusiñamui llua mei, dama Jesúsna dane ciódimaci. Jesús diga itino naimaci ciua rafuena naie facaiseconi jaca bumo lloñedímaci.

Jesúdi Janaba anamo itimiena jillotaja rafue

(Mt 17.14-21; Mr 9.14-29)

³⁷ Ie areruido anedumona ana bitímacimo, ailluena comini naimacimo dafaífide. ³⁸ Cominimona damie ado llote:

—Maestro, cue dajede cue jito duillana jibuisaíbi.

³⁹ Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede.

⁴⁰ Janabana oni oretallena, o llofueoicaiganomo jicantícue; ia oretanidímaci.

⁴¹ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are itícue. Raise omoi ñnollena, ¿nie dñori omoi diga iitícue? —Naie duidímie moomo llote—, O jito cue dine mai atí.

⁴² Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiena fecade. ⁴³ Comini iena ciuanona, Jusiñamui siño uai naimiemo illari rajicaidímaci.

Jesús ie fiodaillena dane llofuia rafue

(Mt 17.22-23; Mr 9.30-32)

Naimaci nia rajicaia, Jesús ie llofueoicaiganomo llote:

⁴⁴ —Cue lluana feitaño. Monamona billanona, ñimana jaidícue; ia Jusiñamui jitailla jira, jiaíruído illaicomini cuena meineitimaci.

⁴⁵ Jesús lluana raise cacaiñedímaci. Naimie iena llofueñena jira, iena raise uíñoñedímaci. Naimiemo iena jicanuana jiaí meiruitímaci.

Jesús ie llofueoicaigano moto imiēna ille rafue

(Mt 18.1-5; Mr 9.33-37)

⁴⁶ Ie facaise Jesús llofueoicaigano conini uaitajanona raitímaci:

—¿Bu cai moto imiēna ille?

⁴⁷ Jesús naimaci comeciái facajacinona uíñuamona, nainomo ite cominimona daje urue bai jainanocaida, naimaci motomo naimiena jonete. ⁴⁸ Raite:

—Comini dñena bie urue jamai bue isoide; ia bie isoidímie cuemo duillamona, naimiena feiñotímiedi cuena jai feiñote. Jusiñamui cuena oretaja jira, cuena feiñotímie Jusiñamuina jiaí jai feiñote. Jamai bue isoidímiedi omoi moto imiēna ille.

Jesúdi ie díbeimo itinona llua rafue

(Mr 9.38-40)

⁴⁹ Naie facaise ie llofueoicaiganomona Jesúsno Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

⁵⁰ Jesús dinena uai ote:

—Naimiena rairuiñeno. Cai dibeimo itimiedi cai fa-caisena ite. Ie jira naimie isoidinona rairuiñeno.

Jesús dinena Jacobo, Juan iaimaia lletaja rafue

⁵¹ Monamo abido Jesús jaillirui iaiei ia, Jerusalémo jaiacanamo naimie comecina facade. ⁵² Ie jira dajeri-riena uicodo oretate. Ie inillinona jenollena, Samaria railla nairaimo jaidimaci; ⁵³ iadedi Jerusalémo naimaci jailla jira, juduairfedinona samaritanodi gaiñena jira, Jesús llofueoicaiganona feiñoiacaifedimaci. ⁵⁴ Iena fidianona, Jacobo, Juan diga, Jesúsmo jicanotiaimaia:

—Nama, ¿bie comini jobaillena, monamona irai bil-lena Jusiñamui coco jicanuana jitaideo?

⁵⁵ Iaimaiaimo eruaillanona, Jesús dinena iaimaiaimo riire lletade:

—Dama ite. Iena jitaifedicue.

⁵⁶ Ie mei inillena jiaie illanomo jaidimaci.

Jesús ie llofuegamiena damie jaillena ie rafue

(Mt 8.19-22)

⁵⁷ Naisona ie llofuecaigano diga, Jesús oni jaillanona, Jesúsmo damie llete:

—O jaillinomo o diga jaiacaducue. O llofuegamiena jaiacaducue.

⁵⁸ Jesús uai ote:

—Janorede ocainaiaidi joforedimaci. Silliñia jil-lainiairedimaci; iadedi jofoniducue. Monamona bil-lanona, imana jaidicue; iadedi bueniducue. Jofoniducue. Cue diga o jaiacania, bue isoidena cuemona oñeitio. Iemo o comecina raise faca.

⁵⁹ Jiaimieo Jesús llete:

—Cue llofuegamiena o jaillena, cue diga mai bi.

Naimie uai ote:

—O diga jaiticue; ia cue moo nia fioidañena jira, o diga nia jaiñeiticue.

⁶⁰ Jesús naimieo dane llete:

—Dama ite. Cue diga mai bi. Cueno ñnoñedinodi o moona canoredimaci. Naimie fiodaia, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie dibeimo naimaci comecia iuaina meidua llocana cue diga mai o bi.

⁶¹ Jiaimie Jesús llete:

—O llofuegamiena jaiacaducue: iadedi cue jofomono jaiacaducue, cue cominina facadollena.

⁶² Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

Ie rafuena lollena, Jesús setenta digamiena oretaja rafue

10 Ie llofueganona llofua mei, naimacimona Jesús setenta digamiena fetode. Naga naimie jaiacana nairaimo menamieriena oretate. ² Naimacimo llete:

—Diga comini ite, naimacina Jusiñamui rafuena ñnotallena; iadedi eo janore lloraini ite. Jusiñamui jicano, jiaie llorainina naimie oretallena. ³ Mai jai; iadedi abi rairuicana jai. Toica llaudaia janallari illanomo illa isoi, omoia oredicue. ⁴ Ucubena uñeno. Ailluena rana omoi uñellena, bolsana uñeno. Meidolle zapatona uñeno. Naisomo bu omoimo dafaifia, are ñañeno.

⁵ Bu ie jofomo omoi ria, jofomo itinomo marena uaido.

⁶ Nainomo maremie ia, o uaina fairioite. Maremie iñena, o uaina fairioñena: “Jusiñamui ona canoite” naimieo lloñeno. ⁷ Nie nairaimo omoi ria, daacomo omoi ri. Omoi ecalle rana guiño. Cue facaina omoi maijia jira, comini omoia ecajia, cue facaina omoi maijia facaina omoi guiño. Naga jofomo guicana jaiñeno. ⁸ Nie nairai omoi ria, omoia naimaci feiñoia, omoi ecalle rana uaitañeno guiño. ⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie dibeimo omoi comecia iuaina meido”.

¹⁰ Nie nairaimo omoi ria, omoia naimaci feiñoñena, ie naiso motomo jaillanona llono: ¹¹ “Omoi naisomo cai eillimo ite jearacuai jai jaidinotica, marañede rafue omoimo illana omoi uñollena. Jusiñamui omoia sedaacade; ia iena jitaifedomoi” llono. ¹² Sodoma nairai jiaie eo marañede. Jusiñamui iena jiaie fuidode; ia nana comini naimie uicomo ico ia, Jusiñamuidi omoia feiñoñedinona Sodoma railla nairai baifemo duere finoite.

Jesús ie ñnoñedinona llua rafue

(Mt 11.20-24)

¹³ Ie fetocanomo Jesús nia llete:

—Corazín railla illanomo navui iticue. Betsaida railla illanomo navui jiait icue. Naimaci dine diga siño rafuena finodicue; iadedi ñnoñedinomaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comecia eo isinotallanona, naimaci comecia iuai meidotimaci. Naimaci comecia iuai meidua jiaie comini uñotal-lena, ebinide iniroina jitanona, jusefo naimaci ifogiaimo jonetimaci. ¹⁴ Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. ¹⁵ Capernaumo itino jiait duere sefuitimaci. Birui abina iedoiacadimaci; iadedi jairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci. ¹⁶ Omoi llua naimaci cacacania, cuena cacadimaci. Omoi llua naimaci jitañena, cuena jitaifedimaci. Cueno jitaifedinodi cuena oretagamiena jiait jitaifedimaci. —Jesús naie fetocanomo iese llua mei, oni jaidimaci.

Ie setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana cioticue. Iemona cue uai naimie uai baifemo faiana uiñoticue. ¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedino omoi anamo jai itataticue. Omoina niese nibaiñeitimaci; ²⁰ iadedi omoi uaina jananiaina nua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

Jesús ie Moo diga ñaia rafue

(Mt 11.25-27; 13.16-17)

²¹ Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotina bie isoide rafuena uiñotadiño; iadedi jamai bue isoidinona iena uiñotadiño. O jitailla jira, iese uiñotadiño. Ie jira iobillacinona omo fecaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoina naimiema uiñotadicue. Ie muidona naimiema uiñotomoi.

²³ Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci. ²⁴ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie iñotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesús cai ecimo itimiena isiruillana llua rafue

²⁵ Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Niese Moisés micori llogacinuai iena raite?

²⁷ Uai ote:

—Moisés micori jaie cuela: “O jitailla jira, o comecina facajamona, cai Nama Jusiñamuina nana o comeci jitaillamona naimiema eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoia, Jusiñamui illanomo jaca iitio.

²⁹ Naie llofueraima Jesúmo dane jicanote:

—¿Bu cue ecimo itino?

³⁰ Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiema fatimaci. Niade ie meinianona ie ecimona jaisite. ³¹ Dallu illanona, Jusiñamui diga ñairaima naie naisona jaide. Fagamiema ciode; iadedi ecido jaide. ³² Dallu illanona, Jusiñamui jofomo maijiraima jiai jaide. Fagamiema ciuanona, ecido jiai jaide. ³³ Ja muidomo Samaria nairai imie jaide. Naie nairaina enoidomoi. Fagamiema naimie ciuanona, naimiema duenaitie. Iemona naimie canoacade. ³⁴ Naimie dine jaillano, ie bofellañona manode. Jiai maitade. Ie burro emodomo jonecaida, naimiema uite. Inillinomo rilla mei, nainomo naimiema sedade. ³⁵ Ie areruido ie inia jofo namamo janore ucubena fecade. Raite: “Naimiema seda. Naimie facaina jiaie rana o oia, abido cue bia, iena ibaiticue”. Ie mei oni jaide. ³⁶ —Naie llofueraimamo Jesús dinena jicanote— ¿Fagamie ecimo itimiedi bu?

³⁷ Uai ote:

—Fagamiema duenaitimie.

Jesús raite:

—Jai raise uiñotio. Mai jai. Ie isoi finocana o jai.

Jesúdi Marta iaiñuai María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiema feiñote. ³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacarellena; ⁴⁰ iadedi Martamo maijille eo illa jira, naiñaiño naimie llofuiacinona cacarefiñede. Ie jira Jesúmo llote:

—Nama, cue euiño cuena canoacaiñena jira, daño maijidiñe. “O euiñona cano” naiñaiñomo llono.

⁴¹ Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca. ⁴² María iemo comecina jai facade. Naiñaiño cue llofuiana nano cacaiacade. Ona canollena naiñaiñomo lloñeiticue.

Jusiñamuimo Jesús jia rafue

(Mt 6.9-15; 7.7-11)

11 Jiairuido ie Moo diga Jesús ñaia, ie llofueganomona damie naimiemo llote:

—Nama, jiana caina llofue, ie llofueoicaiganona Juan Bautista micori llofui isoi.

² Jesús uai ote:

—Omoi jiaia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai iñoñellena.

⁵ Iena naimacina nia llofuellena, Jesús jiaie rafuena llote:

—Naiona mona moto llomeniconna jicallena, o nabai dine o jaia, ado lloitio: “Nabai, daje amani llomeniconna jitaídícue. ⁶ Jiaie nabai cue jofomo como ride. Jaca cue-mo buedi iñede, naimiena cue ecallena”. ⁷ Ie jofó jeraimona o nabai fairioite: “Cuenta uaidoñeno. Cue nasedi jai cue ibaicasa. Cue uruiái jai inídimaci. Jiaí inídicue. Llomeniconna omo fecallena casiacaíñedicue”. ⁸ Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitailla rana fe-caite. ⁹ Daje ra omoi fairia, iena jenodomoí. Raise jenoia, iena baitomoí. Damiena omoi jenoia, naimie illanomo jaidomoí. Nainomo naimiena baillamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoímo iite.

¹¹ Ero, omoímona ie moomo llomeniconna ie jito jicaia, noficina fecañede. Lliciaína jicaia, jaiona fecañede. ¹² Jigina jicaia, acaidona fecañede. ¹³ Jeacina fina-cabidomoí; iadedi omoi uruiáimo mare rana fecacabilana uiñotomoí. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimie mo jicadinomo ie Joreña itataite.

Comini Jesúsna jeare ñaia rafue

(Mt 12.22-30; Mr 3.19-27)

¹⁴ Jiairuido Janaba anamo illamimona Jesús Janabana oni orede. Janabana nia oretañenia, Janaba anamo naimie illamona, naie iima ñainide. Janaba oni jailla mei, naimie ñaite. Ie jira comini rajicaidimaci; ¹⁵ iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

¹⁶ Jiaíno naimiena facaciacasite. Raitimaci:

—Siño uai omo ia, Jusiñamuina siño rafuena finota.

¹⁷ Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo maíjinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ¹⁸ Ie isoide. Beelzebú uaido jananiaina, omoi llua isoi, cue oretaia, Janaba ie díbeimo itino díga jai nabairiñede. Iemona naimie comini danomo iñeitimaci. ¹⁹ Omoi comini jananiaina oni oretacabitimaci; iadedi naimaci finoca rafuena uaitañedomoí. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoí.

²⁰ Jiaie rafuedo iena lloiticue. Ero, ie rana raise riidua-mona, mairidimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana finide; iadedi naimie baifemo mairidimie bia, naimiena emodofillamona, ie rana firede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina

na cue oretaia, Jusiñamui rafuena cue llua uiñotomoí.

²³ Cue díbeimo iñedimie cuenta enoide. Cue díbeimo cominina itañedimiedi naie cominina cuenta ino-tañede.

Janaba anamo illamie rafue

(Mt 12.43-45)

²⁴ Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimimona Janaba oni jaia, jiaie illanona baillena, jofue iñenanomo jaide; iade baiñede. Baiñena jira, naimie comeciaina facade: “Navui cue anamo illamie dine abido jaiticue”. ²⁵ Abido naimie bia, naie iima comeci namanidena naimie baite. ²⁶ Iemei oni jaillanona, jiaie siete jananiaina naimie díga atide, naimaci anamo naie iima illena. Naie siete jananiaina naimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci inoñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona dañaiño Jesúsno llote:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena inuamona, jiaíno eo caimare iitimaci.

Dajerie Jesús siño rafuena finuana jitailla rafue

(Mt 12.38-42; Mr 8.12)

²⁹ Ie facaise díga comini Jesús dine biñoidimaci. Naimacimo llote:

—Birui ite cominidomoí marañedomoí. Siño rafuena cue finuana cioacadomoí; iadedi iena omoi jamai cioillena, siño rafuena finoñeiticue. Ero, Jonás micorí jaie ite rafuena uiñotomoí. Naiemo omoi comeciaina omoi faca. ³⁰ Naimie mo suide rafuemona Nínive railla nairai di Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuenta oretajana uiñoitimaci. ³¹ Ero, Saba railla nairai ie illaiño micorí di Salomón micorí dine jaie aarena jaide. Naimie micorí uiñuacina naiñaiño micorí cacareillena, aarena jaide. Salomón micorí baifemo birui uaidicue; iadedi cuenta inoñedomoí. Omoi comeciaina icinuaina birui omoi meidoñena jira, Jusiñamui uicomo nana comini ille facaiseconi naiñaiño micorí omoína ico ñaite: “Naimiedi siño rafue finuana ciodomoí. ¿Bue ñellena naimiena inoñedomoí?” omoína ico ñaite. ³² Lliciaí jeraimona naimie jillua mei, Nínive railla nairai dine Jonás micorí jaide. Nainomo Jusiñamui rafuena llote. Naie comini iena cacajano, naimaci comeciaina icinuaina meidotimaci. Cue rafuena omoi cacajamona, omoi comeciaina icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoí” omoína

raiñeiticue. Jonás micori baifemo birui uaidicue; iadedi cuena ñnoñedomoi.

Jesús comini illa rafue

(Mt 5.15; 6.22-23)

³³ Jesús llote:

—Lamparín bu unia mei, jofo anamo bainino raiñañega. Cirigai anamo raiñañega. Ie rairanomo raiñaca, comini nainomo bia, jofo jerai lligaiñollena.

³⁴ Omoi uisi diga rana ciódomoi. Omoi uisi maraiñenia, rana raise cioñedomoi. Ie isoide. Omoi comeci maraiñenia, maraiñedicinona finocana jaidomoi. Jusiñamuina uiñoñedomoi. Ie rafuena jiai uiñoñedomoi. ³⁵ Ie jira omoi comeciaina raise fino, cue rafuena omoi raise ñnollena. ³⁶ Nana omoi comeciaina marena ia, cue rafuena ñnocana jaitomoi. Iena raise uiñoitomoi. Jofomo lamparín raise lligaiñua isoi, cue rafuena raise uiñoitomoi.

Jesúdi judíuai illacominiña ñaia rafue

(Mt 23.1-36; Mr 12.38-40; Lc 20.45-47)

³⁷ Cominiña Jesús llofuia mei, daje fariseo imie naimie ñine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide. ³⁸ Naimie ña guiñenia, naimaci einamaci llogacinodo naimie jaiñenamona, Jesús ie onollina jocoñede. Ie jira ñaie fariseo imie rajicaide. Ie comeciña facade: “Naimie eo mare llofueraima. ¿Ñiese cai einamaci llogacinodo jaiñede?” ³⁹ Jesús naimiemo llote:

—Da platos jinafo, da pocillos jinafo jocoñino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciaina jearede. ⁴⁰ Abi uiñoñedomoi. Jusiñamui omoi abiaina omoi comeciaina diga finode. Omoi finoca rafuena uiñote. Omoi comeciaina facajacinona jiai uiñote. ⁴¹ Omoi comeciaina marena ia, jiaie cominiña canodomoi. Iemona Jusiñamuimona omoi abi jiai mare. ⁴² Fariseuai, omoimo rafuena lloiticue. Nana omoi illimo ite ramona Jusiñamuimo janore jisa feca-fecabidomoi; iadedi jiaie cominiño mare rafuena raise finoñedomoi. Jusiñamuina jiai raise isiruiñedomoi. Nana ñaie isoide rafuena omoi jiai finua. ⁴³ Comini omoiñi acarillena, ofiracomoi uicomo raiacadomoi. Ñine omoi macaria: “Jamai bue isoñedicaí” omoi comeciaina facajamona, jiaie cominiño omoína uaiduana gaidomoi. Iese omoi jailla jira, Jusiñamui omoína duere finoite. ⁴⁴ “Bainino ite raiño emodomoi comini uiñoño macarillamona, naimaci abi jai jearede” raitomoi. Bainino ite raiño isoidomoi. Omoi diga jiaie cominiño omoimo ite jeacinona uiñoño nabairillamona, jeacinona jiai finodimaci. Iese omoi finocana jaia, Jusiñamui omoína duere finoite.

⁴⁵ Ñaie facaise Moisés llogacinuaina llofueraimona ñaie Jesús llote:

—Iese o lloia: “Jecino finodomoi” caina jiai llotio.

⁴⁶ Jesús uai ote:

—Jusiñamuimona jiai duere sefuitomoi. Omoi einamaci llogacinuaido raise naimaci jaillena, diga rafue comini finuana jitaedomoi; iadedi iedo naimaci raise jaillena, naimacina jaca canoñedomoi. “Jusiñamuina eo raise sedadicaí” comeciña facadomoi. ⁴⁷ Omoi jaiagaidi Jusiñamui facaina llorainina meinetimaci. Ñaie lloraini micoriai raiafuai birui marena finodomoi; ⁴⁸ iadedi naimaci micoriai llogacinuaido omoi birui jiai jaiñena jira, omoi jaiagai finoca radi: “Mare” raitomoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoína duere finoite. ⁴⁹ Omoína Jusiñamui abi uiñuamona jai llote: “Cue rafuena llollena, naimaci ñine cue facaina llorainina oretaiticue. Cue rafuena eo uiñotina jiai oretaiticue. Dajeriena meinetimaci. Jiañona duere finoitimaci”. ⁵⁰ Enirue finua facaise mona ailluena Jusiñamui facaina llorainina meinetimaci. Omoimona Jusiñamui iba oite. ⁵¹ Abel micori jaiete. Ie ama naimiema meinete. Naimie facaise mona omoi jaiagaidi diga llorainina meinetimaci. Zacaríana jiai meinetimaci. Jusiñamui jofomo Jusiñamuimo toica ocaina jobaisoillano motomo naimiema meinetimaci. Omoimona Jusiñamui birui iba oite. ⁵² Omoi llofuamona comini Jusiñamui rafuena uiñoñedimaci. Jusiñamui rafuena raise uiñoñedomoi. Jiaño iena raise uiñuana jitañedomoi. Iese omoi jailla jira, Jusiñamui omoína duere finoite.

⁵³ Fariseo jofomona Jesús jailla mei, fariseuai comini icirillamona, Jesús diga rafuena jicanotimaci, naimie uaina uaitallena. Moisés micori llogacino llofueraini daje isoi uai uaitatimaci. ⁵⁴ Naimie raise uai oñedena, naimiema duere finoacadimaci.

Jesúdi mareuidinona abi caitadinona llofuia rafue

12 Ie facaiseconi eo ailluena comini Jesús ñine ofidimaci. Ailluena illa jira, conini eilliaimo naidatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicaí” raitimaci; iadedi mareuidinona abi caitadimaci. Naimacimona abina rairui. ² Naimaci birui finoca rafuena birui bainino finodimaci; ia Jusiñamui naimaci comeciaina iticinona ico uiñotaite. ³ Ero, cue rafuena birui anado llocana jaidomoi; ia ico marefodo iena llocana jaitomoi.

Jesúdi jaciruiño llofuia rafue

(Mt 10.28-31)

⁴ Ie llofueganomo Jesús llote:

—Cue nabaiñiaidomoi. Omoína meineiacadinona jaciruiño. Omoi abina meineredimaci; ie iadedi omoi joreño meinenidimaci. Omoína naimaci meinia, omoi joreño Jusiñamui ñine jaite. Iena uiñuamona, omoi meineiacadinona jaciruiño. ⁵ Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiema jacirui. ⁶ Ero, dabecuiro janorede sillina fecadomoina, eo janore ñbaca. Silliñiaí eo janore raifide; iadedi Jusiñamui naimaci illana

uiñote. ⁷ Ero, niga ifotirai omoimo illana Jusiñamui jiai uiñote. Naimiedi omoina sedajana jiai uiñote. Silliñiaí baífemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

Jesús naimiena janoñenana llofuia rafue

(Mt 10.32-33; 12.32; 10.19-20)

⁸ Ie llofueoicaiganomo Jesús nia llote:

—Cue rafuena omoi llumona, jiaíno omoína duere fñoitímaci. Cuená biruí omoi janoñenia, nana comíni Jusiñamui jaienisaí uicomo íco ía, nainomo omoína janoñeitícue. “Cue comínidomoi” omoína raitícue.

⁹ Cuená biruí omoi janoía, nana comíni Jusiñamui jaienisaí uicomo íco ía, nainomo omoína janoíticue. “Cue comíniñedomoi” omoína raitícue. ¹⁰ Jusiñamuidí naga cuena jeare ñaitímie jeacínona feítarede; íadedí Jusiñamuidí íe Joreñoña jeare ñaitímie jeacínona feítañeite. ¹¹ Cue rafuena omoi llua muidona, duere sefuitomoi. Illaicomíni díne omoína llogídollena comíni uía, omoi abí ríidollícínomo omoi comeciáina jarire facañeno. ¹² Naie facaiseconí Jusiñamui Joreño omoi abí ríidollícínona uiñotaite.

Jesúdí raruíaí eo uamona abí rairuillana llofuia rafue

¹³ Nainomo íte comínimona damíe Jesúmo llote:

—Maestro, cue moo jai fiodaílla meí, cue ama doforamíe cue facaína íte rana cuemo íacañede. Naimíemo llono, cuemo íllena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecímo ítinomo llote:

—Ero, rana nicídoñeno. Aílluena ra omoímo íllamona, Jusiñamui íllanomo ríñeitomoi. ¹⁶ Iena omoi raise uiñollena, jiaíe rafuedo íena lloíticue. Ucuberedímíedi íe íllimona ailluena rana ote. ¹⁷ Ie jira comecína facade: “Cue íllimona ailluena rana otícue; íadedí ¿nínomo íena eenoíticue? ¹⁸ Biruí cuemo íte eenoracona judaíticue. Ie meí aillue eenoracona fñoíticue. Nainomo cue rana eenoíticue”. ¹⁹ Ie comecína facaíte: “Cuemo ailluena ra jai íte. Díga años nía ííticue. Jamai ííticue. Marena guíticue. Caímare ííticue”. ²⁰ Iese comecína facade; íadedí Jusiñamui naimíemo llote: “Abí uiñoñedio. Cue llua jira, ja naóna fíodaitío. Ie meí omo íte ra omo fiebíñeite”. ²¹ Dama ramo íe comecína bu facaía, Jusiñamui jítailacínomo íe comecína bu facañenia, faífite.

Jesúdí Jusiñamui caí sedajana llua rafue

(Mt 6.25-34)

²² Ie llofueoicaiganomo Jesús llote:

—Jusiñamui jítailacínomo omoi comecína facaía, omoi íllamo omoi comecína jarire facañeitomoi. Bue omoi guíllamo jarire comecína facañeno. Omoi jítalle íniroímo jarire comecína facañeno. ²³ Jusiñamui omoi na ítataja muidona, guílle omoímo íite. Naimíe omoi abí fínua muidona, íniroidí omoímo íite. ²⁴ Silliñiaímo comecína faca. Buena ríñedímaci. Nie isoide guíllena

eenoñedímaci; íadedí omoi Moo Jusiñamui naimacína sedajamona, naimaci guílle íte. Naimaci baífemo omoi faía jira, naimíe omoína canoíte. ²⁵ Omoímona, ¿bu íe comeci jarire facajamona a saíríte? Iese jaca buna a saíríñede. Dama Jusiñamui omoína a saírítarede.

²⁶ Omoi comeciáina facajamona omoi a saíríñena jira, jiaíe ramo omoi comeciáina jarire fñoñeno. ²⁷ Safíamo omoi comeciáina faca. ¿Níese sícodímaci? Maíjñedímaci. Íniroína tíforíñedímaci; íadedí Salomón mícorí naimaci ísoí jaíe íñede. Naimíe íllaimana jira, naimíe mícorí íniroí eo ebírede; íadedí safía naimíe íniroí baífemo ebíre eruáide. ²⁸ Jusiñamui safíana ebíretacabíde. Dallu facaíse íllanona, safíadí díude. Safía baífemo omoi uaílla jira, Jusiñamuidí íniroína omoímo jaca íite. Safíana naimíedi ebíretaja muidona, omoímo íniroidí jaca íite. Omoi ra omoímo íllena, naimíena íno. Jusiñamuína eo janore ínotomoi. ²⁹ Omoi comeciáina jarire ícana jaíñeno. “¿Buena guíticaí?” raíñeno. Iemo comeciáina eo facañeno. ³⁰ Jusiñamuína ínoñedíno íemo comecína facacabídímaci. Nana omoi jítailacínona omoi Moo Jusiñamuidí uiñua jira, naimaci ísoí íñeno. ³¹ Jusiñamui jítailacínona fínocana omoi jaí. Naimíemo omoi comeci facaía, omoi íllamo omoi comecína jarire facañeitomoi. Iemona guílle omoímo Jusiñamui íite. Íniroí omoímo jiaí íite.

Jesúdí Jusiñamuímo comecína facaja rafue

(Mt 6.19-21)

³² Jesús llote:

—Cue comínina omoi íllanona, urí omoi í. Omoi Moo Jusiñamui jítaílla jira, naimíe anamo omoína ítatajamona, omoína sedaíte. ³³ Omoi raruíaína fecajanona, ucubena dueredínomo feca. Sabíñeíte bolsana ono, omoi ra faífi raíllano. Monamo omoi ra ílla ísoí ñaitícue. Monamo omoi ra ílla ísoí, íena faífiñeitomoi. Fííríraíma nainomo jaíñede. Gíreco nainomo jiaí íñede. ³⁴ Aíllue ra omoímo ía, Jusiñamuímo comeciáina facañedomoi; íadedí naimíe jítailacínona omoi fínoía, naimíemo comeciáina facadomoi.

Jesús íe abído bíllemo ocuírillana llofuia rafue

³⁵ Jesús nía llofúete:

—Monamona íco cue abído bíllemo ocuíri. Iena omoi raise cacáíllena, bie rafuedo íena lloíticue. Damíe íe nabai íe aí ua rafue díne naóna jaíde. Ie mullaíai naimíe abído bíllemo ocuírillana ocuíde. Naimíe bíllemo naimaci raise ocuíria, íniroína jítajanona, lamparíníai uníanona, ocuírítímaci. Iese naimaci ía, nasena naimíe tuía, íena raíre econoítímaci. Nie hora naimíe abído bíla, naimíena naimaci íníñeno ocuíria, íeri naimíe íobíte. Íobíllamona, mullaímana naimíe ítena, mesamo naimacína ecaíte. Naimíe bílle hora naimaci uiñoñena jira, jaca ocuíricana naimaci ílla. ³⁹ Ero, fííríraíma bílle facaiseconí jofo namadí uiñotena, nía caadote, íe ra faífi raíllanona. ⁴⁰ Monamona íco abído bííticue. Omoi ocuíríñena facaísemo bííticue. Ie jira cue bíllemo raise ocuíri.

Jesúdi patrón ie mullaïmana ie jofona sedataja llua rafue

(Mt 24.45-51)

⁴¹ Ie como lloga rafuena cacajano, Jesúmo Pedro jicante:

—¿Bumo bie rafuena llotio? ¿Caimo llotio? ¿Nana cominimo?

⁴² Uai ote:

—Bie isoide cominimo lloticue. Ie mullaiaïmona patrón damiena fetode, ie jiaie mullaiaïna sedallena. Naimacina sedajanona, naimie naimacina jiaie ecade. ⁴³ Ie mei patrón oni jaide. Jofomo abido naimie bia, ie nanoca mullaïma raise maijiana fidiia, naimiena raise ibaite. ⁴⁴ Iobillamona, nana ie raruiaina sedataite; ⁴⁵ iadedi naie mullaïma maraiñenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaïna faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁴⁶ Ie ocuriñena facaise ie patrón abido billanona, naimiena meintaite. Ie uaina ñnoñedino isoi, duere finoite. ⁴⁷ Naie mullaïma ie patrón jitailla rafuena finuana uiñote; iadedi iena finoñede. Ie jira eo duere sefuite; ⁴⁸ iadedi maraiñede rafuena raise uiñoñeno jiaie mullaïma finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaïma isoi, Jusiñamui jitaillacino finocana omoi jai.

Jesús muidona nana comini uri iñena rafue

(Mt 10.34-36)

⁴⁹ Jesús llote:

—Cuenam naimaci ñnollena, eniruemo comini dine biticue. Cuenam dajerie ñnuamona, cue cominina jaitimaci. Cuenam jiaïno ñnoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaïdicue. ⁵⁰ Cue nia eo duere sefuiticue. Iena raire suillena jitaïdicue. ⁵¹ Nana cominina uri itatallena eniruemo biñedicue. Cuenam ñnoñedinodi cuena ñnotinona enoitimaci. Enoillamona, cuena ñnotinona duere finoitimaci. ⁵² Cue billamona, daje jofomo itino diese danomo iñeitimaci. Dabecuïro comini nainomo ia, menamie cue dibeïmo iite. Daje amani cue dibeïmo iñeite. Iese iñenia, daje amani cue dibeïmo iite. Mena cue dibeïmo iñeite. ⁵³ Cue lloga rafuena damierie ñnua muidona, ie moo illa dibeïmo ie jito iñeite. Ie jito dibeïmo ie moo iñeite. Ie ei illa dibeïmo naiñaiño jisa iñeite. Ie jisa dibeïmo ie ei iñeite. Ie jifaiño illa dibeïmo ie miodi iñeite. Ie mio dibeïmo ie jifaiño iñeite. Iese cominina uri itatañedicue.

Jesúdi monamo ite rana llofuia rafue

(Mt 5.25-26; 16.1-4; Mr 8.11-13)

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide. ⁵⁵ Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite.

⁵⁶ Abina uiñotinona abi caitadinodomoi. Monamo eruailamona, rafue suillana uiñotomoi; iadedi omoi cimo suiacalle rafuena raise uiñoñedomoi. Cue lloga rafuena raise cacaiñedomoi. ⁵⁷ Iemo omoi comeciaina raise facañedomoi. ⁵⁸ Ero, omoïna bu llogidoia, juez dine nia omoi riñenia, omoïna llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoïna jonetaite. ⁵⁹ Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

Jesúdi comeciã iuai meiduana dana llua rafue

13 Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori soldaduaina orede, naie cominina fallena.

² Jesús uai ote:

—¿Ñiese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi. ³ Iese omoi comeciaina facañeno; ia omoi comeciã iuai meiduamo comeciaina faca. Omoi comeciã iuai omoi meidoñenia, omoïdi jiaie faifitomoi. ⁴ Siloé railla tidacana navui ana goillamo, dieciocho digamie saitabidimaci. Iena fididomoi. ¿Ñiese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi. ⁵ Iese omoi comeciaina facañeno; ia omoi comeciã iuai meiduamo comeciaina faca. Omoi comeciã iuai omoi meidoñenia, omoïdi jiaie faifitomoi.

Jesúdi ie Moo comini comeciã iuai meiduamo fecuise ocurilla llua rafue

⁶ Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede. ⁷ Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”. ⁸ Ie illina sedaraima uai ote: “Dama ite. Daje año nia seda. Riarana abina caiguiticue. Eniruena caimaretaiticue. ⁹ Jiaie año llisia, mare. Llisiñenia, iena tieiticoco”. Ie isoide. Jusiñamui omoi comeciã iuai meiduamo are ocurite; ia meidoñenia, omoïna duere finoite.

Jesúdi jicaidiñaiñona jillotaja rafue

¹⁰ Jiairuido sábadoruïmo judiuaï ofiracomo Jesús llofue. ¹¹ Nainomo duidiñaiñodi ite. Janaba anamo

naiñaiño illa jira, naiñaiño jicaide. Atona naidainide.

¹² Naiñaiñoña Jesús ciuanona, naiñaiñoño lloste:

—Ñoo, o duicomona jai jillodío. ¹³ —Ie mei naiñaiñoña jetade. Ieconí naiñaiño atona naidadate. Ie jira Jusiñamui iobillacina fecade. ¹⁴ Naie ofiraco sedaraima icirite, sábadoruimo Jesús naiñaiñoña jillotaja jira. Nainomo itinomo lloste:

—Seis digarui ite maijillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo maijñedicaí.

¹⁵ Jesús uai ote:

—Maijñedinona abi caitadinodomoí. Sábado iruimo maijñebidomoí. Sábado iruimo omoi toinaiña imaci illanomona suiñodomoí, jinui illanomo naimaci jiruaillena. Naie isoide maijia omoimona mare. ¹⁶ Ie isoide. Bie riñodi Abraham micorí comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñoña canollena, sábadoruimo iruimo naiñaiñoña Taife anamona cue jillotaia, cuemona mare.

¹⁷ Iena Jesús lluamona, nana naimie dibeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue

(Mt 13.31-32; Mr 4.30-32)

¹⁸ Jesús jiaie rafuena lloste:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

¹⁹ Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo ail-lue riaradi sícode. Ailluena jira, nainomo sillíñai jicaicaiña finodimaci.

Jesús siritate rana llofuia rafue

(Mt 13.33)

²⁰ Jesús jiaie rafuena lloste:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. ²¹ Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

Jesúdi Jusiñamui dine rille llua rafue

(Mt 7.13-14, 21-23)

²² Jesús diga nairaimo llofuecana jaide. Jerusalén dine jaide. ²³ Jesús oni jaillanona, damie naimiemo jicante:

—Nama, ¿niga comini o uaina ñnoitimaci? —Jesús uai ote:

²⁴ —Monamo cue Moo dine jaille nasedi janorede isoide. Naie nasedo llicana o jai. Ailluena comini naiedo jaiacanitimaci; iadedi fo jaitimaci. ²⁵ Naie jofonama nase íbailla mei, ¿ñiese fo jaitomoi? Jino naidailamona, nasena tutajanona, raitomoi: “Nama, o nase econo”. Naimie uai oite: “Omoína uiñoñedicue”.

²⁶ Dane lloitomoi: “O diga navui guiticaí. Cai illanomo

llofuetio”; ²⁷ iadedi naimie uai oite: “Omoína uiñoñedicue. Cue cominiñedomoi. Jeacino omoi começimo nia illa jira, mai jai”. ²⁸ Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micorina cioitomoi; ia omoi jino illamona, duere sefuillamona, eitomoi.

²⁹ Diga comini Jusiñamui illanomo iitimaci. Ailluena judíuaiñedino naga nairaiamona Jusiñamui illanomo biitimaci. Nainomo coninina caimare nabaitimaci.

³⁰ Naga nairaimona Jusiñamui cominina jillotarede. Cue rafuena cacadomoí; ia cue cominina omoi jaiacania, abi iedoñoeno cuena ñnocana omoi jailla.

Jesús Jerusalémo itinomo llua rafue

(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaima Herodes ona meineiade.

³² Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecabidicue. Duidinona jillotacabiticue. Birui siño rafuena finocabidicue. Ico iese nia fñoiticue. Iese cue maijille fuite. ³³ Nia oni jaiticue. Ailluena Jusiñamui facaina lloraini micorai nainomo jai fiodailla isoi, Jerusalémo cue rafue jai raire fuite” llono.

³⁴ Jerusalémo itinomo começina facajano, Jesús lloste:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruai sedaja isoi, diga icaiño cue anamo omoína uaidoicadicue; iadedi omoi dinena cuena jitañedomoi.

³⁵ Iemona Jusiñamuidi omoi illanona jai faionocaide. Cue Moo dine jaiticue. Cue jailla mei, cuena cioñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

Jesúdi abina siridimiena jillotaja rafue

14 Jiairuido sábadoruimo Jesúdi fariseo imie jofomo guisaide. Naie fariseo imiedi illaicomini.

Nainomo itino Jesúmo eo eruaidimaci. ² Guille facaise naie jofomo duidimie bite. Naimie abina siridimie.

³ Nainomo itinomona damieredi fariseuai comini. Moisés micorí llogacinuaina llofueraini jiai itimaci. Naimacimo Jesús jicante:

—Sábadoruimo comena cue jillotaia, ¿omoimona jeacino finodicue? ¿Ñiese Moisés micorí llogacinuai iena lloste?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede. ⁵ Nainomo itinomo lloste:

—Sábadoruimo maijñebidomoí. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare.

Bimiena cue jillotaja jira, ¿niese cuena jeare ñaitomoi?
 6 Iena cacajanona, uainicaidimaci.

Jesúdi guillena uaidoganona llua rafue

7 Jesúdi naimaci guisaibillana ciode. Jiaino baifemo illena, jofo nama abimo nana raicadimaci. Iena ciuamona, naimacimo Jesús rafuena llofue:te:

8 —Rafue dine guillena omoína bu uaidoia, jofo nama abimo raifeno, omoi baifemo itimie bi raillano.

9 Jofo nama abimo omoi raia, omoi baifemo itimie bia, jofo nama omoimo lloite: “Bimiemo omoi raillanona feca”. Meidaillanona, oni rainadaitomoi. 10 Ie jira rafue dine omoína uaidoia, naie jofomo omoi ria, oni raí. Ie mei jofo nama jitaia, omoimo lloite: “Cue abimo raí”. Ie mei nana naie itino omoi iobillana cioitimaci. 11 Ie isoide. Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite.

12 Naimiena uaidotimie mo Jesús llote:

—Guille rafuena o finoia, naga icaiño o nabaiñiaina uaidoñeno. Naga icaiño o cominina uaidoñeno. Naga icaiño o ecimo itino ucuberedinona uaidoñeno. Naimacina o uaidotona, jiairuido guillena ona uaidotimaci, naie iba o ollena; 13 ia rafuena o finoia, dueredinona uaido. Ñuja-ñujacaida macaritinona uaido. Uisínidinona uaido. 14 Naimacimona iba ico o ofenamon, Jusiñamui ona caimare itataite. Jiairuido fiodaillanona mareuidino jilloia, monamo Jusiñamui ona ibaite.

Jesúdi ailluena guille fino ca rafuena llua rafue

15 Jesús abimo itinomona Jesús llua na damie cacajano, raite:

—Monamo Jusiñamui illanomo itimiedi marena iite.

16 Jesús uai ote:

—Iena omoi raise uiñollena bie rafuena lloiticue. Damie aillue rafuena finode. Ailluena cominina uaidote. 17 Rafue illaruimo ie mullaimana orede, cominina dane uaidollena. Raite: “Mai bi. Nana guille finuadi jai fuite”; 18 ia biacaiñedimaci. Damie llote: “Eniruena como ibadicue. Iena jibuisaiacaducue. O rafuemo jaiñeiticue. Ie jira cue joreña icíñeitia”. 19 Jiaimie llote: “Diez diga juraretana como ibadicue. Naimacina jibuisaiacaducue. O rafuemo jaiñeiticue. Ie jira cue joreña icíñeitia”. 20 Jiaimie llote: “Riño como oticue. Ie jira o rafuemo jaiñeiticue”. 21 Ie nama dine naie mullaíma abido jaide. Comini biacaiñenana llote. Iena cacajano, rafue namadi icirite. Ie mullaímamo llote: “Caí nairai naisona jai. Dueredinona uaido. Ñuja-ñujacaida jaidinona uaido. Uisínidinona uaido”. 22 Ie mei naie mullaíma jaide. Abido naimie bia, ie namamo llote: “O llua na finodicue. Ailluena comini jai bitimaci. O jofomo illino nia ite”. 23 Rafue namadi uai ote: “Naisomo itinona bene atillena, cue jofona oruitallena, caí nairaimona jino jai. 24 Cue nano uaidogano cue guillena guíñeitimaci”. Ie isoide. Jusiñamui rafuena

feíñotino monamo Jusiñamui illanomo ico iitimaci; ia naimie rafuena jitaiñedino nainomo ico iñeitimaci.

Jesúdi naimie llofueganona jaiacadino rafue

25 Naie facaise ailluena comini Jesús diga jai jaisoidimaci. Naimacimo llote:

26 —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruai baifemo isiruilla. Cuena ie amatiai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide.

27 Cue llofuegamiena bu jaillanona, duere sefuicana jaite. Nibai naiemona fiodaite. Bu iese jaiacaiñenia, cue llofuegamiena naimie raise jainide.

28 ‘Ero, jiaie rafuedo iena lloiticue. Jofona bu finoacania, ie ucubena bailla diese uiñollena: “¿Niga raifite?” comecina nano facade. 29 Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. 30 Raitimaci: “Ie jofo finua tainede; iadedi fuidonide”.

31 ‘Ero, jiaie rafuedo iena lloiticue. Illaíma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?” Comecina facaja mei: “Emodofíñeiticue” naimie comecina facajia, 32 nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacaiñedicue; ia o diga bie rafuena raise finoacaducue”. 33 Biemo comecina omoi faca. Ie raruaímo bu comecina eo facaia, cue llofuegamiena jainide.

34 ‘Sal mare; iadedi ie caimano jai iñenia, ¿dane niese nibaiamona caimarenite? 35 Jai marañede. Eniruemo jonegadana, jiaí marañede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue llua mo cacarei. Iena ñino.

Jesúdi naimiena ñnotinomona damie faifillana jitaiñena rafue (Mt 18.10-14)

15 Naimaci bisoilla isoi ie rafuena cacaillena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiaí ofidimaci. 2 Iena ciuano, fariseuai cominidi, Moisés micori llogacinuaina llofueraíni diga, Jesús joreña ñaitimaci: —Bimie marañedicinona finorainina feíñote. Naimaci diga jiaí guite. 3 Naimaci ñañana uiñuanona, Jesús naimacimo bie rafuena llote: 4 —Omoimona damiemo cien toica llaudaíai nibai ite. Naimacimona daje feiraitaite. Ie noventa y nueve llau-daíaina fainonocaida, iena jenuaite, ie baille dinori. 5 Baillanona, ie fecanicomo rocanocaida, iobicana biite. 6 Jofomo naimie ria, ie nabaiñiaina uaidoite. Ie ecimo itinona jiaí uaiduanona, raite: “Cue diga iobi. Cue feiraitaite llaudana jai baiticue”. 7 Ie isoide. Cue rafuena cue llua mona, damie ie comeci jeacinona fainonocail-

lamona, ie começi iuai meidua mona, monamo itino eo iobitimaci; iadedi noventa y nueve comini marena illa mona, janore iobitimaci.

Jesúdi faifide ucubena bailla llua rafue

⁸ Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille dinori. ⁹ Iena naiñaiño baia, ie nabaiñaina uaidoite. Ie ecimo itinona jiaí uaiduanona, raite: “Cue diga iobi. Cue faifide ucubena jai baiticue”. ¹⁰ Ie isoide. Cue rafuena cue llua mona, damie ie começi jeacinona fainonocaillamona, ie começi iuai meidua mona, Jusiñamui jaienisai eo iobitimaci.

Jesúdi damie ie moo fainonocailla llua rafue

¹¹ Jesús llote:

—Jiaie rafuena omoimo lloiticue. Damie mo mena jito ite. ¹² Ie moomo jamamie llote: “Moo, o fiodailla mei, o raruiamona janore feiñoiticue. O fiodaillana sedaa-caiñedicue. O raruiaina cue facaina birui jitaídicue. Cuemo ine”. Ie jira ie moo naimiemo fecade. ¹³ Ie mei nano nie dinori illamona, nana ie raruiái iraijanona, jiaie eniruemo jaide. Nainomo ie ucube jamai burue-mo faiaide. ¹⁴ Nana naimie ucube fuidua facaise, naie eniruemo guille iñede. Aime guitimaci. Naimie jiaí aime guite. ¹⁵ Ie jira nainomo ite patrón dine maijiaide. Naie patrón ie chanchuaina sedallena naimiena orede. ¹⁶ Naimiena jaca buna ecarainina jira, chanchuai guille-mona guiacade. ¹⁷ Iese naimie duere sefuilla jira, ja muidomo abina uiñocaillamona, começina facade: “Cue moo jofomo nana naimie mullaiaí raise guitimaci. Guille fiebicabite; iadedi bene aimeri fiodaíticue. ¹⁸ Cue moo dine abido ja jaiticue. Naimiemo lloiticue: Jusiñamuimo jeacinona finodicue. Omo jeare jiaí finodicue. ¹⁹ Odi: ‘Cue jito’ cuena raiñeno. O mullaiaí illa isoi, cuena abido feiño”. ²⁰ Ie facaise ie moo dine jai jaide. Nia aare naimie ia, ie moo naimiena ciode. Ie jitona due-naillanona, naimie dine aiside. Naimiena caimadote. Jiaí libanote. ²¹ Ie jito naimiemo llote: “Moo, Jusiñamuimo jeacinona finodicue. Omo jeacino jiaí finodicue. Odi: ‘Cue jito’ cuena raiñeno”. ²² Ie moo iena cacajano, ie mullaiaimo llote: “Cue jitona naimie eruail-lena, eo mare iniroina atí, naimie jital-lena. Cue jitona naimie illa jira, iena jital-lena, anillona atí. Naimie jital-lena, zapatona jiaí atí. ²³ Janoreta farediretana fano. Iena raise finuanona, iena mai caí guilli. Iobillamona, caimare ebirede rafuena finoiticaí. ²⁴ Navui cuemona cue jito fiodaite isoide. Caje cuemo dane abido rilla. Navui cuemona naimiedi faifide; iadedi birui naimiena dane ciodicue”. Naimie llua isoi, rafuena finodimaci. ²⁵ Naie facaise nano doforamie illimo ite. Jofomo abido naimie bia, comini iraisillana cacade. ²⁶ Daje mullai-mana uaiduanona, naie rafuena jicanote. ²⁷ Naie mullai-ma uai ote: “O ama abido jai bite. O ama ramo jir-iñeno abido billa jira, o moo ie janoreta farediretana

jai fatatate”. ²⁸ Iena cacajano, icirite. Fo jaiacaiñede. Ie jira ie moo jino bite. Naimiena fo uaidote. ²⁹ Ie moomo llote: “Ero, diga años o diga maijídicue. O uaina jaca ñoticue; iadedi cue nabaiñai díga, rafuena cue finol-lena, chivo cuemo jaca fecañedio. ³⁰ O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”. ³¹ Ie moo uai ote: “Moo, nagarui cue diga itio. Nana cue radi oienite. ³² Cuemona o ama navui fiodaite isoide; iadedi naimiena dane ciodicue. Naimie navui faifide raiticue; iadedi caje cuemo dane abido rilla. Cue iobillanona rafuena finodicue”. Bie rafuemono omoi fueollena, iena jai lloticue —Jesús llote.

Jesúdi patrón ie mullaíma finoca rafuena llua rafue

16 Ie llofueoicaiganomo Jesús jiaie rafuena llote: —Ucuberede patrón ie mullaímana ie rana sedatate. Naie patrón eneno oni illanona, ie mullaíma ie rana raise sedañenana fidide. ² Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijñeítio”. ³ Iena cacajano, naie mullai-ma começina facade: “¿Niese nibaiticue? Cue nama cuena jai dotaacade. Maijiana ocuinidicue. Jiaie comi-mona ucube jamai jicajana meiruiticue. ⁴ Cue finuana jai uiñoticue. Naimaci jofomo comini cuena íco feiñol-lena cue dotaja mei, nana cue patrón debedinona uaidoiticue”. ⁵ Ie jira naimacina uaidote. Damie mo jicanote: “¿Cue patrómo niga debedio?” ⁶ Uai ote: “Cien bidones raifi aceitunamona oga aceitena debedicue”. Naie mullaíma raite: “O rabemo jarire ja cueno: cincuenta bidones”. ⁷ Jiaimiemo jicanote: “¿Niga debedio?” Uai ote: “Cien digagai trigo raifi debedicue”. Naie mullaíma dinena raite: “O rabemo ochentana cueno”. ⁸ Iena fidiano, naie mullaímamo ie patrón raite: “Jiairuido marena o illemo o começina raise facadio. Eo abina uiñotimedio” raite. Ero, Jusiñamuina ñoñedinodi naimiena ñotino baifemo ra fecajana baitadimaci. ⁹ Naiemona omoi fueollena, omoimo lloiticue. Omoimo ite ra diga dueredinona cano. Iemona omoi nabaiñaina jaitimaci. Omoi fiodaia, omoi ra bene fiebite; ia Jusiñamui illanomo naimaci díga omoi ia, naimacina birui omoi canuamona, nain-omo omoína marena ñaitimaci. ¹⁰ Janore ra omoimo illamona, Jusiñamui facaina birui omoi raise maijia, ail-luena ra omoimo itedena, Jusiñamui facaina jiaí raise maijiitomoí. Janore ra omoimo illamona, maraiñede rafuena birui omoi finoia, ailluena ra omoimo itedena, maraiñede rafue nia jiaí finoitomoí. ¹¹ Omoimo birui ite ra diga Jusiñamui facaina omoi raise maijiñenia, naimiemona jiaie rana feiñoñeitomoí. ¹² Omoi anamo ite ra diga Jusiñamui facaina omoi raise maijiñenia, Jusiñamui ie rafue omoimo itatañeite. ¹³ Mena patrones diga daruido buna jaca maijinide. Mena diga bu maijiacania, damiena jiaimie baifemo gaité. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiái ollemo começina omoi eo facaia, Jusiñamui jitaillacinomo começina raise facañeitomoí.

Jesúdi fariseuai comini diga dane ñaia rafue

¹⁴ Jesús llofuiana fariseuai comini cacajano, ucubena eo gaia jira, naimie uaina jamaidimaci. ¹⁵ Naimacimo Jesús llote:

—Omoí finoca rafuemonona comini omoína: “Mare” raillana jitaídomoí; iadedi Jusiñamui omoí comeciáí maraiñenana uiñote. Iese omoí illana Jusiñamui gaiñede. ¹⁶ Jusiñamui facaina lloraini micoriai cuedafuaimona Jusiñamui rafuena cacacabidomoí. Moisés micorí cuedafuaimona iena jiaí cacacabidomoí. Juan Bautista micorimona naimie anamo omoí illana Jusiñamui jitaillana cacadomoí. Jusiñamui díbeimo omoí comeciáí iuaina meiduana cacadomoí. Iena jiaí llocabiticue. Iena ailluena ñnuamona, Jusiñamui díbeimo birui duere iacadimaci. ¹⁷ Mona enirue diga nia ia, nana Jusiñamui llogacinuai suicana jaite.

Jesús iima ie aina dotaja rafuena llofuia rafue

(Mt 19.1-12; Mr 10.1-12)

¹⁸ Jesús llote:

—Naga aina dotadimiedí, jiaíñaiño ollena, jeacinona jai finode. Dotacañaiño bu oia, jeacinona jai finode.

Jesúdi ucuberedimie iaimaiaí Lázaro ie rafuena llua rafue

¹⁹ Jesús jiaie rafuena llote:

—Cue llogacinona omoí raise uiñollena, bie rafue lloiticue. Ucuberedimie ite. Eo mare iniroina jítade. Eo caimare raise guicabite. ²⁰ Naimie nasemo Lázaro raillamie jamai biide. Naimiedí dueredimie. Efonaitimie. ²¹ Naimiedí ucuberedimie guiga allamona guiacade; ia guiñede. Jiconiaidí naimie efociaína mecabite. ²² Ie mei naimie fiodaite. Jusiñamui cominina naimie illamona, Jusiñamui jaienisaí naimie joreño monamo Abraham micorí joreño illanomo uitimaci. Ucuberedimie jiaí fiodaite. Comini naimiēna raitimaci. ²³ Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreño aarena ciode. Naimie ecimo Lázaro micorí ie joreño jiaí ciode. ²⁴ Abraham joreño uaidote: “Cue moo Abraham, cuena duenai. Lázaronona cue dine oreta, ie onocai diga, jinuina cue fuemo llocatallesa, cue fuedo manare jaillena. Bie iraimona jai eo llogacacadicue”. ²⁵ Abraham joreñodí uai ote: “Moo, o illa dinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuideo. ²⁶ O dine jainidicai. O enefebetuemo itio. Cai enefebetuemo jiaí iticai. Caimona omoí dine bu jaiñellena, omoimona cai dine bu biñellena, iese ite”. ²⁷ Ucuberedimie micorí joreño dinena uai ote: “Cue moo jofomo Lázaronona oreta. ²⁸ Cueno cinco amataí ite. Naimacimo riire llollena, bie iraimo naimaci riñellena, naimiēna oreta”. ²⁹ Abraham joreñodí uai ote: “Naimacimo Moisés micorí cuedafuiaí ite. Jusiñamui facaina jaie lloraini micoriai cuedafuiaí jiaí ite. Iemo naimaci comeciaina facallesa”. ³⁰ Uai ote: “Iese lloño. Iemo comeciaina facañeiti-

maci; iadedi fiodaillamona jilluanona, naimaci dine bu jaia, naimiēna ñnoitimaci. Naimaci comeciáí iuai meidoitimaci”. ³¹ Abraham joreñodí uai ote: “Moisés micorí cuedafuiaí, Jusiñamui facaina jaie lloraini micoriai cuedafuiaí naimaci ñnoñenia, fiodaillamona bu jilloia, naimiēna jiaí ñnoñeitimaci” —Jesús llote.

Jesúdi jeacinona fnoñenana llofuia rafue

(Mt 18.6-7, 21-22; Mr 9.42)

17 Ie llofueoicaiganomo Jesús llote:

—Diga ramo omoí faicana uitinomo riitomoí. Omoí ramo faitimie duere sefuite. Jusiñamui omoí ramo faitimie duere finoite. ² Como creyentena jaidimie ramo bu faia, naimie cimaimo aillue nofici maianona, joraimo corobaillena naimiēna dotacadena, mare. ³ Como creyentena jaidimie ramo omoí faiñellena, abina omoí rairui. O ecimo itimie ona jeare finoia, naimiēmo iena llono. Ie comeciina meidoiacania, naimie jearede finoca rafuena feita. ⁴ Nagarui diga icaíño ona jeare naimie finoia, naga icaíño o diga naimie marena dane ñaiacania, naie rafuena feita.

Jesúdi naimiēna ñnuana llua rafue

⁵ Ie doce llofueoicaigano Jesús llote:

—Ona ñnoticai; ia caina o uaina eo ñnota.

⁶ Uai ote:

—Jusiñamuina eo janore ñnotomoidena, bene ite amenamo omoí lloia: “Benomona jai. Joraimo sico”, naie amena omoí uaina ñnote.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemonona omoí fueollena, iena lloiticue. Illimo ie mullaíma maijiamona, ie toíniaí sedajamona jofomo abido naimie ria, ie patrón naimiēmo lloñeite: “Mai nano guisaíbi”; ⁸ iadedi naimiēmo lloite: “Cueiēna guillena nano fino. Cueno eca. Ie mei gutio”. ⁹ Naie mullaíma ocuica rana finua muidona, mullaímana naimie illa jira, ie mullaímamo patródí iobillacinona fecañeite.

¹⁰ Ie isoide. Nana cue llua omoí finodomoina, daní omoí maijiadi, cue cominina omoí illa jira, cuemonona iobillacinona feiñoñeitomoí.

Jesúdi diez efonaitinona jillotaja rafue

¹¹ Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite. ¹² Nairai dine naimie riacania, diez efonaitinodí naimiēmo dafaífidimaci. Eneno oni naidaidimaci. ¹³ Naimiēna ado uaidotimaci:

—Jesús, Maestro, caina duenai. Caina ja jillota.

¹⁴ Naimacina Jesús ciuanona, naimacimo llote:

—Mai jai. Jusiñamui diga ñairainimo omoí abina acata. —Jaidimacimo, jillodimaci. ¹⁵ Ie abí jilluana ciuano, naimacimona damie Jesús dine abido bite. Jusiñamuimo iobillacinona ado fecade. ¹⁶ Naimiēmo iobillacinona jiaí fecallena, Jesús uicomo ana bitadate. Naimiedí judíñedimie. Samaritano imie. ¹⁷ Jesús llote:

—Diez digamiedomoi. Omoina jai jillotaticue.
¿Ninomo jiaínodi nueve digamie itimaci? ¹⁸ ¿Niese
Jusiñamui iobillacinona fecaacaiñedimaci? Dama
bimie fecade. Naimiedi judío imieñedimie.

¹⁹ Jesús naimiemo llote:

—A naidada. Mai jai. Cueno o ñnua jira, jai jillodio.

Jesúdi Jusiñamui ie cominina sedajana llofua rafue
(Mt 24.23-28, 36-41)

²⁰ Naie facaise fariseuai comini Jesúsomo jicanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoina
sedallena uiñoñetomoi. ²¹ Buena ciuamona raiñeito-
moi: “Jadi, Jusiñamui bene caina jai sedade”. “Jadi,
batine caina jai sedade”; iadedi omoi motomo
itinomona Jusiñamui díbeimo damierie illamona,
Jusiñamui omoi motomo jai illana uiñoitomoi.

²² Ie llofueoicaiganomo llote:

—Jiairuido duere sefuillamona cue diga janore jisa
iacanitomoi; iadedi iese nia iñeitomoi. ²³ Damierie raia:
“Ero, batine Cristo jai bairede” nainomo jaiñeno.
Naimaci raia: “Ero, bene Cristo jai bairede” iena
ñnoñeno. ²⁴ Mona borillamona mona jillacidi usere
ciode. Ie isoide. Cue abido bia, nana comini iena
uiñoitimaci. ²⁵ Birui iese nia suiñeite. Nano duere se-
fuiticue. Birui ite comini cuena jiai feiñoñeitimaci.

²⁶ Abido cue billirui iairei ia, Noé micori facaiseconi
itino isoi, comini iitimaci. Naimaci duere sefuillemo
Noé micori facaise itinodi comeciaina facañedimaci.

²⁷ Naie facaiseconi nia eo noci deiñenia, Noé micori
ecimo itino naimaci isoilla isoi icana jaidimaci. Jamai
guicana jaidimaci. Aina ua mei, inina ua mei, jebuicana
jaca jamai jaidimaci. Dani iemo comeciaina facauidi-
maci. Jusiñamuimo comeciaina facañedimaci. Iese iti-
maci, Noé micori ie balsamo fo jailla dinori. Nia noci
deiñenia, Noé micori lloga uaina ñnoñedimaci. Noci
deilla mei, ebena nana faifidimaci. Cue abido bia, ie
isoite. Ebena biiticue. ²⁸ Lot micori facaiseconi daje
isoidimaci. Jamai guicana jaidimaci. Aina ua mei, inina
ua mei, jebuicana jaca jamai jaidimaci. Rana ñbauidi-
maci. Iena fecauidimaci. Illimo maijuidimaci. Jofona fi-
noidimaci. Naimaci isoilla isoi icana jaidimaci. ²⁹ Dani
iemo comeciaina facadimaci. Jusiñamuimo comeciaina
facañedimaci. Iese icana jaidimaci, Sodomamona Lot
micori jailla dinori. Nairui monamona boode azufre
ebena billanona, nana Sodomamo itino jobaide. Ebena
nana faifidimaci. ³⁰ Ie isoide. Abido cue billiruimo
comini iitimaci. Cue bia, ebena biiticue. ³¹ Naie facaise
bu ie jofo emodomo ia, ie raruiaina ollena, naimie diga
uillena, bu fo jaiñena. Illimo bu ia, ie raruiaina ollena,
ie jofomo bu jaiñena. ³² Iemona fueollena, Lot ai micori
rafuemo comeciaina faca. Naiñaiño ie raruiaimo daño
comeciaina facajamona, na ie abi diga faifide. ³³ Dama ie
raruiaimo ie comeciaina bu facaia, ja muidomo faifite.
Cue diga jaca iñeite; iadedi cue jitaillacinona finuamo
ie comeciaina bu facaia, monamo cue diga jaca iite.

³⁴ Cue bille facaise menamie daje cuartomo iniano iitii-

aimaia. Damie jaite. Jiaimie fiebite. ³⁵ Mena riño
danomo doberillanona iitiiañua. Dañaiño jaite.
Jiañaiño fiebite. ³⁶ Menamie illimo maijiano iitiiaimaia.
Damie jaite. Jiaimie fiebite.

³⁷ Ie llofueoicaigano jicanotimaci:

—¿Nine jaitimaci?

Uai ote:

—Urujaisai rifaide ramo ofillana uiñua isoi, nana cua-
na ñnotino cue abido billena uiñoitimaci. Cuemo duil-
lamona, cue diga jaitimaci.

Jesúdi feciñona llua rafue

18 Ie llofueoicaiganomo Jesús rafuena dane llote:
—Jusiñamuimo jicabi, omoi jicaca rafue omoi
feiñolle dinori. Raire feiñoñenia, abina jafueñeno.
² Iena omoi raise uiñollena, bie rafuena lloiticue. Jiaie
nairaimo juez ite. Jusiñamuina jaciruiñede. Cominina
jiai jaciruiñede. ³ Nainomo naimie dine daje feciño jai-
jaicabillanona, raite: “Cueno duere finodimemona
cueno cano”. ⁴ Naimie dinena raite: “Dama iesede. Ona
canoñeticue”. Ie mei ie comeciaina facade: “Jusiña-
muina jaciruiñedicue. Cominina jiai isiruiñedicue; ⁵ ia
naiñaiño cuemo sefuire bi-bina jira, naiñaiño
canoiticue, cue rairaiñellena”.

⁶ Jesús llote:

—Maraiñede juez lluaana cacadomoi. Ja muidomo
naiñaiño canode. ⁷ Ero, biemo omoi comeciaina fa-
ca. Jusiñamui naie juez isoñede. Nagarui Jusiñamuimo
naimaci jicaia, ¿niese naimie ie fetocanona canoñeite?
Jaca canoite. ⁸ Raire fairuanona, naimacina raire
canoite; iadedi abido cue bia, ¿niga cuena ñnotino iiti-
maci? Nibai ailluena cuena ñnoñeitimaci.

Jesúdi Jusiñamuimo menamie jia llua rafue

⁹ “Mareuidicai” dajerie railla jira, “Jiaie comini
baifemo faiticai” dajerie railla jira naimacimo Jesús bie
rafuena llote:

¹⁰ —Jusiñamui jofomo, nainomo jillena, menamie
jaidiaimaia. Damie fariseo imie. Jiaimie gobierno
ucubena oraíma. ¹¹ Fariseo imie naidadacaida, dama
anado jide: “Jusiñamui, jiaie comini isoñedicue. Fidi-
maci. Maraiñedimaci. Naimaci aiñede riño diga itimaci.
Cue ecimo ite ucubena oraíma isoi iñedicue. ¹² Naga
semana menarui guicabiñedicue, ona raise cue seda-
janona. Cue ramona omo fecacabidicue. Macaibaite”
jide. ¹³ Gobierno ucubena oraíma eneno naidadacai-
da, jide. Monamo eruaiñede; iadedi jamai bue isoil-
lanona, jogobena farode. Raite: “Jusiñamui, jeacinona
finoraimaducue. Cueno duenai. Macaibaite” jide.
¹⁴ Jusiñamuidi jiaimie afemo iacadimena jiaimie afemo
iñenana itataite. Jusiñamuidi jiaimie afemo ia-
cañedimena jiaimie afemo itataite. Ie jira gobierno
ucubena oraíma ie jofomo Jusiñamuimona jai marebi-
caillanona jaide; ia fariseo imie iese jaiñede.

Jesúdi naimie dine uruiái billana jitailla rafue

(Mt 19.13-15; Mr 10.13-16)

¹⁵ Naie facaise Jesús dine comini naimaci eisaiaia atisite. Ie onolli naimacimo naimie joniana jitaidimaci. “Naimacina raise cano” ie Moomo lollena jitaidimaci. Iena ciuanona, ie llofueoicaigano cominina Jesús dine billana rairuidimaci; ¹⁶ iadedi Jesúdi eisaiaia uaiduano raite:

—Uruiai cue dine billesa. Naimacina rairuiño. Cuen bie isoi inotinodi Jusiñamui cominidimaci. ¹⁷ Bie uruiái abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

Ucuberedimie Jesús diga ñaia rafue

(Mt 19.16-30; Mr 10.17-31)

¹⁸ Ie facaise illacomimona damie Jesúsno jicánote:

—Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

¹⁹ Jesús uai ote:

—¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano. ²⁰ Moisés micori llogacinuaina ino-cana jai. Jaie cuete: “O aiñede riño diga iño. Comena meineño. Rana fiiño. Jaimiena o llogidoia, tainona lloño. O moo uaina ino. O ei uaina ino”.

²¹ Uai ote:

—Cue uruena illa facaisemona nana bie llogacinuaina inoiticue.

²² Iena cacajano, Jesús raite:

—Daje rana nia finoñedio. O raise marebicaia cania, omo ite raruaiaina feca. Naie ucubena dueredinomo feca. Cuena o inuamona, monamo ico jaca iitio. Cue llofueoicaiganona o illena, mai cue diga bi.

²³ Jesús llua naimie cacajano, sunaicaide. Naimiemo eo ailluena ra illa jira, iena fecaaiñede. ²⁴ Naimiemo eruaillano, Jesús raite:

—Ucuberedinodi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiaí raise jainide.

²⁶ Jesús llua cacadino jicánote:

—¿Iemona buca jillobiti?

²⁷ Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro raite:

—Ero, o llua isoi cai jofuena fainonocaida, o diga jaisoidicai.

²⁹ Uai ote:

—Uanaicinona lloticue: Jusiñamui cominina naimie jaillamona, ie jofona bu fainonocaia, ie aina bu fainonocaia, ie amatiaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ³⁰ Jusiñamuiimona ailluena ibana birui feiñoite. Monamo ico jiaí jaca ite.

Jesúdi ie fiodaillena dane llua rafue

(Mt 20.17-19; Mr 10.32-34)

³¹ Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, imana jaidicue. Jusiñamui facaina lloraini cuena jaie cuetimaci. Nana naie rafue ja suite. ³² Judíuaiñedinomo judíuai illacomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci.

³³ Cuena faitimaci. Cuena meineitimaci; ia darui amani illanona, cue fiodaillamona jilloiticue.

³⁴ Naimie llua naimie raise cacaiñedimaci. Naimacina iena Jesús nia raise llofueña jira, iena raise uiñoñedimaci.

Jesúdi uisidimiena jillotaja rafue

(Mt 20.29-34; Mr 10.46-52)

³⁵ Jericó railla nairaimo ie llofueoicaigano diga Jesús riacademo, uisidimie naiso fuemo raillana ciode.

Ucubena jamai jica-jicade. ³⁶ Ailluena comini Jesús diga jaillana naimie cacajano, naie cominimo nie isoide rafue illana jicánote. ³⁷ Uai otimaci:

—Nazaret ie Jesús como bene bite.

³⁸ Ie jira naimie cuirioide:

—David micori Jitona o illamona, cuena duenai. Cuen na cano.

³⁹ Uicodo jaidino naimiena lletade, naimiena llicaitalena; iadedi naimie eo cuirioide:

—David micori Jitona o illamona, cuena duenai.

⁴⁰ Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicánote:

⁴¹ —¿Niese ona cue nibaiana jitaideo?

Uai ote:

—Maestro, cioacadice.

⁴² Jesús raite:

—Mai eroda. Cuena o inua jira, jai jillodio.

⁴³ Ieconí naimie uisidi ciode. Jusiñamuiimo iobilacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuiimo iobillacinona jiaí fecadimaci.

Jesús Zaqueo diga illa rafue

19 ² Jericómo Jesús rillanona, nainomo macaritemo, naie facaise nainomo Zaqueo raillamie ite. Gobierno ucubena nanoca oraima. Naimiedi eo ucuberede. ³ Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide. ⁴ Ie jira uicodo aisicana jaide, amenamo a jaillena, naimiena cioillena. ⁵ Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofu dine jaiticue.

⁶ Ie jira raire ana bite. Ie jofomo Jesúsna iocire feiñoite.

⁷ Iena jiaie comini ciuanona, Jesús joreña jeare ñaianona raitimaci:

—Mariñediciona finoraima jofomo naimie jaide.

⁸Jesúna naimie feiñua mei, Zaqueo Jesús ecimo naidaíta, naimiemo llote:

—Nama, atuedo cue raruiaina dueredinomo biruimona fecaiticue. Bumona navui cue fñia, cuatro diga ra abido iiticue.

⁹Jesús uai ote:

—Iese o llua jira, o comini diga Jusiñamuina jai o ñnuana uiñoticaí. —Jamai bitinomo llote:

—Zaqueodi Abraham micori jito; ia Jusiñamuina navui ñnoñede. ¹⁰Naimie isoidino jillobitallena, biticue. Monamona billanona, ñmana jaie jaidicue. Jusiñamuina ñnoñedinona jenuaibidicue, naimacina jillobitallena.

Illaima ie mullaiaimo ucubena fecaja rafue

¹¹Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”. ¹²Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dine jiaie nairaimo jaide. Ie cominina sedallena, nanoca illaimamona ie uaina feiñoiacade. Iemei abido biacade. ¹³Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. ¹⁴Ie comini naimiema enoidimaci. Jiañona nanoca illaima dine oretajano, raitimaci: “Bimie caina sedajana jitañedicaí”; ia nanoca illaima dinena naimaci lluaña jaca cacaiñede. Ie jira naie nanoca illaima naie illaima jito ie uaina ite. ¹⁵Ie uaina feiñua mei, abido ie eniruemo jaide. Rilla mei, ie mullaiaina uaidote. Nie diese ucubena ocana naimaci jaillana uiñoiacade. Ie jira naimacina uaidote. ¹⁶Nano bitimie raite: “Nama, o cuemo dabe fecadio. Dabedemona jai cuemo ite diez digabe”. ¹⁷Naie illaima naimiemo llote: “Eo marena mañjido. Mare mullaímadio. Janore ra raise o sedaja jira, ona diez nairaiaina sedataiticue”. ¹⁸Ie mei jiaie mullaíma billanona, raite: “Nama, o cuemo fecaca dabedemona jai cuemo ite cinco digabe”. ¹⁹Illaima llote: “Ona cinco nairaiaina sedataiticue”. ²⁰Ie mei jiaie mullaíma bite. Raite: “Nama, jadi, o cuemo iga o ucube. Iniroimo tñlliano, iena eenoticue. ²¹Ona cue jaciruillano, odi eo riimienana jira, iena jamai eenoticue. Jiaie cominimona ie rana baírocabidio. O mañjñena ramona ocabitio”. ²²Illaima dinena raite: “Eo marañede mullaímadio. Cuena o llua isoi, ona duere finoiticue. Cue riimienana uiñotio. Jiaie comini ie rana cue baíruana uiñotio. Cue mañjñena motomo ra cue uana uiñotio; ia buena mañjñedio. ²³¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baífemo feiñotitcue”. ²⁴Nainomo itinomo llote: “Naie ucube naimiemona baíruano, diez digabe itimiemo feca”. ²⁵Uai otimaci: “Naimiemo ailluena ucube jai ite. ¿Bue ñellena dane jiaie fecaitio?” ²⁶Illaima dinena uai ote: “Ailluena raredimie jiaie rana feiñoite; iadedi janore raredimie ie rana faífite. ²⁷Cuena enoidinona bene ati.

Naimacina cue sedajana jitañedimaci. Naimacina meine”.

Jesús nia llote:

—Ie isoide. Iese omoimo suiñellana, Jusiñamui ie comini sedalliruina omoi uiñoñena jira, cue jitaillacino finocana jai.

Jesús Jerusalémo jailla rafue

(Mt 21.1-11; Mr 11.1-11; Jn 12.12-19)

²⁸Naie rafuena llofuia mei, Jerusalén dine comini uicodo ie llofueoicaigano diga Jesús jaide. ²⁹Jerusalén iaieicaidemo, mena nairaimo riacade. Betfagémo raila nairaimo ride. Betania nainomo jiaí ite. Olivos railla anedumo naga nairai iaímaiaí ite. Ie llofueoicaiganomona mena orede. ³⁰Raite:

—Bie nairai illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati. ³¹Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

³²Naimie llua isoi jaidiaímaiaí. Naimie llua isoi burritona baitiaímaiaí. ³³Ie facaise ie naniaí iaímaiaímo jicanote:

—¿Bue ñellena caí burritona suiñodomico?

³⁴Uai otiaímaiaí:

—Coco Nama iena jitaide.

³⁵Ie mei Jesúmo iena atidiaímaiaí. Burrito emodomo iniroina jobianona, ie emodomo Jesúsdi rainadate.

³⁶Jesús iese jaidemo, naimiema iobitallena, illaima isoi naimie jaillena, comini imaci iniroi diga, naiso motomo jobedimaci. ³⁷Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caímare itimaci. Nana Jesús siño finoca rafuena naimaci jai cúa jira, iena naimaci uibiñuamona, Jusiñamuimo iobillacinona ado eo fecadimaci. ³⁸Raitimaci:

—¡Caí Illaima billa! ¡Jusiñamui mamecido bitimiemo caí iobicabillas! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillas!

³⁹Naie cominimona dajerie fariseuai raitimaci:

—Maestro, o diga jaidinona llícaillena, naimacina lleta.

⁴⁰Uai ote:

—Naimaci llícaia, biso fuemo ite noñicidi cuena marena ñaite.

⁴¹Jerusalémo Jesús iaírei ria, iena ciuano, eede.

⁴²Raite:

—Jerusalén itino, Jusiñamui diga omoi uri illena jai biticue. Omoina naimie cominina itataiacadícue; iadedi iena jitañedomoi. Iena jitaídomoidena, ico duere sefuiñeitomoi. ⁴³Jiaíruído omoi bacauai jobaimena finuanona, omoina cirinoitimaci. Omoi ecido llaitimaci.

⁴⁴Omoina meineitimaci. Omoi uruiaina meineitimaci. Omoi illanona judaíitimaci. Jusiñamui omoi motomo birui illana omoi uiñoñena jira, iese omoimo suite.

Jesúdi Jusiñamui jofomona damieriena dotaja rafue
(Mt 21.12-17; Mr 11.15-19; Jn 2.13-22)

⁴⁵Jerusalémo Jesús rilla mei, Jusiñamui jofomo jaide. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaia digá, damierie fecauidimaci. Iena ciuanona, naimacina jino orede. ⁴⁶Raite:

—Ie facaina lloraima micori Jusiñamui llogacino jaie cuela: “Cue jofo ite nainomo cuemo comini jillena” cuela. Ero, ailluena omoi ibataja jira, naimie jofona firiruidino jofona omoi finoca.

⁴⁷Jusiñamui jofomo nagarui Jesús llofuete. Judíuai illaicomini Jesúsna meineiacadimaci; ⁴⁸iadedi niese nibañedimaci, nana comini naimie llofuiana eo jitailla jira.

Jesúdi ie siño uaina llua rafue

(Mt 21.23-27; Mr 11.27-33)

20 Jusiñamui jofomo Jesúdi cominina llofuete. Jusiñamui rafuena llofuete. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamací. Diese billanona, ²jicanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

³Jesús dinena uai ote:

—Omoimo nano jicanoitícue. ⁴Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

⁵Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina ñoñedomoi? ¿Bue ñellena naimie micori llua isoi bautizañedomoi?” ⁶“Comini” cai fairioia, bene itino caina meineitimaci, Juan micoridi Jusiñamui facaina lloraima naimaci railla jira.

⁷Ie jira Jesús uai otimaci:

—Uiñoñedicaí.

⁸Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi marañede majiraini rafuena llua rafue

(Mt 21.33-44; Mr 12.1-11)

⁹Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaimono fecade, iena sedallena. Ie mei jiaie eniruemo are illena jaide. ¹⁰Uvas jai einailla facaise riaraiaina sedaraini dine daje mullaimana orede, naimie facaise iedinona naimie feiñollena; iadedi naie sedaraini naie mullaimana fatimaci. Uvas naimiemo fecaño abido oredimaci. ¹¹Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecaño abido oredimaci. ¹²Naie patrón jiaimiena orede. Naimiena eo bofedaitajanona jino dotadimaci.

¹³Iemei patrón comequina facade: “¿Niese nibaitícue? Cue isiruiga jitona oretaitícue. Naimiena nibai jaciruitimaci. Naimie uaina ñnoitimaci”. ¹⁴Riaraiaina sedaraini naimiena ciuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci. ¹⁵Naimiena jino dotajanona, naimiena meinetimaci. Iena fidia mei, ¿ñiese naie patrón nibaiite? ¹⁶Naimie biite, naie sedarainina meinellena. Ie mei jiaimiena ie illina sedataite.

Naie rafuena cacadino raitimaci:

—Bie isoide rafue suillana jitañedicaí.

¹⁷Naimacimo Jesús eruailano, llote:

—Naie illi sedaraini isoidomoi. Jusiñamui facaina lloraima micori omoina jaie cuete. Ie cuegafuena raise facañedomoi. Naimie micori cuela:

Jofo finoraini jitañena nofici nana naie jofomo ite nofici baifemo jai uaide.

Jusiñamui cominina damierie jaillana naimie micori cuete. Jusiñamui oretagamiena damierie jitañenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidícue. Cue rafuena omoi jitañena jira, naimie cominina jaiñeitomoi.

¹⁸Naie noficina nia ñaitícue. Noficimo bu eicaitaia, bofedaite; ia naie nofici bumo ana uaia, naimiena saitaite. Ie isoide. Cue llua omoi jamaia, duere sefuitomoi. Iena omoi ñnoñenia, ja muidomo faifitomoi —llote.

Jesúmo gobiernomo ucubena fecajana jicanua rafue

(Mt 21.45-46; 22.14-22; Mr 12.12-17)

¹⁹Jesús como lloga rafuedo naimacina ñaiana uiñotimaci. Ie jira naie facaiseconi judíuai illaicomini naimiena gaitaacadimaci; iadedi cominina jaciruitimaci. ²⁰Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadormo naimiena llogidoiacadimaci. ²¹Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. ²²Omo rafuena jicanoiacadicaí. Dama Jusiñamuina sedadicaí; iadedi romanos railla ñairai anamo birui cai illa jira, ¿naimiaci illaia Césarmo ucubena cai fecajana rairuidio? Caimo llono —lloitimaci.

²³Naimiena naimaci jifuiana uiñuanona, Jesús dinena uai ote:

²⁴—Ucube cuemo acata. ¿Bu ie joreño nainomo ite? ¿Bumo jainaiaide bie cuela radi?

Uai otimaci:

—César.

²⁵Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

²⁶ Jesúdi uai raise ua jira naimie llumona jeare rafuena uiñoñedimaci, naimiena llogidollena. Naimie lluari rajicaillamona, llícaidimaci.

Jesús dine saduceuai railla comini billa rafue

(Mt 22.23-33; Mr 12.18-27)

²⁷ Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci. ²⁸ Jesúmo llotimaci:

—Maestro, cai facaina Moisés micori jaie cuega: “Iima fiodailla meinocni, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁹ Bie rafuena uiñoiacadicaí. Siete amataí ite. Nano doforamie ie aina ote. Naimie nia uruiainide fiodailla. ³⁰ Ie emodo imie ie ama feciño ona ote. Naimie uruiainide jiaí fiodailla. Naie siete digamiedemona iese sefuide. ³² Ja muidomo naie riño jiaí fiodaite. ³³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

³⁴ Jesús uai ote:

—Birui aina otomoi. Inina otomoi; ³⁵ iadedi fiodaillamona, Jusiñamui diga jaca itino jillua mei, ainitimaci. Ininitimaci; ³⁶ ia Jusiñamui jaenisai isoi illanona, dane fiodaíñeitimaci. ³⁷ Fiodaitino jilluana omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ³⁸ Jai fiodaítimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiaí jillotaite. Naimiemo naimaci duillamona, naimaci abiaí diga jilluanona, naimie diga jaca itimaci —llote.

³⁹ Iena cacajano, Moisés micori llogacinuaina llofuerainimona dajerie raite:

—Maestro, raise llotio.

⁴⁰ Ie facaise naimiemo nie isoide rafuena dane jicanuana jaciruitimaci.

Jesús dinena fariseuai cominimo jicanua rafue

(Mt 22.41-46; Mr 12.35-37)

⁴¹ Iemei naimie ecimo itinomo Jesús jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci? ⁴² Salmos railla cuegafuiaimo David micori jaie cuega:

Jusiñamuidi cue Namamo llote: “Illaímana o illamona, cue nabeimo ana rai.

⁴³ Ona ñinoñedino o anamo itataiticue”.

⁴⁴ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiaí ie Nama.

Jesúdi judíuai illaicominina ñaia rafue

(Mt 23.1-36; Mr 12.38-40; Lc 11.37-54)

⁴⁵ Nana comini cacajano, ie llofueganomo Jesús llote:

⁴⁶ —Moisés micori llogacinuaina llofuerainimona abina rairui. Illaicominina naimaci itimaciden, naimacina comini cioillena, eo mare iniroina jitaacacabidimaci. Nime naimaci macaria, naimaci jamai bue isoíñedimona itimaciden, comini naimacina uaiduana gaidimaci. Comini naimaciri acarillena, ofiracomo uicomo raíacadimaci. Rafue ia, naimaci jamai bue isoíñedimona comequina facajanona, rafue nama ecimo raíacadimaci.

⁴⁷ Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Mr 12.41-44)

²¹ Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. ² Eo duerede feciño menaruñu joniana jiaí ciode. ³ Ie llofueoicaiganomo Jesús llote:

—Bie eo duerede feciño nana ucuberedino jonía baifemo jonete. ⁴ Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoimo ite ucubena jai jonete. Janore jonete; ia Jusiñamuimona naiñaiñodi jiaíno baifemo jonete.

Jesúdi Jerusalémo ite Jusiñamui jofo judaiana llua rafue

(Mt 24.1-28; Mr 13.1-23)

⁵ Naie facaise Jesús llofueoicaiganomona dajerie Jusiñamui jofona eruailanona, raite:

—Mare nofici diga finoca. Eo mare ra nainomo jiaí ite.

⁶ Jesús llote:

—Birui bie rana ciodomoi; iadedi ico jiaíruido nana bie jofomo ite noficiái oni judaisite.

⁷ Jicanotimaci:

—Jusiñamui jofo judaisillana omo jicanoicadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸ Uai ote:

—Omoína bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairedi” raitimaci. Naimaci díbeimo iñeno. ⁹ Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue. ¹⁰ Daje nairai jiaie nairai diga jobairite. Daje gobierno jiaie gobierno diga jobairite. ¹¹ Eo aillena ñuisañuai suite. Diga illanomo cominidi aime guitimaci. Duicuai eo iite. Monamo comini diga jacirede rana cioitimaci. ¹² Bie isoide rafue nia suiñenia, cuena ñinoñedino omoína llogidoitimaci. Omoína gaitatajanona, omoína duere finoitimaci. Naimaci ofiracomo omoína uitimaci. Cárcelmo omoína jonetimaci. Cuemo omoi duilla jira, omoi duere sefuillena, illaicomini dine omoína uitimaci. ¹³ Naie facaiseconi cue rafuena

naimacimo lloito moi. ¹⁴ Omoi abina omoi riidoia, omoi lluana uicodo jarire iñeno. ¹⁵ Omoi raise lollena, omoi na canoiticue. Uiñoracina omoi mo iiticue. Iemona omoi dibeimo iñedino o uaina uaitanitimaci. ¹⁶ Cuen a ñnotomoi; ia ailluena cuena ñnoñeitimaci. Cuemo omoi duilla jira, omoi na enoitimaci. Iemona dajerie mootiai, dajerie eitiai, dajerie amatiai, dajerie nabaiñiai omoi na llogidoitimaci. Omoi mona dajeriena meineitimaci. ¹⁷ Cue cominina omoi illamona, nana nairai omoi na enoitimaci; iadedi cuena fainono-caiñedimie ja mudomo monamo jaca iite. Naimiena jillotaiticue. ¹⁸ Omoi ille dinori Jusiñamui omoi na raise sedaite. ¹⁹ Duere omoi sefua, cuena fainonocaiñeno jai. Ja mudomo monamo jaca iitomoi. ²⁰ Jerusalén fue do ruicabene icaifona soldaduai ia, ie judaille facaiseconi iairei iite. ²¹ Naiemona omoi jillobillena, duere omoi sefuiñellena, Judeamo omoi illamona, aneduai dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiñeno. ²² Ie facaina lloraini micoriai cuegafuai suillanona, naie facaiseconi naimiena ñnoñedinomona Jusiñamui ibana oite. ²³ Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. Naie facaise comini duere sefuitimaci. Llegi caicitimaci. ²⁴ Lloebi diga meinecana uitimaci. Jiaie nairai dine naimacina jaiadoitimaci. Judúaiñedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt 24.29-35, 42-44; Mr 13.24-37)

²⁵ Jesús nia llofueite:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monaillai eo baguamona, comini comeci ai eo jarire iitimaci. ²⁶ Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fioidaitimaci isoi iitimaci. ²⁷ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁸ Bie isoide rafue sua, omoi na cue jilloitajabillirui iairei illa jira, cue billirui mo raise ocuiri.

²⁹ Iena omoi raise uiñollena, bie rafuena omoi mo lloiticue. Higuera railla riaramo omoi comeciaina faca. Nana amenamo comeciaina faca. ³⁰ Bie eniruemona amena firuillamona, fiemona raire illana uiñotomoi.

³¹ Ie isoide. Bie rafue ico sua, Jusiñamui ie cominina raire sedajana uiñoitomoi. ³² Unaicinona omoi mo lloiticue. Nana bie rafue suille facaiseconi bie nairai nia iite. ³³ Mona fuite. Enirue jiai fuite; iadedi cue lloga uai jaca suite. ³⁴ Jifailacinona omoi ebirui raillano, omoi ecimo ite rana ebirui raillano, abina rairuicana jai. Cuen a ñnoñedinona duere finollena, ebena abido biiticue.

³⁵ Cue bia, illaimana cue illamona, nana cominimo juez isoi lloiticue. ³⁶ Ie jira nagarui abi rairuicana jai. Naie duere sefuille facaise omoi jilloillena, Jusiñamuimo jii. Ja mudomo monamo cue diga jaca iitomoi —llote.

³⁷ Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide.

³⁸ Nagarui jitaramo naimiena cacareillena, Jusiñamui jofomo comini bisoidimaci.

Judúai illaicomini Jesúsna gaitallena siadua rafue

(Mt 26.1-5, 14-16; Mr 14.1-2, 10-11; Jn 11.45-53)

22 Naie facaise pascua railla rafue iairei ite. Naie facaise llomenico guille rafue jiai ite. Naie rafue ia, siritate rana jaca guiñedimaci. Egiptomona naimaci jaiagai jillobillana comecillena, naie rafue ite. ² Judúai illaicomini Jesúsna meineiacadimaci; iadedi cominina jaciruillanona, naimiena nia meineñedimaci.

³ Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie.

⁴ Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúsna gaitatallena, naimaci diga ñaiaide. ⁵ Iobillanona, naimiemo ucubena feaacadimaci. ⁶ Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

Jesúdi ie fioidaille rafuena llua rafue

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Llomenico guille rafue illanona, judúai comini toica llauda fauillarui ride. ⁸ Jesúdi Pedro iaiaiaia Juan diga oretajano, raite:

—Cai rafue guille uicodo finollesa omico jai.

⁹ Naimiemo jicanotiaiaiaia:

—¿Ninomo naiena coco finuana jitaideo?

¹⁰ Uai ote:

—Ero, Jerusalémo omico ria, nogodo jinuina uitimienaciotomico. Naimie jailla jofomo naimiena raca.

¹¹ Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono. ¹² Ie mei omicomo afebebamo ite aillue cuartona acataite. Na raruiaia diga ite. Nainomo cai guille fino.

¹³ Jaidiaiaiaia. Naimie llua isoi baitiaiaiaia. Pascua rafue guille finodiaiaiaia.

¹⁴ Guille facaiseconi ia, Jesús ie llofueoicaigano diga nainomo guisaide. ¹⁵ Mesamo guitimacimo, ie llofueoicaiganomo llote:

—Nia cue fioidañena, omoi diga bie rafue guillena eo jitaideo. ¹⁶ Ie cominina cue Moo ico sedalle facaise ia, nana bie rafue fuite.

¹⁷ Jiroracomoi jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omoi jiro. ¹⁸ Omoi na bene dane iese caimare nabaiñeiticue. Cue Moo sedajanomo omoi diga ico cue ia, nainomo omoi na dane iese caimare marena nabaiticue. —Iena jirodimaci.

¹⁹ Llomeniconona llinuanona, Jusiñamuimo iobilacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioidaiticue. Cue abimo omoi comeciina facajano, iena guiño.

²⁰ Naimaci guilla fuilla mei, jiroracomo vino diga dane oruitajanona, naimacina jiroate. Raite:
—Cue fiodaillamona, dama cue diaillamona, jeacino anamona jilloitomo. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

²¹ Jesús llote:

—Ero, cuena gaitataitimie cai diga guite. ²² Monamona billanona imana jaidicue. Jusiñamui jitailla isoi jai jaiocaidicue; iadedi Jusiñamuimona cuena gaitataitimie eo duere sefuite.

²³ Iemei: “¿Nimie Jesúsna gaitatalle?” dan coniniri siadoside.

Naimaci moto imiena bu ille rafue

²⁴ Ie facaise coniniri siaduana raitimaci:

—¿Cai moto imiena bu ille?

²⁵ Iena cacajanona, Jesús raite:

—Naimaci jitailla ra finollena, judúuaiñedino illamaiaidi naimaci anamo itinona ocuicabide. “Cai anamo itinona canocabidica” raitimaci; ²⁶ iadedi omoimo iese iñede. Omoi moto itimie omoi moto imieñedimiena jailla. Omoimona bu imiena iacania, omoi mullaimana naimie jaicabillasa. Omoimona bu imiena iacania, omoimona naimie canocana jaicabillasa. ²⁷ Ero, jiaie rafuedo iena lloiticue. Naimiena ecallena, naimiena canollena, patrón anamo ie mullaiait imaci. Naimaci baifemo patrón illamona, naimacina canollena, ie mullaiait facaina maijñede. Cue anamo itomoi; ia omoimona canollena, omoi mullaima isoi iticue. ²⁸ Birui duere cue sefuidicue, cuena fainonocaiñedomoi. ²⁹ Cue Moo cuena illaimana jai itatate. Omoimona fetodicue, ³⁰ jiairuido cue illaima illa facaiseconi cue ecimo omoi caimare marena iocire illena. Nainomo omoi judúuai doce nairaiaina sedaitomoi.

Jesúdi Pedro naimiena januana llua rafue

(Mt 26.31-35; Mr 14.27-31; Jn 13.36-38)

³¹ Jesús llote:

—Simón Pedro, ero, Taifedi Jusiñamuimo ona jicante, o ramo faillena; ³² iadedi ori jai jidicue, cuena nia ñnocana o jaillena. Ico cuena raise o ñnoñena mei, cue díbeimo o comeci iuai dane o meidoia, iemona jiaie creyentiait comeciaina ocuiñotaitio.

³³ Pedro uai ote:

—Nama, cárcelmo o ia, nainomo jiait iiticue. O fiodia, jiait fiodaiticue. Ona fainonocaiñeiticue.

³⁴ Jesús uai ote:

—Pedro, jítiramo itava nia ñaiñenia, dacaiño amani cuena janoitio.

Jesús fiodailla facaise iairei illa rafue

³⁵ Ie llofueoicaiganomo Jesús llote:

—Omoimo ite rafuena uiñoiacadicue. Cue rafue llollena, navui omoimona oredicue. “Ucubena uiño, bolsa uiño, meidolle zapatos uiño” omoimo lloticue. Naie facaiseconi omoi, ¿bue rana jitaidomoi?

Uai otimaci:

—Cai buena jitañedica.

³⁶ Jesús raite:

—Biruimona omoi duere sefuitomoi. Ie jira abina rairuicana jai. Birui ucube omoimo ia, nine omoi jaia, iena uiño. Bolsa bumo ia, iena uiño. Abina riidollena, omoimo lloebi iñenia, janore iniroina feca, lloebi ollena. ³⁷ Cuena jaie ciegafuiait ja suite. Isaías micori cuena jaie cuela: “Maraiñede rafue finoraima isoi naimie duere sefuite”.

³⁸ Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

Jesúdi Getsemanímo Jusiñamuimo jia rafue

(Mt 26.36-46; Mr 14.32-42)

³⁹ Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide.

⁴⁰ Nainomo ria, naimacimo llote:

—Taife omoimona ramo fai raillano, iena omoi ñnoñellena, Jusiñamuimo jia —llote.

⁴¹ Naimie janorede nofici bai faia uaila dinori bai jaide. Caiñici ifodo ana raita, Jusiñamuimo jide:

⁴² —Ore Moo, o jitaia, cue duere sefuillamona cuena jillota. Cue jitailla isoi cuena finoño; iadedi o jitailla isoi cuena fino.

⁴³ Naimie comecina ocuiñotallena, ie facaiseconi monamona Jusiñamui jaienici bite. ⁴⁴ Jesús comeci jarire illamona, naimie rioci faitemo, difai diruena enruemo uaide. ⁴⁵ Jia mei, ie llofueoicaigano dine abido bite. Ocosinaillamona, jai inidimaci. ⁴⁶ Naimacimo jicante:

—¿Bue ñellena inidomoi? Mai casi. Taife ramo omoimona fai raillano, iena omoi ñnoñellena, Jusiñamuimo jia.

Jesúna gaitalle rafue

(Mt 26.47-56; Mr 14.43-50; Jn 18.2-11)

⁴⁷ Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llibanollena. Jesús dine iairei bite. ⁴⁸ Jesús raite:

—Judas, cuena llibanuanona, cuena gaitataiacadio.

⁴⁹ Ie llofueoicaigano naie rafuena jai cioidimaci. Jicantotimaci:

—Nama, ¿cait atica lloebi diga ona riidoitica?

⁵⁰ Ie facaise naimacimona damiedi Jusiñamui diga nanoca ñairaima ie mullaima ie nabei jefona jai bonote. ⁵¹ Jesús dinena raite:

—Dama ite. —Ie jefona naimie jetajamona, naimiena jillotate. ⁵² Diga illaicomini Judas diga Jesús dine bitimaci. Naimacimo Jesús llote:

—Fíriraímadicueta cuena omoi gaitajaibilla. Omoi lloebina atidomoi. Omoi butaralluna jiait atidomoi.

⁵³ Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

Pedrodi Jesúna janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade. ⁵⁵ Nairairiri motomo irai bonua mei, ana raidimaci. Pedro naimaci diga jiai raide. ⁵⁶ Nainomo ite mullaiñodi irai bouamona, Pedromo eruaillano raite:

—Bimiedi Jesús diga jaisoidimie.

⁵⁷ Pedro abi janote:

—Naimiena uiñoñedicue.

⁵⁸ Dallu illanona, jiaimie Pedrona ciuanona llote:

—Jesús ie llofueoicaigano imiedo.

Pedro dinena uai ote:

—Imieñedicue.

⁵⁹ Daje hora illanona, jiaimie raite:

—Bimie galileo imiena jira, bimiedi Jesús diga ua jaisoidimie.

⁶⁰ Pedro dinena raite:

—O lluana uiñoñedicue. —Ieconí naimie ñaitemo, itava ñaite. ⁶¹ Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Itava nia ñaiñenia, dacaiño amani cuena janoitio”. ⁶² Pedro jino jaillanona, eo sunaillamona, eo eede.

Jesúna jifanodua rafue

(Mt 26.67-68; Mr 14.65)

⁶³ Ie facaise Jesúsna gaitadino naimiena jifanododimaci. Naimiena jiai fatimaci. ⁶⁴ Ie uisina maitimaci. Lotimaci:

—Siño jitodiosa, ¿bu o faja? caimo llono.

⁶⁵ Iese jifanodocana uitimaci.

Jesúdi judíuai illaicominí dine illa rafue

(Mt 26.59-66; Mr 14.55-64; Jn 18.19-24)

⁶⁶ Monaidemo judíuai illaicominí ofidimaci. Jusiñamui diga nanoca ñairainí ofidimaci. Moisés micorí llogacino llofueraí ofidimaci. Naimaci dine naimiena gaitadino Jesúsna uitimaci. Naie illaicominí dinena raitimaci:

⁶⁷ —Ua Cristodiona, iena caimo llono.

Jesús uai ote:

—Omoimo iena cue lloia, ñnoñeitomoi. ⁶⁸ Buena omoimo cue jicanoia, cue uaina oñeitomoi. ⁶⁹ Monamona jaie billanona, imana jaidicue. Cuena omoí meiniamona, illaíma isoi Jusiñamui ecimo raire iiticue.

⁷⁰ Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

⁷¹ Iena cacajano, raitimaci:

—Naimie lluana jai cacadicaí. Jiaie cominí naimiena llogiduana jai jitaiñedicaí. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui jitoñede.

Pilato dine Jesús illa rafue

(Mt 27.1-2, 11-14; Mr 15.1-5; Jn 18.28-38)

23 Judíuai illaicominí naidacailanona, Pilato dine Jesúsna uitimaci. ² Naimiena llogidotimaci:

—Cai cominí marañedifuena llote. Gobiernomo ucubena cai fecajana rairuide. Naimie jiai raite: “Cristodicue. Illaimadicue”.

³ Pilato dinena naimiemo jicanote:

—¿Judíuai cominí illaimadio?

Uai ote:

—Jii, judíuai illaimadicue.

⁴ Jusiñamui diga nanoca ñairainí Pilato llote. Nainomo bite cominí jiai llote:

—Nicinodí naimiemo iñede.

⁵ Uai otimaci:

—Gobierno joreño cominí comeciai jeare feidocana naimie uite. Nana Judeamo uite. Galileamona tainede. Bene jai caimo ride.

Herodes dine Jesús illa rafue

⁶ Iena cacajano, naimie llogidotinomo Pilato jicanote: —¿Naimiedi Galilea imie?

⁷ —Jii —raitimaci. Galilea enirue illaíma Herodes.

Naie facaiseconí Jerusalémo naimie illa jira, naimie dine Pilatodí Jesúsna orede. ⁸ Jesúsna Herodes ciuanona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiai cioacade. ⁹ Jesúsno ie finoca rafuena are jicanote; iadedí Jesús dinena uaina oñede. ¹⁰ Ie facaiseconí judíuai illaicominí Jesúsna riire llogidotimaci. ¹¹ Herodes ie soldaduai diga naimiena eo jeare ñaitimaci. Illaíma jítaiuga iniroina jítatitimaci. Ie mei Pilato dine naimiena abido orede.

¹² Iemona nairuido Herodes Pilato diga nabairite. Jaié conimana enoidiaímaiaí.

Pilatodí Jesús fodaillana llua rafue

(Mt 27.15-26; Mr 15.6-15; Jn 18.39-19.16)

¹³ Pilatodí judíuai illaicominina, nainomo ite cominí diga, uaidote. ¹⁴ Raite:

—Bimie cue dine atidomoi. Raitomoi: “Cominí comeciai feidocana naimie uite”. Naimiemo jai jicanoticue; ia naimiemo nicinodí iñede. ¹⁵ Herodes cue dine naimiena como abido orede. “Naimiemo nicinodí iñede” jiai raite. Naimiena cue meinellena, naimie jaca nicinona finoñede. ¹⁶ Ie jira naimiena cue sechedotajanona, naimiena oni oretaiticue.

¹⁷ Naie rafue facaiseconí naga año cárcelmona damiena jino jamai oretauide. ¹⁸ Pilato lluana cacajano, nana cominí ado cuiriidimaci:

—¡Naimiena oni uiño, naimiena meinellena!
¡Barrabás cárcelmona jino oreta!

¹⁹ Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. ²⁰ Jesúsna naimie jamai oretaiacana jira, cominí diga Pilato dane ñaite; ²¹ iadedí cuiriidimaci:

—¡Naimiena coraí! ¡Naimiena meine!

²² Pilato dane jicanote:

—¿Nie isoide maraiñede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuiiriidimaci:

—¡Naimiena coraí! —Ja muidomo Pilato dinena:

—Jee —raite. ²⁴ Naimaci jitailla isoi Pilato fairiote.

Jesúna meinellena llote. ²⁵ Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt 27.32-44; Mr 15.21-32; Jn 19.17-27)

²⁶ Jesúna soldaduai oni uitemo, Simón raillamie diga dafaifidimaci. Naimiedi Cirene railla enirue imie.

Jerusalén onifemona bite. Jesús jinafona naimiena cruzna rocaoicaida sonotate. ²⁷ Ailluena comini Jesúna racadimaci. Ailluena riñoniai eo eecana jaisite. ²⁸ Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itañaiñuai, cue facaina eeñeno; iadedi omoi facaina mai omoi ee. Omoi uruiñai facaina mai omoi ee. ²⁹ Ero, jiairuido duere sefuillemona comini raitimaci: “Oiniñuai jiaie riñoniai baifemo duere sefuiñena jira, marena itimaci”. ³⁰ Jusiñamui riicaillafuemona jilloiacanamona, comini jiaí raitimaci: “Aneduai caimo jaicorillana jitaídicaí”. ³¹ Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

³² Naie iaímaiaina meinellena, mena maraiñede imana jiaí uitimaci. Gobierno llogacinona inoñediiaimaiaí. ³³ Ifocoraína eruaila illanomo naimaci ria, Jesúna coraidimaci. Naie maraiñede iaímaiaina jiaí coraidimaci. Damie Jesús nabeimo. Jiaimie Jesús jarifebeimo. ³⁴ Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanuano soldaduai facasite.

³⁵ Ailluena comini eruaidimaci. Judíuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶ Soldaduai naimiena jiaí jifanododimaci. Ie abi isirena cacaiñellena, naimiemo vino fecajanona, ³⁷ raitimaci:

—Judíuai illaimadiodena, fiodaillamona dama o abina jillota. —Naie vino Jesús jiroñede.

³⁸ Jesús ifogí afeconi rabricimo Pilato cuetatate: “Bimiedi judíuai comini illaíma”.

³⁹ Jesús diga coraica iaímaiaimona damie naimiena taigode:

—Jusiñamuimona bitiodena, nia fiodaíñenamona dama o abina jillota. Cocona jiaí jillota.

⁴⁰ Jiaimiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadio? Ja fiodaitio. Iemei Jusiñamui uicomo ja itio. ¿Niese Jusiñamui uicomo o illena jaciruiñedio? ⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesúmo llote:

—Illaimana o illa facaise cuena começi.

⁴³ Jesús uai ote:

—Uanaicino lloticue. Birui cue diga cue Moo illanomo itio.

Jesús fiodailla rafue

(Mt 27.45-56; Mr 15.33-41; Jn 19.28-30)

⁴⁴ Jitoma naidai jai itemo, daje amani horas mona jitiñicaide. ⁴⁵ Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide. ⁴⁶ Jesús ado llote:

—Ore Moo, cue joreñona feiño. —Ie mei naimie jai fiodaite.

⁴⁷ Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci. ⁴⁹ Jesús nabaiñiaí bie rafuena aarena ciodimaci. Galileamona bite riñoniaí bie rafuena aarena jiaí ciodimaci.

Jesús raiafomo jonia rafue

(Mt 27.57-61; Mr 15.42-47; Jn 19.38-42)

⁵⁰ Pilato dine José raillamie jaide, Jesús abina jicallena. Naimiedi illaicomini. Maremie. inogamie. Jesúna meiniana jitañede. Arimatea railla nairaí imie.

Judeamo naie nairaí ite. Naimiedi Jusiñamui ie cominina ico sedajanomo illemo ocuride. ⁵³ Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raíñenafomo jonete. ⁵⁴ Nairui viernes. Sábadorui rille jai iaírei illa jira, Jesús abina raiafomo raíre jonete.

⁵⁵ Galileamona navui bite riñoniaí racadimaci. Raiafona ciodimaci. Naimie abi finuana ciodimaci. ⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micorí jaie llua isoi.

Jesús fiodaillamona jillua rafue

(Mt 28.1-10; Mr 16.1-8; Jn 20.1-10)

24 Domingo jítiramo monaidemo, naie riñoniaí raiafomo jaidimaci, iñaiñuai finoca soride rana uillena. ² Raiafo íbailla nofici oni joillana ciodimaci. ³ Fo jaidemo, Jesús abina cioiñedimaci. ⁴ Uainicaidimaci. Ieconí menamie naiñaiñuai ecimo bairediaímaiaí. Iaímaiaí iniroi eo quenirede. ⁵ Iaímaiaína jacinaillamona, ifogí ana jítadacaidimaci. Naie iaímaiaí dinena jicanote:

—¿Bue ñellena fiodaitimie illanomo cagedimiena jendodomo? ⁶ Galileamo navui naimie omoimo llogacinona comeciñedomo. ⁷ Naimie raite: “Monamona billanona, imana jaidicue. Jusiñamui jitailla jira, marañede rafue finoraini anamo iiticue. Cuen coraitimaci. Darui amani illanona, fiodaillamona jil-
loiticue” raite.

⁸ Iemona ie llogacinona jai comecitimaci. ⁹ Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiai llotimaci. ¹⁰ Naie riñoniaimona María Magdalena ite. Juana ite. María ite. Naiñaiñodi Jacobo ei. ¹¹ Naie riñoniaidi iena llotimaci; iadedi ie rafuena cacadinodi iena ñnoñedimaci. —Jamaifuenai ñaitomoi —raitimaci.

¹² Iena cacajano, Pedro aisicana raiafomo jaide. Nainomo ria, ana jitadacaida, fo erodate. Useroi joillana ciode. Iemo ie comecina facajano, jofomo abido jaide.

Mena llofueoicaiganomo Jesús bairia rafue

(Mr 16.12-13)

¹³ Jesús jilluarui mena llofuega iaiaiaia Emaús railla nairaimo jaidiaiaiaia. Jerusalémona nibai once kilómetros ite. ¹⁴ Nana Jesúsomo suide rafuena ñaiano jaidiaiaiaia. ¹⁵ Iaiaiaia ñaianona, Jesús iaiaiaia diga dafañillanona, iaiaiaia diga jaide. ¹⁶ Jusiñamuidi iaiaiaia naimiena uiñotañena jira, naimiena uiñoñediaiaiaia. ¹⁷ Iaiaiaiaimo Jesús jicanote:

—¿Buena ñaitomico? —Ieconai naidadatiaiaiaia. Sunaitiaiaiaia. ¹⁸ Naie iaiaiaiaimona damiedi Cleofas. Naimie uai ote:

—¿Ñiese Jerusalémo birui suide rafuena uiñoñedio? Nibai como ridio. Nana jiai comini iena uiñotimaci.

¹⁹ Uai ote:

—¿Ñie isoide rafue suide?

Uai otiaiaiaiaia:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofue. Jusiñamuiimona naimiedi maremie. Cominimona naimie maremie; ²⁰ iadedi cai illaicomini naimiena gaitatimaci. Naimiena cruzmo coraitatimaci. ²¹ Jusiñamui naimie cai dine orecamiemo comecina facadicoco. Naimie cai illaimana illemo ocuridicoco; ia naimie jai fiodaite. Naimie fiodaillamona darui amani jai ite.

²² Cai cominimona dajerie riñoniaibirui caina jainaitadimaci. Jitiramo Jesús raiafomo jaidimaci; ²³ iadedi naimie abina cioñedimaci. Abido naimaci bia: “Jusiñamui jaienisaia ciodicaia” raitimaci. Naie jaienisaia naimacimo llote: “Naimiedi caje”. ²⁴ Iemei caimona dajerie raiafomo jaidimaci. Riñoniaia illua isoi ciodimaci. Jesús abina cioñedimaci.

²⁵ Jesús dinena uai ote:

—Abi uiñoñedomico. Nana Jusiñamui facaina lloraini micoriaia ciegafuiaiaia ñnoiacañedomico. ²⁶ Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

²⁷ Iemei Jesús iaiaiaiaia llofue. Moisés micori ciegafuiaiaia llofue. Jusiñamui facaina lloraini micoriaia ciegafuiaiaia jiai llofue. Nana Cristona ciegafuiaiaia llofue.

²⁸ Emaús dine iaie naimaci ria, Jesús nia jaiacade-
mo, ²⁹ naimiena caididiaiaiaia. Raitiaiaiaiaia:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaiaiaia diga fiebillena fo jaide. ³⁰ Nailli guitimacimo, llomenicono Jesús llinuano, Jusiñamui iobillacinona fecade. Iena tairuano, iaiaiaiaimo fecade. ³¹ Jusiñamui jitailla jira, ieconai Jesúsna uiñotiaiaiaia. Iemei iaiaiaiaimona naimiena jai cioicaifiena. ³² Daiaiaiaia ñaitiaiaiaiaia:

—Coco diga naimie ñaia, coco comeci caimare ite.

³³ Naie dacaiño Jerusalémo abido jaidiaiaiaia. Jesús llofueoicaigano naimaci nabaiñiaia diga danomo illana baitiaiaiaiaia. ³⁴ Iaiaiaiaimo llotimaci:

—Cai Nama fiodaillamona jai jillode. Simón Pedromo jai bairede.

³⁵ Ie mei naisona iaiaiaiaia jailla rafuena llotiaiaiaiaia:

—Cai guiticaimo, naimiena uiñoticoco —llotiaiaiaiaia.

Jesús ie llofueoicaiganomo bairia rafue

(Mt 28.16-20; Mr 16.14-18; Jn 20.19-23)

³⁶ “Jesúna ciodicoco” llotiaiaiaiaiaimo, ie llofueoicaigano motomo Jesús bairede. Llote:

—Jai biticue. Uri omoi i.

³⁷ Naimiena ciuamona, jainaitimaci. “Joreña ciodicaia” comeciaina facajanona, jiai jairuitimaci.

³⁸ Naimacimo Jesús jicanote:

—¿Bue ñellena jairuitomoi? ¿Bue ñellena cue bene illana ñnoñedomoi? ³⁹ Cue onollimo eruai. Cue eillimo eruai. Jesúsdicue. Cuen jeta, raise uiñollena. Cuemo llicisi ite. Cuemo illaici ite. Jamai joreño isoiñedicue.

⁴⁰ Iena llua mei, coraiafona naimaci cioillena, ie onolli ie eilli diga acatate. ⁴¹ Iobiacadimaci; iadedi nia raise ñnoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaiaia fecadimaci.

⁴³ Iena feiñuanona, rite. Iena ciodimaci. ⁴⁴ Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriaia cuena cuetimaci. Jusiñamui jitailla jira, iena jai suide.

⁴⁵ Naie facaiseconi naimacina naie ciegafuiaiaia raise uiñotade. ⁴⁶ Naimacimo llote:

—Jusiñamui facaina lloraini micoriaia cuena jai cuetimaci: “Cristo duere sefuite. Fiodaillamona darui amani illanona, jilloite. ⁴⁷ Naimie muidona comeciiaia iuai meid-
uamona, Jusiñamui naimaci jeacinona oni dotaite. Naimie rafue nana nairaimo damierie lloitimaci”.

Omoimo biena lloiticue. Cue rafuena lollena, Jerusalémo taineitomoi. ⁴⁸ Bie rafuena ciodomoi. Iena lloito-
momi. ⁴⁹ Ero, navui naimie llua isoi, cue Moo joreño omoi dine oretaiticue. Jerusalémo fiebi, naimie joreño

omoi feiñolle dinori. Cue rafuena omoi lollena, naimie Joreño omoi comeciaina ocuiñotaite.

Jesús monamo jailla rafue
(Mr 16.19-20)

⁵⁰ Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote.
⁵¹ Iena naimacimo lluanona, monamo jaide. ⁵² Jerusalémo eo caimare abido jaidimaci. ⁵³ Jusiñamuimo iobilacino fecajano, Jusiñamui jofomo nagarui itimaci. Mai. Macaibaite. Lucadicue.

JUAN

Jesucristo rafue iese tainede

1 Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. ²Jusiñamui diga jaca nano ite. ³Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. ⁴Naimie muidona iticai. Naimiena cai iñuamona, jaca iitica. Lligaiñora diga rana cai ciua isoi, caina Jusiñamuina uiñotade. ⁵Naimiena iñoñedino jitiredinomo itimaci isoidimaci. Naimaci comeciai jitirede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶Naimaci comeciaina lligaiñotimiena llollena, Juan micori llucinodo Jusiñamuina nana comini iñollena, Jusiñamuidi Juan Bautista raillamie micorina oretate. ⁸Juan naie lligaiñoñedimie; iadedi Juan naimiena lluaibite. ⁹Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. ¹⁰Naimie muidona comini comuidimaci; iadedi naimie bene billa meinoconi, comini dinena naimiena uiñoñedimaci. ¹¹Ie nairai illanomo naimie ride; iadedi nana cai nairai naimiena feiñoñedimaci. ¹²Damierie naimiena feiñotimaci. Naimiena iñotimaci. Ie uaido naimiedi naimacina Jusiñamui uruiaina itatate. ¹³Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴Iemo caina Jusiñamuina uiñotallena, Jusiñamui jito comena jaide. Naie facaise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie jitona ciodicai. ¹⁵Juan micori naimiena cominimo jaiie llote: —Birui omoimo lloticue; iadedi jaiimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶Jesucristo caina eo duenaillamona, birui caina eo canocabide. ¹⁷Moisés micori Jusiñamui uaina jaiie llote; iadedi iemona Jusiñamui caina duenaillana jaiie raise uiñoñedicai. Jesucristo lluaamona Jusiñamui caina duenaillana jaiie raise uiñotica. Naimiemona uanaicinona jaiie raise cacadicai. ¹⁸Jaca buna Jusiñamuina cioñede; iadedi dajede ie jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi Jesúna llua rafue

(Mt 3.11-12; Mr 1.7-8; Lc 3.15-17)

¹⁹Jerusalémona Juan micori dine judíuai illaicomini Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiaie oredimaci. Naimiemo:

—¿Budío? —raillano jicanotadimaci. Juan dine ril-lanona, raitimaci:

—Cai Jilloitaraima biite raillamie ocuridicai. Cristo raillamie billemo ocuridicai. ¿Odi naimiedio? —raillanona jicanotimaci. ²⁰Naimie dinena janoñede; ia:

—Imieñedicue —raite.

²¹Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina lloraíma ico bil-lena jaiie llote. ¿Odi naimiedio?

Juan dinena raite:

—Ieñedicue.

²²Dane jicanotimaci:

—¿Budío? Caimo llono, cai oretatinomo cai llollena.

¿Niese naimacimo ona lloticai?

²³Juan dinena raite:

—Jofue iñenanomo ado llotimiedicue. Isaías micori jaiie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoi feiñollena, omoi comeciai raise finollena ñaiticue.

²⁴Juan dine bitinodi fariseuai comini. ²⁵Nia jicanoia-cadimaci:

—Odi cai Jilloitaraimañenia, o Elíañenia, o Moisés micori llotimieñenia, ¿bue ñellena cominina bautizadio? ¿Nie isoide uai omo ite? ¿Ninomona o uaina otio?

²⁶Juan dinena uai ote:

—Cominina bautizadicue; iadedi omoi motomo omoi uiñoñegamie jai ite. ²⁷Naimie cue ifo meidoite. Cue baifemo faite. Jamai bue cue isoilla jira, naimie illaformo cue riñena jira, naimiena canonicue.

²⁸Naie rafuedi Betábaramo suide. Jordán railla ille ruicafebeimo ite. Nainomo Juan bautizauide.

Juan micori Jesúna dane llua rafue

²⁹Ie areruido Juan micoridi Jesús naimie dine billana ciuano, naimiena raite:

—Ero, Jusiñamui jito toica llaua mamecido jai bite. Cai jeacino facaina faga llaua ifomo Jusiñamui ie Ji-

tona jai orede. Naimie fallemona comini jeacinona dotaite. ³⁰ Navui naimiena ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamai bue isoifede. Cue nia jeicifenia, naimiedi jaca ite”. ³¹ Cue dine naimie nia biñenia, naimiedi cai Jilloitaraimana uiñoñedicue; iadedi cominina bautizallena bene iticue, cai cominimo naimiena lollena.

³² Juan jiai llote:

—Monamona ucugi isoi Jusiñamui Joreño ana billana cioticue. Jesúmo baite. ³³ Naimiedi cai Jilloitaraimana nia uiñoñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitio. Cue Joreño baillamiedi cue Joreño omoimo fecaité”. ³⁴ Naie rafuena cioticue. Iemona naimiedi Jusiñamui Jitonana lloticue.

Jesús ie fetoacaga comini ie rafue

³⁵ Ie areruido Juan micori llofueoicaiganomona menamie Juan micori diga ia, ³⁶ Juan micori Jesús macarillana ciuano, raite:

—Ero, Jusiñamui Jito toica llauda mamecido jai bite.

³⁷ Juan micori diga itiaimaiai naimana cacajano, Jesúsna racadiiaimaiai. ³⁸ Jinafo dine erodajanona, Jesús iaiaimaiaina ciode. Iaiaimaimo jicanote:

—¿Buena jitaicomico?

Iaiaimaiai dinena uai otiaimaiai:

—Rabbí, ¿ni o jofo? ¿Ninomo itio? —uai otiaimaiai. Rabbí oni dobaiñuamona: “Llofueraima raillamie”.

³⁹ Jesús nai iaiaimaiai uaina ote:

—Mai. Cue diga bi, omico uiñollena. —Ie jira jaidiaimaiai. Jesús illanona ciodiaimaiai. Jitoma nia a illa jira, nairuido naimie diga fiebidiaimaiai. Jitirecaidemo oni jaidiaimaiai.

⁴⁰ Naie iaiaimaiaimona damie Andréna mameciredimie. Jesús dinena naimie jaidemo, ie amano jenuaide. Naimie amadi Simón Pedro. Naimiena baillanona, llote:

—Jai cai cominina Jilloitaraimana baiticue. Cristo raillamiena baiticue.

⁴² Ie mei Jesús dine naimiena uite. Jesús naimiena eo eruaillanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobaiñuacidi Pedro.

Jesús menamie uaidua rafue

⁴³ Ie areruido Jesús Galileamo jaiacade. Felipeba baillanona raite:

—Cue llofuegamiena o jaillena, cue diga coco jaillesa, mai cue diga bi. ⁴⁴ Felipedi Betsaida nairai imie. Andrés iaiaimaiai Pedro diga daje nairai iaiaimaiai. ⁴⁵ Jesús naimiemo llua mei, Felipedi Natanaelna oni jenuaide. Higuera railla riana anamo naimiena baillanona, raite:

—Moisés micori jaie ciegamiensa jai baiticue. Jusiñamui lloraini micoriaidi naimiena jaie jiai cuetimaci.

Naimiedi Jesús. Nazaret imie. Ie moodi José.

⁴⁶ Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

⁴⁷ Jesúsmona iaiaimaiai iaie ia, Jesús dinena llote:

—Ero, buna jifueñegamie billa. Nanoca Israel imie bite.

⁴⁸ Natanael dinena uai ote:

—¿Bu cuena llogao? ¿Niese cuena uiñotio?

Jesús uai ote:

—Felipe ona ailli nia baiñenia, higuera railla riana anamo o illana jai uiñoticue.

⁴⁹ Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

⁵⁰ Jesús dinena uai ote:

—Amena anamo o illana cue uiñua jira, cuena ñnotio. Diga siño rafuena ciojitio. Bie rafue baifemo finuana ciojitio. ⁵¹ Jusiñamuimona billanona, imana jaidicue. Uanaicino omo lloticue. Mona ecorillana o cioia, Jusiñamui jaenisai cue dine billena cioitio. Cuenamona abido jaillena jiai cioitio.

Jinuimona Jesús vino finua rafue

2 Menarui illanona, Galileamo Canámo iima ie ai uarafue ite. Rafue nama uaidua jira, nainomo Jesús ei jaide. ² Jesús jiai uaidoga. Ie llofueoicaiganodi cai jiai uaidogacai. ³ Vino cueillamona, Jesús ei Jesúmo llote:

—Vino jai iñede.

⁴ Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

⁵ Iemei ie eidi rafue nama mullaiaimo llote:

—Naimie omoimo llua fina.

⁶ Jinui nainomo eenollena, nainomo seis noficimona finoca llerodana raisoide. Naiemona jinuina ouidimaci. Marena illena, cai einamací llua isoi, jofomo naimací ria, naimací abiaina llereuidimaci. Naga lleroda nibai cinco latas totaca. ⁷ Mullaiaimo Jesús llote:

—Naie llerodiaina jinui diga oruita. —Pozomona jinui atiano, naie llerodamo toidimaci.

Iena finua mei, ⁸ Jesús naimacimo llote:

—Llerodamona janore jisa uanona, rafue nama dine uiño.

⁹ Naie facaiseconi naie jinuidi vinona jaide. Rafue nama naimena facade. Naimiedi ninomona naie vino uana uiñoñede. Dani nainomo ite mullaiaiai uiñotimaci. Jirua mei, ai otimie uaiduano, ¹⁰ raite:

—Rafue bu finoa, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesúsdi siño rafuena nano finode. Iemona caina ie uai siñona uiñotade. Ie muidona naimie siño Jitonana ñnoticai.

¹² Rafue fuilla mei, Capernaumo Jesús ie ei diga, ie amatiai diga, ie llofueoicaiganodicaí diga jaide. Nano ñgarui nainomo iticai.

Jusiñamui jofomona Jesúdi rana fecarainina dotaja rafue

(Mt 21.12-13; Mr 11.15-18; Lc 19.45-46)

¹³ Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana começillena, naie rafue ite. ¹⁴ Rillano, Jusiñamui jofomo diga rana fecarainina ciode. Ucube ollena, nainomo juraretaiai, toica llaudaiai, ucugiai fecauidimaci. Ucubena meidorainidi jiai itimaci. ¹⁵ Naimaci ocainaiai diga naimaci jino jiullena, rao Jesús uanona, iena lleride. Naimaci ucubena judaide. Mesaiaia oni caitade. ¹⁶ Ucugiaia fecarainimo llote:

—Omoi ucugiaia jino uiño. Cue Moo jofomo ra fecafecajana jitaiñedicue —llote.

¹⁷ Iemo Jusiñamuina lloraini micoriai ciegafuiaia jai começiticaí. Iese jaie cuela: “O jofona cue riiduamona, jiaio cuena meinetaitimaci”. ¹⁸ Nainomo ite juduai illaicomini dinena raitimaci:

—¿Nie isoide uaido naimacina jino oredio? Siño rafuena fino, siño uai omo illana cai uiñollena. ¹⁹ Jesús uai ote:

—Bicono judai. Darui amani maijiamona iena dane nillana fuidoiticue.

²⁰ Dane raitimaci:

—Cuarentiséis años bicomio maijidimaci, iena finolena. ¿Niese iena darui amani illanona, iena dane nillana fuidoitio?

²¹ Iese raitimaci; ia Jesúdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite.

²² Jesús fiodaillamona naimie jillua mei, ie llofueoicaiganodicaí bie llucacina começiticaí. Ie jira naie ciegafuena ñnoticaí. Jesús llucacina jiai ñnoticaí.

Jesúdi comini começiamo iticino lluaa jitaiñena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina ñnotimaci. Coniniri raitimaci:

—Naimiedi cai jilloitaraíma. ²⁴ —Naganomo começiaia naimaci facaja jira, naie cominina naimie uiñuamona, Jesús naimaci motomo iacañede.

²⁵ Naimaci começiamo iticinuaia naimie eo raise uiñua jira, comini rafuena naimiemo bu lluaa jitaiñede.

Nicodemo Jesús diga ñaia rafue

3 Juduai illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

³ Jesús dinena uai ote:

—Raise llotio; ia daje rafue omo lloiticue: Uanai omo lloiticue. Dane abido comonori o jeicifenia, Jusiñamui ie cominina sedajonomo jaca initio.

⁴ Nicodemo abido jicanote:

—¿Niese eimie ie ei jeraimo dane iite? ¿Niese dane comonori jeicite?

⁵ Jesús uai ote:

—Uanai omo lloticue. Jusiñamui ie comini sedajonomo o illena, dama o eimona jeicifellio. Jusiñamui Joreñodo bu dane comonori comuitañenia, Jusiñamui ie cominina sedajonomo jaca iñeite. ⁶ Comemona cai comuitaia, jaca comedicaí; iadedi Jusiñamui Joreñodo cai comuitaadedi, Jusiñamui uruedicaí. ⁷ Omo dane lloiticue: Comonori jeicia. Ieri rajicaiñeno. ⁸ Iena o raise cacaillena, jiaie rafuedo iena lloiticue. Aifidi ie jitailla dine sairide. Iena cacadio; iadedi ninena billana uiñoñedio. Nine jaillana jiai uiñoñedio. Ie isoide. Niese Jusiñamui Joreño cominina comuitajana jiai uiñoñedio.

⁹ Nicodemo dane jicanote:

—¿Niese biedi dane iite? Raise cacaiñedicue.

¹⁰ Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio. ¹¹ Uanaicnona omo lloticue. Abi uiñuamona omo lloticue. Cue cúa rafuena lloticue; iadedi cue lluaa ñnoñedio. ¹² Bene ite rafuena cue lloia, iena ñnoñediota, monamo ite rafuena cue lloia, iena jiai raise ñnoñeitio. ¹³ Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue. ¹⁴ Monamona biticue; ia amenamo fiodaiticue. Jofue iñenanomo Moisés micori jaio joreño amenamo jaie cuinade. Jaioniaí ainillamona comini fiodañellena iena cuinade. Comini ie isoi jilloillena, ie isoi cuena coraitimaci. ¹⁵ Cue fiodaillamona bu cue uaina ñnoia, monamo jaca iite.

Jusiñamuidi cominina eo isiruilla rafue

¹⁶ Jusiñamuidi cominina eo isiruilla jira, comini dine ie damiede jitona orede. Ie jitona naimaci ñnollena, naimiena orede. Naimiena ñnuamona, monamo jaca iitimaci. Jiai faifañeitimaci. ¹⁷ Naimacina duere finotalena ie jitona oreñede; iadedi naimaci jeacinomona jilloillena, naimiena orede. ¹⁸ Jusiñamuidi Jesús uaina ñnotinona jaca duere finoñeite; iadedi ie dajede jitona uaina naimaci ñnoñena jira, Jusiñamui duere finollicino anamo jai itimaci. ¹⁹ Comini começiaia lligaiñollena, Jusiñamui jito bite. Jeacino começiamo illana naimaci uiñollena, naimaci começiaia lligaiñuabite; iadedi naimaci começiaí jitiredinomo iacana jira, jearede rafue naimaci finua muidona, naimiena jitaiñedicue. Ie jira Jusiñamui naimacimo duere finollicinona anamo jai itimaci. ²⁰ Naimie finoca rafue bai raillano, naga jeacino finoraíma ie começi lligaiñuana jitaiñede; ²¹ ia Jusiñamui jitaillacinona finodino naimaci finoca rafue baillena, lligañotimie dine marefodo bitimaci.

Juan micoridi Jesúna dane ñaia rafue

²² Digarui illanona, Jesús ie llofueoicaiganodicaí diga, Judea railla eniruemo macaricana jaidicaí. Nainomo di-

ga irui fiebidicai. Llofuiamona ñnotinona bautizacana uiticai. ²³ Nia cárcelmo iñenia, ailluena jinui nainomo illa jira, Enón railla nairaimo bautizajanomo Juan micorí jiaí ite. Salim railla nairai iaírei ite. ²⁵ Naie facaise Juan micorí llofueoicaigano judíuai imie diga bautizajana siadotimaci. ²⁶ Ie muidona Juan micorí dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaididimaci. O dine jai raise biñedimaci.

²⁷ Juan uai ote:

—Jusiñamui ie uai fecañedena, Jusiñamui facaina buna jaca buena finonide. ²⁸ Cue lluana navui cacado-moi. Lloticue: “Cai comini jilloitaraimañedicue. Cristoñedicue. Naimie billena cue llollena, Jusiñamuidi naimie uicomu cuena orede”. ²⁹ Jiaie rafuedo iena lloiticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiaí iobide. Ie isoide. Comini cue dine navui biñoidimaci. Birui Jesúsomo jaididimaci. Naimiemo jai duidimaci. Iena cue cacajamona, ieri iobidicue. ³⁰ Comini naimie uai siñona uiñuana jitaidicue. Comini cue jamai bue isoidimiena uiñuana jiaí jitaidicue. ³¹ Jamai comedicue. Ie jira eniruemo ite rafuena llocabiticue. Jusiñamuimona Jesús billa jira, cai baifemo faite. ³² Ie Moo illanomo ciua rafuena llote. Ie Moo illanomo caca-ja rafue jiaí llote; iadedi eo janore comini naimiena ñnotimaci. ³³ Naimiena ñnotimiedi Jusiñamui uanaicnona lluana raise uiñote. ³⁴ Jusiñamuidi ie Joreño ie Jitomo caidñeno fecaia jira, naimie Jusiñamui uaina llocabite. ³⁵ Jusiñamuidi ie Jitona isiruite. Ie jira naga rafue naimiemo fecade. ³⁶ Bu Jusiñamui Jitona ñnoia, Jusiñamui illanomo jaca iite; iadedi bu naimiena ñnoñenia, Jusiñamui illanomo jaca iñeite. Jusiñamui riicaillafue anamo jai ite.

Galileamo Jesús jailla rafue

4 Naie facaise ailluena comini Jesúsmona fueotimaci. Iemei naimie díbeido bautizadimaci. Naimacina naimie bautizallena, janore comini Juan dine jaide. Jesúsdi bautizañede. Dani ie llofueoicaiganodicaí bautizadicaí. Fariseuai bie rafuena fidiano, iena Jesús uiñua jira, ³ Judeamona Galileamo Jesús cai diga dane abido jaide.

Samaria iñaiño diga Jesús ñaia rafue

⁴ Galileamo jaillena, Jesúsdi Samaria railla enirue díbeido jaiacade. ⁵ Samariamo cai ria, Sicar railla nairaimo iaírei rillano, daje pozomo ridicaí. Naie pozodi Jacob micorí jaie finoca. Jacob micorí naie pozo illano ie jito José micorímo jaie fecade. ⁶ Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote. ⁷ Jesús pozomo fiebicaila meinona, Sicarmo jaidicaí, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiñojoma jicade:

—Jinuina cue ine, cue jirolesca.

⁹ Naiñaiñodi uai ote:

—Judío imiedío. Samaria iñaiñodicue. ¿Niese cuemo jinuina jicadio? —Naiñaiño iese raite, judíuai Samaria comini diga ñairainina jira.

¹⁰ Jesús dinena dane uai ote:

—Jusiñamui omo fecaacalle ra uiñotiodena, o diga ñaitimiena uiñotiona, cuemo jaca itataite jinuina cuemo jicadio. Iemei omo iena fecadicue.

¹¹ Naiñaiño uai ote:

—¿Niese bie pozomona jinuina oitio? Eo ana ite. ¿Ninomona jaca itataite jinuina oitio? ¹² Cai usuma Jacob micorí bie pozo caimo jaie iñonocaiga. Naimemona naimie micorí jaie jirode. Ie uruiai micoriai jiaí naiemona jirodimaci. Ie ocainaiái dajemona jiaí jirodimaci. Cai usuma micorí baifemo faiñedio —raite.

¹³ Jesús uai ote:

—Nagamiaí bie jinui jirua mei, dane jiroacanite; ¹⁴ iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

¹⁵ Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶ Jesús dinena uai ote:

—O jofomo mai jai. O ini diga abido bene bi.

¹⁷ Naiñaiño uai ote:

—Ininidicue.

Jesús dinena uai ote:

—Uanai llotio. Ua ininidío. ¹⁸ Cinco diga inina jai faicaidio. Birui o diga itimiedi jiaí o iníñede. Uanaicinona ua llotio.

¹⁹ Iemona abina uiñocaillamona, naiñaiño dinena uai ote:

—Odi Jusiñamui ie lloraimadio. Iena uiñotícue. ²⁰ Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadicaí; iadedi omoi judíuai dinena raitomoi: “Jerusalémo Jusiñamuina cai sedauilla”.

²¹ Jesús dinena dane uai ote:

—Cueno ñno. Jiairuido bai bene ite anedumo cai Moona sedañeitomoi. Jerusalémo naimiena jiaí sedañeitomoi. ²² Raise uiñoñeno Jusiñamuina biruido sedadomoi; iadedi cai nairaimona cai jilloitaraima illa jira, naimiena raise uiñuana sedadicaí. ²³ Jiairuido, ua birui, cominidi: “¿Ninomo Jusiñamuina sedaiticaí?” railamo comeciaina facañeitimaci. Naimaci comeciái jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide. ²⁴ Jusiñamui comeñede. Naimiedi jafaici. Omoi comeciái jitaillamona naimiena omoi sedajana jitaide.

²⁵ Riño uai ote:

—Cai jilloitaraima billena uiñotícue. Naimiedi Cristo. Naimie bia, nana bie isoide rafuena caina raise uiñotaite.

²⁶ Jesús raite:

—Naimiedicue.

²⁷ Ieconí abido ridicái. Riño diga Jesús ñaia jira, raiji-caidicái; iadedi: “¿Buena naiñaiño jitaide?” raillano jicanoñedicái. “¿Buena ñaitómico?” raillano jiaí jicanoñedicái. ²⁸ Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

²⁹ —Ailli pozo fuemo cue jaca cioiraininamie diga dafaiñidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai jilloitaraima. Naimiedi nibai Cristo.

³⁰ Ie jira Jesús dine ailluena comini bitimaci. ³¹ Naie riño ie nairai dine jailla mei, abido cai dine nia riñenia, Jesúna raiticái:

—Maestro, mai guiño.

³² Naimie uai ote:

—Cuemo guille illana uiñoñedomoi.

³³ Coniniri siadoticaí:

—Jai nibai bu ecajaibiga.

³⁴ Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue lluamona, jai guiticue isoidicue. ³⁵ Comecina facadomoi: “Jusiñamui uaina nia lloñeiticái. Ico iena lloiticaí”. Ie isoide. Illimo riará nia llisiñenia, comecina facadomoi: “Riará einallena, naga amaga fivui fiebite. Naie facaise maijiiticaí”. Omoimo lloticue: Omoi ecimo eruai. Riará jai einate isoide. Naimacimo Jusiñamui rafue lllollena, iena naimaci ñnollena, ailluena comini jai itimaci.

³⁶ Naie llisillamo maijiitimiedi ie ucubena feiñoite. Ie isoide. Jusiñamui rafuena damierie llocabillamona, comini iena cacadimaci. Jiaíno billamona, iena dane cacajamona, iena ñnotimaci. Naie mare rafue lloraini ibana feiñoitimaci. Jusiñamui díbeimo naimaci dajena maijia jira, dajena iobitimaci. ³⁷ Cai comini iena raicabitimaci: “Damie iduaina rite; ia jiaimie llisillana ote”. ³⁸ Ie isoide. Omoína oredicue, comini cue díbeimo itatallena. Naimacimo cue uaina nano lloñedomoi; iadedi nano jiaíno naimacimo cue uaina llotimaci. Ie jira nana omoi llofuiaimona cue uaina ñnotimaci.

³⁹ Samaria iñaiño lluamona, naiñaiño nairaimona ailluena comini Jesúna ñnotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai jilloitaraima” raillanona Jesúna ñnotimaci. ⁴⁰ Jesús dine naimaci rillanona, naimaci diga naimie fiebillena, Jesúmo jicannotimaci. Ie jira Jesús menarui naimaci dinomo fiebide. ⁴¹ Naimie llofuiaimona, jiaie ailluena comini naimiena ñnotimaci.

⁴² Riñonomo llotimaci:

—Daño o lluamona, navui ñnoticaí; iadedi naimie uaina cai cacajamona, birui raise ñnoticaí. Naimiedi comini ua jilloitaraima.

⁴³ Menarui illanona, nainomona Galileamo Jesús cai diga jaide. ⁴⁴ Caimo llote:

—Jusiñamuina lloraimadi ie nairai illanomo ia, naie comini naimie lluamo cacarefiacaiñedimaci; ⁴⁵ iadedi Galileamo cai rillanona, nainomo itino naimiena caimare feiñotimaci. Pascua railla rafue facaise Jerusalé-

mo nana naimie finoca rafue navui naimaci ciua jira, naimiena caimare feiñotimaci.

Jesúdi illaicomini jitona jillotaja rafue

⁴⁶ Galileamo Jesús cai diga macaria, dane Canámo ridicái. Nainomo jinuimona vino navui finode. Nainomo cai ia, Capernaum railla nairaimo itimie jito duide. Duidimie moodi gobierno diga maijiuide. ⁴⁷ Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiodiaicana jira, ie jitona jillotallena Jesúmo duere jicannote. ⁴⁸ Jesús naimiemo llote:

—Siño rafuena omoi cioiñenia, cuena ñnoñedomoi.

⁴⁹ Uai ote:

—Maestro, cue diga bi, cue jito fiodiañellesa.

⁵⁰ Jesús uai ote:

—Mai jai. O jito jai fiodiañeite —llote. Naie iima Jesús uaina ñnuano, ie jofomo abido jaide. ⁵¹ Naisona naimie jaidemo, ie mullaiaí diga afeedo beici dafaiñide. Llotimaci:

—O jito jai jillode.

⁵² Ie jira naimie jicannote:

—¿Ñino jitoma itemo, jillode?

Uai otimaci:

—Navui are jitoma oni lluaí caidemo, abi cuarilladi faínonocaide.

⁵³ Ie comecina facade: “Navui are naie facaise Jesús cuemo llote: ‘O jito jai jillode’”. Ie mullaiaí lluaña cacajamona, naimiedi Jesúdi cai jilloitaraimana ñnote. Nana naimie jofomo itino jiaí ñnotimaci. ⁵⁴ Judeamona Galileamo Jesús abido billano, siño rafuena iese jai finode.

Joraibimo tisitaitimie jillua rafue

5 Digarui illa mei, cai judúai rafue iacana jira, Jerusalémo Jesús abido jaide. ² Jerusalémo toica llauaiaí jaisoilla nase facaimo joraibi ite. Cai judúai uaimona nai joraibi mamecidi Betesda. Naie joraí fuedo ite cinco jifocotiaí. ³ Nainomo diga duidino biidimaci: uisidimaci, ñuja-ñujacaidino, tisitaitino. Jinuina begollena sedadimaci. ⁴ Feide isoidemona dacaiño Jusiñamui jaienididi jinuina begotallena bite. Iemei nai jinuimo nano jaidimie ie duicomona jillode. ⁵ Duidino motomo tisitaitimie ite. Treintiocho años duide. ⁶ Naimiena ciuano, naimie are duillana uiñuamona, Jesús naimiemo jicannote:

—¿Jilloiacadió?

⁷ Duidimie uai ote:

—Jii; iadedi jinuina begoia, jaca buna iñede cue canoítana. Ie jira jiaimiedi cue uicodo jinuimo jaide. Ie jirari nia jilloñedicue.

⁸ Jesús uai ote:

—Mai naidacai. O biira ferinocaida macari.

⁹ Ieconí naimie jillode. Ie biira ferianona oni jai macarite.

Sábadoruimo duidimie jilloitajana siadua rafue

Sábadoruimo, judíuai jafaici oullaruimo, naimie jillode. ¹⁰ Ie jira judíuai illaicominidi jillodimiemo llote: —Birui sábado. O biira abinocaida o uilla jira, Moisés micori rairuica rana jai finodio. Sábadomo maijinidicai. Birui jafaici uaruimo jaca buena jetanidicai.

¹¹ Naimie uai ote:

—Cuen a jilloitatimie cuemo llote: “O biira mai ferinocaida macari”.

¹² Judíuai dinena jicanote:

—¿Bu iena omo llote? —Naimie uiñoñena jira, uai oñede.

¹³ Jesúsdi comini motomo itabilla jira, ailluena comini illa jira, jai jillodimie ie jilloitatimiena uiñoñede. ¹⁴ Ie meinoconi dallu illanona, Jusiñamui jofomo Jesús dine naimiena baite. Llote:

—Jai jillodio. Abido dane eo duere o sefuisa, dane jeacinona finoñeno.

¹⁵ Ie mei judíuai illaicominimo jillodimie lluaide. Llote:

—Jesús raillamie cuena jillotate.

¹⁶ Sábadoruimo Jesús bie rafuena finua jira, judíuai illaicominidi naimiena duere finoacasite. ¹⁷ Jesúsdi abina riiduan llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote.

¹⁸ Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicominidi naimie meinellena eo jitaidimaci.

Jesús ie Moo isoi finua rafue

¹⁹ Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. ²⁰ Cue Moo cuena isiruillanona, nana ie finoca rafuena cuena jai uiñotade. Naimie jitona cue illa jira, bie iimana cue jilloitaja baifemo jiaie siño rafuena finoiticue, omoi rajicaillena. ²¹ Fiodaitinona jilloitallena, cue Moomo ie uai ite. Naie uai cuemo jiaie ite. ²² Cue Moo juez isoi naimie finoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga.

²³ Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuen a omoi iobitañenia, cue Moona jiaie iobitañedomoi. ²⁴ Uanaicinona lloticue. Cue uaina bu cacai, cuena oretatimiena bu inoia, monamo jaca iite. Jearede rafue naimie finua facaina duere sefuifeite. Faififeite; ia monamo Jusiñamui diga jaca iite. ²⁵ Uanaicino lloticue. Jusiñamui jitodicue. Ua birui cuena finoñedinome cue uaina cacareitimaci. Cuen a cacajamona, cuena inuamona, jaca itimaci. ²⁶ Cominina jaca itatallena, cue Moomo uai ite. Comini jaca itatallena, cuemo ie uai jiaie iga. ²⁷ Cuen a finoñedinome juez isoi cue llollena, naimiemo cue duillamona, ie uai cuemo jiaie iga.

²⁸ Ieri rajicaiñeno. Jiairuido nana jai fiodaitino diese

cue lluaana cacaitimaci. ²⁹ Fiodaillamona naimaci abiaie jilloitimaci. Ie mei cue jitaillacinona finodino jaca illena lloticue. Cue jitaillacinona finoñedinome diese duere sefuillena lloticue. ³⁰ Naimacimo cuena oretatimie jitailla isoi lloticue. Dama cue comecimo ite rafuena cue lloñena jira, bie lluacinodi uanaicino.

Jusiñamui ie Jito uaina comini inoñena rafue

³¹ Jesús nia llote:

—Dama cue abina cue lloiadedi, bu cuena jaca inoñede; iadedi Jusiñamui cue facaina jiaie llote. Naimie llucino uanaicino. Iena uiñoticue. ³³ Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoimo llollena, naimacina oretatomo. Juan llucinodi uanaicino. ³⁴ Naimie micori cue rafuena llouide; iadedi naimie micori llogacinomo omoi comeci eo facajana birui jitaifidicue. Cuen a omoi inollena, naimie mamecina jai lloticue. ³⁵ Lamparín raise lligaiñua isoi, ie rafuedo Juan micori omoi comeciainome iticinona raise uiñotade. Dallu ieri iobidomo. ³⁶ Cue finoca rafue Juan micori finoca rafue baifemo faite. Cue siño finoca rafuena ñaiticue. Cuen a naimie oretajamona, cue Moo uaido iena finodicue. Ie jira naiemona naimie dinena cue billana jai uiñotomo. ³⁷ Cue finoca rafue muidona cuena uiñotomo; iadedi naimie lluaana jaca cacaiñedomoi. Naimiena jiaie jaca cioifidomoi. ³⁸ Cuen a omoi inoñena jira, naimie uaina feiñoñedomoi. ³⁹ Jusiñamui dine omoi rillena, Jusiñamui facaina lloraini micoriaie cuegafuaina facacabidomoi. Naifuiaidi cuena ñaite; ⁴⁰ iadedi Jusiñamui dine omoi rillena, cue uaina inoia-caiñedomoi. ⁴¹ Cuemo iobillacinona omoi fecallena sedañedicue. ⁴² Jusiñamuina isiruiñedomoi. Iena uiñoticue. ⁴³ Cue Moo mamecido cue billanona, cuena feiñoñedomoi; iadedi dama ie mamecido jiaimie bia, naimiena feiñoitomo. ⁴⁴ Jaca inoia-caiñedomoi. Iobillacino coninimo fecadomoi; iadedi ua Jusiñamuidi omoina “Mare” raillana jitaifidomoi. ⁴⁵ “Cue Moomo omoi marañede finoca rafuena lloticue” raillanome comeciaina facañeno. Moisés micori cuegafuaimo omoi llogiduafue jai ite. Moisés micori cuegafuaimo muidona Jusiñamui dine omoi jaca illemo ocuridomoi. ⁴⁶ Moisés micori cuegafuaina inotomoina, cuena naimie micori cuia jira, cuena jiaie inoitomo. ⁴⁷ Naimie cuegafuaina inoñedomoi. Ie jira cuena jiaie inoñeitomoi —llote.

Jesús cinco llomenicomona ailluena cominina eaja rafue

(Mt 14.13-21; Mr 6.30-44; Lc 9.10-17)

6 Jiairuido Galilea railla jorai ie ruica dibeimo Jesús ie llofueoicaiganodicaie diga jaide. Naie joraidi jiaie Tiberiana mameciredo. ² Duidinona naimie jillotaullana naimaci ciua jira, ailluena comini naimiena racadimaci. ³ Naie facaiseconi pascua railla rafuedi jai iaie ite. Jesús cai diga anedumo a jaillanona, dinome ana raide. ⁵ Oni erodatemo, ailluena comini naimie dine billana ciode. Felipemo jicanote:

—Naimaci guillena, ¿ninomona llomenicono oiticaí?
⁶ Naimiena facacillena, iena jicanote; iadedí Jesús ie finolle rana jai uíñote. ⁷ Felipe uai ote:

—Janore naimaci guillena, doscientos digarui ie maijia ucube diese llomenico oticaina, baiñede.

⁸ Naie facaise caimona damie iena cacade. Naimiedi Simón Pedro ama. Andréna mameciredede. Naimie raite:

⁹ —Cinco cebadamona finoca jenide llomenico daje uruemo bene ite. Mena lliciaí jiaí naimiemo ite; ia ¿niese nibaiiticaí? Baiñeite.

¹⁰ Jesús caimo llote:

—Cominimo llono, ana imaci raillesa.

Ie jira raitire illanomo ana raidimaci. Cinco mil iñiaí itimaci. ¹¹ Llomenicono Jesús ua meinoconi, Jusiñamuimo iobillacinona fecajano, Jusiñamuimo jide. Iemei cominimo caina naie llomenicono fecatate. Comini jitailla dierise lliciaí daje isoi fecatate.

¹² Naimaci monillamona, caimo Jesús llote:

—Buena jaca faifiñellena, fiebide guille danomo irai.

¹³ Ie jira iena iraidicaí. Naie cinco llomenicomona, comini guigamona fiebidemona, doce cirigaiaimo oruitaticaí. ¹⁴ Jesús finoca rafuena naie cominidi cianona, llotimaci:

—Jusiñamui facaina lloraini micoriaídi cai jilloitaraima ico billena jaie llotimaci. Bimiedi naimie.

¹⁵ Naimaci illaimana naimie illena, naimiena gaitaacadimaci. Iena naimie uíñua jira, iena naimie jitaíñena jira, aneduaimo naimie oni jaide.

Capernaumo Jesús abido jailla rafue

(Mt 14.22-27; Mr 6.45-52)

¹⁶ Jitoma ana itemo, jai navuidemo, ie llofueoicaiganodicaí joraimo jaidicaí. ¹⁷ Cai botemo cai jaillano, ruica Capernaumo jaiacadicaí; iadedí Jesús nia biñede. Jesúsna sedadicaímo, naimie biñena jirari, jai jítirena fa-caiseconi jai jaidicaí. ¹⁸ Riire aifi illa jira, jorai eo bagode. ¹⁹ Nibaí cinco, nibaí seis kilómetros jaidicaímo, damie cai dine jinui emododo billana ciodicaí. Bote dine naimie billana cianona, jacinaiticaí. ²⁰ Jesús caimo llote:

—Jesúdicuesa. Jacinaíñeno.

²¹ Iena cacajanona, botemo naimiena a billana jitaídicai. Ieconí ruica dine cai jaiacananomo ridicaí.

Comini Jesúsna jenua rafue

²² Cai jailla mei, daje bote nairuido illa jira, jinafomo fiebidino Jesús cai diga jaiñenana uíñotimaci. Cai Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie fa-caise iaíre bite. Monaidemo, Jesúsna naimaci cioíñena jira, cai jiaí iñena jira, naie botiaído Capernaumo Jesúsna jenollena, jaidimaci.

Jesús: “Llomenicodicue” railla rafue

²⁵ Ruica dine Jesúsna comini baillanona, jicanotimaci: —¿Niruido bene ridio? ²⁶ Jesús uai ote:

—Navui are omoína cue ecajamona, iemona omoi monillamona, cuena jenodomoí. Siño rafuena cue finuana ciodomoí; iadedí cuena nia iñoñedomoí.

²⁷ Guille raíre cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi iñuamona, Jusiñamui diga jaca iitomoí.

²⁸ Jicanotimaci:

—Nia Jusiñamui díbeimo iticaina, ¿nie isoidífue finodicaína mare?

²⁹ Jesús uai ote:

—Naimie oretagamie uaina omoi iñuana jitaide.

³⁰ Naimaci dinena dane jicanotimaci:

—¿Nie isoide rafuena finoitio? iena cai ciano, o uaina cai iñollesa. ³¹ Cai jaiagaí jofue iñenanomo Jusiñamuimona bite guilla ra guisoidimaci. Moisés micorí iena jaie cuela: “Jusiñamuimona bite guiga ra naimacimo nagarui fecauide”. Iemo jiaí birui ocuridicaí. Naie isoide siño rafuena o finuana jiaí cioacadicaí —llotimaci.

³² Jesús uai ote:

—Uanaí lloticue. Moisés micorí naie guiga ra jaca fe-cañede. Cue Moo iena fecauide. Birui naimiedi monamona bite ua llomenicono omoimo jai fecacade.

³³ Jusiñamui fecacalle llomenico monamona jai bite. Comini iena guillamona, jaca iitimaci.

³⁴ Llotimaci:

—Nagarui caimo bie isoide llomenicono feca.

³⁵ Jesús uai ote:

—Llomenico guillamona iticaí. Omoi llomenico isoidicue. Cuena iñuamona, monamo jaca iitomoí. Cuena iñotimie dane aimetaíñeite. Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comeciaí jitaillacino naimacimo jaca illena ñaite—. ³⁶ Cuena ciodomoí; iadedí cuena iñoñedomoí. ³⁷ Nana cue díbeimo cue Moo itatallinodí cuena iñoitimaci. Cuemona naimacina jaca oni dotaíñeiticue. ³⁸ Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. ³⁹ Cuena oretatimiedi cue díbeimo itatallinomona buna faifillana jitaíñede. Jusiñamui lluaruimo fiodaillamona nana naimaci abiaína cue jilloitajana jiaí jitaide. ⁴⁰ Jusiñamui Jitona cue illana bu iñoia, cuena bu iñoia, monamo jaca iite. Jusiñamui llolliruimo fiodaillamona naimie abina jillotaiticue. Iese cue Moo jitaide.

⁴¹ Jesúsdi: “Monamona bite llomenicodicue” railla jira, judíuaí illaicominidi naimie uaina jamaillano iñosiñede. ⁴² Raitimaci:

—Bimiedi Jesús. José jito. Ie moona uíñoticaí. Ie eina jiaí uíñoticaí. ¿Niese naimiedi: “Monamona biticue” raite?

⁴³ Jesúsdi uai ote:

—Iese omoi naiñeno. ⁴⁴ Naimiena cue Moo iñotañenia, bu cuena iñonide. Cuena bu iñoñenia, Jusiñamui llolliruimo fiodaillamona naimie abina jillotaiticue.

⁴⁵ Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai ñnoite. ⁴⁶ Buna cue Moona jaca cioñede. Naimiemona cue billamona, dama cue ciua. ⁴⁷ Uanaicinona lloticue. Cue uaina ñnotimie monamo jaca iite.

⁴⁸ Jesús dane llote:

—Llomenico guillamona iticai. Omoi llomenico isoidicue. Cuena ñnuamona, monamo jaca iitomoí.

⁴⁹ Jofue iñenanomo omoi jaiagai Jusiñamuimona bite rana guisoidimaci; iadedi fioidaitimaci. ⁵⁰ Birui jiaie guille ra ite. Monamona ite. Iena bu guia, monamo jaca iite. ⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomenicono guia, jaca iite. Bie llomenicodi cue abi. Comini facaina fioidaiticue.

⁵² Iena cacajano, judúuai illaicomini coniniri naiena siadotimaci. Raitimaci:

—¿Niese bimie abina riiticaí?

⁵³ Ie jira Jesús dinena raite:

—Uanai lloticue. Cue abina omoi riñenia, cue diruena omoi riñenia, cue Moo diga jaca iñeitomoí. ⁵⁴ Bu cue abina ríia, bu cue diruena ríia, cue Moo diga jaca iite. Fioidaillamona naimie abi iirairuimo jillotaiticue. ⁵⁵ Cue abidi ua rille. Cue diruedi ua rille. ⁵⁶ Bu cue abina ríia, bu cue diruena ríia, cuena nabaide. Naimiena jiai nabaidicue. ⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina ríia, cue illamona, naimie jiai iite. ⁵⁸ Bie isoide guille ra monamona jai bite. Omoi jaiagai jaie guiga ra isoñede. Jaie fioidaitimaci; iadedi bie guille ra birui bu guia monamo jaca iite. —Iese llote; iadedi naimie fioidaillamona, naimiena comini ñnuamona, Jusiñamui diga naimaci jaca illena ñaite.

⁵⁹ Capernaumo judúuai ofiracomo Jesús buena llote.

Jesús diga jaisoidino naimie lluaña siadua rafue

⁶⁰ Jesús diga jaisoidino naimie lluaña cacajano, coniniri siadotimaci:

—Bie llua eo irirede. Bu iena cacaiñede.

⁶¹ Jesúsdi naimaci iese siaduana uiñote. Ie jira llote:

—Cue lluaña raise ñnoñedomoi. ⁶² Jusiñamuimona ñmana jaillena jai biticue. Monamo abido ico cue jaillena cioitomoína, iena jiai nibaí raise ñnoñeitomoí.

⁶³ Cai joreño caimo illamona, iticai. Dani cai abi diga iñedicai. Ie isoide. Cue llogacino Jusiñamuimo duide. Iena omoi ñnuamona, jaca iitomoí; ⁶⁴ ia omoimona nana ñnoñedomoi —llote. Nano dofoconimona Jesúsdi naimiena ñnoñedinona uiñote. Naimiena gaitataimienajai uiñote.

⁶⁵ Jesús dane llote:

—Ie jira omoimo lloticue: Cue Moo jitañenia, cuena jaca bu ñnonide.

⁶⁶ Iena cacajano, Jesús diga jaisoidinomona, diga comini naimiena fañonocaidimaci. ⁶⁷ Ie jira ie doce llofueicaiganodicaímo Jesús jicanote:

—¿Jiai cuena fañonocaida, abido jaitomoí?

⁶⁸ Simón Pedro uai ote:

—Nama, o diga cai jaiñenia, ¿bu diga jaiticaí? Jusiñamuimo cai rillena, o isoi jillotaraima iñede. Jiaimie mo jaca itatajaracinodi iñede. ⁶⁹ O lluaña jai ñnoticai. Jusiñamui mare Jitodio. Iena uiñoticaí.

⁷⁰ Jesús dane uai ote:

—Doce digamie fetocaomoi; iadedi omoimona damie Taífemo jainaiaide —llote. ⁷¹ Caimona Judas Iscariote micorina ñaite. Judas micorí Jesúsna gaitataiacadimie.

Jesús amatiaí naimiena ñnoñena rafue

7 Jiairuido Galileamo ite nairaiaímo Jesús macarite. Judúuai illaicomini naimiena meineiacana jira, Judeamo jaiñede. ² Jifocotiaíai railla rafue iaire ite.

Judúuai ie rafue. ³ Ie jira Jesús amatiaí naimie mo llote:

—O diga jaicabidino o finua rafuena raise cioillena, beno fañonocaida, Judeamo jai. ⁴ Bu ie mameci are soriacania, bainino maijirainina. Ie isoide. Siño rafuena o finoa, ailluena comini illa motomo iena fino.

⁵ Jesús amatiaí naimiena ñnoñena jira, iese raite.

⁶ Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai. ⁷ Comini omoína enoiñedimaci. Naimaci finoca jearede rafuena cue llua jira, cuena jaca enoidimaci. ⁸ Jerusalémo rafuemo jai. Cue jaillirui nia riñena jira, nia jaiñeiticue. ⁹ —Iese lluaño, Galileamo naimie fiebide.

¹⁰ Naimie amatiaí rafuemo jailla mej, Jesúsdi naimaci jinafona dama bainino jaide. ¹¹ Nai rafuemo judúuai illaicomini Jesúsna jenuano baiñenano, cominimo jicantotimaci:

—¿Ninomo naimie ite? —Uiñoñena jira, comini uai oñedimaci.

¹² Nainomo ailluena comini itimaci. Comini illa motomo naimiena anado siadoside. Jiaño dinena: “Naimiedi mare” raitimaci. Jiaño dinena: “Naimiedi cominina jifueite” raitimaci. ¹³ Judúuai illaicominina iciana comini jaciruillanona, anado siadoside. Jesúsna marefodo buna ñaiñede.

Sábadoruimo Jesús maijia raufe

¹⁴ Jifocotiaíai railla rafue atuedo fitemo, Jesús Jusiñamui jofomo jaillano, llofueite. ¹⁵ Illaicomini naimie llofuiamona rajicaidimaci:

—¿Niese naimie abi uiñote? Eo rafuena uiñotimie mona jaca fueoñede —raitimaci.

¹⁶ Jesús uai ote:

—Dama cuemona oñega cue llofuiacinodi. Cuena oretatimie ie. ¹⁷ Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuimona cue uana uiñoite. Dama cue comecimona cue oñenana jiai uiñoite. ¹⁸ Bu dama ie comecimona ie llofuiacinona uanona lloia, naimiedi comini naimie mo iobillacinona fecajana jitaide; iadedi bu ie oretatimienaiobitaia, uanai llote. Maraiñedinona finoñede.

¹⁹ Moisés micorí Jusiñamui uaina jaie llote; iadedi birui

naie llogacínuaína nia raise ñnoñedomoi. Iena raise ñnotomoidena, cuena niade meineiacañedomoi.

²⁰ Cominí dinena uai ote:

—Nibai uairitaidio. ¿Bu ona meineiacade?

²¹ Jesús uai ote:

—Dacaiño sábadoruimo damiena jillotaticue. Ie jira cue uaina uaitatomoí. ²² Sábadoruimo jiaí maijicabidomoi. Moisés micorí isaiaí abiaí diana omoímo jaie llote; iadedí naimie micorí naiena nano lloñede. Naimie micorí usumatiaí naiena nano llotimaci. Sábadoruimo isana abi dellirui ia, detomoi. ²³ Moisés micorí llogacínona ñnollena, sábadoruimo isaiaína detomoi. Sábadoruimo imana raise jillotaticuemo, ¿bue ñellena cue diga iciritomoi? ²⁴ Cominimo jamai eruaiñanona, naimacina jeare ñañeno; ia naimaci fino-ca rafuena raise uñuamona, naimacimo comecina faca. Cue finoca rafuemo comecina faca.

Jesúna cominí siadua rafue

²⁵ Ie jira Jerusalémo itino coniniri siadotimaci:

—Illaicominí bimiena meineiacadimaci; ²⁶ iadedí beno marefodo naimie llofue. Jaca buena lloñedimaci. Illaicominí: “Bimiedí cai Jilloitaraima” raillano nibai comeciaina facadimaci. ²⁷ Bimie ie billanona cai uñua jira, naimiedí cai Jilloitaraimañedimie. Cai Jilloitaraima baireia, jaca budí naimie billanona uññoñeite —siadotimaci.

²⁸ Ie jira Jesús Jusiñamui jofomo naimie llofuiano llote:

—Cuen a uñnotomoi. Ninena cue billana jiaí uñnotomoi. Cue jitailla jira biñedícue; iadedí jiaimie cuena oretate. Naimiedí uanai llote. Naimiena uññoñedomoi. ²⁹ Naimiemona cue billa jira, naimiena uñnoticue. Cuen a oretate —llote.

³⁰ Ie jira illaicominí Jesúna gaitaacadimaci; iadedí naimie fiódaille facaise nia riñena jira, buna naimiena gaitañede. ³¹ Nairui ailluena cominí naimie uaina ñnotimaci. Raitimaci:

—Cai Jilloitaraima bia, ¿ñiese naimiedí bimie baífemo jiaie rafuena finoite?

Jesúna gaitaiacana rafue

³² Fariseuaidí cominí iese ñañana cacajano, Jesúna gaitallena, Jusiñamui diga nanoca ñañainidí ailluena policiana orede. ³³ Ie jira naimacina Jesús dinena raite:

—Dallu omoi diga nia iitícue. Ie mei cuena oretatimie dine abido jaitícue. ³⁴ Cuen a jenoitomoi; iadedí cuena baiñeitomoi. Cue dine binitomoi.

³⁵ Ie jira nainomo ite illaicominí daní siadotimaci:

—¿Ñine jaite? ¿Ñiese naimiena baiñeiticai?

Judúuaiñedínona llofuellena, jiaie eniruemo cai cominí dine nibai jaite. ³⁶ ¿Ñiese naimie raite: “Cuen a jenoitomoi; iadedí cuena baiñeitomoi”? ¿Ñiese raite: “Cue dine binitomoi”? —iese siadotimaci.

Jesúdí Jusiñamui Joreñona ñaña rafue

³⁷ Jifocotiaiaí railla rafue fuillaruimo, ua rafue ie nairuimo, Jusiñamui jofomo itinomo Jesús ado llote:

—Bu jiroacania, cue dine bi. ³⁸ Jusiñamui facaina llorainí micoriaí jaie cuela: “Naimiena ñnotimie comeci-mo jaca itatate jinui isoi iite, torafomona jinui tonooilla isoi”.

³⁹ Jesúdí iese llote; ia Jusiñamui Joreñona ñañe. Jusúna ñnotinomo Jusiñamuidí ie Joreñona ico illena ñañe. Jesús nia fiódaiñena jira, iena nia iñega.

Cominí Jesúna dane siadua rafue

⁴⁰ Jesús lluana cominí cacajano, raitimaci:

—Jsiñamui facaina llorainí micoriaí Jusiñamui facaina lloraima ico billena jaie llotimaci. “Cristo nia baireñe-ña, naimie biite” llotimaci. Bimiedí naimie.

⁴¹ Jiaíno raitimaci:

—Naimiedí cai Jilloitaraima. Naimiedí Cristo.

Jiaíno raitimaci:

—Cai Jilloitaraima Galileamona biñeite. ⁴² Jusiñamui facaina lloraima micorí cuela: “Cai Jilloitaraimadí David micorí jito. Belémo David micorí illanomo jericille”.

⁴³ Ie jira daje isoi naimiemo comeciaina facañedimaci. ⁴⁴ Jiaíno naimiena gaitaacadimaci; iadedí buna naimiena jetañede.

Judúuai illaicominí Jesúna ñnoñena rafue

⁴⁵ Ie mei policías naimaci illaicominí dine abido jaidimaci. Fariseuai dinena jicanotimaci:

—¿Bue ñellena Jesúna atñedomoi?

⁴⁶ Policías dinena uai ote:

—Naimie llofuia isoi jaca buna llofueñede. Iena jaci-naillanona, naimiena atñedícai.

⁴⁷ Fariseuai dane llotimaci:

—Cominina jifua isoi, omoina jiaí jifue. ⁴⁸ Cai illaicominí dinena naimiena jaca ñnoñedícai. Moisés micorí llogacínodo raise jaidícai; ⁴⁹ ia Jesús llofuiana cacadino Moisés micorí llogacínuaído jaca raise jaiñedimaci. Ie jira jaca faifitimacisa.

⁵⁰ Naie illaicominimona Nicodemo raillamie ite. Naimie nañona Jesús dine navui jaide. Fariseo imie.

⁵¹ Jesúna riñduanona, naimie llote:

—Cai einamaci llocabitimaci: “Bu duere cai finoacania, nano naimie lluomo cacarefitícai. Jearede rafue naimie finuana cacareillano, naimiena duere finoitícai”. Iena cai cacaiñenia, naimiena duere finoñeitícai.

⁵² Nicodemomo llotimaci:

—Galileamona bitino isoi ñaitio. Naimie llofuegamie-na nibai jai jaiacadio. Jaie cuela fuaiaina raise faca. Jusiñamui facaina llorainí micoriaidí cai nairaina Jilloitaraima Galileamona billena jaie cueñedimaci. Bie Jesús raillamiedí cai nairaina Jilloitaraimañedimie.

⁵³ Ie meinoconi damierie imaci jofomo jaidimaci.

Ie iniñede iima diga riñodi rafuetalla ie rafue

8 Naie facaise Jesúdi Olivos railla anedumo jaide.
² Ie areruido jitiramo Jusiñamui jofomo abido dane jaide. Ailluena comini naimie dine billa jira, naimie ana raita, naimacina llofujete. ³ Naie facaise Moisés micori llogacinona llofueraimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñona jai eidatimaci. Comini illa uicomo atiano, ⁴ Jesúmo llotimaci: —Llofueraima, biñaiño ie iniñede iima diga eidaticai.
⁵ Moisés micori jai e cueba: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?
⁶ Naimiema facacillena, naimie raise uai ofenia, naimiema llogidollena, iese jicanotimaci. Iena cacajano, Jesús ana jítadacaida, eniruemo ie onocai diga cuete.
⁷ Naimiemo diga icaiño jica-jicanuano, naimie naidacaida, naimacimo llote: —Omoimona jeacino iñedimie naiñaiñomo nano noficina fairino.
⁸ Dane ana jítadacaida, eniruemo dane cuete.
⁹ Naimie lluaana cacajano, dajerie jino jaidimaci. Nano eo einamacidi jino jaidimaci. Ie mei coniruenti jino jaidimaci. Nana comini tuua mei, nainomo Jesús fiebide, naie riño diga ñaillena. ¹⁰ Eruaillano naiñaiñomo jicanote: —¿Ni nai o llogidotino?
¹¹ Naiñaiño uai ote: —Jaca iñedimaci. Cuenajai llogidoiacaiñedimaci. Jesús uai ote: —Jiai ona duere finoñeiticue. Mai jai. Jeacino dane finoño.

Jesúdi comini comeciai lligaiñua rafue

¹² Jesúdi cominina dane llofuianona, raite: —Jeacino oni jaillena, comini comeciaina lligaiñoticue. Cuenajai iñotimie jítiredinomo jaca iñeite. Jeacino anamo jai iñedimie Jusiñamui diga ico jaca iite.
¹³ Fariseuai dinena uai otimaci: —Dama o abina ñaitio. Ie jirari uanaicinona lloñedio.
¹⁴ Jesús uai ote: —Dama cue abina lloticue; iadedi uanaicinona lloticue. Ninena cue billanona uiñoticue. Nine cue jailinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi. ¹⁵ Abi raise uiñoño cuena jeare ñaitomoi. Iese omoina ñaiñedice; ¹⁶ iadedi omoina cue ñaia, uanaicinona lloticue. Dama cue uaina omoina lloñedice. Cuenajai oretatimie omoina jiai llote. ¹⁷ Moisés micori iena jiai jai e cueba: “Menamie daje isoi lloia, naie iaimaia illuacinodi omoi inua” cueba. ¹⁸ Cue facaina lollena, menamie jai ite. Cue facaina lloticue. Cue Moo cue facaina jiai llote.
¹⁹ Fariseuai dinena jicanote: —¿Ni o moo? Jesús uai ote:

—Cuenajai uiñoñedomoi. Cue Moona jiai uiñoñedomoi. Cuenajai uiñotomoi, cue Moona jiai uiñotomoi.
²⁰ Jusiñamui jofomo ucube eenoracomo bicinona siadotimaci. Jesús fioidaille facaise nia riñena jira, jaca buna naimiema gaitañede.

Jesúna comini inoñenia, naie jeacino diga fioidaille rafue

²¹ Naimacimo Jesús dane llote: —Ico oni jaiticue. Cuenajai jenoitomoi; iadedi cuenajai baiñeitomoi. Na omoimona jeacino nia itemo, fioidaitomoi. Cue jaillinomo jainitomoi.
²² Ie jira juduai illaicomini dinena iena siadotimaci: —Dama ie abina meineite. “Cue jaillinomo jainitomoi” Jesús railla jira, iese siadotimaci.
²³ Jesús uai ote: —Jusiñamui ite rafuemo duiñedomoi. Naimiemo ite rafuemo duidicue. Naimie dibeimo iñedomoi; ia naimie dibeimo iticue. ²⁴ Cue Jusiñamui Jitonana omoi inoñena jira, na omoi jeacino diga fioidaitomoi.
²⁵ Jicanoside: —¿Budío? Jesús uai ote: —Nano omoi motomo cue illamona bumiedicuenajai omoimona raicabiticue. ²⁶ Diga rafue omoimona lloiacadice. Marañede rafuena omoi finuana omoimona nia lloiacadice; iadedi omoimona cuenajai oretatimie uaina dama lloticue. Nai uaidi uanaicinona —llote.
²⁷ Naimiedi ie Moo Jusiñamuina llote; iadedi cacaiñedimaci. ²⁸ Ie jira Jesús llote: —Cuenajai omoi meinia mei, bumiedicuenajai uiñoitomoi. Cue uaidi dama lloñedice; iadedi cue Moo cue llofuia uaidi llocabiticue. ²⁹ Cuenajai oretatimie cue diga ite. Naimie jitaillera rafuena cue finua jira, cuenajai fainonocaiñede.
³⁰ Iese Jesús llotemo, diga illaicomini naimie uaina como inoiacadimaci.

Comini Taife anamo illa rafue

³¹ Jesús uai ote: —Cue lluaana inoñenajai omoi jaia, cue uai cominidomoi. ³² Uanaicinona uiñoitomoi. Ie mei jiaimie anamo dane iñeitomoi.
³³ Uai otimaci: —Abraham micori ie uruaidica. Jiaimie anamo jaca iñedica. ¿Bue ñellena llotio: “Jiaimie anamo iñeitomoi?”
³⁴ Jesús uai ote: —Uanajai lloticue. Jeacino finocabidomoi. Naja jeacino finoraime ie jeacino anamo jai ite. Omoi jeacino anamo omoi illana ñaiticue. ³⁵ Jiaie rafuedo iena lloticue. Ie patrón anamo itimie ie patrón rafuedi duiñede; iadedi naie patrón jitoimie ie rafuedi duidicue. ³⁶ Ie isoide. Jusiñamui Jitona cue illamona, naimie rafuemo duidicue. Ie jira omoimona cue lloia, omoi jeacino anamo uai iñeitomoi. ³⁷ Abraham micori

ie uruiaidomoi. Iena uiñoticue; iadedi cue llua omoi raise ñnoñena jira, cuena meineiacadomoi. ³⁸ Cue Moo diga jaie cue illamona, cue ciua rafuena llocabiticue. Omoi moomona cacaja rafuena finocabidomoi.

³⁹ Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoi. Abraham micori uruiaññedomoi. Ie jira Abraham micori finoca rafue isoi finoñedomoi. ⁴⁰ Uanai cue llua jira, cuena meineiacadomoi; iadedi Abraham micori iese finoacaiñede. Cue llucino Jusiñamui mona oticue. ⁴¹ Jusiñamui uruiañ finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiaññedicaí. Cai Moodi Jusiñamui.

⁴² Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biñedicue; iadedi cuena oretate. ⁴³ ¿Bue ñellena cue llua na cacaiñedomoi? Cacareirainidomoi. ⁴⁴ Omoi moodi Taifeña jira, cue llua ñnoñedomoi. Naimie jitailla rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucinodi comuicabide. Naimie isidomoi. ⁴⁵ Uanai cue llua jira, cuena ñnoñedomoi. ⁴⁶ ¿Nie isoide jeacino finodicue? Cuevo llono. Uanai cue lliia, ¿bue ñellena cuena ñnoñedomoi? ⁴⁷ Jusiñamuina mooredimiedi Jusiñamui uaina cacade. Jusiñamui uruiaññedomoi. Ie jira cue llua cacaiñedomoi.

⁴⁸ Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

⁴⁹ Jesús uai ote:

—Janaba illamieñedicue. Cue finoca rafuemonona cue Moona iobitadicue; iadedi iese cuena omoi ñaiamona cuena iobitañedomoi. ⁵⁰ Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi ñnoñenia, cuemo iobillacinona omoi fecañenia, cue Moo omoina duere finoite; ⁵¹ ia bu cue llua na uai ñnoia, jaca uai fioidaiñeite.

⁵² Naie illaicomini dinena uai otimaci:

—Janaba illamiediona jai uiñoticai. Abraham micori jaie fioidaite. Jusiñamuina lloraini micoriai jai jaie fioidaitimaci; iadedi: “Bu cue llua na ñnoiadedi, fioidaiñeite” raitio. ⁵³ Cai usuma Abraham micori baifemo faiñedio. Jusiñamuina lloraini micoriai baifemo faiñedio. ¿Bumiediota?

⁵⁴ Jesúsdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi; ⁵⁵ iadedi naimiena uiñoñedomoi. Naimiena uiñoticue. “Naimiena uiñoñedicue” cue raia, omoi isoi taino lloticue. Naimiena uiñoticue. Naimiena

jai ñnoticue. ⁵⁶ Omoi usuma Abraham micori enirue-mo cue ico billena jaie uiñote. Iena uiñuamona, naimie iobide.

⁵⁷ Illaicomini dinena uai otimaci:

—Odi cincuenta años nia iñedio. ¿Niese Abraham micorina ciodio?

⁵⁸ Jesús uai ote:

—Abraham micori nia iñena facaiseconi jaca iticue.

⁵⁹ Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jaide.

Jesús uisnidimiena jillotaja rafue

9 Jiairuido ie llofueoicaiganodicaí diga Jesús macaria, uisnidimiena ciode. Iese nanomona jaca naimiedi jeiciga. ² Jesúmo jicanoticaí:

—Llofueraima, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Cai mo llono.

³ Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuñede. Jusiñamui uai siñonana comini uiñollena, iese jeiciga. ⁴ Nia userena jira, cuena oretatimie ie jitailla rafuena finoacadicaí. Raire jitirenite. Ie mei bu jaca maijinite. ⁵ Enirue mo cue nia ia, comini comeciaina lligaiñoticue. —Iese Jesús llote; iadedi jaiie rafuena ñaite. Naimie nia fioidaiñenia, Jusiñamui rafuena llocana naimie jaillana ñaite. Ie fioidaillrui jai iaie iacanana ñaite. Comeciaina lligaiñuana llote, jeacino oni jaillena.

⁶ Iena lluanona eniruena tuajano, enirue idiai finuanona, uisnidimie uisina naie enirue diga riginote.

⁷ Raite:

—Siloé railla joraibimo mai noisai —raite. Siloé oni dobaiñuamona: “Oretarabi”.

Ie jira naimie noisaide. Uisi jai ciodemona, abido bite.

⁸ Billa mei, naimie ecimo itino, jai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

⁹ Jiaino raitimaci:

—Jii, naimie.

Jiaino raitimaci:

—Ieñede. Naimiena eruaide isoide.

Naimie dinena raite:

—Uisnidimiedicue; iadedi jai ciodicue.

¹⁰ Naimiemo jicanotimaci:

—¿Niese jai birui ciodio?

¹¹ Uai ote:

—Jesús raillamie enirue idiai finuano, cue uisina riginote. Cuevo llote: “Siloé railla joraibimo noisai”. Ie jira noisaidicue. Jai ciodicue.

¹² Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

Comini uisinidimie jai jilluana siadua rafue

¹³ Navui uisinidimie jai jillua mei, fariseuai dine comini naimiena uitimaci. ¹⁴ Sábadoruimo Jesúdi naimiena jillotaja jira, ¹⁵ fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

¹⁶ Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamumona naimie biñede.

Jiaino raitimaci:

—¿Niese jearede ra finouidimiedí uisinidimiena jillotaje? —Ie jira daje isoi comeciaina facañedimaci.

¹⁷ Ie jira navui uisinidimie dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedí Jusiñamui uai lloraima.

¹⁸ Naimie moo, naimie ei iaimaiaimo nia jicanoñenia, judúuai illaicomini nai iima jaca cioñenano ñinosiñede. Ie jira iaimaiaina uaiduanona, ¹⁹ jicanotimaci:

—¿Bimiedí omico jito? ¿Naimie jaca uisinino jeiciga?

²⁰ Uai otiaimaiaí:

—Ji, bimie coco jito. Jaca uisinino jeiciga. Iena uiñotico. ²¹ Niese jai naimie uisina ciuana uiñoñedico. Bu naimiena jilloitajana jai uiñoñedico. Naimiemo jicano. Naimiedí jai eimiesa. Dama ie facaina jai ñaite —uai otiaimaiaí.

²² Bie rafue nia suiñenia, judúuai illaicomini navui llotimaci: “Jesúdi cai jilloitaraíma bu lloia, cai ofiracomo naimiena fo billana rairuiticaí”. Iena jaciruillanona, ²³ llotiaimaiaí: “Naimie jai eimiesa. Naimiemo jicano”.

²⁴ Ie jira illaicomini dane naimiena uaiduano, llotimaci: —Jusiñamui iobillacinona feca. Jesúmo fecaño. Naimie jearede rafuena finouidimiena uiñoticaí.

²⁵ Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidí cioirainidicue. Birui jai ciodicue. Iena uiñoticue.

²⁶ Jicanotimaci:

—¿Niesede ra diga finuamona odi uisina ciodio? ¿Niese ona jillotaje?

²⁷ Uai ote:

—Omoímo jai lloticue; iadedí cacaiacañedomoí. ¿Bue ñellena omoímo dane lloticue? ¿Ie llofueganona jaiacadomoí?

²⁸ Riire uai otimaci:

—Naimie ie llofuegamiedio. Caidí Moisés micorí ie llofueganodicaí. ²⁹ Jusiñamui Moisés micorímo jai ie llua uiañoticaí; iadedí bimiena uiñoñedicaí. Naimie ninena billana jai uiñoñedicaí.

³⁰ Nai iima uai ote:

—Jai, naimie ninena billana uiñoñedomoí; iadedí cuena jillotaje. ³¹ Jusiñamuidí jearede rafuena finodino

ñaia uaina cacarefiñede. Naie isoidino siño rafuena finoenana uiñoticaí; iadedí Jusiñamuidí naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñoticaí. ³² Enirue finua facaisemona jaca buna uisinino jeicigamiena jilloitañede. ³³ Jesúdi Jusiña-muimona biñedimiedena, jaca buena finonide.

³⁴ Uai otimaci:

—Jamai cai nairai imiedio. ¿Niese caina llofueitio? Ie jira naimaci ofiracomona naimiena jino dotadimaci.

Jesús uisinidimie diga ñaia rafue

³⁵ Uisinidimiena jino dotajana fidianona, Jesús naimiena jenode. Baillano, jicanote:

—¿Omoí cominina jilloitaraímana ñnotio?

³⁶ Uai ote:

—¿Bumai naimie? Cuemo llono, naimiena cue ñnolle-sa.

³⁷ Jesús uai ote:

—Naimiena ciodio. O diga ñaite. Cue.

³⁸ Caiñici ifodo rainadajanona, iobillacinona fecal-lena, uai ote:

—Nama, jai o uaina ñnoticue.

³⁹ Jesús uai ote:

—Uisinidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedicaí” raitinona jillotajaíbite. Jesús “Jai maredicaí” raitinomo ite jeacino naimaci uiñollena bite.

⁴⁰ Naimie ecimo ite fariseuai iena cacajano, jicanotimaci:

—¿Uisinidomoí caina raitio?

⁴¹ Jesús uai ote:

—Uisinidino isoi itomoina, omoímo ite jeacino omoí muidonañede; ia “Jai ciodicaí” omoí railla jira, omoímo ite jeacino omoí muidona.

Iese raite; ia naimaci comeciaina ñaite. Jeacino naimacimo illana naimaci uiñoiacañena jira, iese ñaite. Naimaci jeacino oni dotajana jitañedimaci.

Toica llaudaiaí sedaraima rafue

10 Jesús dane llofueete:

—Cue rafuena omoí raise uiñollena, toica llaudaiaína ñaiticue. Llaudaiaí jino uicabilla isoi, llaigafomo nasedo fo jaidimiedí naie llaudaiaí sedaraima; ia jinofebei dinena bitimiedí firiraima. ³ Llaigafomona llaudaiaí sedaraima fo jaillena, nase sedaraimadí nase econote. Llaudaiaí naimie uaina uiñotimaci. Imaci mameciaido uaiduamona, llaigafomona jino bitimaci. ⁴ Nana ie llaudaiaí jino bia, naimacina ifode. Naimie uaina uiñuanona, naimiena racadimaci. ⁵ Naimaci uiñoñegamiena racañedimaci; iadedí naimie uaina naimaci uiñoñena jira, naimiemoni aisidimaci.

⁶ Bie isoidicinona Jesús llofueete; iadedí naie comini iena cacañedimaci. ⁷ Ie jira Jesús dane llofueete:

—Llaigafo ie nase isoidicue. ⁸ Damierie fiirirainina bitimaci. Ie jira llaudaiaia naimaci uaina cacaiñedimaci. —Iese Jesús llofuete; ia naimiena ñnotinona ñaite. Naimiena abi caitadinona ñaite. Naimie ñnotinona naimiena abi caitadino llogacinomo cacarefiñena ñaite. ⁹ Nia llofuete:

—Llaigafo isoidicue. Bu cue nasedo fo bia, jilloite. Llaudaiaia isoi fo biite. Jino jaite. Mare guille baite isoite. —Iese llofuete; ia naimiena ñnotinona marena illana ñaite. Naimiemona naimaci jitailla rafuena uana ñaite. ¹⁰ Nia llofuete:

—Llaudaiaia fiillena, meinellena, faifillena, fiiriraima bite; iadedi cominina jaca raise itatallena, biticue.

¹¹ Llaudaiaia marena sedaraimadicue. Mare sedaraimadi ie toinaia facaina riiduanona ie abina faifite.

¹² Janallari bia, llaudaiaia naimie ieñena jira, jamai maijidimiedí, llaudaiaia fainonocaillano, ecimona aiside. Llaudaiaia janallari gaitaacanamona, llaudaiaia tuudimaci. ¹³ Jamai ucube oiacanano, isiruiñenano, jamai maijidimie aiside. ¹⁴ Iese iñedicue. Mare sedaraimadicue. Cue llaudaiaia uiñoticue. ¹⁵ Cue Moo diga conimana coco uiñua isoi, naimaci cuena jiaia uiñotimaci. Cue llaudaiaia facaina fioidaicue. —Iese Jesús llofuete; ia naimiena ñnotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiaia fioidiacade. ¹⁶ Nia llofuete:

—Jiaie llaigafo jiaie llaudaiaia cuemo ite. Naimacina jiaia atiacadicue. Cue uaina cacaitimaci. Ie mei danomo nana cue llaudaiaia iitimaci. Naimacina dama sedaiticue. —Iese Jesús llofuete; ia jiaie nairaiaimo naimiena ñnotinona ñaite. Dajena naimacina sedajana ñaite.

Jesús fioidaille rafue

¹⁷ Jesús nia llofuete:

—Cue jai fioidaiacanamonona, cue Moo cuena isiruite. Fioidaillamonona dane jilloiticue. ¹⁸ Cue jitaiañena, jaca buna cuena meineñeite. Cue jitailla jira, fioidaiticue. Siño uai cuemo illa jira, cue jitailliruimo fioidaiticue. Cuemo cue Moo siño uaidi jai illa jira, dane jilloiticue.

¹⁹ Jesús iese llofuia jira, juduaia illaicomini daje isoi comeciaina facañedimaci. ²⁰ Jiaia nodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

²¹ Jiaia raitimaci:

—Bie isoidicinona Janaba illamie llofuenede. Janaba illamie uisindimienona jillotanide.

Jesús ie Moo diga daje isoi comeci lloilla rafue

²² Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite. ²³ Salomón micori finotaga jofo abi ibirimo Jesús macarite. ²⁴ Naie facaise juduaia illaicomini naimie dine bitimaci. Jicanotimaci:

—¿Niruido caimo ona lloitio? Odí cai Jilloitaraimania, caimo marefodo llono.

²⁵ Jesús uai ote:

—Omoimo jai lloticue; iadedi ñnoñedomoi. Cue Moo mamecido cue finoca rafuemonona cuena uiñotomoi.

²⁶ Cue toica llaudaiaimo omoi jainaiañena jira, cuena ñnoñedomoi. ²⁷ Cue toica llaudaiaia cue uaina cacadimaci. Naimacina uiñoticue. Cuena racadimaci.

²⁸ Naimaci jaca itataticue. Jaca abina faifiñeitimaci. Cue anamonona jaca budi naimacina bairoñeite. ²⁹ Cue Moo naimacina cuemo fecade. Naimacidi jiaia baiñemofaitimaci. Naimiemona jaca budi naimacina baiñonide.

³⁰ Cue Moo diga daje isoi comeci lloidicoco. —Iese llote; ia naimiena ñnotinona ñaite. Naie illaicomini naimiemo jainaiañena jira, naimiena ñnoñedimaci. Iena Jesús ñaite.

³¹ Jesús llofuiana cacajano, naie illaicomini noficina llinotimaci, naimiena meinellena. ³² Iena cianonona, Jesús llote:

—Cue Moo uaido diga mare rafuena fioidicue. ¿Nie isode rafuena cue finua muidona, cuena meineiacadomoi?

³³ Uai otimaci:

—Mare rafuena o finua muidona, ona meineñeiticaia. Jamai iimadio. “Jusiñamuidicue” o railla jira, ona meineiticaia. Jusiñamui Joreñona jiaia jeare ñaitio.

³⁴ Jesús dinena uai ote:

—Jiaie ciegafuiaia jamainidicaia. Nainomoi Jusiñamuidi naimie uaina cacadinomoi jiaie llote: “Omoidi jusiñamuilladomoi”. Jusiñamui ie uaina cacadinomoi jiaie iese lloide, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ñaitio” raitomoi. ³⁷ Cue Moo isoi cue fiñoñena, cuena ñnoñeno; ³⁸ iadedi cuena omoi ñnoiacañena, cue Moo isoi cue fiñoia, naie rafuena ñno. Iemei cue Moomoi cue jainaiaillana uiñoitomoi. Cuemo cue Moo jainaiaillana jiaia uiñoitomoi.

³⁹ Iena cacajano, naimiena dane gaitaacadimaci; iadedi naimacimona jillode.

⁴⁰ Ie mei Jesús Jordán railla ille ruica díbeimo jaide. Nainomoi Juan micori cominina nano bautizade. Nainomoi rillanona, nainomoi Jesús fiebide. ⁴¹ Ailluena comini Jesús dine bitimaci. Coninina raitimaci:

—Juan micori siño rafuena fiñoñede; iadedi nana Juan micori Jesúsna llucinodi uanaicino.

⁴² Nainomoi ailluena comini Jesús naimaci Jilloitaraimana ñnotinomoi.

Betaniamo Jesús abido jailla rafue

11 Naie facaise Betaniamo Lázaro raillamiedi duide. Naimie miriñodi Marta, María iaiañuaia.

² Naie Mariadi jiairuido Jesús eillimo caimare soride rana totade. Ie mei naiañaiño ie ifotie diga naimie eillina safenaillena dote. ³ Naie iaiañuaia Jesús dine uaina orediaiañuaia, naimie billena. Naimie jibuisaibillena llotatiaiñuaia:

—Nama, o isiruigamie duide —lloatatiaiñuaia.

⁴ Jesús naie rafuena fidiano, llote:

—Jamai fioidaillena naimie duiñede. Jusiñamui uaina siñonona comini uiñollena, naimie duide. Iemona

comini dinena: “Ua Jusiñamui Jitodio” cuena raitimaci.

⁵ Jesúdi Lázaron a isiruite. Ie miriño iaiñuaina jiaí isiruite; ⁶ iadedi Lázaro duillana Jesús fidiano, naimie dine jaiñede. Naimie illanomo menarui nia fiebide. ⁷ Ie mei ie llofueoicaiganodicaímo llote:

—Judeamo abido dane mai cai jailli.

⁸ Uai oticai:

—Llofueraíma, judíuai illaicomini birui noficina ona fairinoiacadimaci. ¿Niese naimaci dine dane jaitio?

⁹ Uai ote:

—Nagarui userede. Userenia bu macaria, raise ciua jira, eicaitañede; ¹⁰ iadedi bu naiona macaria, raise cioñena jira, eicaitaide. —Iese llofujete; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

¹¹ Dane llote:

—Lázaro jai inide; iadedi naimiena casitallena, jaiticue.

¹² Uai oticai:

—Nama, naimie jamai iniia, nia dama casite.

¹³ Naimie jafaici uanona iniamo comeciaina facadicaí; iadedi Jesús naíena lloñede. Lázaro fiodaillana ñaite.

¹⁴ Ie jira Jesús caímo marefodo llote:

—Naimie jai fiodaite. ¹⁵ Nainomo cue iñena jira, cue siño uai omoi ñnollena, omoi facaina iobidicue. Naimie dine mai cai jailli.

¹⁶ Caimona Tomás caímo llote:

—Maiña. Naimie diga fiodaisaiticai —llote. Tomás mameci jiaicidi Dídimio. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raiafomo jai nagaamagarui illana fididicaí. ¹⁸ Jerusalémona Betaniamo tres kilómetros dinori illa jira, ¹⁹ diga judíuai illaicomini eedollena, Marta iaiñuai María dine bitimaci. ²⁰ Jesús billana Marta fidiano, cai dine naisomo bite; iadedi jofomo María fiebide. ²¹ Jesúmo Marta llote:

—Nama, o bene itiona, cue iio fiodañede; ²² iadedi Jusiñamuimo buena o jicaia, naimie iena fínoite. Iena uiñoticue.

²³ Jesús dinena uai ote:

—O iio abido jilloite.

²⁴ Naiñaiño uai ote:

—Nana comini jilloilliruiimo naimie jiaí jilloite. Iena uiñoticue.

²⁵ Jesús uai ote:

—Fiodaillamona comini abiaína Jilloitaraimadicue. Jusiñamui diga jaca illena, cominina itataraimadicue. Bu cuena ñnuanona, fiodaiadedi, iemona íco jilloite.

²⁶ Cuen a ñnotimiena Jusiñamui illanomo jaca illena itaiticue. ¿Iena ñnotio?

²⁷ Naiñaiño uai ote:

—Jií, Nama; odí cai Jilloitaraimadio. Odí Jusiñamui Jitodio. Jusiñamui dinena o billamo jaie ocuiridicaí.

²⁸ Iese raillanona, jofomo Marta abido jaide. Ie euñona uaiduano, anado llote:

—Llofueraíma jai ride. Ona uaidote.

²⁹ Iena cacajano, raire cai dine María bite. ³⁰ Marta diga ie ñaianomo Betania ecimo Jesús nia ite. ³¹ Jesús dine María nia jaiñenia, judíuai illaicomini María nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci. ³² María Jesús dine rillano, naimiena duenaillano, caiñici ifodo rainadacaida, llote:

—Nama, bene itiona, niadedi cue iiodi fiodañede.

Jesús Lázaron a jillotaja rafue

³³ María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite. ³⁴ Jicanote:

—¿Ninomo Lázaron a raitomoi?

Uai otimaci:

—Nama, mai jibuisaíbi.

³⁵ Lázaron a duenaillanona, Jesús eede. ³⁶ Iena ciuanona, judíuai illaicomini dinena llotimaci:

—Ero. Naimiena eo isiruite.

³⁷ Jiaíno raitimaci:

—Navui uisinidimiena jillotate. ¿Bue ñellena bimiena jilloitañede, naimie nia fiodañenia?

³⁸ Iena cacajanona, ie siño uai finuana naimaci nia raise ñnosñena jira, Jesús comeci dane sunaite. Oni jaillanona, raiafomo ridicaí. Nofici motomo ite naie raiafo. Ifodi jiaie noficina íbaica. ³⁹ Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

⁴⁰ Jesús uai ote:

—Cuen a o ñnoia, Jusiñamui uai siñonana uiñotio.

⁴¹ Iemona cominidi noficina oni ñuitadimaci. Jesús monamo eruañllano, llote:

—Moo, cue uaina o cacaja jira, iobidicue. ⁴² Jaca cuena cacadio. Iena uiñoticue; iadedi cue diga bene itino illa muidona, iese ado lloticue. Cuen a o oretajana naimaci ñnollena, o diga ado ñaiticue.

⁴³ Ie mei eo ado llote:

—Lázaro, jino bi.

⁴⁴ Nai fiodaitimie nia naimie abi nana ferinua ra diga jino bite. Jesúdi cominimo llote:

—Naimie abi ferinua oni suiño. —Ie jira suiñodimaci.

⁴⁵ Ie muidona María diga bitinomona ailluena comini Jesúna ñnotimaci. Naimie finoca rafuena ciuanona, ñnotimaci.

Jesúna meinellena, illaicomini comeciaina facaja rafue

(Mt 26.1-5; Mr 14.1-2; Lc 22.1-2)

⁴⁶ Jesúna ñnoñedinomona damierie Jesús finoca rafuena fariseuai dine lluidimaci. ⁴⁷ Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaíticai? Diga siño rafuena ua finocabide. ⁴⁸ Naimiena niese cai nibaíñenia, nana comini naimiena ñnoitimaci. Nana comini naimie díbeimo jaia, naimaci illaimana naimie jaillana jitaiti-

maci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiaí fuidoitimaci. Iena jitaiñedicaí.

⁴⁹ Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi. ⁵⁰ Iese cai nairaimo suiñellena, damie cai nairai facaina fiodaite-na, mare. Iena nibai nia raise uiñoñedomoi.

⁵¹ Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

⁵² Cai comini facaina dama fiodañede; iadedi nana Jusiñamuina ñinoitinona facaina fiodaite. Diga nairaiamoi itimaci; iadedi naimiemo dajena nana naimaci duilena, naimie fiodaite. ⁵³ Caifás llua naimaci cacajamona, judíuai illaicomini comeciaina nia facadimaci, naimiena meinellena.

⁵⁴ Ie jira Jesús judíuai illaicomini illa motodo marefodo macariñede. Jofue iñena dofodo jaidicaí. Efraín raila nairai dine ridicaí. Nainomo diga irui iticaí. ⁵⁵ Pascua railla rafue aire iacana jira, ailluena comini Jerusalémo naimaci nairaiamona jaidimaci. Rafue nia taineñenia, naimacimo ite rafue oni jaillena, cai einamaci llua isoi finodimaci. ⁵⁶ Jusiñamui diga nanoca ñairainidi fariseuai diga navui ñaitimaci:

—Bu Jesúsna cioia, naimiena cai gaitallena, caimo llono.

Rafuemo bitino illamona, Jesúsna jenodimaci. Jusiñamui jofomo naimaci ia, coninimo jicandodimaci:

—¿Niese comeciaina facadomoi? ¿Jesús bene biite? Cai illaicomini llua jira, nibai jai biñeite. Illaicomini llua na fidiano, naimie biñeite.

Betaniamo Lázaro jofomo Jesús guilla rafue

(Mt 26.6-13; Mr 14.3-9)

12 Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaron fiodaillamona navui jillotate.

² Jesúsni iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaí jiaí motomo guiticaí.

³ Iemei Maríadi nardomona finoca caimare soride ra Jesús eillno totade. Daje botella raifi totade. Safenaillena naiñaiño ifotie diga ie eillna dote. Nai caimare soride ra eo raifide. Daje botella ite. Iemona nana jofojeradi soride. ⁴ Caímona Judas Iscariote micorina mameciredimie ite. Jesúsna gaitataitimie. Llote:

⁵ —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote. ⁶ Dueredinona naimie duenaiñede; iadedi naimie cai ucubena sedade. Naimiedi firiraima. Naie ucubemona fñuilla jira, iese naimie llote.

⁷ Jesús uai ote:

—Dama ite. Bie soride ra naiñaiño jai eenoga cue fiodaillirui iena. ⁸ Dueredino omoi diga jaca iitimaci; iadedi omoi diga jaca iñeiticue.

Ailluena comini Lázaron a cúa rafue

⁹ Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázaron Jesús jillotaja jira, Jesúsna dama cioiacañedimaci; iadedi Lázaron jiaí cioiacadimaci. ¹⁰ Ie jira Jusiñamui diga nanoca ñairainidi Lázaron jiaí meinellemo comeciaina facadimaci. ¹¹ Lázaro muidona ailluena judíuai illaicomini naimaci illa díbei fañonocaida, Jesúsna ñnotimaci.

Jerusalémo illaima isoi, Jesús marena jailla rafue

(Mt 21.1-11; Mr 11.1-11; Lc 19.28-40)

¹² Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaron Jesús navui jilloitajana diga comini cioidimaci. Iena llocana uitimaci. Ie jira ailluena comini Jesús dine jaidimaci. ¹³ Raforona uanona, naimiena feñollena, naimie uicomo jaidimaci. Ado cuiriisite:

—¡Cai jilloitaraima billa! ¡Jusiñamui mamecido bitimie eo mare! ¡Cai Illaima eo mare! —cuiirisite.

¹⁴ Jesúsni ailli baiga burrito emododo jaide. Jusiñamui facaina lloraíma micori jaie llua isoi jaide. Jaie llote:

¹⁵ “Jerusalén imaci, jacinañeno. O Illaima burrito emododo biite”. ¹⁶ Naie facaise bie rafuemo comeciaina facañedicaí; iadedi Jesús jillua mei, bie rafuena comeciticaí. ¹⁷ Lázaron Jesús jillotaja jira, ailluena comini Jesús dine jaidimaci. ¹⁹ Iena cüano, fariseuai coniniri ñaitimaci:

—Jaca buena birui finañedicaí. Ailluena comini Jesús díbeimo jai jaidimaci.

Judíuaiñedino Jesúsna cioiacana rafue

²⁰ Judíuaiñedino Jusiñamuina sedallena, pascua railla rafuemo jiaí bitimaci. ²¹ Naie facaise cai dine bitimaci. Felipedi Galilea ie Betsaida nairai imiñena jira, Felipe dine bitimaci. Felipemo llotimaci:

—Jesúsna cioiacadicaí.

²² Felipe iena Andrémo llote. Ie mei Jesúsno lluaidiamai. ²³ Jesús uai ote:

—Monamona biticue; ia jai cue fiodaille facaise ride. Comini cue uaidi siñonana uiñua facaise jai ride. ²⁴ Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodañenia, jaca bu jillobiñeite. Cue fiodaillamona ailluena comini jillobitimaci. ²⁵ Ie abimo ite rafuemo comecina dama bu facaia, ja muidomo fañite; ia cuemo ite rafuemo comecina bu facaia, monamo jaca iite. ²⁶ Cüena bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena caimare itataite. ²⁷ Cue comeci jai rucaicuerite; iadedi, ¿ñiese raiticue? Raiñeiticue: “Moo, cue fiodaillamona

cuenta jillote". Fiodaillena biticue. Ie jira raiticue:

²⁸ "Moo, cominina o uai siñonana uiñota".

Ieconí monamona Jusiñamui llote:

—Jai iena finodicue. Dane iena finoiticue.

²⁹ Jusiñamui ñaiana nainomo ite comini raise ca-cañenano, raitimaci:

—Mona gurude.

Jiaino raitimaci:

—Naimiemo Jusiñamui jaienici llote.

³⁰ Jesús uai ote:

—Cue facaina naie lluaana cacaiñedomoi; iadedi omoi facaina iena cacadomoi. ³¹ Cuen a uiñoñedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafefitaite. ³² Cruzmo cue fiodaia, naimacina jilloitallena, ailluena cominina cue dibeimo itataiticue. ³³ —Naimie fiodaillana naimaci uiñollena, iese llote.

³⁴ Naie comini uai otimaci:

—Jusiñamui facaina lloraini micoriai jaie cuega: "Cai Jilloitaraima jaca fiodaifeite". ¿Niese raitio: "Jusiñamui mona biticue; ia fiodaiticue"?

³⁵ Jesús dane uai ote:

—Cue llofua dinori omoi comeciaina nia lligaiñoticue. Cue lluaamo cacarei. Omoi diga cue nia ia, cue llofuiaamo cacarei. Jitiredemo bu macaria, nai illana raise uiñoñede. Ie isoide. Jeacino anamo itinodi jitiredinomo itimaci isoidimaci. Uanaicinona uiñoñedimaci. ³⁶ Jeacino anamona omoi jilloillena, cue llofua uaido omoi comeciaina birui lligaiñoticue. Cue uaina ñno, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina ñnoñena rafue

³⁷ Jesús diga siño rafuena finode; iadedi ailluena comini: "Naimiedi cai Jilloitaraima" raillana nia ñnosñede. ³⁸ Iemona Isaías micori jaie cuegafuai suide. Naimie jaie cuega:

Jusiñamui, cai lluaicinona cacadimaci.

O siño uaido o finoca rafuena jiai cioidimaci; iadedi ñnoñedimaci.

³⁹ Isaías micori dane cuega:

Naimaci ctoi raillano, Jusiñamui naimacina uisnidino isoi itatate.

Naimaci comeciaina abina uiñoi raillano, naimaci comeciaina feitate.

Naimiena ñnoi raillano, iese naimacina jai itatate. Ie jira jai ñnonidimaci. ⁴¹ Jusiñamui ie ebirede rafuena naimie ciuamona, Isaías micori iena llote. Isaías micori Jesúsna llote. ⁴² Isaías micori iese llote; iadedi ailluena judúuai illaicomini Jesús uaina ñnotimaci. Fariseuaina jaciruillanona, iena janotimaci. Naimaci ofiracomona naimacina jino dotajana jaciruitimaci. ⁴³ Comini naimacina iobitajana naimaci eo jitaila jira, dotajana jitañedimaci. Jusiñamuimo ite iobillacinona raise oia-caiñedimaci.

Jesús ie Moona ñaia rafue

⁴⁴ Naie facaise Jesús eo ado llote:

—Cuenta ñnotimie cuenta oretatimiena jiai jai ñnote.

⁴⁵ Cuenta cioidimie cuenta oretatimiena jiai ciode isoide.

⁴⁶ Comini comeciaina lligaiñollena biticue. Ie muidona naga cuenta ñnotimie jitiredinomo jai iñede. Jeacino anamo jai iñede. ⁴⁷ Cue uaina cacajano ñnoñedimie mo juez isoi birui lloñedimie. Cominina duere finollena, biñedimie; iadedi naimaci jeacinomona naimacina jilloitallena biticue; ⁴⁸ ia cuenta bu ñnoñenia, cue uaina naimie ñnoñenia, ja muidona faifite. Cue uaina naimie ñnoñellemona, nana naimiena ñnoñedino janafefillirui mo Jusiñamui naimiena ico duere finoite. Cuenta jitañedimie, cue uaina jitañedimie comini janafefillirui mo janafefite. ⁴⁹ Dama cue comeci facaja uaido lloñedimie. Cue Moo cuenta oretaja muidona, cue Moo cuemo lloga uaido lloticue. ⁵⁰ Cue Moo lloga uaidi naimie dibeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

Jesúdi ie llofueoicaigano eilliana jocua rafue

13 Pascua railla rafue riacana areruido ia, Jesús ie Moo dine abido jaiacanana uiñote. Naimaci diga naimie nia ia, ie cominina jaca eo isiruite. ² Jesúsna gaitatallena, naie facaise Taifedi Judas Iscariote micori comeciina feidote. Judas micori Simón jito. ³ Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaillena jiai uiñote.

⁴ Nairuido Jesús cai diga guite. Guilla meinoconi, Jesús a naidacaida ie abimo ite iniroina duiñode. Abi dora diga ie moillina ferinote. ⁵ Janorede nogomo jinuina totaja mei, cai eilliana jocode. Safenaillena, ie dora diga dote. ⁶ Simón Pedro dine naimie ria, Pedro jicanote:

—Nama, ¿cuenta eillina jiai jocoitio?

⁷ Jesús uai ote:

—Cue finoca rafuena birui uiñoñedio; iadedi jiairuido uiñoitio.

⁸ Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñeitio.

⁹ Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi diga, jiai joco.

¹⁰ Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeci jiai jai jeanide; iadedi omoimona damie comeci nia jearede.

¹¹ Naimiena gaitataiacadimiena naimie uiñua jira, iese llote.

¹² Cai eilliana jocua mei, ie iniroi dane jitaia mei, dane ana rainadajanona, caimo jicanote:

—Omoimo ailli cue finoca rafuena nibai raise ca-caiñedomoi. ¹³ Cuenta "Cai Nama" raicabitomoi. "Cai llo-

fueraima" cuena jiaí raicabitomoi. Iese cuena omoi raia, mare. Ie isoi iticue. ¹⁴ Omoi Namadicue. Omoi llofueraimadicue; iadedi omoi mullaima isoi iticuedena, omoi eilliaína jai jocodicue. Omoi jamai bue isoidinomona, omoi eilliaína danirie jocua. ¹⁵ Cuemona fueo. Abi iedoñeno cue isoi omoi jai. Cue afemo iñedomoi. ¹⁶ Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaína jocodicue. "Jiaimie afemo iticai" raillanomo comecina omoi facañeno. ¹⁷ Bicino omoi uiñuamona, iese omoi finoia, caimare iitomoi. ¹⁸ Nana omoína iese ñañedícue. Nana cue fetocanona uiñoticue. David micorí jaié llote: "Cue diga guitinomona damie cuena enoidimie ite". ¹⁹ Bie nia suiñenia, iena jai lloticue. Iena cuemo suilla mei, David micorí llogacino raise ñnoitomoi. ²⁰ Uanai lloticue. Cue oretagamiena bu feiñoia, cuena jiaí feiñote. Bu cuena feiñoia, cuena oretatimie-na jiaí feiñote.

Jesúdi ie gaitataitimiéna llua rafue

(Mt 26.20-25; Mr 14.17-21; Lc 22.21-23)

²¹ Jesús iese llua mei, ie comeci sunaite. Llote: —Uanai lloticue. Omoimona damie cuena gaitataite. ²² Caimona ¿nimie naimiéna gaitataite? raillanona, comecina facajano, coninimo eroridicai. ²³ Cuena Jesús eo gaía jira, Jesús abimo iticue. ²⁴ Cuena uaiduanona, Pedro cuemo llote: —"¿Bu ona gaitataite?" Jesúmo jicano. ²⁵ Ie jira Jesúmo jicanoticue: —Nama, ¿bu ona gaitataite? ²⁶ Jesús uai ote: —Bie llomeniconna mutajanona, naimiemo fecaiticue —raite. Mutaja mei, Judas micorímo fecade. Naimie micorídi Simón Iscariote jito. ²⁷ Llomeniconna guilla meinonni, Taife anamo Judas micorí illamona, Taife naimie comecina feidote. Jesús naimiemo llote: —O finoacaga rana raire fino. ²⁸ Jesús Judas micorímo llua raise uiñoñedicai. ²⁹ Judas micorí ucubena sedaja jira, jiaíno comecina facade: " 'Cai jitaile guille íbarisai' Jesús naimiemo llote". Iese lloñenia, " 'Janore ucube dueredinomo feca' nibaí naimiemo llote". ³⁰ Guilla mei, Judas micorí jino jaide. Naie facaise jai jitiñeficaide.

Jesús ie fiodaillena ñaía rafue

³¹ Judas micorí jailla mei, Jesús llote: —Jusiñamui mona billanona, imana jaidicue; ia cue fiodaile facaise jai ride. Cue fiodaillmona cominidi Jusiñamui uai siñonana uiñoitimaci. ³² Iemona Jusiñamui uai siñonana comini uiñoia, Jusiñamuidi cominina cue siño jitona jiaí uiñotaite. Iese ja finoite. ³³ Cue comini, dallu omoi diga bene iticue. Jaiticue. Cue diga iacanitomoi. Judíuai illacominimo navui cue llua isoi, omoimo ja lloticue. Cue jaillinomo nia jaiñeitomoi. ³⁴ Ie jira jiaie rafuena omoimo ja lloticue. Omoína cue isiruilla isoi, coninina omoi isirui. ³⁵ Coninina omoi

isiruillamona, jiaie cominidi cue cominidomoina uiñoitimaci.

Pedro Jesús diga ñaía rafue

(Mt 26.31-35; Mr 14.27-31; Lc 22.31-34)

³⁶ Naie facaise Pedro naimiemo jicanote: —Nama, ¿nine jaitio? Jesús uai ote: —Cue jaillinomo cue diga ja jaiñeitio. Jiaíruido jaitio. ³⁷ Pedro uai ote: —Nama, ¿bue ñellena ja jaiñeticue? O jitaia, o facaina ja fiodaíticue. ³⁸ Jesús dinena uai ote: —Cue facaina fiodaicadio. Uanai omo lloticue. Nia monañenia, iitava nia ñañenia, dacaiño amani cuena janoitiosa.

Jesús ie Moo dinomo rille rafue

14 Jesús ie llofueoicaiganodicaina nia llofute: —Rucaicueriñeno uri i. Jusiñamuina ñnocana jai. Cuena jiaí ñnocana jai. ² Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue. ³ Fuiduanona, dane abido biitcúe. Omoína cue dine uillena, cue dine omoi illena, biitcúe. ⁴ Cue jaillinona birui uiñotomoi. Nainomo omoi rillena jiaí uiñotomoi. ⁵ Tomás uai ote: —Nama, o jaillinona uiñoñedicai. ¿Niese nainomo riticai? ⁶ Jesús uai ote: —Omoi naiso isoidicue. Uanaicinona lloticue. Cue Moo díbeimo cominina jaca itataticue. Cue Moo dine joide naiso isoidicue. Jaca dasode cue Moomo duide naídi. Cue Moo dine o ria, cuena ñno. ⁷ Cuena uiñotomoina, cue Moona jiaí uiñotomoi. Biruidemona naimiéna uiñoitomoi. Naimiéna jai ciodomoi. ⁸ Felipe uai ote: —Nama, o Moona caimo acata. Iemo jai macaibaite. ⁹ Jesús uai ote: —Felipe, are omoi diga iticue; iadedi cuena nia uiñoñedomoi. Cuena ciodimie cue Moona jiaí jai ciode isoide. ¿Niese llotio: "O Moona caimo acata"? Cue Moona jai ciodio isoidio. ¹⁰ Cue Moo diga daajedicoco. Iena nia ñnoñedio. Cue lluaí cue Moo uai. Cue lluaí cue comeci iuaiñede. Cue motodo naimie maijide. ¹¹ Cue Moo diga daajedicocona ñno. Cue uaina omoi ñnoñenia, siño rafuena cue finua jira, cuena ñno.

Jesús ie Moo Joreña llua rafue

¹² Jesús nia llofute: —Uanai lloticue. Cuena omoi ñnoia, cue finoca rafuena jiaí finoitomoi. Cue Moo dine cue jailla jira, cue Moo Joreña omoi dine cue oretaja mei, cue finua baífemo finoitomoi. ¹³ Cue Moo uai siñonana omoi uiñollena, buena cue díbeido cue Moomo omoi jicaia, nana iena finoitcúe. ¹⁴ Cue díbeido omoi jicaia, iena finoitcúe. ¹⁵ Cuena omoi isiruia, cue llogacinuaina

ñnoitomoí. ¹⁶ Ie Joreño omoímo fecallena cue Moomo jñitícue. Naie Joreñodí omoína canoite. Omoí diga jaca iite. ¹⁷ Uanaicinona llocabite. Naimiēna naimaci uiñoñena jira, cuena ñnoñedino naimiēna feiñonidimaci; iadedí naimie omoí diga illa jira, naimiēna uiñotomoí. Omoí diga jaca iite. ¹⁸ Omoína fainonocaiñeiticue; ia dane biitícue. ¹⁹ Nano nigarui illanona, cuena ñnoñedino cuena nia cioitimaci. Ie mei cuena cioñeitimaci; iadedí fiodaillamona cue jillua mei, cuena nia cioitomoí. Cue jaca illa jira, jiaí jaca iitomoí. ²⁰ Fiodaillamona cue jillua mei, cue Moomo cue duillana raise uiñotomoí. Cuemo omoí duillana jiaí raise uiñotomoí. Omoímo cue duillana jiaí raise uiñotomoí. ²¹ Cue llogacinuaina omoí isiruia, cuena isiruitomoí. Ie jira cue Moodí omoína jiaí isiruite. Omoína jiaí isiruitícue. Omoína cuena uiñotaitícue.

²² Iscariotena mamecifeñede Judas naimiēmo jicantote:

—Nama, ¿bue ñellena daní caina ona uiñotaitio; iadedí jiaie cominina ona uiñotañeítio?

²³ Jesús uai ote:

—Cuena isiruitinona cue rafuena uiñotadícue. Bu cuena isiruia, cue llogacinuaina ñnoite. Cue Moo naimiēna isiruite. Iemona naimiēna nabaitícoco. ²⁴ Bu cuena isiruñenia, cue llogacinuaina ñnoñede. Cue llogacinodí cuejeñede. Cue Moo ie. Naimie cuena oretate. ²⁵ Omoí diga nia cue illamona, bie llogacinuai omoímo jai llotícue. ²⁶ Cue Moodí omoína canollena, naga rafuena omoína llofuellena, cue facaina ie Joreñona omoímo oretate. Omoína nana omoímo llogacinuaina comecitaite. ²⁷ Cue Moo ñine jaitícue; iadedí omoí comeciaina uri itataitícue. Cuena ñnoñedino omoí comeciaina iese itatanidimaci. Jarire iñeno. Jaciruiñeno. ²⁸ Aillí cue llua cacadomoí: “Cue Moo ñine jaitícue; iadedí dane biitícue”. Cue Moo ñine cue jailla jira, cuena omoí isiruia, cueri iobitomoí. Cue Moo cue afemo ite. ²⁹ Bie rafue cuemo nia suiñenia, uicodo omoímo iena jai llotícue. Naie sua, cuena fainonocaiñeno omoí jaillena jitaídícue. ³⁰ Omoí diga are nia ñañeítícue. Cuena ñnoñedino anamo itimie cuena jai duere finoacade. Taifena ñaitícue. Naimie anamo iñedícue; ³¹ iadedí cue Moona cue isiruillana cuena ñnoñedino uiñollena, cue Moo cuemo llua isoi, fñoitícue. Mai cai jaillí.

Uvas railla riará ie rafue

15 Jesús nia llofueite:

—Cue ñibeimo marena omoí illena omoí raise uiñollena, jiaie rafuedo iena llofueitícue. Uvas railla ua riaradícue. Cue Moodí uvas railla riará sedaraima. ² Cue amena igailaidomoí. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide. ³ Cue llogacinuaido jaillamona, jai jaigaica isoidomoí. Iemona omoí comeciái jai jeanide. ⁴ Cuena nabai. Ona jiaí nabaitícue. Naie amenamo jai ñuñena jira, daje ñibegaise jaitaca igaidí jai llisiñede. Ie isoide. Cuena omoí nabaicabiñenia, llisiñede igai isoidomoí. Ie jira cuena nabai. ⁵ Uvas railla riaradícue.

Cue amena igailaidomoí. Cuemo omoí ñuñedí, omoímo cue ñuñedí, eo lliside isoidomoí; iadedí cuemo omoí ñuñenia, jaca llisiñede isoidomoí. Cuemo omoí ñuñenia, cue jitailla isoi mare rafuena jaca finoñeítomoí. ⁶ Jai ñuñede igailai safenailla mei, marañena jira, jobaillena, danomo ofitaticai. Cuemo ñuñedimie jai ñuñede igai isoide. Jusñamuimona duere sefuite. ⁷ Cuena omoí nabaia, cue uaina omoí feitañenia, omoí jitailla rana jica. Ie mei feiñotomoí. ⁸ Eo lliside omoí isoia, cue Moo iobide. Iese omoí ia, ua cue cominidomoí. —Iese Jesús llofueite; ia naimie ñibeimo naimaci raise illena ñaite. Mare rafuena naimaci fino-cana jaillena ñaite.

⁹ Nia llofueite:

—Cuena cue Moo isiruilla isoi, omoína isiruitícue. Cuena nabaicabi. ¹⁰ Cue Moo llogacinuaina cue ñnuamona, naimie isiruillacino anamo itícue. Cue Moo llogacinuaina omoí ñnuamona, cue isiruillacino anamo itomoí. ¹¹ Cue isoi omoí comeciái eo caimarellena, bicinuai omoímo llotícue.

¹² Dane bie rafuena llotícue. Omoína cue isiruilla isoi, coninina omoí isirui. ¹³ Naimaci o isiruillamona, o nabaiñiaí facaina o fiodaia, naimacina eo ua isiruitio. ¹⁴ Cue llogacinuaina omoí ñnoia, cuena nabaidomoí. ¹⁵ Omoína “Cue mullaiaidomoí” jaca raiñedícue; iadedí omoína “Cue nabaiñiaidomoí” birui raitícue. Mullaiaí imaci patrón fino-ca rafuena uiñoñedimaci. Ie jira nana cue Moomona cue cacaja rafuena omoímo jai llotícue. Ie jira nana cue rafuena jai uiñotomoí. ¹⁶ Cuena fetodidomoí; iadedí omoína fetodidícue. Omoí lliside isoicabilana omoímo jai llotícue. Ie mei buena cue mamecido cue Moomo omoí jicaia, omoímo fecaite. ¹⁷ Coninina omoí isiruillena jai llotícue.

Cominí Jesúsna enoilla rafue

¹⁸ Jesús nia llofueite:

—Cuena ñnoñedino omoína enoia, nano cuena jai enoidimaci. Iena uiñotomoí. Omoína nia enoiñenia, cuena jai enoidimaci. ¹⁹ Naimacimo jainaiñidomoína, omoína isiruitimaci; iadedí naimacimo omoí jainaiñiēna jira, omoína cue fetua jira, omoína enoidimaci. ²⁰ Omoímo jai llotícue. Illaíma duere sefuiia, naimie anamo itino jiaí duere sefuidimaci. Ie isoide. Cuena cominí duere finua isoi, omoína jiaí duere finoitimaci. Cue llofuiacinona naimaci ñnua isoi, omoí llofuiacino jiaí ñnoitimaci. ²¹ Cuena oretatimie naimaci uiñoñena jira, cue muidona iese finoitimaci. ²² Naimacimo ite jeacinona naimacimo lloñedícue, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. ²³ Cuena enoidimiedí cue Moona jiaí enoide. ²⁴ Eo siño rafuena naimaci motomo finodícue. Buna cue isoi jaca finoñede. Iena finoñedícue, naimacimo ite jeacinona uiñoñedimaci. Cue siño fino-ca rafuena jai ciodimaci. Ie jira cuena enoidimaci. Cue Moona jiaí enoidimaci. ²⁵ Naimacina David micorí jai llote:

“Naimacimo buena finoñedicue; ia cuena enoidimaci”. Naie cuegafuiaí jai suide.

²⁶ Cue Moo ie Joreño omoimo oretaitaite. Ie Joreño omoína canoite. Omoína uanaicinona uiñotaite. ²⁷ Cue nano lluaruimona cue diga omoi illa jira, cue facaisena jiaí raise lloitomoi.

Juduaí illaicomini Jesús llofueoicaiganona duere finua rafue

16 Jesús nia llofueite:
—Danomo abido omoi jaiñellena, cue uaina omoi fainonocaiñellena, bicinuai omoimo ja lloiticue. ² Omoi ofiracomona illaicomini omoína dotaitimaci. Jiairuido omoína meiniamona: “Jai Jusiñamuina marena sedadicaí”, comeciaina facaitimaci. ³ Cuena naimaci ñnoñena jira, cue Moona jiaí naimaci ñnoñena jira, iena finoitimaci. ⁴ Bie rafue omoimo sua, naie facaise cue lluaña omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

Jesús Jusiñamui Joreñoña llua rafue

⁵ Jesús nia llofueite:
—Cuena oretatimie dine ja jaiticue; iadedi omoimona buna: “¿Ñine jaitio?” cuemo jaca nia jicanoñede. ⁶ Omoimo bie rafue cue llua jira, omoi comeciai eo sure ite. Ie jira cue jaillinona jicanoñedomoi. ⁷ Uanaí lloticue. Cue jaia, mare. Cue jaiñenia, omoína canoraíma omoi dine biñeite. Cue jaia, omoi dine naimiena oretaiticue. Jusiñamui Joreñodi omoi canoraíma. ⁸ Naimie bia, cuena ñnoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiaí uiñotaite. ⁹ Cuena naimaci ñnoñenia, naimacina naimacimo jeacino nia illana uiñotaite. ¹⁰ Cue Moo dine abido cue jaillinona, cuena cioiñeitimaci; ia iemona Jusiñamui Joreño cue uaina siñonana uiñotaite. ¹¹ Fiodaillemona jilloiticue. Iemona cuena ñnoñedinona anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uiñotaite. ¹² Diga rafue omoimo nia lloiacadicue; iadedi jai rairaiñaidomoi. ¹³ Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacinodo llofueite. Jiairuido suille rafuena llofueite. ¹⁴ Omoína cue rafuena uiñotaite. Ie jira cuena iobitaite. Nana cue Moomo ite uaidi cueje. ¹⁵ Ie jira bie rafuena lloticue. Jusiñamui Joreño omoína cue rafuena raise uiñotaite.

Sunaillamona caimare illa rafue

¹⁶ Jesús nia llofueite:
—Dallu illanona cuena cioiñeitomoi. Ie mei dallu illanona, cuena dane cioitomoi.
¹⁷ Ie llofueoicaiganodicaímona damierie daní coninimo jicanodosite:

—¿Ñiese caimo llote: “Dallu illanona, cuena cioiñeitomoi. Ie mei dallu illanona, cuena dane cioitomoi. Cue Moo dine jaiticue”? ¹⁸ ¿Buena caimo llote? Raise cacaiñedicai.

¹⁹ Cai jicanuana Jesús uiñuanona, naimie jicanote:
—¿Cue lluaña raise uiñoiacadomoi? ²⁰ Cuemo suille rafue sua, eo eitomoi; iadedi cuena ñnoñedinona eo iobitimaci. Sunaitomoi; iadedi jiairuido caimare iitomoi. ²¹ Jiaie uaido iena lloiticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide. ²² Ie isoide. Ja sunaitomoi; iadedi dane omoína cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoína buna sure itatañeite. ²³ Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaitaite. ²⁴ Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

Jiairuido Jesús marefodo llua rafue

²⁵ Jesús nia llofueite:
—Jiaie uaido bicinona omoimo jai lloticue. Jiairuido iese lloñeiticue. Omoína cue Moona marefodo lloiticue. ²⁶ Nairuimo cue Moomo omoi facaina jicañeiticue. Cue mamecido cue Moomo omoi jitaillacinona daní jicaitomoi. ²⁷ Omoína naimie isiruillamona, omoimo fecajite. Cuena omoi isiruilla jira, cue Moomona cue billana omoi ñnua jira, cue Moo omoína isiruite. ²⁸ Cue Moomona eniruemo biticue. Naimie dine abido jaiticue.
²⁹ Lloticaí:
—Jai marefodo caimo llotio. O uaina meidocana jai uiñedio. ³⁰ Nana rafuena o uiñuana uiñoticaí. Cai comeciaino iticinona o uiñuamona, caína raise uiñotio. Iemona Jusiñamuimona o billana jai ñnoticaí.
³¹ Jesús uai ote:
—Cuena jai ñnotomoi. ³² Jiairuido, ua birui, oni tuuitomoi. Nagamiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga iite. ³³ Cuena omoi ñnuano, omoi uri illena, omoimo bie lloticue. Eniruemo omoi ia, jaca duere sefuitomoi; iadedi omoi comeciaina ocuiño. Omoína duere finodinona jai cue emodofilla jira, omoi comeciaina ocuiño. Naimaci baiñemo faiticue.

Jesús ie Moo diga ñaia rafue

17 Jesús bicinona llua mei, monamo eruaillano, jide:
—Moo, cue fiodaiacanarui jai ride. Cue uai siñonana uiñota. Iemei o uai siñonana jiaí uiñotaiticue. ² Nana comini afemo cuena jai itatatio. Imana cue jaillamona, nana comini afemo cuena jai itatatio. Comini comeciai iuaina o meidotajamona, cue fiodaillamona, ailluena comini o diga jaca iitimaci. ³ Ona nanoca Jusiñamuina uiñoitimaci. Jai cuena o oretajana jiaí uiñoitimaci. ⁴ Ailluena siño rafuena jai finodicue. Nana o cuemo lloga

rafuena cue finuamona, bene ona jai iobitadicue. ⁵ Ore Moo, enirue nia iñena facaiseconi o diga iticue. Illaíma isoi o ecímo dane ebire iacadícue. Dane cuemo ine, daje isoi coco illesa. ⁶ Comini comeciaí iuaina o meidotajamona, naimacina jai llofuecabitícue. O anamo naimaci illamona, omo ite rafuena llofuecabitícue. Iemona o rafuena ñinocana jaidimaci. ⁷ Nana cuemo ite rafue omona feiñoticue. Iena jai uifñotimaci. ⁸ Nana cuemo o llogacinuaina naimacimo jai llotícue. Jai ñnotimaci. Omona cue billana jiaí jai ñnotimaci. Cuen a o oretajana jiaí ñnotimaci. ⁹ Naimaci facaina birui jiidícue. Naimacina cuena ñnotadio. Ie jira omo jai duidimaci. Ona ñnoñedino facaina birui jiiñedicue. ¹⁰ Nana o díbeimo itinodi cueje. Nana cue díbeimo itinodi oie. Nana naimaciri iobidícue. ¹¹ Bene eniruemo fiebitimaci. Eniruemona monamo jaitícue. O dine abido jaitícue. Ore Moo, jeacino naimaci finoí raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. ¹² Naimaci diga nia cue ia, naimacina cue anamo sedadícue. Naimacina raise sedadícue, naimaci feirai raillano. Naimaci motomona dama Judas feiraité. Jusiñamui lloiraíma micorí cuezafuíaí suillena, naimie ua faifite. ¹³ O díne jai jaitícue. Cue isoi naimaci comeciaí eo caimare illena, naimacimo ailluena rafuena jai llotícue. ¹⁴ O llogacinuaina jai llotícue. Ona ñnoñedino naimaci jainaíaññena jira, ona ñnoñedino naimacina enoidimaci. Ona ñnoñedino jiaí jainaíaññedicue. ¹⁵ Eniruemona birui o naimacina uana jicanoñedicue; iadedi Taífemona naimacina o sedajana birui jicanotícue. ¹⁶ Ona ñnoñedino jainaíaññedicue. Ona ñnoñedino jiaí jainaíaññedicue. ¹⁷ O llogacinuaido naimacina marena itata. O llogacinuaidi uanaicino. O jitaillacina naimaci finollena, o uai naimaci comeciaino raise itata. ¹⁸ Bene cuena o oretaja isoi, ona ñnoñedino díne naimacina oretaticue. ¹⁹ Uanaicinona naimaci uifñuamona, naimaci comeciaí marebicaillena, cuena ñnotino facaina fiodiaicadicue. ²⁰ Bimacina birui dane jiiñedicue; iadedi bimaci cue rafuena íco lloia, jiaíe comini cuena ñnoitimaci. Cuen íco ñnoitino facaina birui jiaí jiidícue. ²¹ Daajedicoco. Coco illa isoi, naimaci comeciaina daje isoi lloillena, nana naimaci facaina jiidícue. Daje isoi comeciaí lloillamona, cuena nia ñnoñedini ñnoitimaci. Iemona cuena o oretajana ñnoitimaci. ²² Cuemo o iga uaidi ebirede. Naimaci comeciaí lloillena, naimacimo o uai jai cue iga. ²³ Naimaciri dajedicai. O diga daajedicoco. Naimaci comeciaí daje isoi lloillana jitaídícue. Iemona cuena ñnoñedino bene cuena o oretajana uifñotimaci. Cuen o isiruilla isoi, naimacina o isiruillana jiaí uifñotimaci. ²⁴ Ore Moo, naimaci cue díne illena jitaídícue. Enirue nia iñenia, illaíma isoi o ecímo ebire jaie iticue. Dane ie isoi ebire birui cue ia, naimaci cuena ciuana jitaídícue. ²⁵ Ore Moo, mareuidimedio. Jiaíe comini ona uifñotimaci; iadedi ona uifñotícue. Cue llofueoicaiganodi o cuena oretajana jai uifñotimaci. ²⁶ Naimacimo ona jai llotícue. O cuena isiruilla isoi coninina naimaci isiruillena, naimacimo nia llotícue —jide.

Jusúna gaitalle rafue

(Mt 26.47-58; Mr 14.43-54; Lc 22.47-54)

18 Jiaí mei, Jesús ie llofueoicaiganodícaí diga, Cedrón railla iconi enefebeimo ruica aceituna railla riaraiái illanomo naíona jaide. ² Jesús caí diga nainomo jaisoilla jira, Judas micorí naie illanona jiaí uifñote. Jesúsna gaitatallena nainomo Judas jaide. ³ Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiaí oredimaci. Soldaduai dí lamparínaiári bitimaci. Reinaíari jiaí bitimaci. Sidaniári jiaí bitimaci. Judas naimacina ifode. ⁴ Jesúsdi nana naimiemo suille rafue uifñuamona, naimaci díne billano, jicanote:

—¿Buna jenodomoí?

⁵ Uai otimaci:

—Nazaret ie Jesús.

Jesús uai ote:

—Imiedícue.

Iena cacajano, jacinaillamona, abido ñaijillamona, eniruemo uaidimaci. Jesúsna gaitatallena, Judas micorí naimaci diga ite.

⁷ Jesús dane jicanote:

—¿Buna jenodomoí?

Uai otimaci:

—Nazaret ie Jesús.

⁸ Jesús uai ote:

—Omoímo jai llotícue: “Imiedícue”. Cuen omoi jenoia, cue diga itino oni jaillena rairuifñeno.

⁹ Naimie ie Moomo como lloga uai suillena, iese lloite. Iese ie Moomo como lloite: “Cuen a ñnotaganomona jaca buna faifñedicue”. ¹⁰ Ie daacaiño Simón Pedrodi ie lloebi llinocaida, Jusiñamui diga nanoca ñairaima mullaíma jefona jaiñbonote. Naie mullaíma mamecidi Malco. ¹¹ Iena ciuamona, Jesús Pedro m lloite:

—O lloebina eeno. Cue Moo jitailla isoi, fioiditícue.

¹² Ie mei soldaduai, imaci capitán diga, judíuai imaci policías diga, Jesúsna gaitajano, naimiema maitimaci.

¹³ Anás díne nano uitimaci. Anásdi Caifás jifai. Caifásdi Jusiñamui diga nanoca ñairaima. ¹⁴ Navui Caifás judíuai illaicominimo lloite: “Damie nana caí comini facaina fioidaitena, mare”.

Pedro Jesúsna nano janua rafue

(Mt 26.69, 70; Mr 14.66-68; Lc 22.55-57)

¹⁵ Simón Pedro Jesús jinafo racade. Jiaí racadícue. Cuen Jusiñamui diga nanoca ñairaima uifñuamona jira, ie nairaíbirimo Jesús diga jaidícue; ¹⁶ iadedi Pedro nase mo fiebicaide. Ie jira jino abido jaillano, Pedro fo atillena, nasena sedaraiñomo jicanotícue. ¹⁷ Naiñaiño Pedromo lloite:

—Jesús llofueoicaigano imiedio.

Pedro uai ote:

—Ieñedicue.

¹⁸ Rosirena jira, naie jofo mullaíai, policías diga, cocí diga irai bonodimaci. Agaillena irai ecímo naidaidimaci. Agaillena Pedro naimaci motomo jiaí ite.

Jesús Anás dñe illa rafue

(Mt 26.59-66; Mr 14.55-64; Lc 22.66-71)

¹⁹ Ie facaise Anás Jesúmo ie llofueoicaiganodicaína jicante. Ie llofuiacinuaina jiaí jicante. ²⁰ Jesús dñena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiaí jaca llofuecabiticue. Nainomo nana o comini oficabidomoi. Bainino buena jaca lloñedicue. ²¹ ¿Bue ñellena birui cuemo jicantio? Cuena cacadinomo iena jicano. Cue llofuiana uiñotimaci.

²² Iese Jesús llua jira, daje policia naimie uiecona butade. Jesúmo jicante:

—¿Bue ñellena iese uai otio?

²³ Jesús dñena naie uai ote:

—Naimie uai jeare oticuenta, cuemo llono. Jeare oñedicuemo, ¿bue ñellena cuena butadio?

²⁴ Jesús uai oñede. Iemei Anásdi Caifás jofomo Jesús maianona orede.

Pedro Jesúsna dane janua rafue

(Mt 26.71-75; Mr 14.69-72; Lc 22.58-62)

²⁵ Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶ Naie facaise daje mullaíma Pedromo llote:

—Aceitunas railla riaraiá illanomo ona cidicue —llote. Jesúsna soldaduá gaítaja facaiseconi Pedro naie mullaíma ie come jefona ailli jaíbonote, soldaduá Jesúsna gaítaja ie daacaíño. ²⁷ Pedro dane janote. Ieconitava ñaite.

Jesús Pilato dñe illa rafue

(Mt 27.1-2, 11-14; Mr 15.1-5; Lc 23.1-5)

²⁸ Ie mei Caifás jofomona gobernador jofomo Jesúsna jitiñamo uitimaci. Naie facaise gobernador di Pilato. Naimiedi judíuaiñedimie. Naimaci einamaci rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guilledi guiñega. ²⁹ Ie jira Pilato jino bite. Naimacimo jicante:

—¿Nie isoide rafue muidona llogidotomoi?

³⁰ Uai otimaci:

—Bimie marañede rafue finoñedena, o dñe naimiena atañedicaí.

³¹ Pilato llote:

—Naimiena uiño. Omoi einamaci llogacinuaido naimiena duere fino.

Uai otimaci:

—Come meinellena caimona rairuidomoi. Naimie coraiana jitaídicaí —llotimaci. ³² Navui Jesúsdi: “Cuena cruzmo coraítimaci” llote. Naie llucino jai suisaide.

³³ Pilato fo abido jaillano, Jesúsna uaiduano, naimiemo llote:

—Judíuai illaima raillamiedio.

³⁴ Jesús dñena jicante:

—¿O comecina dama iese facajano llotio? Iese comecina o facañenia, jiaimie omo lloga.

³⁵ Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiaí fecadimaci. ¿Nie isoide marañede rafuena finodio?

³⁶ Jesús uai ote:

—Eniruemo cominina sedañedicue. Judíuai illai-comini cuena gaítañellena, eniruemo cominina sedadicedena, cue comini cue facaina fuidimaci.

³⁷ Pilato uai ote:

—Ie jira odi illaimadio.

Jesús uai ote:

—Jaca railla. Uanaicino llollena, jeicigacue. Nana uanaicinona jitaídino cue lluaana cacadimaci.

³⁸ Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo iñede.

Jesúna coraíacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuai bisoidomoi. Bie año omoi jitaia, omoi illaima raillaimena marena ore-taiticue.

⁴⁰ Comini dñena cuiriidimaci:

—Dama ite. Bimiena jitaíñedicaí. Barrabásna cárcelmona marena jino oreta. —Iese cuiriidimaci. Barrabásdi fiiriraima.

19 Ie mei Pilato Jesúsna oni uillanona, naimiena sechedotade. ² Jifanodosillena, soldaduá eecuaimona finoca nuiciraina naimie ifogimo jitaídicaí. Jiduirede iniroina jitaíjano raitimaci:

³ —Judíuai illaimadio. —Iemei ie uiecona bucoídimaí.

⁴ Pilato dane jino billano, raite:

—Naimie omoi dñe jino ja biite. Naimiemo nicinodi iñede —raite.

⁵ Ie facaise Jesús jino bite. Eecuaimona finoca nuiciraina jitaíca. Jiduirede iniroina jitaíca. Pilato naimacimo llote:

—Jadi, naimie.

⁶ Jusiñamui diga nanoca ñairainidi, jiaie illaicomini diga, naimiena cuano, cuiriidimaci:

—Naimiena coraí.

Pilato llote:

—Naimiemo nicinodi iñede; ia oni uillanona, naimiena omoi coraí.

⁷ Uai otimaci:

—Moisés micori jaie cuela: “Bu Jusiñamuina jeare ñaianona, fiodailla”. “Jusiñamui jitaídicaí” naimie railla jira, naimie fiodailla. Naimie Jusiñamui jitaína abina caitadimie. Caimona naimiedi marañede rafue jai finode.

⁸“Naimiedi Jusiñamui Jito” comini raillana Pilato cacajano, eo jacinaite. ⁹Jesúna dane fo uite. Jesúdi Jusiñamui Jitona naimie raise uifollena, Jesúmo jicanote:

—¿Ninena bitio?

Jesús uai oñede. ¹⁰ Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraitallena.

¹¹ Jesús uai ote:

—O anamo Jusiñamui cuena itataja jira, o uai ite, cuemo llollena. Ie jira omo cuena fecadino o baifemo jeacino finodimaci.

¹² Ie facaimona Pilato Jesús marena jino oretaiacade; iadedi judíuai illaicomini dinena cuiriisite:

—Bimie o jino marena oretaia, cai nanoca illaíma ie nabaiñedio. “Illaímadicue” Jesús lluaímona, cai nanoca illaíma díbeimo naimiedi ñede. Cai nanoca illaímadí César.

¹³ Comini lluaímona cacajano, Pilato Jesúsna jino atide. Ie cominimo lloranomo raide. Naie illano nofinina mameciredede. Judíuai uaido Gabatana mameciredede.

¹⁴ Pascua rafue guilla finorarui jitoma naidai illanona, Pilato dinena llote:

—Jadi, omoi illaíma.

¹⁵ Iemona cominidi cuiriisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaímana coraiticue?

Jusiñamui díga nanoca ñairaini uai otimaci:

—Cai illaímadí César. Jíai illaímadí caimo ñede. Jaca dallaimade cai illaímadí.

¹⁶ Ie mei Pilato naimacimo naimiena fecade, coraillena.

Jesúna coraiacana rafue

(Mt 27.32-56; Mr 15.21-41; Lc 23.26-49)

Pilato llua jira, Jesúsna uitimaci coraillena. ¹⁷ Jesúdi ie cruzna rocaicaida sonode. Ifocoraina eruaila mameciredede illanomo jaidimaci. Judíuai uaido naie illano Gólotana mameciredede. ¹⁸ Nainomo naimiena coraidimaci. Naimie abimo menamie coraica. Damie Jesús nabeimo. Jíaimie jarifebeimo. ¹⁹ Cruzmo jonellena, Pilato rabricimo cuetatate: “Nazaret ie Jesús. Judíuai Illaíma”. ²⁰ Judíuai uaido cuega. Romanos comini uaido jíai cuega. Griego uaido jíai cuega. Jesús coraiano Jerusalén ianori illa jira, ailluena comini iena cioidimaci.

²¹ Iena ciuamona, naie rabricina meidollena, Jusiñamui díga nanoca ñairaini Pilatomo llotimaci:

—“Judíuai Illaíma” raillano jai cuetatatio. Iena meidua jítaidicaí. Bimie dinena raisoide: “Judíuai Illaímadicue” raillanona, o cuetatatajana jítaidicaí

²² Pilato uai ote:

—Jai cuetataticue. Jíai rabricimo dane cuetataticue.

²³ Jesúsna coraia mei, soldaduái naimie iniroi uanona, naga soldado dígamie jonega iniroi. Nagaamaga sol-

daduái ite. Ie camisa fiebide. Naie daje jamai nigaroi.

²⁴ Ie jira daní coniniri ñaitimaci:

—Bie camisa cuaranoñeíticaí, daní caí fecallena. Mai. Conima jabomaiticaí, iena ollena. —Iese finuano Jusiñamuina lloraíma micorí cuegafuíaí suide. Jaié cuega: “Cue iniroi daní naimacimo fecaitimaci; iadedí cue camisa ollena, conima jabomaitimaci”. Iese finodimaci.

²⁵ Cruz abimo Jesús ei, ie euiño díga ite. Cleofas aidi ite. Naiñaiño mamecí María. María Magdalena jíai ite.

²⁶ Jesús ie eina ciode. Cuena naiñaiño ecimo jíai ciode. Cuena eo gaide. Ie jira ie eimo llote:

—Jadi, o jito isoi itimie anamo iitio.

²⁷ Cuemo llote:

—Jadi, o ei isoidiñaiño anamo iitio.

Naie dacaíño naiñaiñoña cue jofomo uillanona, naiñaiñoña sedadicue.

²⁸ Ie mei Jesús nana rafue jai fuillana uifuanu, llote:

—Jiroacadicue. —Iese lluanona, Jusiñamuina lloraíma micorí jaié cuegafuíaí jai suide. ²⁹ Nainomo llerojimo vino ite. Radosimo fibecode rana joniano, vinomo faite. Iemei Jesúsno fecade jaronollena. ³⁰ Iena jaronuano, Jesús llote:

—Cue maíjia jai fuite. Jai macaibaite. —Ie ifogi ana jítadacaida, fiodaite.

Jesús sida díga ducia rafue

³¹ Pascua railla rafue guille finuarui illa jira, judíuai illaicomini Pilato díne jaidimaci. Raíre fiodaillena, coraicano idaíaina uellullena naimiemo jicanuaidimaci. Sábado rafue ie nairui nia illanona, sábadorui jai raíre taineacana jira, coraicano cruzmo sábadoruimo illana jítaiñedimaci. ³² Soldaduái jaillano, Jesús ecimo coraíca íaímaíai idaíaina uellude. ³³ Jesús díne billano, naimie jai fiodaillana cioidimaci. Ie jira naimie idaíaina uelluñedimaci; ³⁴ iadedí daje soldado Jesús ciraigiconi sida díga ducide. Naifo díaide. Naifomona jinui jíai bite.

³⁵ Nana iena cioidicue. Uanai lloticue. Omoi inollena, iena lloticue. ³⁶ Soldaduái iese finuamona, jaié cuegafuíaí jai suide. Jaié Jesúsna cuega: “Naimie illaicina tainoñeítimaci”. ³⁷ Jíai jaié cuega: “Judíuai dinena naimaci ducitagamiemo ico eruaitimaci”.

Nofici ifomo Jesús raia rafue

(Mt 27.57-61; Mr 15.42-47; Lc 23.50-56)

³⁸ Naie facaise Pilato díne José raillamie jaide. Cruzmona Jesús abí oni ollena, Pilatomo jicanuaide. Josédí Arimatea nairai imie. Pilato fairiote. Ie jira José Jesús abí ana uanona, iena oni uite. Judíuai illaicomini naimie jaciruillanona, Jesúsna bainino inote. ³⁹ Nicodemo jíai bite. Siorede rana atide. Mirra áloe díga jai tamiano atide. Níbai treinta kilos atide. Naimiedi Jesús díne naíona navui bite. ⁴⁰ José, Nicodemo díga, Jesús abína useroina ferinotíiaímaíai. Naimaci comini finouilla isoi, naie siorede radí iniroimo jonega. ⁴¹ Amenaíai íaire illanomo Jesúdi coraíca. Nainomo nofici ie raíafodi ite. Nia buna naifomo raíñafo. ⁴² Naifo íaire illa jira, sábadorui jai riacana jira, jíai raífo jenollena abí

juanina jira, nainomo naimiena jonetiiaimaia. Nofici diga raiafo raise ibailla mei, jofomo jaidiiaimaia.

Fiodaillamona, Jesús jillua rafue

(Mt 28.1-10; Mr 16.1-8; Lc 24.1-12)

20 Domingo jitiramo nia monañenia, raiafomo María Magdalena jaide. Raiafo ibailla nofici oni joillana ciode. Jesús abina cioñede. ² Ie jira aisicana Pedrona jenuaide. Cuenajia jenuaide. Baillano, llote: —Cai illaicomini cai Nama abina raiafomona otimaci. Naimiena jonianona uiñoñedicue.

³ Ie mei raiafomo jaidicoco. ⁴ Aisicana jaidicoco; iadedi riire cue aisicana jailla jira, nano ridicue. ⁵ Ana bitadacaida, fo erodaticuemo, useroi joillana ciodicue; iadedi fo jaiñedicue. ⁶ Ie mei Simón Pedro rillano, fo jaide. Useroi joillana jia ciode. ⁷ Ie ifogimo ferinoga iniroi eneno illana ciode. Raise nacuana ciode. ⁸ Iemei jia fo jaidicue. Iniroina cuamona, Jesús jai jilluana inoticue. ⁹ Jaiie ciegafuia llote: “Fiodaillamona jilloite”. Naie ciegafuiaina como raise inoticoco. ¹⁰ Ie mei jofomo jaidicoco.

María Magdalenamo Jesús bairia rafue

(Mr 16.9-11)

¹¹ Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo, ¹² Jusiñamumona mena jaienici jai billana ciode. Userede iniroi jitadiamaia. Jesúsna navui jonianomo ana raidiamaia. Damie ifogi dibeimo raide. Jiaimie eilli dibeimo raide. ¹³ Naiñaiño jicanotiamaia:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴ Naie facaise jinafo dine eroquilla, Jesúsna ciode; iadedi naimiena uiñoñede. ¹⁵ Naiñaiño comecina facade: “Naimiedi bie illano sedaraima”. Jesús naiñaiño jicante:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶ Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboni! —Naie uai oni dobaiaumona: “Llofuerama”.

¹⁷ Jesús uai ote:

—Cuenalinoño cuena faica. Cue Moo dine nia jaiñedicue. Cue amatia dine mai jaillanona, cue rafuena llua. Cue Moo dine jaiticue. Naimiedi cue Jusiñamui. Naimie jia omoi Moo. Jia omoi Jusiñamui.

¹⁸ Ie jira María Magdalena Jesús llofueoicaiganodica mo lluaibite:

—Cai Namana jai ciodicue. —Iemei caimo naimie naiñaiño llua llote.

Jesús ie llofueoicaiganomo bairia rafue

(Mt 28.16-20; Mr 16.14-18; Lc 24.36-49)

¹⁹ Domingo naio Jesús llofueoicaiganodica jofomo ofidica. Judíuai illaicomina cai jaciruillamona, nasia nana cai ibaica. Nase econoño ieconi Jesús cai motomo billanona, caina uaiduano, llote:

—Uri omoi i.

²⁰ Ie onollina acatate. Ie ciraigina jia acatate. Cai Namana jai cai ciuari eo iobidica. ²¹ Jesús dane llote:

—Uri omoi i. Cue Moo cuena oretaja isoi cue rafuena llollena, omoina oretaiticue.

²² Ie facaise caina firaiñuanona, raite:

—Jusiñamui Joreño omoi feiñuana jitaicue. ²³ “O jeacina jai dotade” bumo omoi lloia, Jusiñamui jai dotaca. “O jeacina nia dotañede” bumo omoi lloia, Jusiñamui nia dotañega.

²⁴ Naie naio Tomásna mameciredede llofueoicaigame cai diga iñede. Dídimona jia mameciredede. Naimiedi gorasa. ²⁵ Naimiemo llotica:

—Cai Namana ailli ciodicai.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, inoñeiticue.

Jesús ie llofueoicaiganomo dane bairia rafue

²⁶ Ocho digarui illanona, Jesús llofueoicaiganodica dane ofillano, Tomás cai diga ite. Nana nasia ibaica; iadedi nase econoño ieconi Jesús cai motomo dane fo billano, uaiduano, llote:

—Uri omoi i.

²⁷ Iemei Tomásno llote:

—Eroda cue onollimo. Naifo jeta. Ciraigi ifona jia jeta. Inoño jaiño. Mai ino.

²⁸ Tomás uai ote:

—Cue Namadio. Cue Jusiñamuidio.

²⁹ Jesús dane uai ote:

—Cueno o ciua jira, cuena inotio; iadedi cuena cioñedino cuena inoia, jia caimare iitimaci.

³⁰ Jesús diga siño rafuena finode. Iena ciodicai. Nana naie rafuena bie rabenicomoeñedicue; ³¹ iadedi dajerie cueticue. Jesúscai jilloitaraimana omoi inollena, iena cueticue. Naimiedi Jusiñamui Jitona omoi inollena, iena jia cueticue. Naimiena omoi inuano, naimie diga jaca iitomo.

Jesús ie llofueoicaiganomo ane bairia rafue

21 Diga irui illanona, Tiberiana mameciredede jorai fuemo Jesús ie llofueoicaiganodica mo dane bairedede. ² Nainomo diese itica: Simón Pedro, Tomás, Natanael, cue ama Jacobo, cue, jiaie iaiaia. Tomás mameci jiaicidi Dídimo. Natanael Galilea ie Caná naira imie. ³ Simón Pedro caimo llote:

—Lloiji faiaiticue.

Naimie uai otica:

—O diga jaiticai. —Iese raillano, botemo jaidicai. Namona naio llojjina faiticai; ia jaca buena oñedicai.

⁴ Monaiacademo, Jesús jorai fuemo bite; iadedi naimiena uiñoñedicai. ⁵ Jesús caimo jicanote:

—Caimaci, ¿nie diese lliciaina jai otomoi?

Uai oticai:

—Jaca oñedicai.

⁶ Naimie dane uai ote:

—Omoi bote nabei dine omoi llojjina faino.

Ie jira faiticai. Ailluena lliciai naiemo jilla jira, a aiñonidicai. ⁷ Iena ciuamona, Pedromo lloticue:

—Caí motomo caí Namadi ite.

Pedro iena cacajano, naimie taimiena jira, ie iniroi jitate. Jesús dine naimie raire rillena, joraimo daiade;

⁸ iadedi botedo biticai. Enirue iaire illa jira, na lliciaimo sonocana, llojjina atidicai. Nibaí cien metros oni ite.

⁹ Jorai fuemo caí ria, coocimona bonoca iraina ciodicai. Lliciai iraimo ruica jai ite. Llomenico jiaí ite. ¹⁰ Jesús caimo lloite:

—Omoi oga lliciaimona janore atí.

¹¹ Ie jira Simón Pedro botemo jaillano, llojjina llinuonona, eniruemo ari sonode. Ciento cincuenta y tres jemierie jitatitacai. Ailluena ite; iadedi llojji cuarariñede.

¹² Jesús lloite:

—Mai guisaíbi. —Jesúna caí uiñua jira: “¿Budío?” jaca buna raiñena. ¹³ Jesúsdi llomenico diga lliciaina caina ecade. ¹⁴ Fiodaillamona jillua facaisemona dacaiño amani caimo Jesús jai abina bairetate.

Jesús Pedro diga ñaia rafue

¹⁵ Guilla mei, Jesús Simón Pedromo lloite:

—Simón, odi Juan jitodio. —Jiaí jicanote— ¿Nana o nabaiñiaí baifemo cuena isiruitio?

Simón uai ote:

—Jii, Nama, ona cue isiruillana uiñotio.

Jesús uai ote:

—Toica llaudaiaí uruiaina omoi raise sedaja isoi, cuena innotinona raise seda. Naimacina cue rafuena raise llofue.

¹⁶ Dane lloite:

—Simón, odi Juan jitodio. —Dane jicanote— ¿Cuena isiruitio?

Simón uai ote:

—Jii, Nama, ona cue isiruillana uiñotio.

Jesús dinena uai ote:

—Toica llaudaiaí uruiaina omoi raise sedaja isoi, cuena innotinona seda.

¹⁷ Dane jicanote:

—Simón, ¿cuena isiruitio? —Jesús naimiemo dane jicaua jira, “Jesús cue uaina innoñede” raillanona, Pedro comeci sunaite.

Uai ote:

—Nama, naga rafuena uiñotio. Ona cue isiruillana uiñotio.

Jesús uai ote:

—Toica llaudaiaí uruiaina omoi raise sedaja isoi, cuena innotinona seda. ¹⁸ Daje rafue omo nia lloiticue. O nia conirue facai o iniroi dama jitado. Ie mei o jitalanomo jaidio. O uaicroma facaiseconi o onolli oni ñuitaitio. Ie mei jiaimie o iniroi ona jitajano, o jitañenanomo ona uite. Cue lluana inocana o jai.

¹⁹ Fiodaillena Pedro uiñollena, uicodo Jesús iese lloite. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusíñamuina iobitade.

Jesús ie gaia llofueoicagamiemo llua rafue

²⁰ Pedro diga Jesús nia ñaia facaise, Pedro dobaicailanona, cuena ciode. Iaímaiaí jinafona racadicue. Jesús gaíamiedicue. Navui caí guia, Jesús nia fiodaiñenia, Jesús abimo cue ia, Jesúsimo jicanoticue: “¿Bu gaitatalio?” ²¹ “Cuena innotinona seda” Pedromo Jesús llua mei, Pedro dobaicaillanona, cuena ciuano, Jesúsimo jicanote:

—Nama, ¿niese naimie fiodaite?

²² Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue lluana inocana o jai.

²³ Ie jira creyentiaí naie lluana fidiano cuena raitimaci:

—Naimie fiodaiñeite. —Iese raitimaci; iadedi Jesús iese raiñede. Jesús lloite: “Naimie nia itemo, cue abido bia, dama iesede. Naimie rafuedi omo duiñede”.

²⁴ Nana rafuena ciuano lloticue. Iena cueticue. Uanaicinuaina cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

HECHOS

Jesús Jusiñamui Joreño billena llua rafue

1 Teofilo, o dine, ¿nigacino? ¿Nie isoidio? Omo jiaie rabe birui dane oretaiacadie. Lucadie. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiaie cueticue. ² Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci. ³ Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo nia fiebi.

⁵ Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreño feiñoitomo —raite.

Monamo Jesús jailla rafue

⁶ Ie llofueoicaigano diga Jesús dane ofillanona, naimiemo jcanotimaci:

—Nama, ¿birui cai judíuai cominina jai sedaitio, David micori cai usumatiaie micoriaie jaie sedaja isoi?

⁷ Naimie uai ote:

—Naie rafue suille facaiseconi jaca uiñoñeitomo. Naimie siñona illamona, dama cue Moo naie rafue suilliruina uiñote; ⁸ iadedi cue Moo ie Joreño omoi feiñua mei, siño uai omoimo iite. Ie jira Jerusalémo cuena lloitoi. Judeamo, Samariamo, ua nana eniruemo ite nairaimo lloitoi —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisñede. ¹⁰ Monamo nia eruaidemo, ieconi naimaci dine Jusiñamui jaienici, mena iima bairia isoi, bairedi-aimaia. Naie iaimaia iniroi userede. ¹¹ Raitiaimaia:

—Galileo imaci, ¿bue ñellena monamo eruaidomo? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaia.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. ¹³ Rillano imaci cuartomo jaidimaci. A dibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Diese nainomo itimaci. ¹⁴ Naimaci jitaillamona, Jusiñamuimo jillena, nagarui danomo ofidimaci. Jillena, jaino naimaci diga jiaie ofisoidimaci. Diga riñoniaie jiaie ofisoidimaci. Jesús ei, María, jiaie ofisoide. Jesús amatiaie jiaie ofisoidimaci.

¹⁵ Comini ofilla motomo Pedro naidaita, rafuena llote. Nibaie ciento veinte comini nainomo itimaci. Pedro llote:

¹⁶ —Amatia, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacinodi cueda. Iena uiñoticaie. Judas micorina uiñoticaie. Naimie Jesúsna gaitadinona ifode. ¹⁷ Naimiedi da cai llofueoicaigano imie. Cai diga maijtuide. ¹⁸ Ie marañeno finoca rafuemonu ucubena feiñua mei, ie comeci iuaina meiduanona, naie ucubena oni judaie. Judíuai illacomini naie ucube diga eniruena ibadimaci. Nainomo Judas micori ie cimaio cuinajanona, ie abina dama meinete. Rifaillamona, ana uaillamona, ie jebegi boficaillamona, nana ie jebegi jino uaide. ¹⁹ Nana Jerusalémo itino iena fididimaci. Ie jira cai uaido naie enirue mamecireda Acéldama. Oni dobaifiamona dirue toillanie. ²⁰ Ero, Salmos rabenicomo Judas micorina iese David micori jaie cueda:

Naimie illano taino iite.

Buna jaca iemo iñeite.

Naimie maijille jiaimieimo iite.

Iese cueda. ²¹ Ie jira cai diga itinomona damiena fetoiticaie. Cai Nama Jesús cai diga illa facaiseconi, nagarui diga iñiaie cai diga jaisoidimaci. Juan Bautista micori Jesúsna bautizaja facaisemona, Jesús monamo caimona jaillarui facaiseconi, naimaci cai diga jiaie itimaci. Naimacimona damiena fetoiticaie, Jesús jilluana cai diga llollena. —Iese Pedro raite.

²³ Ie mei mena iimana fetodimaci. Damiedi José Barsabas. Jiaie mameci Justo. Jiaimiedi Matías. ²⁴ Ie mei Jusiñamuimo jidimaci:

—Nama, nana comini imaci comeciaina uiñotio. ¿Nie iimana jitaidio? Caina uiñota. ²⁵ Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micori ie maijiana jai fainonocai —juidimaci. ²⁶ Ie jira conima jabo-maside, uiñollena bu ille. Matiamo baite. Iemei jiaie once diga oretagano isoi naimie ite.

Cristo oretagano Jusiñamui Joreña feiñua rafue

2 Pentecostés railla rafue irui ria, nana creyentia diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. ² Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jia cacadimaci. ³ Iena naimacimo bairede. Iena cioidimaci. Irai boua isoi eruaide. Nana naimacimo baite. ⁴ Iese Jusiñamui Joreña feiñotimaci. Nana naimaci comeciaina namatade. Iemei diga nairai uailaido ñaitimaci, Jusiñamui Joreña naimacina ñaitatajama. Naimaci ñaia uailaina uiñoñedimaci.

⁵ Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiamona bitimaci.

⁶ Creyentia ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci. ⁷ Eo raijicaidimaci. Coninimo jicanotimaci:

—¿Buta ñaite? Nana Galileos imaci. ⁸ ¿Niese naimacina cacadica? Cai uaido dajerie ñaiana cacadica —raitimaci. ⁹ Diga comini imiaititimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, ¹⁰ Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritino jiaititimaci. ¹¹ Judíuai itimaci. Judíuaiñedino jiaititimaci. Judíuai isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadica —raitimaci. ¹² Nana eo raijicaidimaci. Danirue jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñai naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluomo cacarei. Naie rafuena lloiticue. ¹⁵ Omoi comeciaina omoi facaja isoi, jifaiñedica. Jitoma nia fuiri daidemo, bu jaca jifairainina. ¹⁶ Joel micori bie rafuena jaie llote. Joel micori Jusiñamui rafuena lloraíma. Naimie jaie lloga rafue birui caimo jai suide. ¹⁷ Llote:

Jusiñamui caimo llote: “Jiairuido bie rafue suite.

Cue Joreña diga cominimo fecajiticue.

Iedo omoi uruiaie cue lluana lloitimaci.

Iemona omoi coniruiaina nicairitaiticue.

Iemona omoi einamacina jiaie nicairitaiticue.

¹⁸ Ua nana cuena sedadinomo cue Joreña fecajiticue.

Naimaci cue lluana lloitimaci.

¹⁹ Monamo eo jacirede rafuena ico suiñotaiticue.

Enirueo eo jacirede rafuena ico jiaie suiñotaiticue.

Comini jobairillemona, enirueo comini diruedi eo iite.

Naie facaise dajie diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaiticue.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ Iadedi birui cuemo bu jicaia, ie jeacinomona naimiena jillotaiticue” Jusiñamui llote.

Ie Joreña caimo birui illamona, Joel micori llogacino jai suide.

²² ‘Caimaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi. ²³ Jusiñamui comecei jaie facaja isoi, Jusiñamui jitailla isoi, Jusiñamui naimiena omoi fecade. Jesúsna coraitatomo. Jusiñamuina iñoñedinona naimiena meinetadomoi; ²⁴ iadedi fiodaillamona naimiena Jusiñamui jillotajano, llogi ie cacajamona naimie jillobide. Naimie fiodaite; iadedi fiodaillamona nainomo iñoñede. ²⁵ David micori naimiena jaie llote:

Jusiñamui cue diga jaca illana uiñotiticue.

Cue ecimo naimie ite, cue comeciina ocuiñotallena.

²⁶ Ie jira cue comecei caimare ite. Eo iobidicue.

Cue marena illemo jai jiaie ocuridicue,

²⁷ raiafomo cue joreña naimie fainonocaiñena jira, ie mare Jito abi rifaillana naimie jitañena jira.

²⁸ Naimie cuena jilloitallena uiñotiticue.

Cue diga naimie illa jira, cue comecei caimare iite.

²⁹ ‘Caimaci, cai usuma David micorina marefodo

ñaiticue. David micori ñaia, dama naimie facaina

ñaiñede. Jesúsna ñaite. David micori jaie fiodaite.

Raiafomo jonega. Naifo bene nia illamona, naimiedi

Jesúsna ñaiana uiñotitica. ³⁰ Ie ia David micori Jusiñamui

rafuena llote. Naimie micoridi Jusiñamui naimiemo ua-

naicinona lluana uiñote. Jaie Jusiñamui naimiemo llote:

“O uruiaimona damie illaimana illanona, ie cominina

sedajite” llote. ³¹ Cristona ñaite. David micori nia

suiñede rafuena llote. Naimie micori Cristo jilloillena

llote: “Raiafo Jusiñamui fiodaillanomo Cristo Joreña

fainonocaiñeite. Cristo abi rifañeite” llote. ³² Jesúsna

ñaite. Jusiñamui Jesúsna jai jillotate. Nana cai iena cioidi-

caie. Ie jira iena llotitica. ³³ Ie ecimo Jesúsna jai dane itata-

janona, Jusiñamui naimiena iobitade. Ie Moo llua isoi,

Jesús jai ie Moo Joreña caimo jai fecade, omoi birui

ciua isoi, omoi birui cacaja isoi. ³⁴ Naimie abi monamo

jaiñena jira, David micori dama naimie facaina

ñaiñede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana raie.

³⁵ Ona iñoñedinona o anamo itatiticue”

raite. David micori llua isoi, birui jai suide.

³⁶ Pedro nia ñaite:

—Jesúsna coraidomoi; iadedi Jusiñamui naimiena cai

Namana itatate. Naimiena cai jilloitaraímana jai

itatate. Nana judíuai comini naiena uiñuana jitaidicue.

³⁷ Pedro lluana cacajano, naimaci comeciaino riire baite. Pedromo iena jicanotimaci. Ie nabaiñiaimo jiai jicantimaci:

—Caimaci, o lluana jai cacadicaí. ¿Bue finoiticaí?

³⁸ Pedro uai ote:

—Omoi comeciái iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreña jiai feiñoitomoi. ³⁹ Omoimo ie Joreño fecallena navui llote. Omoi uruiaimo jiai fecaite. Jiaie nairaiaí itinomo jiai fecaite. Ua nana Jusiñamui fetocanomo jiai fecaite.

⁴⁰ Diga uai naimacimo Pedro llote. Raite:

—Ailluena comini marañede rafuena birui finocana jaidimaci. Faiñitimaci. Naimaci isoi jaiñeno; iadedi cue lluana omoi cacajamona, iena ñino.

⁴¹ Diga comini ie lloga uaina feiñuano, bautizadimaci. Nairuido nibai tres mil comini creyentiaina jaidimaci.

⁴² Cristo oretagano llofuiana fueuidimaci. Cristo oretagana eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiiuidimaci.

Cristona ñnotino illa rafue

⁴³ Cristo oretaganodi diga siño rafuena finuamona, nana comini jacinaitimaci. ⁴⁴ Nana creyentiaí damacina itimaci. Naimaci raruiaí coninimo fecauuidimaci.

⁴⁵ Dueredino ia, naimacina canollena, raruiairedino naimaci raruiaina vendidimaci. Iemei naie ucube dueredinomo fecadimaci. ⁴⁶ Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiai sedauuidimaci. Nainomo danomo guillanona, Jesús fiodaillana comeciuidimaci. Caimare imaci comeciái illamona, caidiñeno guisoidimaci. ⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

Jusiñamui jofomo Pedro llucino

3 Jusiñamui jofomo jiaa facaise Pedro iaiaiaí Juan diga jaide. Jitoma ana ia, comini jiiuidimaci. ² Iaiaiaí jaillanomo jiaie comini tisitaitimienaa atiana ciodiaiaiaí. Tisitaitimienaa naimie jaca jeiciga. Naimienaa nagarui atiano, Jusiñamui jofo ie ebiredena railla nase fuemo rainauuidimaci. Nainomo naimienaa rainauuidimaci, fo jaidinomona ucube jica-jicallena. ³ Iaiaiaí fo jaiacania, ucube jicallena, ie onolli ñuitade. ⁴ Iaiaiaí naimiemo eruaillano, Pedro raite:

—Cocomo eruai.

⁵ Ie jira iaiaiaimo eruaide. Ra feiñoitena, ocianona sedade. ⁶ Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaicue.

⁷ Pedro naimie onollido llinuano, a naidanete. Iecon naimie eillidi jillode. Ie taisicoñuai jiai jillode. ⁸ Daiacailanona naidacaide. Macarillanona, iaiaiaí diga fo jaide. Jusiñamuimo iobillacinona fecajano, daiacail-

lanona macarite. ⁹ Nana comini naimie macarillana cioidimaci. Naimie iobillacinona fecajana jiai cacadimaci. ¹⁰ Naimie nase fuemo ana raisoilla jira, naimienaa uiñotimaci. Naimiemo jai suide rafuena eo rajjicaidimaci. ¹¹ Naimiedi Pedro iaiaiaí Juan diga nia llinuano, naimaci dine Salomón micori finotaga jofo abi ibirimo comini aisidimaci. Rajjicaidimaci. ¹² Iena ciuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daiiaiaí iaiaiaí uaido naimienaa jilloitate” raillanona cocomo eruaidomoi. ¹³ Iena finoñedicoco; iadedi Jusiñamui iena finuano, ie jito Jesúsna iobitade. Cai usumatiaí micoriaí, Abraham, Isaac, Jacob, ua nana cai usumatiaí micoriaí bie Jusiñamuina sedadimaci; iadedi Jesúsna birui fecadomoi, coraillena. Pilato naimienaa jino marena oretaiacana jira, Pilato ecimo naimienaa llogidotomoi.

¹⁴ Mareuidimienaa jitañedomoi; iadedi come fatimienaa cárcelmonaa jino billana jitañedomoi. Barrabás raillamienaa jitañedomoi. ¹⁵ Jusiñamui díbeimo caína itatitimienaa meinotomoi. Naimie fiodaite; ia Jusiñamui naimienaa jillotote. Iena cioidicoco. Ie jira iena lloticoco. ¹⁶ Tisitaitimie jilluana jai ciodomoi. Naimienaa uiñotomoi. Jesúsna naimie ñnua jira, Jesús naimienaa mairitate. Naimienaa raise jillotote. Iena jai ciodomoi.

¹⁷ “Caimaci, ero, omoi finoca rafuena abina uiñoñoeno finodomoi. Omoi illaicomini jiai daje isoi finodimaci.

¹⁸ Jaiie Jusiñamuidi ie facaina llorainina jairuido suille rafuena llotatate. Naimacina Cristo llogi cacajana llotatate. Birui naie llogacino suide. ¹⁹ Omoi comeciái iuaillaí meido. Jusiñamui díbeimo omoi comeciaina meido. Iemei Jusiñamui omoi jeacinona dotaite. Iena jaca feitaite. ²⁰ Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi jilloitaraima. ²¹ Jusiñamui facaina lloraini micoriaí jaiie lloga rafue suille dinori monamo naimie fiebiite. Jaiie Jusiñamuidi ie mare lloraini micoriaí uaido bienaa llote.

²² Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi damienaa fetote. Nana naimie omoimo lluana cacarei. ²³ Bie lloraimana bu cacarefiñenia, Jusiñamui naimienaa duere finoite. Iemona faifite”. ²⁴ Nana Jusiñamui ie lloraini micoriaí birui suille rafuena llotimaci. Samuel micori illa facaisemona naimaci bienaa llotimaci.

²⁵ Jusiñamuidi cai usumatiaí micoriaimo rafuena llote; ia bie rafue birui omoimo jiai duide. Jusiñamui Abraham micorimo jaiie llote: “Nana cominidi o uruiaí muidona caimare iitimaci”. ²⁶ Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi marañedicinona fainonocaitallena, omoi dine naimienaa nano jai oretate.

Cristo oretagamaiaí llaicomini motomo illa rafue

4 Comini diga Pedro iaiaiaí Juan diga ñaia facaise, Jusiñamui diga ñairainidi naie iaiaiaí dine bitimaci. Jusiñamui jofona sedaraini illaiaa diga, saduceuai railla comini diga jiai bitimaci. ² Fiodaillamona

Jesús jai jilluana llofuetiaimaiaí. Cominina iaímaiaí llofuia jira, naie iaímaiaí diga iciritimaci. ³ Iaímaiaína gaitajanona, jai navuilla jira, cárcelmo jonetimaci, ie jitiramo naie rafuena siadollena. ⁴ Iese suide; ia Pedro llogacinona cacadinomona ailluena comini naiena inotimaci. Cinco mil digamie creyentiaína jai itimaci.

⁵ Icoiti Jerusalémo nana judíuai illaicomini siadollena ofidimaci. ⁶ Anás jiaí bite. Naimiedi Jusiñamui diga nanoca ñairaima. Caifás bite. Juan bite. Alejandro jiaí bite. Nana Jusiñamui diga nanoca ñairaima cominidi ofidimaci. ⁷ Naimaci motomo Pedro iaímaiaí Juan diga atianona, iaímaiaímo jicanotimaci:

—¿Bu uai diga buena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoímo lloiticue. ⁹ Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi. ¹⁰ Jesucristo uai diga jillode. Omoí buena uiñuana, ua nana judíuai comini buena uiñuana jitaídúe. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoí uicomo Jesús muidona tisitaitimie jai benoconi naidailana ciodomoi. ¹¹ Omoí jofo finoraini isidomoi. Omoí jitaíñede noficidi jiaie nofici baífemo jai jaide. Jesúdi naie nofici isoide. Naimie rafuena omoí jitaíñena jira, naimiena meinotomoi. ¹² Cai jeacinomona jiaimie caina jillotanide. Nana eniruemmo ite cominimona jiaimie buna jaca jillotanide. Dama Jesús caina jillotarede —llote.

¹³ Jaciruiñeno marefodo llofuetiaimaiaí. Nainomo itino iena cacajano, comecina facadimaci: “Abina uiñoñediiaimaiaí. Jamai bue isoidiaimaiaí”. Ie jira raijicadimaci; iadedi Jesús llofueoicaigaiaimaiaína illana uiñotimaci. ¹⁴ Jilloitagamie iaímaiaí diga naidailana ciodimaci. Ie jira naimaci uai iñede. ¹⁵ Naie rafuena siadollena, naie illaicomini iaímaiaína bai oredimaci. ¹⁶ Coninimo jicanotimaci:

—¿Niese naie iaímaiaína nibaiticaí? Nana Jerusalémo itino iaímaiaí siño rafuena finuana jai fididimaci. Iena janonidicaí. ¹⁷ Jiaie comini iena fidii raillano, Jesús rafuena iaímaiaí llofuiana rairuiticaí.

¹⁸ Ie mei iaímaiaína naimaci dine dane uaidotimaci. Iaímaiaímo Jesús rafuena llofueñellena riire llotimaci. ¹⁹ Pedro iaímaiaí Juan diga naimaci uai ote:

—Ie rafuena coco lollena Jusiñamui jitaide. Omoí uaina coco inoia, Jusiñamui jitailla rafuena finoñeiticoco. Cocomo llono. ¿Bu uaina inoiticoco? ¿Jusiñamui? ¿Omoí? Cocomo iese llono. ²⁰ Daímaiaí coco ciua rafuena lloticoco. Daímaiaí coco cacaja rafuena lloticoco —raite.

²¹ Iaímaiaína jacinaitajamona, iaímaiaína jino oretatimaci. Iaímaiaína duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira. ²² Jai jillodimiemo cuarenta años baífemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo jiacino

²³ Iaímaiaí jino jailla mei, iaímaiaí nabaiñiaí dine jaidiaimaiaí. Illaicomini iaímaiaímo llua llotiaimaiaí. ²⁴ Naimaci iena cacajano, Jusiñamuimo damie llua isoi jidimaci:

—Ore Moo, mona finodio. Eniruenta finodio. Monailaina finodio. Nana naiemo ite rana jiaí finodio. ²⁵ Cai usuma David micorina raise uiñoticaí. Naimiedi ona sedadimie. Naimiena bie rafuena o Joreño jai llotatajamona, naimie llote:

¿Bue ñellena Jusiñamui diga judíuaiñedino iciritimaci?
¿Bue ñellena Jusiñamuimo comini tainomo comeciaina facadimaci?

²⁶ Illaicomini ofidimaci, Jusiñamui diga fuirillena. Jusiñamui facaisena iñedimaci.

Cristo facaisena jiaí iñedimaci llote. ²⁷ Naie rafue birui bene suide. Bie nairaimo Herodedi, Poncio Pilato diga, judíuaiñedino diga, judíuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci. ²⁸ Naimaci ofillamona, nana o jitaillie rafuedi, o jai lloga rafue diga, jai suide. ²⁹ Nama naimaci jaciruitajacinona jai uiñotio. Cai comeciaina ocuiñota, o rafuena jacitaíñeno cai lolllesa. ³⁰ Duidinona jilloita. O mare Jito Jesús uaido caina siño rafuena finota —jidimaci.

³¹ Jusiñamuimo jiacino fuilla meinotomoni, naimaci ofiracodi jaidisite. Jusiñamui Joreño nagamiaí comecimo namatade. Iemona Jusiñamui uai jacitaíñeno llocana jaidimaci.

Creyentiaí damacina illa rafue

³² Nana creyentiaí damacina itimaci. Naimacimo raruiaí ia, dajena naimacimo duide. ³³ Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode.

³⁴ Naimaci dine buna buena jaca jitaíñedimaci. Ucube ollena, enirueredino imaci eniruenta fecadimaci. Ucubene ollena, joforedino imaci jofona fecadimaci. Ucubene atianona, ³⁵ Cristo oretaganomo fecadimaci. Ie mei dueredinomo imaci jitailla isoi fecaidimaci. ³⁶ Naimaci motomo José mameciredimie ite. Cristo oretagano jitaica mamecidi Bernabé. Ie mameci oni dobaíñuamona firadotimie. Naimie nairaidi levita. Naimiedi Chipre raila uiasi imie. ³⁷ Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

Ananías micori ie ai micori diga Jusiñamuina jifuia rafue

5 Naie facaise Ananías ie ai diga iaímaiaí eniruenta jiaí fecade. Ie ai mamecidi Safira. ² Naie iba naimiemo dabeí fiebide. Ie ai iena uiñote. Atuedo atianona, Cristo oretaganomo fecade, “Nana ucube

atidicue" raillanona. ³Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niese Taife o comecimo namatade? Jusiñamui Joreñomo taino llotio, dabei ucube omo fiebilla jira.

⁴Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina maraiño facadio? Cominimo taino llotio. Jusiñamuimo tainona jiai llotio.

⁵Ananías bie uaina cacajano ieconi fiodaillamona oni caide. Nana iena cioldino eo jacinaitimaci. ⁶Iemei nainomo ite conirueniaí naimiena feridimaci. Jino uillano, raiafomo jonetimaci.

⁷Naie rafue daje amani horas illanona, naimie ai ie inimo suide rafuena uiñoño bite. ⁸Pedro naiñaiño-mo jicanote:

—¿Nie diese o fecaca o enirue? Cuemo lloño.

Naiñaiño uai ote:

—Jii, ie diese coco fecaca.

⁹Pedro jicanote:

—¿Bue ñellena Jusiñamui Joreña jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

¹⁰Naimie ecimo ieconi naiñaiño fiodaillamona, oni caide. Conirueniaí fo billano, naiñaiño fiodaillana cioldimaci. Jino uillano, ie ini abimo dafomo jonetimaci.

¹¹Iena fidiama, nana creyetiaí eo jacinaitimaci. Nana bie rafuena fididinodi jiai eo jacinaitimaci.

Cristo oretagano ailluena siño rafuena finodimaci

¹²Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jofo abi ibirimo ofisoidimaci. ¹³Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴Jaciruitimaci; iadedi creyentiaina ailluena comini jaidimaci. Ailluena iñiaí, ailluena riñoniaí, diese creyentiaina jaidimaci. ¹⁵Imaci biiramo duidinona jonecaida, naisomo atidimaci. Pedro nainomo macarillano, o lloña naimie joreño naimacimo ibaillamona, "Jillobiticaí" raillano, atidimaci. ¹⁶Jerusalémo ie fuemo ite nairaiaimona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finoudimaci.

Cristo oretagano duere sefuilla rafue

¹⁷Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiai eo uraoidimaci. Saduceuai railla cominimo duidimaci. ¹⁸Eo uraoidamona, Cristo oretaganona gaitajano, cárcelmo jonetimaci. ¹⁹Naiona Jusiñamui jaienididi cárcel nasena econote. Cristo oretagano jino atiano, naimacina raite:

²⁰—Jusiñamui jofomo mai abido jai. Cominimo Jusiñamui dine naimaci ille rafuena lloño.

²¹Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaiaina oretate, Cristo oretaganona atillena. ²²Cárcelmo jaidemo, naimacina cioñedimaci. Abido billanona, llotimaci:

²³—Cárcel ie nase jaca ibaicana cioldicaí. Raise llaveca. Nase fuemo jaca soldaduai itimaci; iadedi econoticaimo, jaca buna cioñedicai.

²⁴Jusiñamui jofo nanoca sedaraima, Jusiñamui diga ñairaini diga, bie lluaana cacajano, uainicaidimaci. Comecina facadimaci: "¿Nie isoide rafue naimacimo jai suide?"

²⁵Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶Iena cacajano, Jusiñamui jofo nanoca sedaraima ie policiaí diga jibuisaide. Cristo oretaganona atide. Fecaise atide, comini dinena policiaiaina noficiado fairinoi raillano. ²⁷Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo lloite:

²⁸—Omoimo Jesús rafuena llofuiana rairuidicaí; iadedi nana Jerusalén cominina jai llofuetomoi. Iese omoi llofuecacia, "Cai illaicomini Jesúsna meinetimaci" llotomoi.

²⁹Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina iñoiacadicai. ³⁰Cai usumataí micoriaí Jusiñamuina sedauidimaci. Naie Jusiñamuidi Jesúsna jai jillotate. Jesúsna meinellena, cruzmo coraidomoi; ia Jesúsna omoi meinia mei, ³¹Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judíuai comini comeciaí iuai meidolena, naimaci jeacínuaí dotallena, iese naimiena itatate. ³²Bie rafuena llofuecabiticaí. Jusiñamui Joreño uaido iena jiai llofueticaí. Jusiñamuina iñnotinomo Jusiñamuidi ie Joreña jai fecade —raite.

³³Iena cacajano, illaicomini eo iciritimaci. Cristo oretaganona meineiadicimaci; ³⁴ia ieconi illaicomini motomo damie naidaide. Naimie mameci Gamaliel. Moisés micori llogacinona uuiucaide. Nana cominidi naimie uaina iñnotimaci. Cristo oretaganona dallu bai oni oretajanona, naimie lloite:

³⁵—Caimaci, omoi bie cominimo omoi finolle rafuemo comeciaina raise faca. ³⁶Jaie Teudas micori illaimana jaiacade. "Jai uaina baitimiedicue" raillano, naimie dibeimo cuatrocientos iñiaí jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. ³⁷Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite. ³⁸Ie jira ja omoimo lloiticue: Bie cominina faionocai. Jamai cominimona naimaci llogacino iade, jamai cominimona naimaci finuacino iade, ieconi duite. ³⁹Jusiña-

muimona bie rafue ia, jaca niese nıbaıñeitomoi. Jusiñamuimona bie rafue ia, Jusiñamui dıga omoi rafuedi iite.

Naimacı naimie lluana feiñuano, ⁴⁰ Cristo oretagano fo atıano, naimacına fatımacı. Naimacı Jesús rafuena llofuiana eo rairuide. Ie mei jino imacına oredımacı; ⁴¹ iadedi illaıcomını illanomona Cristo oretagano caımare jaidımacı. “Jesús dıbeımo caı illa jira, caina duere fınodımacı” raıllano, caımare jaidımacı. Jusiñamui naie facaise naimacına riıdoñena jira, jıaı caımare itımacı. ⁴² Jusiñamui jofomo nagarıui Jesucristo rafuena llofueti macı. Comını jofuemo nagarıui jıaı llofuetımacı. “Jesúdi caı Jilloıtaraima” llofueıdımacı.

Creıentiaina canollena, sıete dıgamıe díaconuaina illena, fetua rafue

6 Naie facaise aılluena comını creıentiaina jaidımacı. Uradoıllamona gıego uaido ñaıte comını dınenıa, judıuaı uaido ñaıte comınına jeare ñaıtımacı. Gıegıuaı fecıñıuaı judıuaı fecıñıuaı isoi nagarıui rana feıñoñena jira, jeare ñaıtımacı. ² Ie jira naie doce oretaganodı creıentiıaı danomo ofıllena, nana naimacına uaidotımacı. Naimacımo llotımacı:

—Jusiñamui uaina llollena, ra fecalle dıga, abı juanıde. Jusiñamui uaina llofuiana caı fıanonocaiadedı, maraıñede. Ra jamai caı fecaiadedı, jıaı maraıñede. ³ Ie jira, amatıaı, omoi mona sıete dıgamıena fetı. İnoganonıa fetı. Jusiñamui Joreño nana comecımo namatadınonıa fetı. Eo abı uıñotınıona fetı. Ie isoıde iıñıaına fetı. Bıe ra fecarainına maıjııtımacı. ⁴ Ie mei caı abı juarenıte, Jusiñamuımo caı jııllena, Jusiñamui uaina caı llofuellena.

⁵ Nana comınıdı:

—Jee —raitımacı. Esteban mıcorına fetodımacı. Naimie Jusiñamuına eo iınote. Jusiñamui Joreño nana naimie comecımo namatade. Jıaı fetodımacı: Felipe, Prócorı, Nicanor, Timón, Parmenas, Nicolás. Nicoladı Antioquía nairai imıe. Judıuaı comını isoi naimıedi Jusiñamuına iınote. ⁶ Fetua mei, oretagano dıne atıdımacı. Jusiñamuımo oretagano jııa mei, fetocanomo imacı onollı jonetımacı, Jusiñamui naimacına marena itatallena.

⁷ Naie facaise Jusiñamui uaidı comınıdo uıñıtacana jaıde. Jerusalémo aılluena comını creıentiaina jaidımacı. Jusiñamui dıga ñairainımona creıentiaina aılluena jıaı jaisıte.

Esteban mıcorı ie rafue

⁸ Esteban mıcorı fue eo mare. Jusiñamui Joreño naimıena namatajamona, naimie uai eo sıño. Comını motomo aılluena sıño rafuena fınuıde. ⁹ Naie facaise dıje judıuaı comını ofıracomona damıerie Esteban mıcorı dıne bııtımacı. Patrón anamona jıllıbidınomo naie ofıracı jainıaıde. Naimacı dıga damıerie Cırene nairai imacı bııtımacı. Damıerie Alejandrıa nairai imacı danomo jıaı bııtımacı. Cılıcıa nairai imacı jıaı bııtımacı. Asia nairai imacı jıaı bııtımacı. Esteban conını uaina uai-

tatımacı; ¹⁰ iadedı naimacı uaitalle uaidı iñede.

Naimacımo Esteban uai isoıdıuaidı iñede. Jusiñamuımona ie uaina ua jira, Esteban abına uıñuano ñaıte.

¹¹ Ie jira jıaıe comınımo bainıno İbajano, naimıena llogıdotadımacı. Raitımacı:

—Esteban Moısés mıcorı jınaıfomo jeare ñaıana cacadıcaı. Naimıedi Jusiñamui jınaıfomo jeare ñaıana jıaı cacadıcaı.

¹² Iese lluamona, comını comeciaina feıdocana jaidımacı. İllaıcomını comeciaina feıdocana jıaı jaidımacı. Esteban dıne bıllanonıa, naimıena gaitadımacı. Naie rafuena sıadollena, naimacı ofıracomo naimie mıcorına uıtımacı. ¹³ Tainona llogıdotınıona jıaı atıdımacı. Llotımacı:

—Bımıedi Jusiñamui jofona jeare ñaıcabıte. Bımıedi Moısés mıcorı llogacıno jınaıfomo jıaı jeare ñaıcabıte.

¹⁴ Naimıedi Jesús bıe jofona judaıllena llote. Moısés mıcorı caımo llogafıuaı fıanonocaillena jıaı llote. İena cacadıcaı.

¹⁵ İemo nana illaıcomını naimıemo eruaidımacımo, naimie uıeco Jusiñamui jıaıenıci isoi eruıde.

Esteban mıcorı abı riıdua rafue

7 Jusiñamui dıga nanoca ñairaima Esteban mıcorımo jıcanote:

—¿Ua ie isoi naimacı llıacıno ite?

² Naimie uai ote:

—Caımacı, cacarei. Caı jıaıgaımona caı fueollena, naimacı mıcorıaina lloıtıcue. Jusiñamui mareııena jira, naimıedi caı eırue jıtımo jaıe bıarede. Caı eırue jıtıdı Abraham mıcorı. Mesopotamıımo naimie mıcorı nıaıa, Harámo naimie mıcorı nıaıaıñena, Jusiñamuidı naimie mıcorımo bıarıano ³ llote: “O enıruemona maı jıaı. O comınımona maı jıaı. Omo cue acatalle enıruemo jaitıo”. ⁴ Ie jira Caldea raılla enıruemona naimie mıcorı jaıde. Harámo rıllanonıa, dıga iruıllaı nainımo ite. Naimie moo mıcorı fıodaılla mei, omoi bıruı illa enıruemo Jusiñamui naimie mıcorına oretate. ⁵ Nainımo rıllanonıa, Jusiñamuidı naıe enıruue naimie mıcorımo fecadıede. Ua janore jıaıa fecadıede; iadedı: “Omo İena İco fecajıtıcue” raıte. “O urıuaımo fecajıtıcue” jıaı llote; iadedı naıe facaise Abraham mıcorı urıenıde. ⁶ Jusiñamui jıaı llote: “O urıuaı jıaıe comını enıruemo jıanııtımacı. Eğıptımo jıanııtımacı. Naimacına duere fınoıtımacı. Cuatrocıentos años llogı cacajıtımacı. ⁷ Naimacına maıjıtıaıte nairaina duere fınoıtıcue. Ie mei o urıuaı naıe enıruemona bııtımacı. Bıe illanomıo cuemo İobıllacınonıa fecajıtımacı” llote. ⁸ Ie comınına naimacı jıaıllena, Jusiñamui Abraham mıcorımo İısaıaıdıese abına dıana llote. Ie facaise Abraham mıcorı İsaac mıcorına comıtate. Ie jeıcıamona ocho dıgarıı illamona, Abraham mıcorı naimie mıcorına dete. İsaac mıcorı Jacob mıcorına comıtate. Jacob mıcorı doce urıuaına comıtate. Naimacı mıcorıaımona caı doce dıga nairai comıdımacı.

⁹ Caımacı, José mıcorına Jacob mıcorı urıuaı mıcorıaı uradoıllamona, Eğıpto comınımo naimıena fecadımacı; ¹⁰ iadedı Jusiñamui naimıena eo sedade. Ie llogı ie ca-

cajamona naimiena jillotate. Naimiemo uifnoracinona fecade. Ie jira Faraón micori naimiena jiaí gaide. Faraón micoridí Egipto illaíma. Ie muidona Faraón Joséna fetode, nana Egiptomoto itinona sedallena. Ie jofona jiaí sedatate. ¹¹ Naie facaiseconi nana Egipto cominí aime guitimaci. Canaámo Jacob micorí illanona, nana nainomo itino diga aime jiaí guite. Eo duere sefuidimaci. Cai usumatiaí micoriaí naimaci illanomo guillena baiñedimaci. ¹² Egiptomoto guille illana Jacob micorí fidiano, guille ollena, nano facaise ie uruiaí micorína nainomo oretate. ¹³ Ie mei José ie amatiaina naimiena uifnotade. Faraóndí José cominí illana fidide. ¹⁴ Ie jira Josédí ie moona uaidote. Nana ie cominina uaidote. Setenta y cinco digamie ite. ¹⁵ Ie jira Egiptomoto Jacob micorí jaide. Nainomo fiodaite. Ie uruiaí micoriaí nainomo jiaí fiodaitimaci. ¹⁶ Siquem railla nairaí illanomo naimaci cominí naimaci micoriaína uillano, nofici ie raiafomo jonetimaci. Siquemmo Abraham micorí naifona Emmor uruiaí micoriaímona jaie ibade.

¹⁷ 'Caimaci, Jusiñamui Abraham micorimo lloga rafue suille iaírei illa facaiseconi, Egiptomoto cai cominidí eo jebuidimaci. Abraham micorimo: "Egiptomona o uruiaí biitimaci" Jusiñamui jaie lloste. ¹⁸ Naie facaise jiaíe illaíma Egiptona sedade. José micorína uifnoñede. ¹⁹ Ie jira cai cominina jifuiano maijitaude. Uruiaí fiodaillena, naimacina imaci uruiaína faínonocaitate. ²⁰ Ie facaiseconi Moisés micorí jeiciga. Jusiñamuimona naimie micorí eo ebire eruaide. Ie moo jofomo daje amani fivui ite. ²¹ Ie mei naimiedí faínonocaiga. Faraón jisa micoridí naimie micorína uanona, naiñaiño jito isoi naimie micorína uiuicaide. ²² Naimie micorí nana Egipto cominí uifnuacinona fueote. Illaíma uai isoi naimie uaidí ite. Eo abina uifnotimie.

²³ 'Caimaci, naimie micorí cuarenta años illa facai, ie cominí dine ie jaillemo ie comecina facade. Naimie cominidí cai judíuaí cominí. ²⁴ Egipto imiemona damie llegi cacajana ciuano, naimiena riidote. Riiduanona, Moisés micoridí Egipto imiena meinete. ²⁵ Moisés micorí comecina facade: "Cue muidona Egiptomona Jusiñamuidí cue cominina oretate". "Cue cominí buena uifnotimaci" raillanona comecina facade; ie iadedí iena uifnoñedimaci. ²⁶ Ie arediruido Moisés micoridí mena come iaímaiaí fuirillana ciode. Iaímaiaína marena itataiacade. Raite: "¿Bue ñellena conimana duere finoacadomico? ¿Bue ñellena o come diga fuiridomico?" ²⁷ Duere finoacadimie naimiena oni ñuitade. Jicanote: "¿Bu odi cai illaímana jonegao? ¿Bu caímo ona llotatate juez isoi?" ²⁸ ¿Na are Egipto imie o meinia isoi cuena jiaí meineiacadío?" ²⁹ Iena cacajano, come fajana naimie llinua jira, jacinaillanona, Moisés micorí aiside. Madián railla eníruemo jamai ua illafuena ite. Dinomo ie aína ua mei, nainomo mena jitona comuitate.

³⁰ 'Caimaci, cuarenta años illa mei, jofue iñenanomo Moisés micorí illanona, Jusiñamui jaíenici naimie micorímo bairede. Sinaí railla anedu íanori ite. Amena boua isoi amenamo bairede. Naie boode amenadí fuiñede. ³¹ Iena ciuano, Moisés micorí raíjicaide. Naie

iaíreise naimie micorí jibuisaidemo, naimiemo Jusiña-mui lloste: ³² "O usumatiaí imaci Jusiñamuidícue. Abraham, Isaac, Jacob, imaci Jusiñamuidícue" lloste. Jacinaillanona Moisés micorí abi docaide. Jaciruillanona, erodañede. ³³ Jusiñamui naimiena raite: "Jamai bue o isoilla jira, o zapatona duiño. Benomo cue illa jira, o naidaíllanodí eo mareno. ³⁴ Egiptomoto cue cominí llegi cacajana raise ciodicue. Naimaci duere sefuillana uifnotícue. Ie jira omo bairedícue, naimacina Egiptomona jilloitallena. Mai jaí. Egiptomoto ona oretaitícue" lloste; ³⁵ iadedí cominí dinena Moisés micorína jaie jitaíñenamona, naimiena raitimaci: "¿Bu illaímana odi jonegao? ¿Bu o juezna jonegao?" Cominí dinena naimiena jitaíñedimaci; iadedí Jusiñamui naimiena illaímana itatate. Naimiena Egiptomona cominina jilloitaraimana jiaí itatate. ³⁶ Egiptomona Moisés naimacina atide. Egiptomoto nia ia, diga siño rafuena finode. Jiaírede monaíllai fuemo naimaci rillanona, siño rafuena jiaí finode. Jofue iñenanomo cuarenta años siño rafuena finocana jaide.

³⁷ 'Caimaci, Moisés micoridí cai judíuaí cominimo lloste: "Omoimona Jusiñamuidí damiena ie rafue lloraimana ico oretate, naimie cuena oretaja isoi". ³⁸ Jofue iñenanomo naimaci ia, Moisés Jusiñamui jaíenici diga anedumo ñaite. Anedu mamecidí Sinaí. Iemei cai usumatiaí micoriaí diga naie jaíenici facaina Moisés ñaite. Caímo fecallena, naimiedí cominina itatate uaina feiñote; ³⁹ iadedí cai usumatiaí micoriaí naimiena ñnoiacaíñedimaci. Naimiena jitaíñedimaci. Egiptomoto abido jaillemo naimaci comeciaí facadimaci. ⁴⁰ Ie jira cominí dinena Aarón micorimo llotimaci: "Egipto eníruemona Moisés caina atide; iadedí naimie cai diga illana ja uifnoñedícaí. Cai facaina Jusiñamuina eruaide jiraraína fino, Egiptomoto abido caina ifollena". ⁴¹ Iemo jurareta urue joreña finodimaci. Iena sedallena, faga toíca ocainaiaína fecadimaci. Naimaci finoca rafueri eo caimataidimaci. ⁴² Ie jira Jusiñamui naimacimona oni jaillanona, naimacina faínonocaide. Iemona jito-mana sedauidimaci. Fivuína jiaí sedauidimaci. Ucuaina jiaí sedauidimaci. Jusiñamui rafue lloraima ie rabenicomo buena jaie iese cuega:

Jusiñamui lloste: "Judíuaí imaci, cuarenta años jofue iñenanomo omoí ia, cuemo omoí faga toíca ocainaiaí fecañedomoí;

⁴³ iadedí cuemo omoí comeciaína facañeno Moloc railla jiraraína sedadomoi.

Refán railla ucuduna jiaí sedadomoi.

Naimacina sedallena, jiraraína finodomoi.

Ie jira Babilonia nairaí baífemo omoína oretaitícue" cuega. Naie facaise cai usumatiaí micoriaí Jusiñamuina jitaíñedimaci.

⁴⁴ 'Caimaci, bie rafuena cai fueollena, cai usumatiaí micoriaí motomo Jusiñamui illana lloitícue. Jofue iñenanomo cai usumatiaí micoriaí motomo daje jofo ailloconitaí. Nainomo Jusiñamuina sedallena, Jusiñamui Moisés micorímo acataja isoi, iena nitimaci. Jusiñamui jaie cuega noficidí naícomo eenoga. ⁴⁵ Josué diga bie eníruemo naimaci billa facaise, cai usumatiaí

micoriai naicon a tidimaci. Bie enirue jiaie nairaiaimo jainaiaide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. ⁴⁶ Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: ⁴⁷ ia Salomón micoridi jofona Jusiñamui iena finode; ⁴⁸ iadedi Jusiñamuidi iima finoca jofomo i-ñede. Jusiñamui facaina lloraima micoridi Jusiñamuina iese cuete:

⁴⁹ Cai Nama raite: "Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitañedicue" raite.

⁵¹ Ero, omoi comeciai jaiarede. Omoi comeci ñnoñede. Jefonidomoi isidomoi. Ie jira Jusiñamui Joreño anamo iacaiñedomoi. Omoi usumatiai micoriai isoí itomoi. ⁵² Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue. ⁵³ Jusiñamui jaieniciaimona Moisés micori llogacinona feiñotomoi; iadedi iena ñnoñedomoi.

Judúuai Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite. ⁵⁵ Jusiñamui Joreño nana Esteban micori comecimo namatajamona, monamo eruailano, naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode. ⁵⁶ Raite:

—Mona ecuaillana ciodicue. Jusiñamui jito Jusiñamui nabeimo naidaillana ciodicue.

⁵⁷ Esteban lluaana cacajano, jefo oroisite. Eo cuiriillano, naimie dine aisicaidimaci. ⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside. ⁵⁹ Estebana nofici diga fairinuano, Estebadi Jusiñamuimo ado jide:

—Cue Nama Jesús, cue joreño feiño.

⁶⁰ Ieconí cañici ifodo rainadacaida ado jide:

—Naimaci bie jeacino finua muidona, ibana oñeno. Iese naimie jia mei, fiodaite.

Saulo creyentiaina duere finua rafue

8 Saulo dinena Esteban meiniana jiai jitaide. Cristo rafuena eo ñnotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiai duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiañodi Samaria railla eniruemo jaidimaci; iadedi Cristo oretagano nine jaiñedimaci. ³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiai gaitade.

Felipe Samariamo illa rafue

⁴ Tuficaida jaidino naga illanomo Jesús rafuena llocana uitimaci. ⁵ Samariamo Felipedi daje nairaimo jaide. Nainomo Cristo rafuena llofueuide. ⁶ Ailluena cominidi Felipe llofuiana eo raise feiñotimaci, naimie siño rafuena finua jira. ⁷ Felipedi diga jananiai anamo ite cominimona jananiaina oretate. Riire cuirioillano, jaidimaci. Ailluena tisitaitinona jillotate. Ailluena ñujañujacaidinona jiai jillotate. ⁸ Ie jira naie nairaimo ite comini eo iobidimaci.

⁹ Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomedicue.

¹⁰ Nana comini naimiena ñnotimaci. Abina uiñoñedino ñnotimaci. Abina uiñotino jiai ñnotimaci. Raitimaci:

—Naimie uaidi Jusiñamui ie. Naimiedi siño jito —raitimaci. ¹¹ Iese naimacina are jifue. Naimaci rajicaila jira, naimaci naimiena cacadimaci. ¹² Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llote. Naimaci Felipe llofuiana ñnotimaci. Inuamona, Felipe naimacina bautizade. Iñiaina bautizade. Riñoniaina jiai bautizade.

¹³ —Jiai ñnoticue —Simón di raite. Naimie bautizaja mei, Felipe diga jaiocaide. Felipedi diga siño rafuena finua jira, Simón naimena ciuano, rajicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaímaiai Juan diga, batine oredimaci. ¹⁵ Iaímaiai rillano, naimaci Jusiñamui Joreña feiñollena Jusiñamuimo jidiamaiai, ¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreña nia feiñoñedimaci. ¹⁷ Ieconí iaímaiai onollí naimacimo joniano, Jusiñamui Joreña feiñotimaci.

¹⁸ Naimaci Jusiñamui Joreño feiñuana Simón di ciuano, ucubena iaímaiaimo feacaade. ¹⁹ Raite:

—Cuemo omico uaina ine, bummo cue onollina cue joniamona, naimie Jusiñamui Joreña feiñollena.

²⁰ Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadío; iadedi Jusiñamui naimiena jamai fecade. ²¹ Bie rafuedi omo duiñede. Jusiñamuimona o comeci nia marañede. ²² O comeci iuai meido. Naimie o comecimo ite marañede facajacuaina oni dotallena, cai Namamo jica. ²³ Omo ailluena marañedicino illana uiñoticue. O comeci eo uradoide. Marañedicinona o comecimo namaredio.

²⁴ Simón uai ote:

—O llua cuemo suiñellena, o Nama diga cue facaina ñaino.

²⁵ Cristo rafuena iaímaiai llua mei, Jerusalémo abido bitiaímaiai. Abido billano, Samariamo diga comini illanuaimo Jesús ie mare rafuena llocana bitiaímaiai.

Etiopía imie creyentena jailla rafue

²⁶ Naie facaise Jusiñamui jaienisaimona damie Felipemo llote:

—Beicido joide naído mai jai. Jerusalémona Gazamo joide naisona jai —llote. Naie naiso jofue iñenanodo joide. ²⁷ Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijtuide. Naiñaiño mamecidi Candace. Naimiedi nana naiñaiño gobierno ucubena sedade. ²⁸ Naimie jai abido jaillano, ie carretamo raita, Isaías micori cueda rabenicono ado facade. ²⁹ Jusiñamui Joreño Felipemo llote:

—Naimie dine iaiei jai. Carreta dine jai.

³⁰ Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uifotio?

³¹ Naimie uai ote:

—¿Niese uifotitue, bu cuena canoñenia?

Felipemo jicanote, naimie diga a jaillano danomo raillena.

³² Naimie facaca cuedafue iese raite:

Toica llauda fallena uilla isoi, naimiena uitimaci. Toica llauda itirai garedino dine eeñena isoi, naimie ñaiñede.

Ie abina riidollena, uaina oñede.

³³ Marañede rafuena naimie finofede; ia naimiena duere finodimaci.

Naimie uruai iñeded, ¿bu naimie rafuena lloite? Meinia meinoconi, naimie jai iñede.

³⁴ Etiopía imie Felipemo jicanote:

—¿Bie lloraíma bu iena llote? ¿Dama naimie iena llote? ¿Jaiimiena iena llote? Cuemo llono.

³⁵ Iemei Felipedi bie cuedafuamona naimiemo Jesús ie mare rafuena llote. ³⁶ Naisona jaidiaimaímo, jinui illanomo ridiaimaíai. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

³⁷ Felipe uai ote:

—O comecimona o ñnoia, cuemona mare.

Naimie uai ote:

—Jesucristodi Jusiñamui jitonana ñnotitue.

³⁸ Naimie ie carreta jorodate. Iemei jinui dine jaidiaimaíai. Felipedi naimiena bautizade. ³⁹ Jinuimona iaimaíai bia, Jusiñamui Joreño Felipena oni uite. Etiopía imie Felipena dane cioñede; iadedi Etiopía imie iobicana jaide. ⁴⁰ Jusiñamui Joreño Azotomo Felipena uite. Cesarea dine naimie jaillanona, naga nairaímo Jesús ie mare rafuena llocana uite. Ie mei Cesareamo ride.

Saulo creyentena jailla rafue

(Hch 22.6-16; 26.12-18)

9 Naie facaise Saulo cai Nama Cristona ñnotinona eo duere finoacade. Icirillamona, naimacina meineiade. Ie jira Jusiñamui diga nanoca ñairaíma dine jaide. ² Judúai comini naie ñairaíma anamo illamona, creyentiana duere finollena, Saulo cartana naimiemo jicajade. Damasco ite judúai ofiracuaimo dajerie cartana uiacade. Naie ofiracuai sedaraini

naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. Iñiaí baia, riñoniaí baia, naimacina Jerusalémo atiacade. ³ Cartana ua mei, naimie jaillano, Damasco iaie ia, ieconi monamona damie naimie abina quetiñote. ⁴ Eniruemo naimie ana uaillano, monamona damie naimiemo lluaana cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadio. ⁶ Naidacai. Damasco mai jai. Nainomo o finolle rafue omo lloiticue.

⁷ Saulo diga jaidinodi ñaiñeno naidaidimaci. Naie uaina cacadimaci; iadedi buna cioñedimaci. ⁸ Ieconi Saulo naidacade. Ie uisi ecoricaillamona, erodatemo, jai buena cioñede. Ie onollina llinocaida, naimiena Damasco uitimaci. ⁹ Darui amani cioñede. Jusiñamuimo comecina facajamona, guiñede. Jiaí jiroñede.

¹⁰ Damasco Ananiana mameciredimie ite. Naimiedi creyente. Inañenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene ititue.

¹¹ Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jide. ¹² Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

¹³ Ananías uai ote:

—Nama, diga cominimona naimiena fididicai.

Jerusalémo naimiedi marañede rafuena ona ñnotinomo finode. ¹⁴ Jusiñamui diga nanoca ñairaíma uai naimiemo ite, nana bene ite creyentiana gaitallena.

¹⁵ Cai Nama naimiemo llote:

—Mai. Naimie jai cue fetoca, judúaiñedinomo cue rafuena llollena, illaicominimo cuena llollena, judúai cominimo cue rafuena jiaí llollena. ¹⁶ Cuena naimie jai ñnua muidona, naimie ñe isoi llegi cacajite. Naimiemo iena lloiticue.

¹⁷ Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

¹⁸ Ieconi Saulo uisimona lliciaí ico isoide ra uaide. Dane ciuana, naidaide. Ie mei jai bautizaga. ¹⁹ Ie mei jai guite. Dane mairide. Diga irui Damasco ite creyentiaí diga naimie ite.

Damascomo Saulo illa rafue

²⁰ Judíuai ofiracomo naimie jaillanona, Jesús ie rafue-na llofue. “Jesúdi Jusiñamui Jito” raillanona llofue.

²¹ Nana naimiena cacadinodi rajicaide. Raitimaci: —Bimie Jerusalémo Jesúsna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús díbeimo jai ite.

²² Saulo nagarui jacitaiñeno llofuiano fibioicaide. Llofueide:

—Jesúdi cai Jilloitaraima. —Naimie raise llofuia jira, judíuai dinena iena uaitanidimaci.

²³ Digarui illa mei, judíuai comeciaina facadimaci, naimiena meinellena. ²⁴ Naimie aisii raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano, ²⁵ naiona creyentiai naimiena oni uitimaci. Naimie jillobillena, llaigafo jinofebeimo cirigaimo rai-najanona, naimiena ana ñuitadimaci.

Jerusalémo Saulo illa rafue

²⁶ Jerusalémo naimie jaide. Naimie ria, creyentiaina nabaiacade; ia naimiena jaciruitimaci. Creyentena naimie jaillana ñnoñedimaci. ²⁷ Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo llua jiai llote. Damascomo naimie ia, Jesúsna jacitaiñeno llofuiana jiai llote. ²⁸ Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. ²⁹ Iena cacajanona, griego uaina ñaite judíuaidi naimie llofuiana uaitatimaci. Naimiena meineiacadimaci. ³⁰ Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

³¹ Judeamo, Galileamo, Samariamo nana creyentiai uri itimaci. Cai Namana ñnocana jaidimaci. Cai Namana jaciruiocaida jaidimaci. Jusiñamui Joreño naimaci comeciaina eo ocuñotade. Ailluena comini creyentiaina jaidimaci.

Eneas jillua rafue

³² Naie facaise diga illanuaimo Pedro macarite. Lidamo ite creyentiai dine ride. ³³ Nainomo damie bii-ramo biidena ciode. Naimiedi Eneas. Ocho años tisi-taillamona biide. ³⁴ Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O biira ferí. —Ieconí naimiedi naidadate. ³⁵ Nana Lidamo ite comini, nana Sarónmo ite comini diga, naimiena jilluana ciuanona, creyentiaina jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaiño ite. Griego uaimona oni dobañuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. ³⁷ Naie facaise

naiñaiño duicotaide. Ie mei fiodaite. Naimaci einamací finua isoi, ie nabaiñiai naiñaiño abina jocodimaci. Iemei aneba ie quartomo naiñaiñoña jonetimaci. ³⁸ Lidamona Jope iaie ite. Pedro Lidamo creyentiai illana fidiano, menamie naimie dine oredimaci. Iaimaiaina llotatimaci:

—Buena sedañeno cai dine raie bi.

³⁹ Ie jira Pedro naidacaida, naie iaimaiaí diga jaide. Naimie ria, aneba ie quartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci. ⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raita, Jusiñamuimo jiiide. Abido dobaicaida, naiñaiño erodate. Raite:

—Tabita, mai rainacai.

Ieconí naiñaiño uisí oni erodate. Pedrona ciuano, a rainadate. ⁴¹ Naiñaiño onollí llinuana, a naidanete. Ie mei Pedrodi feciñuaina, jiaie creyentiai diga, uaidote, naiñaiño jai cajenana naimaci cioillena.

⁴² Nana Jopemo ite comini naie rafuena fididimaci. Ie jira ailluena comini cai Namana ñnotimaci. ⁴³ Jopemo Pedro diga irui Simón jofomo ite. Simón di ocaina igoi-na cuidoraíma.

Cornelio comeci iuai meidua rafue

10 Cornelio raillamiedi Cesareamo ite. Naimiedi capitán. Itaiamona bite soldaduai naimie anamo itimaci. ² Naimiedi Jusiñamui llogacínodo jaide. Nana ie comini diga Jusiñamuina ñnote. Judíuai cominimo ailluena rana jamai fecauide. Jusiñamuimo jiiuide. ³ Jitoma ana ia, naimiemo jai ñcairilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

⁴ Naimiena Cornelio jaciruiocaida eruaidé. Jicanote:

—Nama, ¿buena jitaídió?

Naimie uai ote:

—Jusiñamui o jiacinuaina jai cacade. Jusiñamuidi duerede cominina o canuana jiai feitañede. ⁵ Mai, Jopemo damerie o mullaiaimona oreta, Simón rail-lamiena atillena. Naimie jiaie mamecidi Pedro.

⁶ Naimiedi igoi cuidoraíma jofomo ite. Naie cuidoraíma mamecidi Simón. Monailai fuemo naimie jofo ite.

⁷ Jusiñamui jaienicí jailla mei, Corneliodi ie mullaiaimona mena uaidote. Naimie anamo ite soldaduai-mona damie jiai uaidote. Naie soldadodi Jusiñamuina jiai ñnote. ⁸ Nana naimiemo Jusiñamui jaienicí llua naimacimo llua mei, Jopemo oretate. ⁹ Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jiiillena. ¹⁰ Naimie aimetaite. Guiacade. Guillena comini finodemo, naimiemo ñcairilla isoi ite. ¹¹ Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite.

¹² Naiemo jiaíforie eruaidé ocainaiaí ite. Diga eniruemo jorode ranaí ite. Diga nuiciniaí jiai ite. Nana Moisés micorí fimaidoga rille radi ite. ¹³ Naimiedi monamona damie llua na cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micorí fimaidoga rille rana jaca riñedicue.

¹⁵ Monamona damie llua dane cacade:

—Jusiñamui jai fimaidoñede. Ie jira iese lloño.

¹⁶ Dacaiño amani iese suide. Ie mei naie radi monamo abido jaide.

¹⁷ Pedro ie comecina facade: “¿Niese illana ciodicue?” Ie daacaiño Cornelio oretagano bite. Simon illa jofo jicauano, naie nasemo ride. ¹⁸ Simón Pedrona naie jofo illana jicantimaci. ¹⁹ Pedro ie nicairillana isoide mo comecina facajano, Jusiñamui Joreño naimiemo llote:

—Ero, daje amani iima ona jenode. ²⁰ Naidacaida, ana jai. Naimaci diga buena sedaño mai jai. O dine naimacina oredicue.

²¹ Pedrodi comini dine ana jaide. Raite:

—Omoi jenocamiedicue. ¿Bue ñiaibitomoí billa?

²² Uai otimaci:

—Cornelio raillamie anamo iticai. Cornelio Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina inotimie. Nana judíuai comini dinena naimiedi mareuidimie.

²³ Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiaí naimie diga jiaí jaidimaci. ²⁴ Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiaí jiaí jai uaidote. ²⁵ Pedro fo jaia, Cornelio dine naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena.

²⁶ Pedrodi naimiena a naidanete. Raite:

—Mai a naidada. Cue jiaí jamai imadicue.

²⁷ Naimie diga ñaiano fo jaidiaimaiaí. Ailluena comini ofillana ciode. ²⁸ Naimacimo llote:

—Moisés micorí judío imie judíuñedimie nabairillana rairuide. Iena uiñotomoí. Judíuñedimie jofomo illana jiaí rairuide. Ie areruido Jusiñamui nicairilla isoidifuenta cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoína cue jearuillana jai jitañede. ²⁹ Ie jira buena sedaño biticue, cuena o uaidua jira. ¿Bue ñellena cuena uaidotomoí? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jidicue. Ieconí Jusiñamui jaienici cuemo bairede. Naimie iniroi quenirede. ³¹ Cuena raite: “Jusiñamui o jiana cacade. Naimiedi duerede cominina o canuana feitañede. ³² Ie jira Jopemo damieriena oreta, Simón Pedrona uaidollena. Jiaie Simón jofomo ite. Simóndi igoí cuidoraíma. Ie jofo monaillai fuemo ite”. ³³ Iemona ona uaidoticue. O comeci marena jira, bene bitio. Jai nana bene iticai. Jusiñamui cai di-

ga jiaí ite. Cai Nama nana omo llua cacareillena, bene iticai.

Cornelio Pedro llua rafue

³⁴ Pedro uai ote:

—Jusiñamui nana comini naimie inuana jitaillana jai uiñoticue. ³⁵ Naga nairaimona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide. ³⁶ Cai judíuai cominimo Jesucristo llua mona, Jusiñamui dibeimo cai illena jai uiñoticaí. Iemona Jusiñamui diga cai uri illana jai jiaí uiñoticaí. Jesúsdi nana cai Nama. Bie rafuena navui janore fididomoí. ³⁷ Nana Judeamo bie rafue llocana jai jaide. Juan micorí bautizajana llua mei, Galileamo Jesús naimie llofuiana tainede. ³⁸ Jusiñamuidi ie Joreña Jesús mo fecade. Jesúsdi Nazaret imie. Naimiemo ie uaina jiaí fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. ³⁹ Judíuai eniruemona nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; ⁴⁰ iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiaí ciodicai. ⁴¹ Nana comini naimiena cioiñedimaci; iadedi Jusiñamui fetocano diese naimiena ciodimaci. Fiodailamona naimie jillua mei, naimie diga guiticaí. Naimie diga jamai jirodicai. Naimiena cai raise uiñua jira, Jusiñamui caina fetode, naie rafuena lollena. ⁴² Cominimo bie rafuena llua caimo llote. Jusiñamui Jesúsna jai fetode, naimiena inoñedinona duere finollena. Nia fiodaiñedinona duere finoite. Jai fiodaitinona jiaí duere finoite. Ie jira Jesús rafuena llocana jaidicai. ⁴³ Jesús muidona naga naimiena inotimie ie maraiñedinodi Jusiñamui dotalle. Iena nana Jusiñamui facaina lloraíni micoriaí jaie llotimaci.

Judíuaiñedino Jusiñamui Joreña feiñua rafue

⁴⁴ Pedro buena nia llofueia, Jusiñamui Joreño nana bie rafuena cacadinomo bite. ⁴⁵ Iena ciuanona, Pedro diga bite creyentiaí rajicaidimaci. Naimacidi judíuai comini. Judíuaiñede cominimo Jusiñamui ie Joreño jai fecaja jira, rajicaidimaci. ⁴⁶ Jusiñamui Joreño naimacimo illamona, judíuaiñedinodi jiaie nairai uailaído ñaitimaci. Naie ñaia uailaína uiñoñedimaci. Jusiñamuimo iobillacinona jai fecadimaci. Pedro diga bitino iena cacajano, rajicaidimaci. Iemei Pedro raite:

⁴⁷ —Cai feiñua isoi, Jusiñamui Joreña jiaí feiñotomoí. Omoi bautizallena jaca budí rairuiñeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

Jerusalémo Pedrodi naimiemo jai suide rafuena llote

11 Judeamo ite Cristo oretagano, jiaie creyentiaí diga, judíuaiñede comini Jusiñamui uaina feiñua-

na fididimaci. ² Pedro Jerusalémo abido ria, judíuai comini naimiena icidimaci. ³ Jicanotimaci:

—¿Bue ñellena judíuaiñedino jofomo jaidio? ¿Bue ñellena naimaci diga guitio?

⁴ Pedro uai uanona, naimacimo naie rafuena nagacluina lloste:

⁵ —Jopemo navui cue ia, Jusiñamuimo cue jüia, ñicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride. ⁶ Nainomo eruaidicue, diga rana ciodicue: ocainaiaina, eniruemo jorocana jaidinona, nuiciniaina. Iena ciodicue. ⁷ Monamona damie cuemo lluana cacadicue. Raite: “Pedro, naida-caillanona, fajanona, rino”. ⁸ Naie uai oticue: “Nama, dama ite. Moisés micori fimaidoga rille rana jaca riñedicue”. ⁹ Monamona dane cuemo lloste: “Jusiñamui iena jai fimaidoñede. Ie jira iese lloñeno”. ¹⁰ Dacaiño amani iese suide. Ie mei monamo nana abido dane jaide. ¹¹ Ieconí daje amani iima cai illa jofomo ridimaci. Cesaremona cue dine damie naimacina orede.

¹² Jusiñamui Joreñodí naimaci diga buena sedañeno cue jaillena cuemo lloste. Cue diga seis creyentiai jiai jaidimaci. Cuená uaidotimie jofomo jaidicai. ¹³ Nainomo cai rilla mei, naimie ie jofomo Jusiñamui jaienicina navui ciuana caimo lloste. Naie jaienicí naimiemo lloste: “Jopemo cominina oreta, Simón Pedrona atillena. ¹⁴ O jitaille rafuena omo lloste. Naie rafuena o cacajamona, jeacnomona jilloitio, nana o jofomo ite comini diga” lloste. Ie jira naimie cuena uaidote. ¹⁵ Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite. ¹⁶ Iena cue ciuamona, cai Nama Jesús lloga uaina comeciticue. Naimie navui lloste: “Juan micori rafuena comini feiñuamona, Juan naimacina bautizade; iadedí cue rafuena omoi feiñuamona, cue Moo ie Joreñona birui feiñoitomí”. ¹⁷ Cai Nama Jesucristona cai ñnuamona, Jusiñamuidí ie Joreñona caimo navui fecade. Naimacimo daje isoi birui fecademo, ¿ñiese Jusiñamui díbeimo iñeiticue?

¹⁸ Iena Cristo oretagano cacajano, jai naimaci uaina uaitallico iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidí judíuaiñede comini comeciai uai meiduana jai jitaide. Naimie díbeimo naimaci illana jai jitaide. Ie jira naimieri iobidicai.

Antioquíamo ite creyentiai illa rafue

¹⁹ Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judíuai cominimo naimaci rafuena llotimaci; ²⁰ iadedí tuficaidinomona jiaño Chipremona billanona, Cirenemona billanona, Antioquíamo rillano, judíuaiñedinomo cai Nama Jesús rafuena llotimaci. ²¹ Cristo uai naimacimo illamona, ailluena comini ñnotimaci. Cai Nama díbeimo jaidimaci. ²² Jerusalémo ite creyentiai iena fidiano, Antioquíamo Bernabéna oretatimaci. ²³ Naimie ria, naimaci marena

illamona, naimiedí Jusiñamui naimacina dueruillana uifnote. Ie jira iobide. Imaci comeciai ocuiñocana ñnocana jaillana naimacimo lloste. ²⁴ Naimiedí maremie Jusiñamui Joreño nana naimie comecimo namatadimie. Jusiñamuina eo ñnotimie. Naie facaise ailluena comini creyentiaiñe jaidimaci.

²⁵ Ie mei Tarsomo Bernabé Saulona jenuaide.

Naimiena baillanona, Antioquíamo naimiena uite.

²⁶ Daje año creyentiai diga nabairillanona, naimacina llofuetiaimaiaí. Antioquíamo creyentiaidí cristianona nano mameciredimaci.

²⁷ Iemei Jerusalémona Antioquíamo damierie Jusiñamui rafuena llorainí bitimaci. ²⁸ Naimacimona Agabo raillamie ite. Jusiñamui Joreñodí naimiena llotatate:

—Nana comini ico aime guitimaci. —Claudio illa mana illa facaiseconi iese jai suide. ²⁹ Ie jira Antioquíamo ite creyentiaidí, Judeamo ite creyentiaimo, ucubena oretaiacadimaci. ³⁰ Nagamiiaí imacimo illa dierise ucubena oredimaci. Creyentiaina llofuerainimo Bernabé diga, iaímaiaí Saulo diga, naie ucubena oredimaci.

Herodes Agripadí creyentiaina duere finua rafue

12 Naie facaise Herodes railla illaimadí creyentiaimona damieriena gaitatate, naimacina duere finollena. ² Lloebi diga Jacobo cimaiona jaitatate. Jacobodí Juan ama. ³ Ieri judíuai illaicomini iobidimaci. Iena uifñuamona, Herodes Pedrona jiai gaitatate. ⁴ Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacade. ⁵ Ie jira Pedro cárcelmo fiebide; iadedí creyentiai naimie facaina eo jiidimaci. ⁶ Herodes naimiena meineiacanarui naío Pedro soldaduái motomo inide. Mena lloeo diga maiga. Soldaduái cárcel nasena jiai sedadimaci. ⁷ Ieconí cai Nama ie jaienicidí cárcelmo bairede. Cárcelmo lligaiñote. Naimiena casitallena, jaienicí Pedro ciraigina jetade. Raite:

—Raíre naidacai.

Ie mei naimie onollimo ite lloedí oni uaide. ⁸ Jaienicí naimiena raite:

—O iniroina jita. O zapatona jiai jita— Iena jitaja mei, naie jaienicí dane raite—. O iniroi o abimo ferino. Cue diga mai bi.

⁹ Naie jaienicí jinafona Pedro jino jaide. Pedrodí naie jaienicí naimiemo finoca rafuena uifñoñede.

—Ñicairilla isoi comecina facadicue —raite. ¹⁰ Naga nasena sedade soldadomona jaide. Jino jaillena, nanoca nasemo ride. Nai nasedí lloema ie; iadedí nase dama ecoride. Jino jaidiaímaiaí. Daje calle jaillanona, jaienicí naimiena fañonocaide. ¹¹ Iemona Pedro naimiemo suide rafuena jai uifñoñeide. Raite:

—Cue Nama ie jaienicina uanai oretate. Herodemonu cuena jillobitade. Judúuai illaicomini cue meinellena cue sedajamona cuena jillobitade.

¹² Iena jai naimie uiñuano, María jofomo jaide. Maríadi Juan Marcos ei. Jusiñamuimo jillena, naicomo ailluena comini ofidimaci. ¹³ Rillanona calle fuemo ite nasena tute. Daje mullaiño bite. Naiñaiño mamecidi Rode. ¹⁴ Naimie uaiduamona, naiñaiño Pedro uaina uiñote. Iobilla jira, nase econoñede; iadedi abido fo aise. Pedro nasemo illana llote. ¹⁵ Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

¹⁶ Pedro nasena nia tua jira, nasena econuaibitimaci. Econuamona naimiena naimaci ciuamona, rajicaidimaci. ¹⁷ Fo jaillano, Pedro ie onolli jaidide, naimaci lli-caillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentaimo iena jiaí llono.

Ie mei Pedro jino jaillano, jiaínomo jaide.

¹⁸ Monaidemo, Pedro nainomo iñena jira, soldaduái rajicailanona, siadotimaci. ¹⁹ Herodes iena fidiano, naimiena jenotate. Naimiena baiñena, soldaduaimo jicantote. Baiñena jira, naimacina meinellena llote. Iemei Judeamona Cesareamo Herodedi jaide.

Herodes micori fiodailla rafue

²⁰ Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo majjidimiedi Blasto. Blasto diga naie cominidi nabairite, naimaci díbeimo naimie illena. Herodes eniruemona naimaci guille billa jira, uri illena naimie-mo jicantote. ²¹ Naie cominina Herodes feiñollena, ie ebirede iniroina jitade. Naimacina feiñollena, ie rairabicimo raide. Iemona raita, rafuena are llote.

²² Iena cacajano, comini ado cuiriidimaci:

—Jamai iimadi ñaiñena. ¡Jusiñamui ñaia!

²³ “Jusiñamuiñedicue” naimie raiñena jira, ieconi cai Nama jaienicí naimiena iracotaitate. Jusiñamuimo iobillacino naimie fecañena jira, aiaí naimiena aite. Iemona naimiedi fiodaite.

²⁴ Naie facaiseconi Jusiñamui uai llocana jaide. Ailluena comini iena inotimaci.

²⁵ Iaimaiaí uiga ucube illanona, Bernabé, Saulo diga, Jerusalémoma Antioquíamo abido bitiaimaiaí. Juan Marcos jiaí atidiaimaiaí.

Bernabéna, iaimaiaí Saulo diga, fetua rafue

13 Antioquíamo creyentiaí motomo Jusiñamui facaina lloraini itimaci. Llofueraíni jiaí itimaci: Bernabé, Simón. Simóndi jiaie mamecí Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla

enirue gobernador. Saulo jiaí ite. ² Naimaci Jusiña-muina sedajamona, guiñenaruillaí ia, Jusiñamui Joreño naimacimo llote:

—Bernabé iaimaiaí Saulo diga fetu, cuejena. Cue rafuena iaimaiaí llollena, iaimaiaína jai fetodicue.

³ Jusiñamuimo naimaci jiaí mei, Jusiñamui iaimaiaína fetuana naimaci uiñuamona, naimaci onolli iaimaiaí-mo jonia mei, iaimaiaína naimacimona oni oretatimaci.

Pablo, iaimaiaí Bernabé diga, Chipremo illa rafue

⁴ Iaimaiaína Jusiñamui Joreño oretaja jira, Seleuciamo jaidiaimaiaí. Nainomona botedo Chipremo jaidiaimaiaí. Chipredí uasi. ⁵ Chipremo ria, Salaminamo judúuai ofiracuaimo Jusiñamui uaina llofuetiaimaiaí. Juan Marcos iaimaiaí diga jiaí jaide. ⁶ Nana naie uasimomo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraima. “Jusiñamui rafuena lloticue” raite; iadedí taino lloraima. ⁷ Gobernador diga maijuide. Gobernadori Sergio Paulo. Gobernadori abina uiñotimie. Jusiñamui uaina cacaacana jira, naimie Bernabé iaimaiaí Saulo diga uaidote. ⁸ Barjesús ie jiaie mamecidi Elimas. Naie iaimaiaí llofuiana uaitate. Gobernador inuana jitañede. ⁹ Saulodi jiaie mamecí Pablo. Pablo dinena naimiena eo eruailano, Jusiñamui Joreño nana Pablo comecimo namatajamona, ¹⁰ naimiemo llote:

—¡Eo jifueraimadio! ¡Eo marañedio! ¡Taife díbeimo itio! Nana mare rafue díbeimo iñedio. Cai Nama ie mare uanaicinona dobairaidodio. ¹¹ Cai Nama ie uaido ona ja iracotaitaticue. Nano nigarui useredinona cioiñeitio.

Ieconí naimie cioñede. Cominina jenuaide, ie onolli-do llinocaida ie uillena. ¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaita.

Jesús rafuena llocana jaidiaimaiaí

¹³ Pafomona botedo Pablo ie nabaiñai diga jaide. Perge railla nairaimo ride. Perge Panfilia railla eniruemomo ite. Juan Marcos iaimaiaína fañonocaida, Jerusalémoma abido jaide. ¹⁴ Pergemona Antioquíamo jaidiaimaiaí. Pisidia railla eniruemomo Antioquí ite. Sábadoruimo judúuai ofiracomo jaillano, ana raidiaimaiaí. ¹⁵ Moisés micorií cuegafuena facaja mei, Jusiñamui facaina lloraini micoriaí cuegafuena facaja mei, judúuai ofiraco sedadino iaimaiaímo llotimaci:

—Caimaci, cominimo bue omico lloiacania, mai llono.

¹⁶ Pablo naidadajano, ie onollina jaidide, comini lli-caillena. Raite:

—Jusiñamuina sedallena bene itomoi. Omoimona damierie judúuaidomoi. Jiaíno judúuainfedomoi; iadedí judúuai isoi Jusiñamuina sedadomoi. Cue lluamo mai cacarei. ¹⁷ Iemona omoi fueollena, cai jaiagai rafuena lloticue. Cai judúuai comini Jusiñamuina birui sedadi-

caí. Naimiedi caí jaiagaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide. ¹⁸ Jofue iñenanomo cuarenta años naimacina canode. ¹⁹ Canaán eniruemo siete nairaina cuenode. Caí jaiagaimo, naimaci uruiái diga, naie eniruena fecade, naimaci iena. ²⁰ Cuatrocientos cincuenta años caí jaiagaina fetuamona, naie eniruena naimacimo fecade. Naie facaise Jusiñamuidi jueces fetode, caí jaiagaina naimaci canollena. Naimie díbeimo naimacina itatallena, Jusiñamui naie jueces fetode; iadedi Samuel micorí illa facaise juecesna jai jitaiñedi-maci. Samuel micorídi Jusiñamui facaina lloraima. ²¹ Il-laimana naimaci jitailla jira, Jusiñamui Saúl micorína fetode. Naimiedi Cis micorí jito. Naimie micorí nairaidi Benjamín. Cuarenta años Saúl micorí caí usumatai micoríaina sedade. ²² Naimie ifo meidollena, naimaci illai-mana illena, Jusiñamui David micorína fetode. Naimiedi Isai micorí jito. Jusiñamui naimie micorína llote: “Bimie eo cue comecido jaidimie. Nana cue jitailla rafuena finoite”. ²³ Jusiñamui llua isoi, David micorí uruiaimona Jesúdi caí judúai comini jilloitaraimana jaide. ²⁴ Jesús nia llofueñenia, Juan Bautista micorí llofueuide. Juan micorí caí cominimo llouide: “Omoi jeacinona fañonocaida, Jusiñamui díbeimo omoi comeciaí iuailai meido. Iena omoi meidoia, comini iena uiñotallena, mai omoi bautizallomoi”.

²⁵ Juan micorí ie llofua fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoiñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

²⁶ Caimaci, caí eirue jito Abraham micorimona comuidicaí. Jusiñamuina birui sedadicaí. Ie jira caí jeacinomona naimie jilloitalle rafue caimo duide. Jesúna ñaiticue. ²⁷ Jerusalémo itinodi, caí illaicomini diga, Jesúna jaie meinetimaci. Naga sábadó Jusiñamui facaina lloraini micoríai cuegafuina facadimaci; iadedi iena raise cacaiñedicue. Jesúna naimaci meiniamona, Jusiñamui lloraini micoríai cuegafuina jai suitatimaci. ²⁸ Jesús maraiñede rafuena finoñede; iadedi naimiena meinetimaci. Pilatomo jicanotimaci, naimiena meinel-lena. ²⁹ Nana Jusiñamui facaina lloraini micoríai cuegafuina suilla mei, cruzmona naimie ana uano, nofici ie raiafomo naimiena jonetimaci; ³⁰ iadedi fiodaillamona Jusiñamui naimiena jillotate. ³¹ Galileamona Jerusalémo naimie diga jaidino naimiena diga icaiño cioidimaci. Iemei cominimo naimie rafuena jai llocabitimaci. ³² Jusiñamui caí jaiagaimo jaie lloga rafue jai suide. Iena omoimo ja lloiticoco. ³³ Jusiñamuidi caí jaiagaimo llogafue birui jai suide. Jesúna caí dine jai orede. Naiena salmos dosmo cuega: “Jusiñamui llote: ‘Cue jittodío. Birui ona jilloitaraimana itataticue’”. ³⁴ Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiaí raite: “Davidmo cue llogacinona omoi facaina jaca finojiticue”. ³⁵ David micorí jiaie salmomo iena cuete: “O mareuidimie jaca rifail-lana jitaiñedio” raite. ³⁶ Jusiñamui David micorína ñaiñede. Ie illa dinori David micorídi Jusiñamui jitailla rafuena finode. Ie mei naimie fiodaite. Ie raiafomo

naimie comini naimiena jonetimaci. Ie mei David micorí abi rifaiñede; ³⁷ iadedi Jusiñamui jito abidi ie isoi rifaiñede.

³⁸ Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micorí llogacinodi omoi maraiñedicinomona omoína jillotañede; ³⁹ iadedi Jesúna birui omoi ñnoia, omoi jeacino anamona jilloitomoi. ⁴⁰ Abina omoi rairui, Jusiñamui facaina lloraini micoríai jaiie cuegafuina omoimo sui raillano. Jaie cuetimaci:

⁴¹ Ero, Jusiñamui uaina jamaidomoi. Ieri rajicaidomoi; iadedi faifidomoi.

Omoi motomo siño mare rafuena birui finodicue. Ie bu omoimo iena iese lloia, bie rafuena ñnoñeitomoi. Ie isoi omoimo suiñellena, Jesúna birui omoi mai ñno.

⁴² Ie mei Pablo lliicaide. Iaimaiaí jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane llollena. ⁴³ Comini jino jailla mei, ailluena comini Pablo, iaimaiaí Bernabé diga, ñaicana jaidimaci. Judúai iese jaidimaci. Judúaiñedinó iese jiaí jaidimaci. Naie judúaiñedinodi judúai isoi Jusiñamuina ñnotimaci. Pablo, iaimaiaí Bernabé diga, ñaicana jaillanona, naimacimo llotiaimaiaí:

—Jusiñamui omoína duenaillana omoi jai uiñua jira, Jesús rafuena mai omoi ñno.

⁴⁴ Jiaie sábadoruimo ailluena comini ofidimaci, Jusiñamui uaina cacareillena. ⁴⁵ Ailluena cominina ciuano, judúai comini dinena eo uradoidimaci. Pablo joreñoña ñaitimaci. Naimie llofuiacinuaina uaitatimaci; ⁴⁶ iadedi Pablo, iaimaiaí Bernabé diga, jacitaiñeno llofuetiaimaiaí:

—Omoimo Jusiñamui uaina nano lloiacadicoco. Iena jitaiñedomoi. Jusiñamui diga omoi jaca illena jitaiñedomoi. Ie jira judúaiñedinó dine jaiticoco. ⁴⁷ Iese Jusiñamui jaie llote:

Judúaiñedinomo ona oretaiticue, naimacimo cue rafue llollena, naga eniruemo ite cominimo jeacinomona jilluana llollena.

⁴⁸ Iena cacajano, judúaiñedinó iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci. ⁴⁹ Nana bie eniruemo caí Nama Jesús uaina llocana jaide; ⁵⁰ iadedi judúai dinena diga cominina fuemo faicana uitimaci. Jusiñamuina sedade riñoniaína fuemo faicana uitimaci. Naie riñoniaí mameciaí are soride. Illaicomini fuemo faicana uitimaci. Ie jira Pablo, iaimaiaí Bernabé diga, duere finodimaci. Naimaci illanomona iaimaiaína jino dotadimaci; ⁵¹ iadedi jioracuaí iaimaiaí eillimona jaidinotiaimaiaí, naimacimo ite jeacinuaina naimaci uiñollena. Ie mei Iconio railla nairaimo jaidiaimaiaí; ⁵² iadedi Antioquíamo ite creyentiaí eo iocire itimaci. Jusiñamui Joreño nana naimaci comecimo namatade.

Iconiomo Pablo, iaimaiaí Bernabé diga, illa rafue

14 Iconiomo judúai ofiracomo, iaimaiaí Antioquíamo jailla isoi, jaidiaimaiaí, Cristo rafuena duere llotiaimaiaí. Ie jira ailluena comini creyentiaína

jaidimaci. Judíuai cominimona ailluena ñnotimaci. Judíuaiñede cominimona ailluena jiaí ñnotimaci; ² iadedi ñnoñede judíuaidi judíuaiñedinona fue mo faitimaci. Naimacimo creyentiaína tainona llotimaci; ³ iadedi nainomo are fiebidiaímaiaí. Cai Nama facaisena jacitaiñeno llotiaímaiaí. Cai Nama Jesús iaímaiaína síño rafuena finotate. Ie jira cominidi cai Nama Jesús naimacina dueruillana fididimaci; ⁴ iadedi nana comininaiena ñnoñedimaci. Comeciaina daje isoi lloisñede. Damierie judíuai facaisena itimaci. Damierie naie iaímaiaí facaisena itimaci. ⁵ Judíuaiñedinodi, judíuai diga, naimaci illaicominidi diga, naie iaímaiaína duere finoacadimaci. Noficina iaímaiaína fairigiacadimaci. ⁶ Iena fidiano, Licaoniamos ite nairaimo aisicano jaidiaímaiaí. Lистра railla nairaimo jaidiaímaiaí. Derbe railla nairaimo jiaí jaidiaímaiaí. Naie nairai ecimo ite eniruemo jiaí jaidiaímaiaí. ⁷ Nainomo Jesús ie mare rafuena llofuetiaímaiaí.

Listramo iaímaiaímo suilla rafue

⁸ Listramo damie tisitaite. Nanomona naimie iese jecia jira, jaca macariñede. ⁹ Pablo llofuiana naimie raise cacajamona, “Jusiñamui cuena jillotarede” raillanona, tisitaítmie ñnote. Pablo dinena naimiemo eruailano, naimie ñnuana uifnote. ¹⁰ Naimiemo ado llote:

—A naidada.

Iemei daiacaida naimie macarite. ¹¹ Ailluena cominidi Pablo finoca rafuena ciodimaci. Naimaci uaido ado cuiriidimaci:

—Iñiaí isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiaí sedauidimaci. ¹² Ie jira Bernabé mamecidi jiaícina jonega Júpiter. Pablo mamecidi jiaícina jonega Mercurio, naimie ñairaimana illa jira. ¹³ Naie nairai nanoca nase ruica facai Júpiterna sedauilla jofo ite. Iaímaiaína sedallena, safia diga juraretaína abina finoduanona, Júpiter facaina ñairaima naimacina atide. Ailluena cominidi diga bite. Juraretaína fallena, “Naie iaímaiaídi cai Jusiñamui” raillano, iaímaiaímo feaacadimaci. ¹⁴ Iaímaiaí iena ciuanona, “Cominidi marañede rafuena finoacade” raillano, iaímaiaí ñiroina cuaranotiaímaiaí. Cominidi motomo aisicana jaidiaímaiaí. Ado llotiaímaiaí:

¹⁵ —Nabaiñiaí, ¿bue ñellena cocomo iese finodomoí? Jamai ñmadicoco. Omoí isoidicoco. Jusiñamuina omoí sedallena, jamai rana omoí sedañellena, mare rafuena omoímo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiaí finode. Nana nainomo ite rana jiaí finode. ¹⁶ Jaiie Jusiñamuidi nana omoí judíuaiñedinoni omoí jitailla rafuena ñnuana rairuñede; ¹⁷ iadedi naimie finoca rafuemonona naimiema uifñoredomoí. Omoí facaina mare rafue naimie finocabide. Noci deitate. Omoí riana sicutate. Omoímo guille itatate. Iemona omoí comeciaina caimare itatate. Iemona Jusiñamuina uifñoredomoí.

¹⁸ Iese Pablo llote; iadedi iaímaiaímo juraretaína fecajana jaca fañonocaiacañedimaci. ¹⁹ Nano ñgarui illamona, Pisidiamos ite Antioquíamona judíuai cominidi

bitimaci. Iconiomona jiaí bitimaci. Judíuai dinena fue mo faiamona, naimaci díbeimo cominidi jaidimaci. Iemona noficio Pablona fairigite. Naie nairaimona naimiema sonocana uitimaci, fiadaitimema naimie eruaila jira. ²⁰ Naimiema iese fañonocaila mei, creyentiaí naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide. ²¹ Naie nairaimo Jesús ie mare rafuena llotiaímaiaí. Diga cominidi creyentiaína jaidimaci. Ie mei Listramo abido jaidiaímaiaí. Iconiomo abido jiaí jaidiaímaiaí. Pisidiamos ite Antioquíamos jiaí abido jaidiaímaiaí. ²² Creyentiaí comeciaina ocuifñotadiaímaiaí. Cristona ñia ñnuana llotiaímaiaí. Raitiaímaiaí:

—Jusiñamui dine cai ñia riñenia, eo duere sefuiticai.

²³ Naga creyentiaí illanomo creyentiaína sedarainona fetodiaímaiaí. Guiñeno Jusiñamuimo jiaí mei, guiñena facaise mei, naimiema naimaci jai ñnua jira, cai Nama illa anamo naimacina fañonocaidiaímaiaí.

Siriamos ite Antioquíamos abido jaidiaímaiaí

²⁴ Pisidiamos jaillanona, Panfiliamos ridiaímaiaí.

²⁵ Pergemos Cristo uaina llua mei, Ataliamos jaidiaímaiaí. ²⁶ Nainomona botedo Siriamos ite Antioquíamos abido ridiaímaiaí. Nano naie iaímaiaí illanomo abido ridiaímaiaí. Nainomona iaímaiaí navui ñia jaiñenia, creyentiaí dinena Jusiñamui iaímaiaína duenailana uifñuamona, iaímaiaína oredimaci. Jusiñamui rafuena iaímaiaí llollena, iaímaiaína oredimaci. Naie maijia fuilla jira, jai abido bitiaímaiaí. ²⁷ Iaímaiaí rilla mei, creyentiaína ofitatiaímaiaí. Nana Jusiñamui iaímaiaímo finoca rafuena llotiaímaiaí.

—Jusiñamuidi judíuaiñedinoni naimiema ñnuana jai jitaide —llotiaímaiaí. ²⁸ Dinomos creyentiaí diga are itiaímaiaí.

Jerusalémos Moisés micorí llogacina siadua rafue

15 Antioquíamos Jerusalémona janore cominidi billano, creyentiaína iese llofuetimaci:

—Moisés micorí caimo llua isoi, omoí abina omoí detatañenia, jeacinomona jillobiñeitomoí.

² Ie jira creyentiaí uri iñedimaci. Pablo, iaímaiaí Bernabé diga, Jerusalémona bitino llofuiana eo uaitatiaímaiaí. Ie muidona creyentiaí dinena iaímaiaína, jiaíe creyentiaí diga, Jerusalémos jaillena fetodimaci. Cristo oretagano diga, Jerusalémos ite creyentiaína sedaraini diga, bie rafuena siadoiacasite. ³ Creyentiaí naimacina oretaja mei, Fenicia railla eniruemo díbeido jiaí jaidimaci. Creyentiaí illanuaimos llofuecana jaidimaci. Judíuaiñedinoni creyentiaína jai jaillana naimacimo jiaí llotimaci. Ie jira naie creyentiaí caimare itimaci.

⁴ Jerusalémos ria, creyentiaídi naimacina feiñotimaci. Cristo oretagano itimaci. Creyentiaína sedaraini jiaí itimaci. Naimacimo nana Jusiñamui iaímaiaímo finoca rafuena llotiaímaiaí. Cristo rafuena iaímaiaí llofuiaimona, judíuaiñedinoni Cristona ñnuana llotiaímaiaí.

⁵ Iena cacajano, fariseuai dibeimo ite creyentiaimona jiaño naidaita raitimaci:

—Moisés micorí llogacínuaína ñnuamona, judúuaiñede creyentiaí abína diana jitaídicaí.

⁶ Bie rafuena siadollena, Cristo oretaganodi, creyentiaí sedarainí diga, danomo ofidimaci. ⁷ Iena are siadua mei, Pedro naidacaillano, raite:

—Amatiaí, judúuaiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uifnotomoi. Cue llofuiamona ñnotimaci.

⁸ Nana cominí comeciaina naimie uifnuamona, judúuaiñedino naimiena ñnuana Jusiñamuidí uifnote. Caimo fecaja isoi, ie Joreño naimacimo fecaja jira, Jusiñamuidí judúuaiñedinona jitaillana jai uifnoticaí.

⁹ Jusiñamuidí naimacina cai isoi jai feifnote. Naimiena naimaci ñnua jira, naimie naimaci comeciaina jeacinona jai dotade. ¹⁰ ¿Bue ñellena Jusiñamuina ñnoiacañedomoi? Jusiñamui jitaillacino omoi finoacaiñena jira, naimie omoi duere finuana jitaídomoi. Cai jaiagai Moisés micorí llogacínodo jaidimaci; iadedi iena raise ñnoñedimaci. Nana ie llogacínona jaca finonidimaci. Iedo jaie jiaí jaidicaí; iadedi iena jiaí finonidicaí. ¿Bue ñellena iedo birui cai jaillana jitaídomoi? ¹¹ Jesucristo caína duenailla jira, cai jeacinomona jilloiticaí. Judúuaiñedino cai isoi jilloitimaci.

¹² Iena cacajano, nana ofidino uai llicaidimaci. Iemei Bernabé lluaana cacadimaci. Pablo lluaana jiaí cacadimaci.

—Jusiñamui judúuaiñedino motomo cocona siño rafuena finotate —lloitiiaimaiaí.

¹³ Iaimaiaí ñaia mei, Jacobo raite:

¹⁴ —Amatiaí, cuemo cacarei. Judúuaiñedinomo Jesús rafue Simón Pedro nano llua rafuena jai cacadicaí. Creyentiaína naimaci jaillena, Jusiñamui naimacina jai fetode. ¹⁵ Jusiñamui facaina llorainí micoriaí iena jaie cuetimaci:

¹⁶ Jusiñamui jaie llote: “David micorí illaíma isoi illaímana illena, cue jítóna ico oretaiticue.

David jicorí jito illaímana birui iñede; iadedi David micorí ifomo illaímana cue jito iite.

Iemona judúuaiñedino cuena ñnoitimaci.

Naimaci cue cominina jaillena jiaí jitaídicaí.

Iena cue llua jira, iena finoiticaí” llote.

¹⁹ Ie muidona cue comeci raite: Judúuaiñedinomona creyentiaína jaidinona duere finoñeíticaí. ²⁰ Naimacimo rabena oreta, dama buena llollena: “Jiraraimo fecaca llicisina riñeno. O aifñede riño diga iñeno. O ñiñede ñima diga iñeno. Llerinoga rana riñeno. Diruena jiaí riñeno”. ²¹ Jaiemona naga sábadó naga judúuai ofiracomo judúuidí Moisés micorí cuegafuiaimona naie isoide lletarafuena cacadimaci. Ie jira naie isoide rafuedo nia jaiticaí: iadedi jiaie Moisés micorí lletarafuedo jaiñeíticaí.

²² Ie mei Cristo oretaganodi, creyentiaína sedarainí diga, comeciaina facadimaci, naimacimona cominina fetollena, Antioquíamo oretallena. Nana creyentiaí comeciaina facajano: “Jee” raitimaci. Pablo, iaimaiaí Bernabé diga, naimacina oretaiacadimaci. Judana fe-

todimaci. Naimie mameci jiaicidi Barsabás. Silana jiaí fetodimaci. Jiaie cominí baifemo rafuena baitadiiaimaiaí. ²³ Rabena cuetimaci, iaimaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticaci. Jerusalémo iticaí. Cristo oretaganodicaí. Creyentiaína sedarainidicaí. Omoidí cai amatiaí. Omoimo jai cueticaci. Judúuaiñediomoi; iadedi cai amatiaídomoi. ²⁴ Cai motomona jiaie cominí naimaci llofuiado omoína uri itatañenana fididicaí. Omoi jeacinomona omoi jilloillena, Moisés micorí llogacínodo omoi jaillana jitaídicaí. Ie jirari omoi comeciái rucaicuerite. Naimacina oretañedicaí. ²⁵ Danomo cai ofilla mei, menamiña fetodicaí, omoimo oretallena, Bernabé, iaimaiaí Pablo diga. Bernabéna isiruiticaí. Pablona jiaí isiruiticaí. ²⁶ Iaimaiaí cai Nama Jesucristo muidona navui niadedi fioidaitiaimaiaí. ²⁷ Ie jira Judas, iaimaiaí Silas diga, oretaiticaí. Omoimo bie rabe cuia isoi lloitiiaimaiaí. ²⁸ Jusiñamui Joreño caimo illamona, bie rafuena omoimo lloiticaí. Ailluena rafue omoi finuana lloñeíticaí. Dani bie rafuena finojitomoi. ²⁹ Jiraraimo fecaca rana riñeno. Diruena riñeno. Llerinoga rana riñeno. O aifñede riño diga iñeno. O ñiñede ñima diga iñeno. Iese omoi iñenia, marena iitomoi. Macaibaite” cuetimaci.

³⁰ Ie mei Antioquíamo jaidimaci. Ailluena cominina ofitaja mei, naimacimo cartana fecadimaci. ³¹ Iena facajano, naie llucacínori iobidimaci. ³² Judas Jusiñamui facaina lloraima. Silas daje isoide. Diga rafuena creyentiaímo llofuetiaimaiaí. Naimaci comeciaina jiaí ocuifnotadiiaimaiaí. ³³ Diga irui nainomo illa mei, iaimaiaína oretatinomo creyentiaí iaimaiaína marena abido oretatimaci.

³⁴ Nainomo Silas comecina facajano, fiebide. Ie jira Judas dama abido jaide. ³⁵ Antioquíamo Pablo, iaimaiaí Bernabé diga, cai Nama Jesús rafuena llofuellena fiebidiaimaiaí. Diga cominí jiaí iese llofuetimaci.

Pablo jiaie eniruemo ite creyentiaí dine dane jailla rafue

³⁶ Diga irui illa mei, Pablo Bernabémo llote: p —Naga navui coco llua nairaímo creyentiaí dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

³⁷ Bernabédi, naie iaimaiaí diga, Juan Marcos uiacade. ³⁸ Panfiliamo iaimaiaína navui Juan faínonocaide. Iaimaiaí diga llofuellena jaiñena jira, Pablo naimiena dane uiacañede. ³⁹ Riire ñaitiaimaiaí. Comecina daje isoi lloifñediiaimaiaí. Ie jira dajena jaiñediiaimaiaí. Bernabé Juan Marcona uillanona, Chipremo aillue botedo jaidiaimaiaí. ⁴⁰ Ie mei Pablo Silana uite. “Jusiñamui omicono canoite” creyentiaí dinena raillanona, iaimaiaína oredimaci. ⁴¹ Siria railla eniruemo Jesús rafuena llocana jaidiaimaiaí. Cilicia railla eniruemo jiaí llocana jaidiaimaiaí. Creyentiaí comeciaina ocuifnotacana jaidiaimaiaí.

Timoteo iaimaia digá jailla rafue

16 Nano Derbemo Pablo, iaimaia Silas digá, ridiaia-maia. Iemona Listramo ridiaiaiaia. Nainomo Timoteo railla creyente ite. Naimie eidi judía iñaiño. Jia creyente. Ie moo micoridi griego imie. ² Listramo ite creyentia, Iconiomo ite creyentia digá, naimiena: “Mare” raitimaci. ³ Pablodi Timoteona uiacade, naimie digá jaillena. Timoteo moo micorí griego imiena jira, naimie abina nia detatañede; iadedi nainomo ite judíuai illa jira, Moisés micorí llua isoi, Pablo Timoteo ie abina dete. Judíuñedimie naimaci motomo ia, naimaci motomo inide. ⁴ Naga nairaimo naimaci jaillanona, Jerusalémo siadogacina creyentiaimo llote. Jerusalémo Cristo oretagano, creyentiaina sedaraini digá, navui naicinona siadotimaci. Creyentia naie llua-na ñollena, iena llocana jaidimaci. ⁵ Ie jira creyentia ñnocana jaidimaci. Nagarui ailluena comini creyentia-na jaidimaci.

Pablo nicairilla ra isoidena ciua rafue

⁶ Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci. ⁷ Misiamo naimaci rillano, Bitiniamo jiacade; iadedi Jesús Joreño dane imaci jaillana rairuide. ⁸ Ie jira Misiamona ecido jaillano, Troas railla nairaimo jaidimaci. ⁹ Nainomo naie naiona Pablo nicairilla ra isoidena ciode. Daje Macedonia imiedi uicomo naidaita naimie-mo jica-jicanode. Raite: “Macedoniamu ruica o bi. Caina canuaibi”. ¹⁰ Naiena Pablo ciua mei, naie facaise-mona Pablo digá jaidicue. Lucadicue. Ie jira bie rafuena raise uiñotícue, iena omo cuellena. Macedoniamu ruica dine cai jaill botena jenodica. Comecina facadica: “Jusiñamuidi caina uaidote, nainomo ie mare rafuena cai llollena”.

Filipomo illa rafue

¹¹ Ie jira Troamona Samotrachimona monaillaido atona ie mamedo jaidica. Ie icoitidiruido Neápolis railla nairaimo ridica. ¹² Dinomona Filipomo duide naisodo jaidica. Macedoniamu ite. Naie enirue facaise ie nanoca nairai Filipos. Naie nairaidi Romamona bitino nairai. Digá irui nainomo itica. ¹³ Sábadoruido naie nairaimona nasedo jino jaidica. Comecina facajamona: “Dinomu niba comini oficabidimaci, Jusiñamuimo jillena”, ille fuemo jaidica. Nainomo dañaiñorie riñoniai billanona, dinomu ana raídica, naiñaiñuaimo Cristo rafuena llollena. ¹⁴ Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede inruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comece naie llua feiñotade. Naie facaise creyentena jaide. ¹⁵ Naiñaiño ie jofomo itino digá bautizaja mei, caimo llote:

—Cuedi cai Namana cue jai ñnuana omoi uiñuamona, cue jofomo mai bi, nainomo omoi fiebillasa. —Duere caina uai-uaidode.

¹⁶ Jusiñamuimo jiranomo jairuido jaidicaimo, daje jitañomo dafaifidica. Naiñaiñodi jiainomona ibacaiñaiño. Janaba anamo naiñaiño jia ite. Iemona naiñaiño jairuido suille rafuena llouide. Naie rafuena llua ibatajano, naiñaiño namaiaidi ailluena ucubena feiñouidimaci. ¹⁷ Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

¹⁸ Digá irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño lluaucubena jai oñenana naiñaiño namaia jai uiñua jira, Pablo, iaimaia Silas digá, gaitadimaci. Iaimaiaina plazamo illacomini illanomo sonocana uitimaci. ²⁰ Dinomu iaimaiaina illacomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañediaiaiaia. Iaimaia judíuai comini. ²¹ Romanuai comina cai illa jira, iaimaia llogacinauina cai ñnoia, iedo cai jaia, marañede.

²² Iena cacajano, nana comini naie iaimaiaina fanaisitimaci. Illacominidi naie iaimaia iniroina cuaranuanona duiñode. Rasi digá, iaimaiaina digá icaño fatatatimaci. ²³ Iaimaiaina eo faja mei, cárcelmo jonetimaci. Cárcelna sedaraimamo iaimaiaina raise sedallena llotimaci. ²⁴ Iese llua jira, iaimaiaina llaveracomu fo iaimaiaina uite. Donoramu iaimaia eillai ñuitajano, raise donode.

²⁵ Naiona daferui facai Pablo, iaimaia Silas digá, Jusiñamuimo ifuerillacina ro-rodiaiaiaia. Jia jiidiaiaiaia. Jiaie llavecana naiona cacadimaci. ²⁶ Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie dacaiño nana llavecana imaci donua radi oni ecoride. ²⁷ Cárcelna sedaraima casidemo, cárcel ie nasia ecocorinaillana ciode. “Llavecana jai aisidimaci” raillamo naimie comece facade. Ie jira ie lloesi aiñoicaida, dama abi faitaacade. “Illaicomini bia, ¿bue lloitícue?” raillamona comece facade; ²⁸ iadedi Pablodi eo riire cuirioide:

—¡O abina dama meineño! Bene nana iticaia.

²⁹ Lamparina atillena cárcelna sedaraima jicajanona, jarire fo jaide, Pablo iaimaia Silas dine. Jacinaillano, naimie abidi docaillamona, iaimaia uicomo cañici ifodo ana rainadate. ³⁰ Iaimaiaina jino ua mei, nai iaimaiaimo jicanote:

—¿Buena ñnojitícue, cue jeacinomona cue jilloillena?

³¹ Uai otiaiaiaia:

—Coco Nama Jesúsna ñno. Iese na o jofomo ite comini digá o jilloillesa.

³² Iemei naimiena Jesús ie rafuena llofuetiaiaiaia, nana ie jofomo itino digá. ³³ Naie facaise iaimaia

bofellaña jocode. Iemei naimiedi, nana ie comini diga, bautizaga. ³⁴ Guillena, ie jofomo naie iaiaiaia uite. Jusiñamuina jai ñnua jira, na ie comini diga, naimie caimare ite.

³⁵ Ie oni monaidemo, illaicominidi dajerie policiana cárcelmo oretatimaci, nai iaiaiaia jino orellena.

³⁶ Cárcel sedaraimadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

³⁷ Iadedi policiamo Pablodi llote:

—Cocodi romanuai cominidicoco; iadedi cocomo ite rafuena raise uiñoñoeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

³⁸ Illaicominimo policias naiena lluaibitemo, illaicominidi naiena cacajanona, eo jacinaito, romanuai cominina iaiaiaia jira. Cai nanoca illaicominidi romanuai nairai cominina jamai ebena duere finuana rairuidimaci. ³⁹ Ie jira naie iaiaiaia dine illaicominidi jaidimaci, iaiaiaia: “Dama dino iesede” raillena. Jino atia mei, nairaimona jino iaiaiaia jaillena oredimaci. ⁴⁰ Cárcelmona jino billano, Lidia jofomo fo jaidiaiaia. Creyentiaia ciuano, naimaci comeciaina ocuiñotalena, naimacina dane llofuetiaiaia. Ie mei oni jaidiaiaia.

Pablo, iaiaiaia Silas diga, Tesalónicamo illa rafue

17 Anfípolis railla nairaimo macaritiaiaia. Apolonia railla nairaimo macaritiaiaia. Ie mei Tesalónica railla nairaimo ridiaiaia. Dinomo juduai ofiracodi ite. ² Pablo fibilla isoi, nainomo fo jaide. Daje amani sábadoruimo Jusiñamuina ciegafuiaimona naimacina llofuede. ³ Iese naimacina llofuede:

—Cristo llegei cacaito. Fiodaillamona naimie jilloite. Naimiedi Jesús. ⁴ Naiena cacadinomona ailluena ñnotimaci. Pablo, Silas iaiaiaia dibeimo jaidimaci. Jusiñamuina ñnote grieguaimona ailluena comini creyentiaina jaidimaci. Ie emodoconi ailluena nanocañaiñuidi creyentiaina jiai jaidimaci; ⁵ iadedi juduidi uradoillano, jamai itinomona eo marañede ññiaina uaiduanona, ailluena cominina ofitatimaci. Ie jira naie nairai uri iñedimaci. Iaiaiaia comini uicomo uillena, Jasón jofomo binasite. ⁶ Iaiaiaia baiñenano, Jesúsna, jiaie creyentiaia diga, illaicominini illanomo aiñoicaida uiti-maci. Cuiisite:

—Naga nairaimo cominina uri itatañediaiaia. Benomo jai bitiaiaia. Jai benomo billanona, Jasón ie jofomo iaiaiaia feñote. ⁷ Cai nanoca illaia ie llogacinona jai ñnoñedimaci. Ie anamo jai iacaiñedimaci. Raitimaci: “Jiaie illaia anamo iticai. Jesús raillamie anamo iticai”.

⁸ Juduai iese lluamona, cominidi uri iñedimaci. Illaicominidi jiai uri iñedimaci. ⁹ “Naie iaiaiaia dane biñeitiaiaia” illaicominimo creyentiaia raillano, illaicominidi Jasón jiaie creyentiaia diga, jino oretatimaci.

Bereamo Pablo, iaiaiaia Silas diga, illa rafue

¹⁰ Naie naio creyentiaidi Pablona, iaiaiaia Silas diga, Bereamo raie oretatimaci. Dinomo rillano, juduai ofiracomo jaidiaiaia. ¹¹ Nainomo ite juduai eo mare. Tesalónicamo ite juduai isoñedimaci. Bereamo itinodi Cristo rafuena iocire feñotimaci. Niedi uanaicnioni raillanona, nagarui Jusiñamuina ciegafuiaina facadimaci. ¹² Ie jira naimacimona ailluena ñnotimaci. Juduaiñedinomona ailluena nanocañaiñuidi ñnotimaci. Ailluena ññiaia jiai ñnotimaci; ¹³ iadedi Bereamo Pablo Jusiñamui ie uaina jai lluaia Tesalónicamo ite juduidi fidiano, dinomo jaidimaci. Cominina fuemo faillena, jaidimaci. ¹⁴ Naie facaise creyentiaidi Pablona oni oretatimaci. Monailai fuemo duide naisona oretatimaci. Silas, iaiaiaia Timoteo diga, fiebidiaiaia. ¹⁵ Pablo uigamacia naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaiaiaia Timoteo diga, raie cue dine billesa” llono.

Atenamo Pablo illa rafue

¹⁶ Atenamo iaiaiaia rillena Pablo sedademo, naie nairaimo ailluena jiraraiaia ciode. Iena ciuanona, Pablo comecidi jeareficaide. ¹⁷ Naiena ciua mei, juduai ofiracomo juduai diga coniniri Jusiñamui rafuena siadote. Jusiñamuina jai ñnote juduaiñedino diga coniniri iena jiai siadote. Plazamo nagarui jamai itino diga coniniri iena jiai siadote. ¹⁸ Jamai comecina facadinomona damerie naimie diga jiai ñaitimaci. Epicúreo railla rafuedo jaisoidimaci. Estoico railla rafuedo jiai jaisoidimaci. Damerie naimacimona raitimaci:

—¿Buena nai ñaillareuidimie caimo lloiacade? Jiaino raite:

—Jiaie nairai Jusiñamuillaicaimo lloiacade isoide.

Jesús fiodaillamona jilluana Pablodi llouilla jira, iese raitimaci. ¹⁹ Ie jira naimiena naimaci siadouillanomo uitimaci. Naie illano Areópagona mameciredo. Jicanotimaci:

—¿Ñie isoide o comocinuai? Caimo llono, cai uiñolena. ²⁰ Eo feiredicinuaina cacadicaia. ¿Buena nai llofuiacinodi llote? Iena uiñoiacadicaia.

²¹ Nana Atenamo ite comini, jiaie illanomona bitino diga, jamai ailli como imaci fidia rafuena ñai-ñaidimaci. Jamai ailli fidia rafuena caca-cacadimaci. Jiaie rafuena finoñedimaci.

²² Jicanua mei, Areópago railla illanomo Pablo naidacida llote:

—Atenas imaci, omoimo rafuena lloiacadicue. Omoi Jusiñamuillaina eo sedacabidomoi. ²³ Cue macarillamona, omoi Jusiñamuillaina sedaja jiraraia ciodicue. Daje jiraraia abimo iese cueda: “Uiñoñega Jusiñamuina sedadicaia” cueda. Uiñoñoeno naimiena sedadomoi. Ja omoimo naimiena lloiticue. ²⁴ Jusiñamui biniena jai finode. Ie emodoconi Jusiñamuidi nana biniemo

itinona jiaí finode. Naimiedi mona ie Nama. Enirue ie Nama. Ie jira iima finoca jofomo naimie iñede. ²⁵ Naga jitailla rana naimiemo illa jira, naimiena canonicai. Naimie nana cominina comuitate. Jiaí nagarui jafaici cai uadi caimo iga. Uanai nana rana caimo iga.

²⁶ Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiaí jonega. ²⁷ Iese jonega, naimaci naimiena jenollena. Jenuano, nibai naimiena baitimaci. Caimona naimie are iñede.

²⁸ Naimie jaca illa jira, cai jiaí iticai. Jiaí cajedicai. Ie isoi omoi rafue lloraini jiaí llotimaci: “Naimie ie uruiaidicai”.

²⁹ Naimie caina comuitaja jira, Jusiñamuidi jirarai isoiñedena uiñotícaí. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Iima ie onolli diga finoca ra isoiñede. ³⁰ Cominidi abi uiñotíno jeacino jaie finouidimaci. Jusiñamui naimacina nia janafedede; iadedi jai birui Jusiñamuidi nana cominina naga illanomo naimaci comeciái iuai meidollena jitaide. ³¹ Naimaci comeciái iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúsna naimie jai jilloitaja jira, iena uiñotícaí.

³² Fiodaillamona Jesús jilluana cacajano, damierie jaisitimaci. Ieconí jiaínodi raite:

—Jiairuido o lluana dane cacajiticaí.

³³ Iemei naimaci motomona Pablo jino jaide. ³⁴ Naie cominimona damierie naimie díbeimo jaidimaci. Iñotimaci. Naimacimona damie Areópagomo siadoudimie. Ie mamecidi Dionisio. Jiaíñaiño iñote. Naiñaiño mamecidi Dámaris. Daje facaiseconí jiaie cominidi iñotimaci.

Corintomo Pablo illa rafue

18 Atenamona Corinto railla nairaimo Pablodi jaide. ² Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaímaiaí. Romamona Claudio nana judíuai cominina jai oretate. Ie jirari bitiaímaiaí. Roma ie nanoca illaimadi Claudio. ³ Pablo iaímaiaí daje isoi maijia jira, Pablo iaímaiaí jofomo fiebide. Iaímaiaí conima diga maijide. Chivos itiraíai ie nilla iñiroina ti-forisoidimaci, naiemona jofona finollena. ⁴ Naga sábadoruimo judíuai ofiracomo llofueite, judíuaina iñotallena, judíuaiñedinona iena jiaí iñotallena. ⁵ Macedoniamona Silas, iaímaiaí Timoteo diga, bitemo, Pablodi nagarui Jusiñamui uaina llofueuide. Judíuaimo: “Jesúdi cai jilloitaraima” llouide; ⁶ ia naimie uaina iñosiñedimaci. Jiaí naimie jinafomo jeare ñaitimaci. Naimaci comeciái jeare ciua jira, Pablo ie iñiroina jaidínote, naimacina raillano:

—Daní omoi muidona Jusiñamui omoína duere finojite. Cue muidonañeite. Jai judíuaiñedino dine jaiticue, naimacina cue llofuellena.

⁷ Iese raillano, oni jaide. Justo jofomo jaide. Naimiedi Jusiñamuina iñouidimie. Ie jofo judíuai ofiraco ecimo ite. ⁸ Crispodi, nana ie jofomo itino diga, cai Nama Cristona iñote. Naimiedi judíuai ofiraco ie sedaraima. Ailluena Corintomo ite cominí creyentiaina jaidimaci. Ie mei naimacidi bautizaga. ⁹ Daje naiona Pablo nicaírilla isoidemona, Pablomo cai Nama Jesucristodi llote:

—Mai jaciruiñeno. Faicaíñeno cue rafuena llocana jai. ¹⁰ O diga iiticue. Budi ona maraiñeno finoñeite. Bie nairaimo ailluena cominidi cue díbeimo jaitimaci.

¹¹ Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

¹² Corinto railla nairaidi Acaya railla eniruemo jainaiñeide. Naie facaise Acaya ie gobernardi Galión. Naie facaiseconí damierie judíuai cominí Pablona faicadimaci. Galión dine naimiena uitimaci. ¹³ Raitimaci:

—Cai illaima llogacino isoi bimiedi cominina Jusiñamuina sedallena llofueñede.

¹⁴ Pablo uai oiacademo, judíuaimo Galióndi llote:

—Judíuai, cacarei. Naimie maraiñede rafuena finodena, naimie omoína jifuetena, omoi llamo nia cacarefidicue; ¹⁵ iadedi jamai naimie uailai cuemo llotomoi. Omoi usumatiái micoriaí mamecíaí cuemo jiaí llotomoi. Omoi einamací llogacinuaina cuemo jiaí llotomoi. Iena omoi coniniri siadotomoi. Bie isoide rafuena siadoiacaiñedícue.

¹⁶ Iemona naimiedi nainomona naimacina oni orede.

¹⁷ Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibaiñede.

Antioquíamo Pablo abido jailla rafue

¹⁸ Naifue suilla mei, nainomo Pablo are fiebide. Ie mei creyentiaina facaduano, Priscila iaímaiaí Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. ¹⁹ Efesomo rillanona, iaímaiaína fañonocaide. Judíuai cominí Jusiñamui rafuena siadollena, Pablodi judíuai ofiracomo fo jaide.

²⁰ Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue— ²¹ Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riitícue. —Iemei Efesomona jaide. ²² Cesareamo sijiano, Jerusalémo macarite. Creyentiái dine jaide. Ie mei Antioquíamo jiaí macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiái imaci comeciaina ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriaí cuégafuiai raise uiñote. ²⁵ Naimiedi Jesús ie rafuena navui jai cacade. Ie comecimona iena eo llote.

Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiai uiñoñede. ²⁶ Judíuai ofiracomo naimie llofuaia, jaitaiñeno llofuate. Priscila, iaimaia Aquila diga, naiena cacadiñaimaia. Ie jira naimiena oni eneno uitñaimaia. Ie uiñoñega rafuena eo raise naimiena llofuetiñaimaia. ²⁷ Acayamo Apolodi jaiacana jira, creyentiaidi naimie comecina ocuiñotajano, naimiena oresite. Acayamo ite creyentiaimo rabemo cuetimaci. Jusiñamui naimacina dueruilla jira, creyentiaina jai jaidimaci. Naimiena marena feiñollena iese cuetimaci. Nainomo naimie rillanona, creyentiaina eo canode. ²⁸ Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui ciegafuiaimona Jesúdi cai jil-lotaramana llofuate.

Efesomo Pablo illa rafue

19 Corintomo Apolo nia itemo, nairai ai onifedo joide naido jailla mei, Pablo Efesomo ride. Dinomo rillanona, creyentiaina baite. ² Naimacimo jicante: —¿Cristona omoi ñnuaruimo Jusiñamui Joreña feiñotomoi? Uai otimaci: —Jusiñamui Joreña nia jaca cacaiñedica. ³ Dane jicante: —¿Nie isoi omoi bautizagaomoi? Uai otimaci: —Juan micori lloga rafue facaina bautizagacai. ⁴ Pablo uai ote: —Mare. Juan llote: “Omoi comeci ai uaina meido. Iemei bautizallomoi”. Ie ifo meidoitimiena comini ñnollena llote. Jesúna ñnollena llote. Jesús rafuena omoimo raise lloiticue. ⁵ Iena cacajano, cai Nama Jesús díbeido bautizadimaci. ⁶ Naimacimo Pablo ie onollina joniama, Jusiñamui Joreña feiñotimaci. Ie mei naimaci uiñoñega nairai uaido ñaitimaci. Jusiñamui Joreño naimacimo llua rafuena jiai llotimaci. ⁷ Nibai nana naimacidi doce iñiaia. ⁸ Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui díbeimo naimaci comeci ai uaina meiduana Pabloti jaitaiñeno eo llouide. Nainomo daje amani fivui fiebide. ⁹ Naimacimona jainodi Pablo uaina uaitatimaci. Jiai ñnoiacañedimaci. Naimaci ñnoñena ira, ofiracomo bitinomo: “Cristo rafuedi maraiñede” llouidimaci. Ie jira Pabloti creyentia diga naimacimona eneno oni jaide. Tiranno ie lloracomo nagarui Pabloti llofueuide. ¹⁰ Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci. ¹¹ Jusiñamuidi Pablona siño rafuena finotate. ¹² Duidinomo cominidi naimie jetaca pañueluaina uitimaci. Duidinomo naimie jetaca ñniraina jiai uitimaci. Naiena jetajamona, duidinodi jillodimaci. Janaba anamo itinodi jiai jillodimaci. ¹³ Naie facaise jamai

macarisoidino ridimaci. Judíuai imaci. Naimacidi icorinaini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

¹⁴ Esceva ie siete jitotiaidi iese finoacadimaci. Escevadí Jusiñamui diga ñairaima. ¹⁵ Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

¹⁶ Ieconí Janaba anamo itimie naimaci emodomo daiaacide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaia diga jino aisidimaci.

¹⁷ Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidiana, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. ¹⁸ Ie jira ailluena creyentiaidi billano, imaci navui maraiñede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. ¹⁹ Ailluena icorilla rafuaia illabai atianona, marefodo jobaidimaci. Niga raifi rabai jobaillana facadimaci. Cincuenta mil ucube diese facai rabaina jobaidimaci. ²⁰ Cai Nama Jesús uaina eo llocana jaide. Cominidi naie uai siñonana uiñotimaci.

²¹ Naie rafue illa mei, Pabloti comecina facajano raite: “Macedoniamos cue macarillamona, Acayamos cue jiai macarillamona, Jerusalémo riacadicue”. Ie emodoconi naimiedi raite: “Nainomona Romamos jiai jaiacadicue”. ²² Naimie nia Asiamos nano nigarui illanona, mena canoramona Macedoniamos oretate. Timoteona, iaimaia Erasto diga, oretate.

Efesomo ite comini maraiñede rafue finoacadimaci

²³ Naie facaiseconí Pablo nia oni jaiñenia, Jesucristo rafue muidona Efesomo ite cominidi maraiñede rafuena comuitatimaci. ²⁴ Demetrio raillamie platamona diga rana finouide. Naimiedi Diana ie jofo joreñuaina finouide. Naimie anamo ailluena maijuidimaci. Dianadi naimaci jusiñamui. ²⁵ Naimie isoi maijuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uiñotomoi; ²⁶ iadedi Pablo raillamiedi diga comina jai llofuate: “Comini finoca raniaidi jusiñamuillañede”. Naie llofuiamona ailluena comini naimie díbeimo jaidimaci. Dama Efesomo iese suiñede; iadedi ua nana Asiamos iese suide. ²⁷ Ie jira abina rairuicadicai, cai maijille faifi raillano, comini Diana jofona jiai sofei raillanona. Cominidi naiñaiñona eburillana faitaitimaci. Naiñaiñori rajicaiñeitimaci. Dianadi eo ebirede jusiñamui. Nana Asiamos ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuicadicai.

²⁸ Iena cacajano, eo iciritimaci. Riire cuiroidimaci:

—¡Efeso ie Diana eo ebirede!

²⁹ Danirie siaduamona, nana comini eo failliñaidimaci. Iemo nana comini dajena naimaci ofiracomo fo raire jaisite. Gayona, iaímaiaí Aristarco diga, gaitajano uitimaci. Naie iaímaiaídi Pablo ie nabai iaímaiaí. Iaímaiaí comuillanodi Macedonia. ³⁰ Pablo ofiracomo jiaí fo jiacade; iadedi creyentiaídi naimie fo jaillana rairuidimaci. ³¹ Illaicominimona damierie nabaiñiaí naimiemo fo jaillana jiaí rairuidimaci. ³² Fo itinomona damierie daje rafuena ebena cuiriidimaci. Jiaino jiaífuaena ebena cuiriidimaci. Eo failliñaidimaci; ie iadedi bue ñellena naimaci ofillana raise uiñoñedimaci. ³³ Comini motomona judúuaí dinena damie uicomo oredimaci. Ie mamecidi Alejandro. Cominina lliicaitallena, ie onolli jaidianona, cominimo lloiacade; ³⁴ iadedi naimie judío imiema naimaci uiñuanona, nana daacaiño cuiriidimaci. Mena horas raifi cuiri-cuiriidimaci:

—¡Efeso ie Diana eo ebirede!

³⁵ Iemei naie nairai rabe cueraimadi cominina lliicaitatate. Naimaci lliicailla meinoconi, naimie llucacimona cacadimaci. Raite:

—¡Cacarei! Cai nairaidi Dianana sedacabidicai. Naiñaiño ebirediñaiño. Naiñaiñoona eruaide jiraraidi monamona jaie uaide. Iena jiaí sedacabidicai. Nana bie eniruemo ite comini iena uiñotimaci. Bu naiena uiñoñedimienena jaca iñede. ³⁶ Bu cue lluaana jaca uaitaite. Ie jira omoi lliicai. Comeciaí facañeno buena finoñeno. ³⁷ ¿Bue ñellena Gayo iaímaiaí Aristarco diga, benomo atidomoi? Iaímaiaídi cai jusiñamui joreñoña ñaiñediiaímaiaí. Naiñaiñoña jeare finoñediiaímaiaí. ³⁸ Demetrio, ie maijiraini diga, iaímaiaína llogidoiacania, cominina llogidoraco ite. Diga jueces jiaí ite. Coniniri nainomo iena siado; ³⁹ iadedi jiaí nicino omoi mo ia, cai illaicomini ofia, buena siaduano, caimo lloitimaci. ⁴⁰ Birui bie rafue cai finua jira, illaicomini nibai caina duere finoitimaci. ¿Niese cai nibaille? Illaicomini caimo buena jicanoia, ¿niese raiticai?

⁴¹ Naie llua mei, ofidinona jino orede. Iemei jai jono tuudimaci.

Macedoniamo Pablo dane jailla rafue

20 Efesomo ite rafue suilla mei, Pablodi creyentiaína uaidote. Naimaci comeциаína ocuiñotafuena llote. Iemei naimacina naimie facaduano, Macedonia railla eniruemo jaide. ² Nainomo ite nairaiimo macarite. Comecina ocuiñotallena, naimacina llofuecana jaide. Iese Macedoniamona Grecia railla eniruemo risaide. ³ Nainomo daje amani fivui illa mei, Siriamo botedo abido jiacade; iadedi judúuaídi naimiema meineiacanana Pablo fidiano, Macedoniamo abido macarite. ⁴ Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaímaiaí Segundo diga, jaide. Tesalónica nairai imie iaímaiaí. Gayo naimie diga jiaí jaide. Gayodi Derbe nairai imie. Timoteo naimie diga jiaí jaide. Tíquico, iaímaiaí Trófiomo diga, jiaí jaidiiaímaiaí. Asia imie iaímaiaí. ⁵ Coco uicodo naimaci jaillano, Troamo cocona sedadimaci. ⁶ Llomenico guillaruillaí railla rafue fuilla mei, Filipomona jaidicoco. Monailaido dabecuirorui coco jail-

la mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fiodaillana começillena, danomo ofidicaimo, Pablodi caina llofue. Icoiti naimie jiacana jira, Pablo are ñaite. Naiona jitoma daferui illa facai nia ñaite. ⁸ Cai ofillanomo ailluena lamparíniaí ite. ⁹ Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiema meniñocaidemo, naimie jai fiodaillana cioidimaci. ¹⁰ Ie jira Pablo ana jaide. Naimie emodomo jitadacaida, naimiema meniñote. Cominimo llote:

—Omoi rucaicueriñeno. Naimie cajede. Jafaicina nia faite.

¹¹ Abido a jaidimaci. Jesús fiodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacade. Ie mei oni jaide. ¹² Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

¹³ Pablodi Troamona Asón railla nairaimo arido jiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicaí. ¹⁴ Ie jira Asónmo naimiema cai baillanona, cai diga botemo bite. Ie mei Mitilene railla nairaimo jaidicai. ¹⁵ Nainomona dane monailaido cai jaillano, ie areruido Quío railla nairaimo ruicafebellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai. ¹⁶ Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla eniruemo naimie are iacaiñena jira, Pablo começina facade: “Efeso ecido monailaido jaiticai”.

Efesomo ite creyentiaí sedarainimo Pablo llua rafue

¹⁷ Creyentiaína sedarainina uaidollena, Miletomona Efesomo Pablo cartana orede. ¹⁸ Naimie dine naimaci rillanona, Pablo naimacimo llote:

—Asiamo nano cue rillaruimona, niese omoi diga nararui cue illana uiñotomoi. ¹⁹ Cai Nama diga abina iedoñoño maijuidicue. Eecana sure maijuidicue. Judúuaí cuena duere uiñodosia jira, ie facaiseconi dueredicue.

²⁰ Cuemo ite marecinona omoi mo jaca janoñedicue. Nana Jusiñamui rafuena omoi mo jai lloticue. Omoi ofillanomo omoi na llofueuidicue. Omoi jofuemo omoi na jiaí llofueuidicue. ²¹ Judúuaína llofueticue. Judúuaíñedinona daje isoi llofueticue. Jusiñamui diibeimo omoi começiaí iuaina meiduana lloticue. Cai Nama Jesúna omoi ñnuana jiaí lloticue. ²² Jusiñamui joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena

uiñoñedicue; ²³ iadedi Jusiñamui Joreño naga nairaimo cuemo llote: “Llaveracomo ona gaitajano ona jonesiite. Duere sefuitio”. ²⁴ Cue ille dinori are illemo comecina facañedicue. Dama cue ille dinori fuidoiacadicue. Cai Nama Jesúmona cue feiñoga maijjiana fuidoacadícue. Mare rafuena omoimo lloiacadicue. Jusiñamui omoína duenaillana jiaí llotícue. ²⁵ Jusiñamui anamo omoí illa rafuena omoimo jai llotícue. Jai dane cue uiecona cioiñeitomoí. Iena uiñoticue. ²⁶ Cue uaina jaca janoñedicue; ia nana Jusiñamui uai omoimo llotícue. Ie jira cuemona omoí diga cue comeci mare. Jusiñamui uaido omoí jaiñenia, cue muidonañeite. ²⁸ Mai omoí abí rairui. Jusiñamui Joreñodí omoína creyentiaína sedatate. Naimacina raise seda. Jusiñamui díbeimo itinona llofue. Naimie Jito fiodailla muidona, naimacina ote, naimie iena. ²⁹ Naimacidi toica llaudaiaí isoidimaci. Nia abina raise uiñoñedicue. Cue jailla meinoconi, taino llorainidí, janallari isoi, omoimo biite. Naimaci nana omoí sedaca cominina ramo faite, danomo abido naimaci jaillena, jiconiaí llaudaiaí gaitaja isoi. ³⁰ Omoímona uanañedicinona llorainidí iite. Creyentiaína ramo faitimaci, omoí llucacina fainonocaillena, naimaci díbeimo illena. ³¹ Ie jira abina rairui. Bie rafuena feitañeno. Daje amani fiemona nana omoína jai llofuetícue. Naína omoína llofuetícue. Aremona omoína jiaí llofuetícue. Omoína cue duenaillamona, eianona omoína llofuetícue. ³² Mai. Cai Nama illa anamo omoína fainonocaitícue. Naimie uaimona naimie omoína duenaillana jai uiñotomoí. Naie uaidí omoína jiaí ocuiñotaite. Iemona Cristona ñnocana jaitomoí. Nana naimie fetocano diga naimie illanomo íco jaca iitomoí. ³³ Jiaíno ie ucubena jaca nicidoñedicue. Bu ie iniroillainana jaca jiaí oiacañedicue. ³⁴ Cue jitaille rana dama cue maijjiano otícue. Cue diga jaidino imaci jitaille rana jiaí dama cue maijjiano otícue. Iena nana omoídi uiñotomoí. ³⁵ Iese cue illamona omoína llofuetícue. Iese maijjiano duerede cominina canocana jaiacadicai. Cai Nama Jesús ie llogacina uiñotícaí. Naimie raite: “Raruiaína cai feiñoia, iobidícaí; iadedi cai eo iobiacania, jainomo raruiaína fecadícaí”. ³⁶ Naie llua meino, naimaci diga caiñici ífodo rainadajano, Jusiñamuimo jide. ³⁷ Nana naimacidi eo eedimaci. Pablona caimaduanona, naimiēna llibanotimaci. ³⁸ “Cuenā dana cioiñeitomoí” naimacimo llua jira, eo sunaitimaci. Ieconī naimie diga botemo jaidimaci.

Jerusalémo Pablo jailla rafue

21 Naimacina cai facadua meinoconi, suiñodícaí. Cos railla nairaimo atona jaidícaí. Ie are Rodas railla uiasimo ridícaí. Iemei Pátara railla nairaimo ridícaí. ² Nainomo Fenicia railla eniruemo jaiacade botena baitícaí. Nai botemo cai jailla mei, suiñodícaí. ³ Chipre railla uiasina cai cíoja, cai nabei díbeimo ite. Iemei Siria railla eniruemo jaidícaí. Tiro railla nairaimo sijidícaí. Botedo uiga raruiaína nainomo joneacadimaci. ⁴ Tiromo ite creyentiaí cai baillanona, siete digarui naimaci diga itícaí. Jerusalémo naimiēna judíuai meineñellena, nainomo naimie jaiñellena, Jusiñamui

Joreño naimacina Pablomo llotatate. ⁵ Digarui illa meinomo oni jaidícaí. Naie nairaimona nana naimaci cai diga jaidimaci. Riñoniaí, naimaci uruiaí diga, jaidimaci. Caiñici ífodo monaillai fuemo ana rainadajano Jusiñamuimo jide. ⁶ Naimaci facadua meinoconi, botemo jaidícaí. Naimaci imaci jofuemo abido jaidimaci. ⁷ Tiromona Tolemaida railla nairaimo jaidícaí. Creyentiaína uaiduano, darui naimaci diga itícaí. ⁸ Ie are jaillano, Cesareamo cai ria, Felipe jofomo jaidícaí. Felipedí Jesucristo ie rafuena lloraima. Jerusalémo díaconuaina creyentiaí jaiē fetua facaise, Filipena fetodimaci. ⁹ Naimie dinomo fiebidícaí. Naimiēmo cuatro jisa ite. Naiñaiñuái nia iima abina uiñoñede. Jusiñamui naiñaiñuaimo llucacina llocabitimaci.

¹⁰ Digarui nainomo cai illamo Judeamona damie bite. Naimie mameci Agabo. Jusiñamui facaina lloraima. ¹¹ Caimo ria, naimiedí Pablo cinturóna aiñode. Naie diga ie eillina maite. Ie onollina jiaí maite raillano:

—Jusiñamui Joreño raite: “Jerusalémo judíuai illai-cominí bie cinturón jainoide iimana daje isoi maítimaci. Judíuaiñedinomo naimiēna fecajitimaci” raite.

¹² Naiena cai cacajano, naie cominí diga, Pablona caidícaí, naimie Jerusalémo jaiñellena. ¹³ Pablo uai ote:

—¿Bue ñellena eedomoí? ¿Bue ñellena cue comecina ocuiñotañedomoí? Cue maiana jaca jitaidícue. Ua cue fiodaillana jaca jiaí jitaidícue. Cue Nama Jesús muidona cue fiodaíadedí, damamai fiodaitícue.

¹⁴ Cai lloga uai naimie ñinoñena muidona, raitícaí:

—Cai Nama jitaille rafuena finuana jitaidícaí. —Iemei llicaidícaí.

¹⁵ Nano ñigarui illanona, cai raruiaína finuano, Jerusalémo jaidícaí. ¹⁶ Cesareamo ite creyentiaímona jiaíno cai diga jaidimaci. Mnasón jofomo caina uitimaci. Naimiedí Chipre railla uiasi imie. Naimiedí nano bie rafue tainiamona creyente.

Jacobo diga Pablo ñaia rafue

¹⁷ Jerusalémo cai ria, creyentiaídi caina caimare uaidotimaci. ¹⁸ Ie are Pablo, cai diga, Jacobo dine jaide. Nana creyentiaína sedaraini nainomo jai ofidimaci.

¹⁹ Uaidua mei, Pablo nagacinuaido Jusiñamui judíuaiñedinomo finoca rafuena llote:

—Cue llofuiamona ailluena judíuaiñedinomo creyentiaína jaidimaci —llote.

²⁰ Naie rafuena cacajano, Jusiñamuimo iobillacina fecadimaci. Iemei naimiēmo llotimaci:

—Ama, ero, judíuaimona ailluena cominí jai creyentiaína jaidimaci; ia nana naimaci Moisés micorí llogacino do eo jaidimaci. ²¹ O finoca rafuena jai fididimaci. Ona cominí ñaiana jai fididícaí. Jiaie nairai motomo ite judíuaina Moisés micorí llogacina fainonocaillena llofuetio. Naimaci uruiaí abina deñenana llofuetio. Moisés micorí llogacinuaido jaiñellena llofuetio. ²² Ie jira ¿niēse nibaiítícaí? O rillana jai fididimaci. ²³ Ie jira omo cai lluaña fino. Cai ecimo cuatro iima jai ite. Nie isoide rafuena Jusiñamuimo jai llotimaci. ²⁴ Jusiñamui jofomo naimacina uiño. Naimaci diga Moisés micorí

llua isoi, o abi fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomo. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicaci.
²⁵ Judíuaiñedino Moisés micori llogacinodo jaillana lloñeiticaci. Naimacimona creyentiaina jaidinomo navui cueticaci: "Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno" cueticaci.

²⁶ Pablo "Jee" raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo nagamíia rana fecajaruina jiaí llote. Siete digarui illanona, Moisés micori llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillaí fuiacanuillaímo Asiamona damierie judíuidi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona, ²⁸ cuirriidimaci:

—Caimaci, caina cano. Bimie naga illanomo llofuia-mona, cominina raise itatañede. Moisés micori llogacinuaido jaiñede. Bifona raise sedañede. Judíuaiñedino bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona ciodi-maci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai cominimona judíuñedimie Jusiñamui jofomo jaillana maraiñede. ³⁰ Asiamona bitino cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. ³¹ Pablona meineiacania, soldaduai ie comandantedi nana comini ieillana fidide. ³² Ieconí naimiedi, ie soldaduai diga, nana ie illacomini diga, comini dine aisicana bitimaci. Ie jira cominidi naimacina ciuano, Pablona fajana faionocaidimaci. ³³ Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

³⁴ Nana iedinodi jiaiforie llotimaci. Ie jira naie rafuena naimie jaca uiñoñede. Ie muidona cuatello naimiena uillena llote.

³⁵ Cuartel tidabacuimo naimaci ria, comini jarire jailla jira, soldaduai Pablona uitimaci. ³⁶ Ailluena comini racadimaci. Ocuioisite:

—¡Naimiena meine!

Pablo ie abi riidua llua rafue

³⁷ Cuartelmo jaiacania, Pablo comandantemo llote: —O diga ñaiacadicue. Raijicaillamona, naimie uai ote:

—Griego uaido ñaitio— ³⁸ Jiaí llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue lollena, omo jicanoiacadicue.

⁴⁰ —Jee —raite. Pablo tidabacui muidomo naidaide. Cominina lliicaitallena, ie onollina jaidide. Comini lliicaila mei, Pablo judíuai uaido naimacimo llote:

22 —Caimaci, einamaci, cue abi riiduacinomo mai omoi cacarei.

² Naimie judíuai uaido llua naimaci cacajano, lliicaidimaci. Ie jira Pablo llote:

³ —Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue. ⁴ Jesucristo ñnotinona jaiie eo duere finodicue. Diga creyentiaina maianona, cárcelmo joneticue. Iiñiain duere finodicue. Riñoniaina jiaí duere finodicue.

⁵ Jusiñamui diga nanoca ñairaima cuena uiñote. Nana omoi illacomini cuena uiñotimaci. Creyentiaina duere finollena, naimacimona dajerie cartana jaiie feiñoticue. Damascomo ite judíuaimo cuetimaci. Damascomo jaidicue, nainomo ite creyentiaí maiano, Jerusalémo atianona, naimacina duere finollena.

Pablodi Jesúna ñnuana llua rafue

(Hch 9.1-19; 26.12-18)

⁶ Omoimo bie rafuena lloiticue. Jerusalémona jaidicue; iadedi Damascomo cue iaireicaia, jitoma naidai iacania, ieconí monamona damie cue abina eo quetiñote. ⁷ Eniruemo ana uaidicue. Monamona damie cuemo llua cacadicue: "Saulo, Saulo, ¿bue ñellena cuena duere finodio?" ⁸ Jicanoticue: "¿Budío?" Monamona damie uai ote: "Nazaret ie Jesúsicue. Cuena duere finodio". ⁹ Cue diga itinodi cue quetiñua rana ciodimaci; iadedi cue diga ñaitimiena cacaiñedimaci. ¹⁰ Raiticue: "Nama, ¿bue ñeiticue?" Cai Nama cuena raite: "Naidadajanona, Damascomo jai. Nainomo o finolle rafuena omo lloiticue".

¹¹ 'Cuena eo quetiñua jira, cioñedicue. Cue diga itino cue onollido llinocaida, Damascomo cuena uitimaci.

¹² Nainomo Ananías raillamedí ite. Jusiñamuina eo ñnote. Moisés micori llogacinuaido eo jaisoide. Nainomo ite judíuidi naimiena: "Mare" raitimaci. ¹³ Naimie cuemo bite. Cuemo llote: "Saulo, ama, mai oni eroda". Ieconí dane erodajanona, naimiena ciodicue. ¹⁴ Naimie raite: "Cai usumatiaí micoriaí ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacareillena. ¹⁵ Nana cominimo naimiena lloitio. Nana o ciua rafuena lloitio. Nana o cacaja rafuena jiaí lloitio. ¹⁶ Mai cue llua ñno. Naidadajanona, o jeacino oni dotallena, Jusiñamuimo jica. Ie mei bautiza" raite.

Judúuaiñedinomo Pablo jailla llua rafue

¹⁷ Te mei Jerusalémo abido cue billa mei, Jusiñamui jofomo Jusiñamuimo cue jñia, nicairiticue isoidicue. ¹⁸ Cai Namana ciodicue. Cueno llote: "Jerusalémona raire mai jai. Cominidi o cuena llua feiñoñeitimaci". ¹⁹ Uai oticue: "Nama, naga judúuai ofiracomo ona ñnotinona fauidicue. Cárcelmo naimacina joneuidicue. Nama, Jerusalémo itino iena uiñotimaci. ²⁰ Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiena meinetino ñiroina sedadicue"; ²¹ iadedi cue Nama cueno llote: "Mai jai. Judúuaiñedinomo ona are oretacadicue".

Comandante anamo Pablo illa rafue

²² Bie lloga dinori comini Pablo llua cacadimaci. Iemei cuiriidimaci:
—Bie isoide ñima illana benomo jitaiñedicaí. ¡Naimiena meine!
²³ Cuirillamona naimaci ñiroina jaidisite. Icirisiano enruena jiai fadosite. ²⁴ Judúuai uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:
—Naimiena cuartelmo uiño. Naimiena fano. Naimie mo ite rafuena caimo naimie llollena, naimiena duere fino.
²⁵ Naimiena maiano naimiena fallena, Pablodi nainomo ite capitámo jicanote:
—¿Juez nia lloñenia, romano nairai imiena fajana mare? Romano nairai imiedicue.
²⁶ Capitán iena cacajano, comandante dine jaide. Iena llote. Jicanote:
—¿Ñiese ñibaiticaí? Bimie romanuai nairai imie.
²⁷ Iena cacajano, comandante bite. Pablomo jicanote:
—¿O Romano nairai imiedio?
Pablo uai ote:
—Jii.
²⁸ Comandante dinena raite:
—Romanuai nairai imiena cue jaillena, eo ibadicue. Pablo uai ote:
—Romanuai nairai imiena jeicigacue.
²⁹ Teconi naimiena duere finoacadino naimiemona raire oni jaidimaci. Pablo romanuai nairai imiena jira, naimiena jai ebena maia jira, comandante jiai jacinante. Comecina ñibai facade: "Iese naimiemo cue finua jira, ie ibana ollena, cue illaimamo cuena jiai llogidoite".

Illaicomini motomo Pablo illa rafue

³⁰ Comandantedi judúuai Pablona llogiduana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judúuai illaicomini diga, ofillena llote. Pablona atiano, naimaci motomo uillanona, naimiena naidanete.

23 Ie abina riidollena, Pablo naie judúuai illaicomini motomo ite. Naimacimo eruaillano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue comeci mare.

² Ananiadi Jusiñamui diga nanoca ñairaima. Pablo llua naimie gaiñenamona, Pablo ecimo itinona Pablo fuena farotate. ³ Pablo dinena naimiemo llote:

—Jusiñamui o fuena faroite. Mareuidimiena abina caitadio. Moisés micori llogacinuai muidona benomo itio, cueno llollena; iadedi cue finoca rafuena raise o uiñoñeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micori iena jaie cuiana uiñoticue. "Illacomina jeare ñaiñeno" cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

⁶ Cominimo Pablo eruaillamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacinomo ocuiriticue. Ie jira bene cuena llogidoiacadomoí.

⁷ Naimie iena lloia, naimaci comeciái daje isoi lloñedicaci. ⁸ Saduceuai cominidi fariseuai comini isoi ñnoñedicaci. "Fiodaillamona jilloñeiticaí" saduceuai comini raillana ñnoside. "Jusiñamui jaienisai ñede. Comini joreñuai ñede" raillana ñnoside; iadedi fariseuai comini dinena nana naie rafue illana ñnotimaci. ⁹ Ie jira eo failliñaidimaci. Fariseuai motomona jiaíno naidadajanona, llote:

—Bimiemo jeacino ñede. Jusiñamui jaienicí naimiemo ñibai jaie llua mona, bie rafue naimiemo ite.

¹⁰ Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiena uillena llote.

¹¹ Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

Pablona meineiacana rafue

¹² Monaidemo, judúuaimona jiaíno comeciaina facadimaci: "Pablona nia cai meineñenia guiñeiticaí. Jiroñeiticaí". ¹³ Cuarenta baifemo ite comini iese comeciaina facadimaci. ¹⁴ Naimaci judúuai illaicomini dine jaillano, raitimaci:

—Daní comeciaina facadicaí: Pablona nia cai meineñenia, jaca buena guiñeiticaí. ¹⁵ Omoí dine Pablona atillena, naimiemo eo raise jicanua isoi, comandantemo jicano. Pablo iaírei bia, naimiena cai meinellena, ocuidoiticaí.

¹⁶ Pablo enaise naie rafuena fidiano, cuartelmo jaide, Pablomo llollena. ¹⁷ Iena cacajano, Pablodi capitána uaidote. Raite:

—Bie conruena comandante dine uiño. Naimie diga ñaiacade.

¹⁸ Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jıcanote. O diga ñaiacade.

¹⁹ Naimie onollına comandante llinocaida, bai ie atianona, naimiemo jıcanote:

—¿Bue cuemo lloiacadió?

²⁰ Naimie uai ote:

—İco are Pablona illaicomini dine uillena, naimiemo eo raise jıcanua isoi, omo jıcanollena, judıuai danı comeciaina facadımaci. ²¹ Naimaci jıtaiilla isoi finoñeno. Cuarenta digamie baifemo naimiena reiduanı sedadımaci. Llotımaci: “Guiñeıtıcaı, jıroñeıtıcaı, Pablona nıa caı meineñenia”. Naimacıdı omo jıcanolle rafuena o finollena sedadımaci.

²² Comandante coniruena facaduano raite:

—Jaca bumı cuemo o lluaıa lloñeno.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduaina uaidı, imaci raruiıa finollena, Cesareamo navuida baıfe imaci jaillena. Setenta caballuaidı jaitıno uaidı. Doscientos ducirainıa jıaı uaidı. ²⁴ Jıaıe caballona atı, naıe emodomo rainadacaidı Pablo jaıllena. Félix raılla gobernador dine naimiena raise uıño —llote. ²⁵ Cartana jıaı cuete. İese cuete:

²⁶ “Félix, omo cueticue. Claudio Lisiasdıcue. Caı mare gobernadordı. ¿Nıgacıno? Cue uai o dine oredıcue.

²⁷ Damıe o dine oredıcue. Judıuai naimiena meıneıacana jıra, soldaduıa diga naimiena gaitataticue.

Naimiena gaitataja meı, naimıedi romanuıa nıraı imıenana fıdıdıcue. ²⁸ Judıuai illaicomini dine naimiena uitıcue, naimaci llogıduacınona raise cue uıñollena.

²⁹ Naimaci einamacı llogacınuaı muidona naimiena llogıdotımaci. İena fıdıdıcue. Naimie jaca buena fınoñede. Naimiena meınellena, naimie cárcelmo jonellena lloıacaiñedicue. ³⁰ Jıaıno naimiena dane meıneıacanana fıdıdıcue. İe jıra o dine naimiena oretaticue. İe llogıdotıno o dine jaillena jıaı lloıtıcue. Naimaci naimiena omo lloıtımaci” cuete.

³¹ Comandante llua isoi, soldaduıa naıona Pablona Antıpatrısmo uitımaci. ³² İco are eıllıdo jaıde soldaduıa cuartelmo abıdo bıtımacı; ia Pablo caballuaidı jaidıno diga onı jaıde. ³³ Cesareamo raılla nıraımo rıllanona, gobernadorımo cartana fecadımaci. Naimie dine Pablona jıaı uitımaci. ³⁴ Gobernador cartana facade. İe meı Pablomo ie nıraı illanona jıcanote. Pablo uai ote:

—Cılıcia.

³⁵ Gobernador dinena raite:

—O llogıdotıno bıa, o rafuena cacajıticue.

Soldaduıaımo jıaı llote:

—Omoı anamo Herodes raılla illaıma mıcorı jofomo naimiena seda.

Félix dine Pablo riıdua rafue

24 Dabecuirorui illa meı, Ananıas bıte. Naimıedi Jusiñamui diga nanoca ñairaima. Jıaıe illaicomini diga bıte. Tértulo raıllamıe jıaı bıte. Naimıedi llogıdoraima. Gobernadorımo Pablona llogıduıabitımaci.

² Pablona uaidua meı, gobernadorımo Tértulo Pablo fınoça rafuena llote:

—Félix, bie rafue omo lloıtıcue. Eo mareuidımedıo. O muidona eo urı itıcaı. Caı nıraına canollena, diga mare rafuena fınođıo. ³ İobıllamona, nana caı iena feıñotıcaı. ⁴ Ona icıacaiñedicue; iadedı o fue maria jıra, cue lluaımo dallu cacarei. ⁵ Bımedı eo caı abına aruire fınode. Nana enıruemo ite judıuaina urı itatañede. Naimıedi Jesús raıllamıe rafuedo jaidıno illaıma.

⁶ Jusiñamui jofona jeare naimie fınoıacana jıra, naimiena gaitadıcaı. Moısés mıcorı llogacınuaıdo naimiena duere fınoacadıcaı; ⁷ iadedı comandante Lisias ride. Caimona naimiena rııre bıırode. Naimiena caı llogıdolıena, o dine caı bıllena caımo llote. ⁸ Pablomo o jıcanıacanaı, naimıemona bıe rafuena uıñıtıo. Nana naimiena caı llogıduacınona uıñıtıo.

⁹ Judıuai illaicomini, Tértulo llua isoi, dacınodo llotımaci.

¹⁰ İemeı gobernador dinena Pablomo llote:

—Maı o facaina o ñaıno.

İe jıra Pablo ñaıte:

—Dıga años caı nıraı o anamo itıcaı. İe jıra cue abına rııduacınona omo marefodo lloıtıcue. ¹¹ Doce dıgarui illanona, Jerusalémo como bıruı rıdıcue. İena uıñıacadıosa jıaıe comınımo jıcano. Jusiñamuına sedallena, Jerusalémo itıcue. ¹² Bu diga conıma uaina jaca uaitañedicue. Jusiñamui jofomo uaina uaitañedicue. Judıuai ofıracuımo uaina jıaı uaitañedicue. Naisomo uaina jıaı uaitañedicue.

Comınına urı itatañenana lloñedicue. İe jıra cuena raise llogıdonıdımacı; ¹⁴ iadedı jıaıe rafuena lloıtıcue. Caı usumatıaı Jusiñamuına sedadımaci. Naimiena jıaı sedadıcue. Nana Moısés llogacınuaına ñnotıcue. Nana Jusiñamuına llorainı mıcriaı cuegafuıaina ñnotıcue. Bımacımona jıaıe llogacınuaıdo jıaı jaidıcue. Bımacımona uanaıñedicınodo jaidıcue. ¹⁵ Fıodaıllamona comını ıco jıllıollena ñnotıcue. Jusiñamuına ñnotıno jıllıoitımaci. Jusiñamuına ñnoñedıno jıaı jıllıoitımaci. Beno itıno iena jıaı ñnotımaci. ¹⁶ İe jıra marena iacadıcue, “Maraiñede rafuena Pablo fınode” comını lloñellena, “Maraiñede rafue Pablo fınode” Jusiñamui lloñellena. ¹⁷ Dıga años Jerusalémo abıdo bıñedicue. Jerusalémo ite dueredınona canollena, ucubena bıruı atıdıcue. Jusiñamuına jıaı sedajaıbıdıcue. ¹⁸ Moısés mıcorı llua isoi, cue abı marena fınuano, nıruı Jusiñamui jofomo cuena bıtımacı. Aıllena comını cue diga fıñede. Comınına icırıtañedicue. ¹⁹ Naıe facaıse Asıamona jıaıe judıuai bıtımacı. Cuemo nıcıno ia, ¿bue ñellena naimaci bene bıñedicımacı, cuena llogıdollena? ²⁰ Naimaci bıacaiñenia, ¿bue ñellena bene itıno bıe rafuena raise lloıacaiñedicımacı? Naimaci motomo Jerusalémo cue ia, maraiñede rafuena cue fınuana lloñedicımacı. ²¹ Navui naimaci motomo cue llotıcue: “Fıodaıllamona comını ıco jıllıoitımaci”. İena bıruı ñaıtımaci. İe jıra cuena llogıdıocadımacı.

²² Félixdı Jesús dıbeımo itıno rafuena raise uıñua jıra, Pablo rafuena nıruıdo sıadoıacaiñede.

—Comandante Lisias bia, dane omoi rafuena siadoiticue —raite. ²³ Félix capitámo Pablo cárcelmo sedajana lloste. Naimiena maiñellena jiaí lloste. Naimiena canollena, naimie nabaiñiaí naimie dine jaillena rairuiñede.

²⁴ Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiamaiaí. Jesúna ñnuana cacadiamaiaí. ²⁵ Jeacino finoñellena, dama ie jitailla rafuena finoñellena, jiairuido Jusiñamui riicaillafue anamo iñellena cacadiamaiaí. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoticue.

²⁶ Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena.

²⁷ Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fainonocaide.

Festomo Pablo llua rafue

25 Naie provinciamo darui amani rilla mei, Cesareamona Jerusalémo Festo jaide. ² Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci. ³ Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci. ⁴ Festo uai ote:

—Pablo Cesareamo fiebiite. Raire nainomo abido jaiticue. ⁵ Omoi illaicomini mona damierie cue diga jaitimaci, nicino naimiemo ia, naimiena llogidollena.

⁶ Nibaí ocho, nibaí diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena lloste. ⁷ Pablo billa mei, Jerusalémona bite judíuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci. ⁸ Pablo uai ote:

—Judíuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiaí finoñedicue.

⁹ Iena cacade; iadedi Festo judíuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

¹⁰ Pablo uai ote:

—Llogidoracomo jai iticue. Cai nanoca illaíma facaina cominimo llotio, naimacina duere finollena. Benomo cue lloste. Judíuaimo jaca buena finoñedicue. Iena raise uiñotio. ¹¹ Romanuai railla nairai illaicomini llogacinona cue ñnoñenia, damamei jearede rafuena cue finoia, cue fiodaillamo jaca ocuridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaíma dine jaiacadicue.

¹² Ie ecimo ite canoraini diga Festo ñaia mei, Festo raite:

—Cai nanoca illaíma dine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaímaiaí. Agripadi naie enirue illaíma. ¹⁴ Diga irui nainomo itiaímaiaí. Naimiemo Festodi Pablo ie rafuena lloste:

—Félix Pablona cárcelmo bene fainonocaide.

¹⁵ Jerusalémo navui cue ia, Jusiñamui diga nanoca ñairaimadi, judíuai einamací diga, naimiena llogidote. Naimiena duere finollena cuemo jicanotimaci.

¹⁶ Naimaci uai oticue: “Cai Romanos cominidi llogidogamiena jamai tainomo duere finoñedicai; iadedi llogidogamiedi ie llogidotino uai nano cacareiticaí. Ie mei ie abi riidollicinomo jiaí cacareiticaí”.

¹⁷ Ie jira naimaci cue dine benomo navui bia, ie are cominimo cue llouillanomo raide. Pablona cue dine uaidoticue. ¹⁸ Naimiena llogidotinodi lloia, naimiena marañede finoca rafue cue facaja isoi, llogidoñedimaci. ¹⁹ Dani naimaci ñnuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. ²⁰ Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”; ²¹ iadedi Pablo nainomo jaiacañede. Cai nanoca illaíma dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaíma dine naimiena cue nia oretañenia.

²² Agripadi Festomo lloste:

—Naimie ñaiana cacacadicue.

Festo uai ote:

—Ico are naimie ñaiana cacareitio.

²³ Ie jira ie are Agripa, iaímaiaí Berenice diga, gobernador ofiracomo bitiaímaiaí. Finobillano ebire bitiaímaiaí. Soldaduai imaci illaicomini jiaí bitimaci. Naie nairaimo ite nanoca comini jiaí bitimaci. Ofilla mei, Festo Pablona atillena lloste. ²⁴ Festo lloste:

—Agripa, nana beno itino, bimiena ciodomoi.

Jerusalémo ailluena judíuai naimiena llogidotimaci. Bene cue dine jiaí bitimaci. Naimie meiniana eo jitaídimaci; ²⁵ iadedi naimiemo nicinodi iñenana jai uiñoticue. Naimiena meinellena cue lloste, nicinodi naimiemo iñede. Augusto dine naimie jaillena naimie jicanua jira, naimiena oretaiticue. ²⁶ Nicinodi nia iñede, cai illaimamo cue cuellena. Ie muidona omoi dine naimiena jai atidicue. Agripa, naimie ñaíamo raise cacarei. Naimiemo cai jicanua mei, nibaí nicino naimiemo illana uiñoticaí. Iemona Augustomo cueiticaí.

²⁷ Augusto dine llavecamié cue oretaia, naimiemo nicino iñenia, cuemona marañede.

Pablo ie abina dane riidua rafue

26 Naie facaise Agripa Pablomo lloste:

—Mai llono. O abi riiduacinona cacacadicue. Pablo: “Ji” raillanona, ie onolli a ñuitade. Raite:

²—Agripa, bene o illa jira, cuemona mare. Cue fue baillafuedo o uicomo cue abina riidoitícue. Judíuai cominídi diga rafuena cuena llogídotímaci. ³Nana caí judíuai rafuena raise uíñotio. Nana caí einamaci rafuena jiaí uíñotio. Cuemo raise cacarei. ⁴Jerusalémo naimaci motomo cue illa jira, diga judíuai cue conirue-namona cuena uíñotímaci. ⁵Cuena naimaci lloiacania, fariseo imiēna cue illana are uíñotímaci. Jiaie cominí baifemo fariseuaidí caí einamaci llogacínuaína ñnotímaci. ⁶Jusiñamuidí caí usumatiaí micoriaímo fiodaillamona cominí ico jilloillena jaie llote. Ie suillemo jai ocuiridícue. Ie jira llogidoracomo birui jai itícue. ⁷Nagarui Jusiñamuina naimaci eo sedajamona, caí doce nairaidí naie llogacino suillemo jiaí nia ocuiridímaci. Ore illaíma, bie ocuirillacino muidona judíuai illaí-cominí cuena llogídotímaci.

⁸¿Bue ñellena Jusiñamuidí cominí fiodaillamona jil-lotajana ñnoiacaíñedomoi? ⁹Jaie ie isoidícue. Nazaret ie Jesúna ñnotinona diga jearede rafuena jaie finoacádícue. ¹⁰Jerusalémo iena finodícue. Cárcelmo ailluena Jesúna ñnotinona jonetícue. Jusiñamui diga nanoca ñairainí uaido iena finodícue. Naimacina meinelle caí illaícominí raia: “Jee” raisoidícue. ¹¹Diga judíuai ofiracomo, diga icaiño, naimacina duere finodícue. Naimaci Jesúna jeare ñaiana jitaídícue. Naimaci diga cue eo icirilla jira, jiaie eniruemo ite nairaimo jiaí jaidícue, naimacina duere finollena.

Pablodí Jesúna ñnuana llua rafue

(Hch 9.1-19; 22.6-16)

¹²Ie jira Damascomo jaidícue. Jusiñamui diga nanoca ñairainí uaido jaidícue. ¹³Ore illaíma, jítoma naidai ia, monamona quetiñotena ciodícue. Naidí jítoma baifemo quetiñote. Cue abina quetiñote. Cue diga itino abina jiaí quetiñote. ¹⁴Eniruemo cue ana uaia, damie lluaana cacadícue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maíga jurareta suiñoacana isoi. Ie isoidio. Riicaillamona, cuena duere finoacadio”. ¹⁵Uai otícue: “¿Budiota?” Caí Nama cuemo llote: “Jesúdícue. Cuena duere finodio. ¹⁶Mai a naidacai. Cue rafuena o llofuellena ona fetodícue. O birui ciua rafuena lloitio. Ona cue uíñotalle rafuena jiaí lloitio. ¹⁷Naimaci ona duere finoia, omoi cominimona ona jillotaitícue. Judíuaiñedínomona ona jiaí jillotaitícue; iadedí judíuaiñedíno dine ona oretaitícue, ¹⁸naimaci comeciaí tainomo iñellena. Taife anamona Jusiñamui anamo naimacina itataitio. Jeacino anamo naimaci birui illa jira, jítiredínomo jai itímaci isoidímaci. Jusiñamuina uíñuamona, useredínomo iitímaci isoidímaci. Iemei Jusiñamui naimaci jeacínona dotajite. Cuena naimaci ñnuamona, nana cuena ñnotino diga cue illano ico jaca iitímaci”.

¹⁹Ore Agripa, monamona cue cacaja rafuena ñnotícue. Jesúdí Jusiñamui Jitona ñnotícue. ²⁰Damascomo itinomo iena nano llotícue. Ie mei Jerusalémo itinomo iena jiaí llotícue. Diga Judeamo itínomo iena

jiaí llotícue. Judíuaiñedínomo iena jiaí llotícue. Llotícue: “Omoi comeciaímo iticínona meido, Jusiñamui díbeimo omoi illena. Omoi comeciaímo iticínona omoi meidua mei, mare rafuena finocana jai”. ²¹Ie jira judíuai illaí-cominí Jusiñamui jofomo cuena gaítadímaci. Cuena meineiacadímaci; ²²iadedí Jusiñamui cuena canode. Ie jira birui bene itícue. Illaícominímo beno nia llotícue. Illaícominíñedínomo jiaí nia llotícue. Dama Jusiñamui facaina llorainí micoriaí ico suille cuegafuena birui llotícue. Dama Moisés micorí ico suite cuegafuena jiaí birui llotícue. Jiaie rafuena lloñedicue. ²³Jaie cuetímaci: “Cristo llegí cacajite. Fiodaillamona jilloite. Naimiedi nano dofoconi jilloitimie. Iemona caí judíuai cominí jeacínomona jilloillena uíñotímaci. Iemona judíuaiñedíno jeacínomona jilloillena uíñotímaci”. Ie jira bie rafuena llocana jaidícue.

Creyentena Agripa jaillena Pablo jitailla rafue

²⁴Iese Pablodí abi riiduano, Festo riire llote:

—Pablo, odí uairico isoidio, eo comecina o facaja jira.

²⁵Pablo uai ote:

—Uairicoñedicue. Festo, odí cue illaímadío. Cue llucacínodí uanaicino. Ebena ñai-ñaiacaíñedicue. ²⁶Agripa cue lloga rafuena raise uíñote. Nana bie rafuena naimie jai uíñua jira, naimie diga marefodo ñaitícue. Bainino suiñede. ²⁷Ore Agripa ¿Jusiñamui llorainí cuegafuaína ñnotio? omo jicanotícue. Iena o ñnuana jai uíñotícue.

²⁸Agripa dinena uai ote:

—Dallu o ñaiamona, cuena creyentena ñibai itataiacadio.

²⁹Pablo uai ote:

—Ñibai dallu ñaitícue. Ñibai are ñaitícue; iadedí cue isoi o jaillana jitaídícue. Ua nana cue ñaiana cacadino cue isoi jaillana jitaídícue; iadedí omoi bie lloeo diga maiana jitaíñedicue.

³⁰Iemona Agripa naidacaide, Festo diga, Berenice diga. Nana raídino jiaí naidacaidímaci. ³¹Jino jaillano, Pablo joreñona siadotímaci:

—Bimie jaca buena finoñede, naimiana caí meiniana llollena. Buena finoñede, cárcelmo illena.

³²Agripa Festomo llote:

—Naimie caí nanoca illaíma dine jaillana jicanoñedena, niadedí naimie jino marena oreca.

Romamo Pablo jailla rafue

27 Italiamo Augusto dine Pablo oretajana Festo llua mei, Pablona jiaie llavecana diga capitámo fecade. Naie capitádi Julio. Augustona mameciredede batallómo jainaiaide. ²Adramitiomona bite botemo jaidícaí. Naie bote Asia railla enirue igobiaímo sijicana jaicade. Aristarco caí diga jaide. Macedonia enirue imie. Naimie nairaidí Tesalónica. Suiñodícaí. ³Ie areruido Sidón railla nairaimo ridícaí. Nainomo Juliodí Pablona marena sedade. Ie nabaiñiaí dine Pablo ari jaillana rairuiñede. Ie jira naimacimona ie jitaillena rana ote. ⁴Iemei nainomona suiñodícaí. Aifidí abído caina

ati-atina jira, aifi raise iñenanomo, Chipre railla uiasi cai jarifebeimo illa ecido jaidicai. ⁵ Cilicia railla enirue ecido monaillaido jaidicai. Panfilia railla enirue ecido jiaí jaidicai. Mira railla nairaimo ridicai. Naie provincia mameci Licia. ⁶ Naie bote Roma dine jaiñena jira, capitádi jiaie botena jenode. Capitádi Alejandriamona bite botena baite. Naie bote Italiamo jaiacade. Ie jira naie botemo cai jonecaida, caina uite. ⁷ Diga irui fe-cuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai. ⁸ Uiasi iaireise iese sefuicana jaillanona, Maregobe railla illanomo ridicai. Lasea railla nairai jiaí ianori ite.

⁹ Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maijidinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticaí. Botena jiaí nibai faifiticaí. Cai nibai jiaí faifiticaí —llote.

¹¹ Iese llote; iadedi naie bote piloto oni jaiacade. Naie bote nama jiaí oni jaiacade. Capitán iaímaiaí lluana Pablo lluana baifemo ñnote. ¹² Igobe maraiñena jira, rollime facaise illa jira, ailluena comini nainomona jaiacacimaci. “Fenice railla nairaimo niedi riiticaí” raillano jaiacacimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide. ¹³ Beici dinena aifidi bia, “cai jitailla aifidi bite” raillanona, suiñodicai. Creta iaírei monaillai fuemo jaidicai. ¹⁴ Ie mei raire cai dine eo riire aifi bite. Naie aifi noci deisoilla dinena bite. ¹⁵ Botena oni uite. Botena atona eronenidicai. Ie muidona jamai ebena jaidicai. Aifidi caina iese uite. ¹⁶ Janorede uiasi fuemo aifi raise iñenanomo jaidicai. Nai uiasi mameci Claudia. Faifiñel-lena bote ie janorede nocae sefuire a aiñodicai. ¹⁷ A aiñua mei, rao diga botena ruica maiticai. Sirte railla conillie illanomo cai joodai raillano, velaiaina duiñodicai. Iemei aifi jamai uigacai. ¹⁸ Ie areruido aifi riire illa jira, cargana oni dotadicaí. ¹⁹ Dane ie are bote ie raruiaí, cai onolli diga, oni dotadicaí. ²⁰ Diga irui jitoma bainide. Diga irui ucuai jiaí bainide. Aifi eo riire nia ite. Cai jillobiñellemo jai ocuriñedicai.

²¹ Diga irui cai guiñena mei, Pablo naimacimo llote: —Nabaiñiai, cue uaina navui ñnotiomoidena, niadedi bie isoi sefuiñedicai. Cretamo cai fiebidicaina, bie isoi sefuiñedicai. ²² Omoi comeciaina ocuiño. Bie botedi faifite; iadedi caimona jaca buna faifiñeite. ²³ Jaive naiona Jusiñamui jaienidici cuemo bairede. Jusiñamuimo jainaiaidicue. Naimiena sedadicue. ²⁴ Naie jaienici cuemo llote: “Pablo, jaciruiñeno. Romamo o nanoca illaíma dine iitio. Jusiñamui ona duenailla jira, nana o diga jaidino jilloitimaci”. ²⁵ Ie jira omoi comeciaina ocuiño. Cuemo llua isoi, naimiedi bie rafuena suitate. Jusiñamui iena finuana ñnoticue.

²⁶ Nibai uiasimo jutadaiticai.

²⁷ Catorce digarui naio illamona, Adria railla monaillaimo jamai cai jaia, naiona daferui facai marineruaidi:

“Enirue iaire ite” raillanona comeciaina facadimaci. ²⁸ Ie jira ie aforediñona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. ²⁹ Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci. ³⁰ Naie facaise marineruai botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

³¹ Iena ciuano, Pablo capitámo llote. Soldaduaimo jiaí llote:

—Botemo bimaci fiebiñeniadedi, jilloñeitomoi.

³² Ie jira soldaduidi nocae maia raona jaitadimaci. Jai dinomo nocaena fainonocaidimaci. ³³ Nia monaiñenia, Pablo nana caimo llote:

—Guiño. Catorce digarui illanona, jai guiñedomoi.

³⁴ Ie jira guiño, omoi mairillesa. Ua faifiñeitomoi.

³⁵ Iese naimie raillanona, Jusiñamuimo iobillacinona fecade, nana comini illa uicomo. Llomeniconna tairuano, guite. ³⁶ Nana naimaci comeciái ocuiñocaida, jiaí guitimaci. ³⁷ Botemo doscientos setenta y seis diese iticai. ³⁸ Cai monillamona, fiebide trigona monaillaimo oni fadodicai, bote meenañellena.

³⁹ Ie oni monaidemo, erodatemo, naie eniruena uiñofedicai. Igobemo conillici illana ciodicai. Nainomo jamai ebena sijiacadicaí. ⁴⁰ Ie jira lloelluna nainomo oni fainonocaidicai. Datarabe maiana suiñodicai. Vela aifimo sebiñoticai. Monaillai fuemo enirue dine jaidicai. ⁴¹ Iemei jaiciridifomo ridicai. Eniruemo jodate. Bote muido eniruemo jiaire jodate. Eo baguamona jillací taicosite. ⁴² Naimaci iamona jillobi raillano, soldaduai llavecanona meineiacadimaci. ⁴³ Pablona jillotaicana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai. ⁴⁴ Jiaíno bote ie rabricido juicaida icana jai. Jiaíno bote ie raruiaido juicaida icana jai. —Iese enirue-mo nana marena ridicai.

Maltamo naimaci illa rafue

28 Jai cai jillua mei, Malta railla uiasimo cai illana uiñoticai. ² Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. ³ Pablo reiena ua mei, iraimo jonete. Joniamona, jao usirenamona, reigaimona jino bite. Naimiena ainide. ⁴ Jao naimie onollido lliillana Malta comini ciuano, coniniri ñaitimaci:

—Nibai bimie comena meinetimie. Monaillaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. ⁶ Comeciaina facadimaci: “Naimie onolli raire sirite. Iemei raire fio-daite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi nibai Jusiñamui.

⁷ Naie illanomona uiasi illaíma enirue iaire ite. Naimie mamecidi Publio. Caina marena feiñote. Darui amani ie jofomo caina marena itatate. ⁸ Publio moo

duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate. ⁹ Bie rafue suilla jira, naimie dine nana uiasimo ite duidino bi-bidimaci. Naimacina jillotate. ¹⁰ Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

Romamo Pablo rilla rafue

¹¹ Daje amani fivui illa mei, Alejandriamona bite bote-do jaidicai. Naie uiasimo nana rollime facaiseconi naie bote ite. Mena jusiñamui iaimaia joreño bote muidomo ite. Damie Cástorna mameciredede. Jiaimie Póluxna mameciredede. ¹² Naie botedo oni cai jaillanona, Sira-cusamo sijidicai. Darui amani nainomo iticai. ¹³ Nainomona jaillano Regiomo sijidicai. Darui illa mei, aifi be-ici dinena billa jira, ie areruido Puteolimo ridicai. ¹⁴ Sijia mei, nainomo creyentiaina baiticai. Naimaci diga siete digarui cai illana jitaidimaci. Ie mei Roma dine jaidicai. ¹⁵ Romamo nia cai riñenia, nainomo ite creyentia cai billana fididimaci. Cai dine bitimaci. Foro de Apio railla nairaimo damerie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jia ocuiñote. Cai diga Romamo jaidimaci. ¹⁶ Romamo cai ria, capitán llavecanona ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisii raillano, daje soldado nainomo naimiena sedade.

Romamo Pablo llofuia rafue

¹⁷ Darui amani illa mei, Pablo Romamo ite nanoca judíuaina uaidote. Danomo ofilla mei, naimacimo llote: —Caimaci, jaca buena cai cominimo finoñedicue. Cai einamací llogacinuaina jaca #noticue; ¹⁸ iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira; ¹⁹ iadedi judíuai: “Dama ite” railla jira, cai nanoca illaima dine jaillena jicanoticue; iadedi cue nairai diga jaca iciriñedicue. ²⁰ Omoi diga ñaillena, omoina cioacadicue. Fiodaillamona ico comini jillollena cue llofuecabilla jira, bie lloeo diga maigacue.

²¹ Uai otimaci:

—Judeamona jiaino ona cuega cartana jaca feiñoñedicai. Caimo o rafuena lollena, jaca buna biñede. Bene jaca bu ona jeare ñaiñede. ²² Ie jira omona naie rafuena cacaacadicai. Naga illanomo comini o llofuiana uaitajana uiñoticai. Creyentiaina jeare ñaitimaci. Iena fididicai. Ie jira caimo iena raise llono.

²³ Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llofuede. Moisés micorí llogacinuaimona, Jusiñamui facaina lloraini micoríai cuegafuaimona, Jesúna llofuede. ²⁴ Jiaino naimie llofuiana #notimaci. Jiaino #inoñedicai. ²⁵ Nana naimaci comeciaina daje isoi lloiñedicai. Iemona oni jaidimaci. Nia jaiñenia, naimacimo Pablo llote:

—Jusiñamui joreñodi Isaias micorina cai usumatiamo raise llotatate. Omoi usumatiai micoríai illa isoi nia itomoi. Isaias micoridi omoina jai cuega rafue jai suide. Naimie micorí cuete:

²⁶ Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeit-omoi.

Rafuena cioitomoi; iadedi iena uiñoñeitomoi.

²⁷ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisnidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue dibeimo iacaiñedomoi, omoina cue jilloitai rail-lanona’ ”.

²⁸ Jusiñamui rafuena omoi #inoñena muidona, judíuaiñedinodi Jusiñamui naimacina jilloitaiacanana jai fididimaci. Naimaci iena cacareitimaci.

²⁹ Iese naimie llua mei, judíuaidi coniniri siadocana abido jaidimaci.

³⁰ Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote. ³¹ Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llofuede. Marefodo llofuede. Naimiedi cai Nama Jesucristo rafuena llofuede. Jaca budi naimie llofuiana rairuiñede. Teofilo, jaca digacino omoi jai lloticue. Mai. Lucadicue.

ROMANOS

Romamo ite creyentiaimo Pablo cartana orede

1 Romamo ite creyentia, omoi dine cartana oredicue. Pablodicue. ¿Nigacino? Jesucristo dibeimo maijidicue. Jusiñamui fetocamiedicue. Ie mare rafuena cue llollena, cuena orede.

²Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiaí cuega. Iemona birui facacabidicai. ³Bie rafuedi Jusiñamui Jitona llote. Naimie jaie ite usumadi cai illaíma David micori. ⁴Naimie Jusiñamui Jitonana uiñoticaí. Jusiñamui Joreñodi siño rafuedo caina iena uiñotade. Jusiñamui Jito fiodaillamona, Jusiñamuidi ie Jitona jillotate. Jusiñamui Jitodi Jesucristo. Cai Nama. ⁵Caina duenaillanona, caina oretate, naga nairaiaína naimiena inotallena, naimiena naimaci iobitallena. ⁶Naimacimona itomoí. Naimiemo omoi duillena, Jesucristo omoína jai fetode.

⁷Romamo ite creyentiaí, Jusiñamui isiruiganodomoí. Naimie isoi mareuidinona omoi illena, fetocanodomoí. Cai Moo Jusiñamui, cai Nama Jesucristo diga, omoína duenaite. Iena uiñocana mai omoi jai. Iaimaiaí omoína uri jai itatatiamaiaí. Iena omoi uiñocana mai omoi jai.

Roma dine Pablo jaiacade

⁸Diga comini, diga illanuaimo, Jesucristona omoi inuana jai fididimaci. Ie jira nano dofoconi omoi facaina Jesucristomo iobillacinona feaacadicue, Jusiñamuimo iena naimie fecallena. ⁹Jusiñamuimo cue jiaí, omoi ri jidicue. Jusiñamui iena uiñote. Naimie Jito rafuena cue lluanona, cue comecimona naimiena sedadicue. ¹⁰Jusiñamuimo cue jiaí, naimiemo jicadicue, cuena canollena. Naimie jitaia, omoi dine ja muidomo cue riiticue. Iena jicadicue. ¹¹Omoína eo cioadicue. Jusiñamui Joreño uai cuemo illamona, omoi comeciaina ocuiñotaiacadicue. ¹²Jesucristona omoi inuamona, naimiena cue inuamona, coninina cai comeciaina ocuiñotaiticaí.

¹³Cue amatiaí, diga icaiño omoi dine jaiacadicue. Iena omoi uiñuana jitaicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaie nairaiaí jai inotimaci. Omoi dine Jesucristo rafuena lluaiacadicue, iena omoimona dajerie inollena. ¹⁴Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñañedínomo iena jiaí lloiacadicue. Abina uiñotínomo iena lloiacadicue. Abina uiñoñedínomo iena jiaí lloiacadicue. ¹⁵Ie jira omoimo Jesucristo rafuena eo lloiacadicue.

Jesucristo rafue siño

¹⁶Jesucristo rafueri iobidicue. Naie rafuedi siño. Jusiñamuidi naga iena inotinona naimaci jeacinomona jillotate. Judíuaidino nano iena cacadimaci. Ie mei judíuañedino iena jai cacadimaci. ¹⁷Naie rafuemona Jusiñamui caina feiñuana uiñoticaí. Jusiñamui caina marebicaitajana uiñoticaí. Naimiena cai inuamona iena uiñoticaí. Jusiñamui facaina lloraíma micori jaie cuega: "Jusiñamuina inuamona marebicaidimiedi Jusiñamui dibeimo ico jaca iite" cuega.

Comini jeacinona finoiadedi, dani naimaci muidona

¹⁸Nana Jusiñamuina jitañedínodi naimie duere finolifue anamo jai itimaci. Iena uiñoticaí. Jusiñamui caina iena uiñotade. Marañede rafue naimaci finuanona, Jusiñamui ie uanaicinona jamaidimaci. ¹⁹Jusiñamui naimacina naimiena uiñotaja muidona, imaci comeciainona Jusiñamui illana uiñotimaci. ²⁰Enirue finua facaisemona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. "Naimiena uiñotimaci" omoi raia, naimiedi bu. Naimie uai jaca siñonana uiñotimaci. Ie jira: "Jusiñamuina uiñoñedicai" rainidimaci. ²¹Jusiñamui uiñotimaci; iadedi naimie uaina inoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciái jai tainomo ite isoide. Jai marebificañedimaci. ²²"Abina uiñoticaí" raitimaci; iadedi abina uiñoñedimaci. Jamai ebe isoidimaci. ²³Jusiñamui jaca ite. Naimie uai siño. Naimiena sedaacañedimaci; iadedi jiaie rana sedaacadimaci. Fodairuide imana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

²⁴Ie jira Jusiñamui naimacina fañonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci. ²⁵Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

²⁶Iese naimaci illa jira, naimaci jitailla meirede rafuena finollena, Jusiñamui naimacina fañonocaide. Coniñona aifuedotimaci. ²⁷Naimaci jitailla jira, conimana aifuedotimaci. Naimaci marañede finoca rafuemona duere sefuillemona ibana feiñoitimaci.

²⁸ Jusiñamuina naimaci uifnoiacaiñena jira, marañede rafuemo naimaci comeciã facallena, Jusiñamui naimacina fañonocaide. Naimaci finorainiga rafuaina finocana jaidimaci. ²⁹ Naga isoide marañedicinona finoidimaci. Naga isoide jearedicinona finoidimaci. Jiaie comini rana nicidoudimaci. Jiaie cominina duere finoidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finoidimaci. Eo ñaillaredimaci. ³⁰ Jiaie comini joreñona ñaoidimaci. Jusiñamuina jaca gañedimaci. Cominina jeare ñaoidimaci. Abina iedoudimaci. Abina biruidimaci. Diga jearede rafuemo comeciaina facauidimaci. Naimaci moo uaina ñorainidimaci. Naimaci ei uaina ñorainidimaci. ³¹ Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiaie dueruirainidimaci. Iese jaisoidimaci. Iese nia jaicabidimaci. ³² Jusiñamuidi jae llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui llua uañotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macaï mare iese imaci finua” raitimaci.

Jusiñamuidi marañede rafuena finodinona duere finoite

2 Ero, omoi judíuaimona damie comecina ñibaï facade: “Bie isoide marañede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide marañede rafuena naimie finua jira, Jusiñamui naimiena jiaï duere finoite. ² Jusiñamuidi uanaicinona uañuamona, marañede rafuena finodimiena duere finoite. Iena uañotimaci. ³ “Jusiñamui duere finollicino anamona jilloñeitimaci” comecina facade. Naimacimo o comecina o facaja isoi, naimaci isoi o finua jira, Jusiñamui ona jiaï duere finoite. ⁴ Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie ñibeimo o illana naimie jitaide. Naiena jamañeno. ⁵ O comeci jaiãrena jira, o comeci Jusiñamui ñibeimo meidoiacañedio. Ie jira ico eo duere sefuitio. Ie riicaillifue-mona Jusiñamuidi nana naimiena ñoñedinona duere finoite. Iena Jusiñamui finoia, Jusiñamuimona mare. ⁶ Nagamãiaï imaci finua ille ñinori Jusiñamui naimacina duere finoite. ⁷ “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite. ⁸ Marañede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona ñoñedimaci. ⁹ Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedinomo cominina jiaï duere finoite; ¹⁰ iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua

finoite. Judíuaiñedinomo iese jiaï finoite, ¹¹ naga nairaina daje isoi naimie finua jira.

¹² Judíuaiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci ñoñena jira, jiaï jaca daje isoi duere sefuitimaci. ¹³ Moisés micori llogacinona cacajamona, Jusiñamuimona jaca buna marebicaiñede; iadedi iena ñnuamona marebicaide. ¹⁴ Judíuaiñedinodi Moisés micori llogacino anamo iñedimaci; iadedi naimaci comeciã facajamona, marecinona finuana uañotimaci. Marecinodo jaillana jiaï uañotimaci. ¹⁵ Moisés micori llogacino anamo naimaci illa isoi, naimaci comeciãmona marecinona naimaci finoiadedi, iena uañotimaci. Ie jira marañedicinona naimaci finoiadedi, iena jiaï uañotimaci. ¹⁶ Biena llofuecabiticue. Ico Jusiñamui llua jira, Jesucristodi cominimo imaci comeciãmo iticinona juez isoi lloite. Marañedicinona finouidinomo duere finollicinona lloite. Marecinona finouidinomo duere finollicinona lloñeite.

Moisés micori llogacinodo judíuai comini raise jaiñedimaci

¹⁷ Abina ieduamona, omoimona damerie raitomoi: “Judíuai imacidicaï. Moisés micori llogacino anamo caï illa jira, duere finollicinomona jilloiticaï. Jusiñamui caï diga ite” raitomoi. Iena omoi raillamona, abina iedotomoi. ¹⁸ Naimie jitailla rafuena uañotomoi. Moisés micori llogacinona omoi uañuamona, marecinona finuana uañotomoi. ¹⁹ Jusiñamuina uañoñedinona llofueiacadomoi. Naimiena naimaci uañoñena jira, jitiredinomo itimaci isoidimaci. Uanaicinona naimacimo omoi lluaamona, naimaci comeciaina lligaiñoiacadomoi. Naimacina uanaicinona uañotaiacadomoi. ²⁰ Jusiñamuina raise uañoñedinona llofueiacadomoi. Naimacina abina uañotaiacadomoi. Naimie rafuena nia raise uañoñedinona llofueiacadomoi. Moisés micori llogacinomo nana uañuacino illa jira, naiemo uanaicino illa jira, iese iacadomoi. ²¹ Jiaie cominina llofueiacadomoi; iadedi ñnese omoi comeciãmo fueoiacañedomoi? “Rana fiñeno” llotomoi; iadedi fiñdomoi. ²² Omoi añede riño diga iñenana llotomoi; iadedi ie isoi finodomoi. Jusiñamuina eruaide jiraraina gañedomoi; iadedi naie ra illanuaimona naie jiraraina fiñdomoi. ²³ Moisés micori llogacinori abina iedotomoi; iadedi iena omoi ñnoñena jira, Jusiñamuina jeare finodomoi. ²⁴ Iena Isaías micori jiaie cuete: “Omoi muidona judíuaiñedinodi Jusiñamuina jeare ñaitimaci” cuete. ²⁵ Jusiñamui ñibeimo jai omoi illana jiaie comini uañollena, omoi abina detatatomoi. Moisés micori llogacinona omoi ñnoiadedi, omoi abina detatajã mare; iadedi naicinona omoi ñnoñenia, abina detatañedinomo isoi jai itomoi. Jusiñamui ñibeimo iñedomoi. ²⁶ Moisés micori llogacinona judíuaiñedinomo ñnoiadedi, naimaci abina detatañenia, Jusiñamuimona naimie ñibeimo ite judíuai isoidimaci; iadedi abina detatañedimaci. ²⁷ Moisés micori llogacinuaina uañotomoi. Omoi abiaï-

na detatatomoi; iadedi Moisés micori llogacinona judúaiñedinodi ñnua jira, Moisés micori llogacinuai omoi ñnoñena jira, Jusiñamuimona omoi baifemo uaidimaci. ²⁸ Omoi jeiciamona Jusiñamui ua cominiñedomoi. Omoi abiaina detatajama, Jusiñamui ua cominiñedomoi; ²⁹ iadedi omoi comeciai marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciai marena illa jira, Jusiñamui cominidomoi. Raise naimiena ñnotinodi cominimona iobillacinona feiñuana jitañedimaci; iadedi Jusiñamuimona iobillacinona jitañedimaci.

3 Bie cartana omoi feiñuanona, iena facallemona, damierie comecina facaite: "Judúaidicai; ia naiemona, ¿niese jiaie comini baifemo faiticai? Cai abiaina detataticai; ia naiemona jaca buena oñedicaí". ² Ie jira omoimo lloiacadicue: "Judúaina cai illana eo mare". Jusiñamuidi dani caimo ie rafuena llote. Jiaie cominimo lloñede. ³ Cai cominimona dajerie Jusiñamui rafuena ñnoñedimaci; iadedi Jusiñamuidi ie lloga rafuena jaca finode. ⁴ Comini tainona llotimaci; iadedi Jusiñamuidi uanaicinona jaca llote. David micori iena jiaie llote:

O lloga uaimona uanaicinona o llouillana uiñoticaí.

O finoca rafuena jiaie comini uaitaia, o dinena jaca anafenodio.

Iena uiñoticaí.

⁵ Dane damierie comecina facaite: "Jusiñamuidi mareuidimie. Cai baifemo uaide. Cai marañedicinona cai finuamona caina Jusiñamui jitaia, jiaie cominidi Jusiñamui jaca mareuillana uiñotimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira". Omoimona iese dajerie comeciaina facadimaci; ⁶ iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiaí duere finonite.

⁷ Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. ⁸ Omoimona dajerie cuena ñaitimaci: "Bimie raite: 'Jusiñamui marecinona finuana raise cai uiñollena, marañedicinona finocana cai jailla' ". Iese cue lloñena jira, Jusiñamui naimacina duere finoia, cuemona mare.

Jeacinona nana cai finodicai

⁹ Judúaidicai; iadedi jeacinona nana comini finua jira, jiaie nairaí baifemo fañedicai. Judúaidicai; iadedi jeacinona finodicai. Judúaiñedinodi jeacinona jiaí finodimaci. ¹⁰ Jusiñamui facaina lloraini micoriai iena jiaie cuete:

Marebicaidino jaca iñede. Nana comini marañedimaci.

¹¹ Jaca buna Jusiñamuina raise uiñoñedimaci. Naimiena raise uiñoiacaiñedimaci.

¹² Mare rafuedo nana jaiñedimaci. Marañedicinona finoodimaci.

Jaca buna marecinona finoñedimaci.

¹³ Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

¹⁴ Naimaci fuiaí eo borede.

¹⁵ Icirillamona jiaie cominina raire meinetimaci.

¹⁶ Nine naimaci jaia, diga marañede rafuena comuitatimaci.

¹⁷ Uri illana uiñoñedimaci.

¹⁸ Jusiñamuina jaciruiñedimaci

jiaie iese cuete. ¹⁹ Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci riidolle uai iñede. Nana comini Jusiñamui duere finollicino anamo itimaci. Iena uiñoticaí. ²⁰ Moisés micori lloga uaina ñnuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

Jesucristona cai ñnuamona jillobidicai

²¹ Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedimaci; iadedi Moisés micori iena jiaie llote. Jusiñamui facaina lloraini micoriai iena jiaí llotimaci. ²² Jesucristona cai ñnuamona, Jusiñamuidi caina marebicaitate. Nana Jesucristona ñnotinona marebicaitate. Nie isoide cominina cai ia, caina marebicaitallena, caina dajie isoi feiñoite. ²³ Nana caidi jeacinona finodicai. Jusiñamui caina jitailla isoi, marena iñedicai. ²⁴ Caina naimie dueñaillamona, naimie jitailla jira, Cristo Jesúsna cai ñnuamona, caina marebicaitate. ²⁵ Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñnoia, caina duere finoñeite. Jusiñamuina mareuidimiena uiñoticaí. ²⁶ Naimiena iese oretajamona, Jesúsna ñnotimiena Jusiñamuidi marebicaitaja jira, Jusiñamuina mareuidimiena uiñoticaí.

²⁷ Cai jeacinomona marena cai illena, buena finoñedicai. Ie jira cai finuamona abi iedoñedicai. Buena finoñedicai; iadedi Jesucristona cai ñnuamona, jillobidicai. Ie jira cai finoca rafueri abina iedoñedicai.

²⁸ Moisés micori lloga uaina cai ñnuamona, marebicaiñedicai; iadedi Jesucristona cai ñnuamona marebicaidicai.

²⁹ Jusiñamuidi dani judúuai imaci Mooñede; iadedi naimiedi nana comini imaci Moo. ³⁰ Cai Moodi jaca damiena jira, naimiena naimaci ñnua jira, judúuaina marebicaitate. Naimiena naimaci ñnua jira, judúaiñedinona jiaí marebicaitate. ³¹ Cai ñnuamona cai marebicaiilla jira, Jusiñamui facaina lloraini micoriai jiaie lloga uaina caitañedicai; iadedi iena ua ñnocana jaidicai.

Abraham micorimona fueoticaí

4 Abraham micori rafuena ja ñaiacadicue. Naimie marebicaiillafuena omoimo lloiacadicue. ² Ie finoca rafuemona naimie micori marebicaidena, naimie

mícori abina iedote; iadedi ie finoca rafuemonona naimie mícori marebicaiñede. Ie jira Jusiñamuimona naimie mícori abina iedoiacaiñede. ³ Iena Moisés mícori jaie cuega: “Jusiñamuina Abraham mícori ñnua jira, Jusiñamuidi naimie mícorina jeacinona jaca finoñedimiena isoitate. Naimie mícorina marebicaitate” cuega.

⁴ Maijillena buna damie ocuiadedi, ibajana jamai fe-cañeite; iadedi maijia facaina fecaite. ⁵ Ero, ie maijiamona jaca bu jeacinona jaca finoñedimiena isoia-caiñede. Jusiñamuina naimaci ñnua jira, Jusiñamuidi maraiñedinona marebicaitate. ⁶ Bie rafuena David mícori jiai jaie cuega:

Ie maijiamona bu marebicaiñena jira, Jusiñamui marebicaitagamiedi iocire iite.

⁷ Naimaci maraiñedinona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

⁸ Naie jeacinomo Jusiñamuidi comecina dane fa-cañeite.

Naimiedi jai feitaite.

Ie jira iocire iitimaci.

⁹ Dani abina detatativo iocire illena lloñede; ia abina detatañedinomo iena jiai llote. Jusiñamuina Abraham mícori ñnua jira, Jusiñamui naimiena marebicaitate.

¹⁰ Naimie mícori abina nia detatañenia, naimie mícori marebicaide. ¹¹ Naimie mícori marebicailla mei, Jusiñamui dinena Abraham mícorimo abi detatajana llote. Abraham mícori ie abina detatajamona, Jusiñamuina naimie mícori ñnuana uifnoticai. Ie abina detatajamona, judío imiena jai jaide; iadedi Jusiñamuina ñnuamona, naimie mícori marebicaide. Ie jira Abraham mícoridi nana Jusiñamuina ñnotino moo. Nana comini abiaina detatañedimaci; iadedi naimaci ñnua jira, Jusiñamui naimacina marebicaitate. ¹² Cai comini abiaina detatatimaci; iadedi cai moo Abraham mícori isoi naimaci ñnua jira, Abraham mícori isoi marebicaidimaci. Ie jira Abraham mícori nana naimaci moo.

Abraham mícori ñnuamona, Jusiñamui lloga uaidi suide

¹³ Abraham mícorimo Jusiñamuidi: “Nana enirue omo iiticue” llote. “O uruiaimo iena jiai iiticue” llote. Moisés mícori llogacinona Abraham mícori ñnua jira, iese Jusiñamui lloñede; iadedi Jusiñamui lloga uaina Abraham mícori ñnua jira, iese Jusiñamui llote. Abraham mícori ñnua jira, Jusiñamuidi naimiena marebicaitate. ¹⁴ Moisés mícori lloga uaina ñnotinomo: “Nana enirue-na omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimiena ñnotinomo: “Nana enirue-na omoimo iiticue” llote. ¹⁵ Moisés mícori lloga uaina naimaci raise ñnoñenia, Moisés mícori lloga uaido jaidino Jusiñamui riicaillifue anamo itimaci; iadedi Moisés mícori lloga uai iñedena, Jusiñamui-mona buna duere sefuñeite.

¹⁶ “Enirue-na omoimo iiticue” naimiena ñnotinomo Jusiñamuidi llote. Duenailamona llote. Nana Abraham uruiaí mícoriimo iena llote. Dani Moisés mícori lloga

uaido jaidinomo lloñede; iadedi Abraham isoi ñnotinomo jiai llote. Abraham mícori isoi cai jailla jira, naimiedi cai moo. ¹⁷ Jusiñamui iena jaie llote: “Ona diga nairai imaci moona jai itataitice” llote. Jusiñamui fiodaitinona jilloitarede. Nia iñede rana ie uaido jiai comuitate. Ie jira Jusiñamui Abraham mícorimo llua isoi, suide. Jai fiodaitino illa isoi Abraham mícori abi illa jira, Jusiñamui naimie abina mairitate. Ie ai oiniñomo urue comuillena llote.

¹⁸ Jusiñamui Abraham mícorimo jiai llote: “Ailluena uruiaí omo iite. Diga nairai omona jebuite” llote. Abraham mícoridi naie ñnorainiga rafuena ñnote. ¹⁹ Jai ñnote; iadedi cien años naimie mícorimo illamona, naimie jai eeiroma. Naimie mícori aidi, Sara mícoridi, oiniñona jira, naiñaiño uruedi comuñede. ²⁰ Abraham mícoridi Jusiñamui llua ñnote. ñnocana jaillano, iobillacinona Jusiñamuimo fecade. ²¹ Abraham mícoridi Jusiñamui lloga uaina finuana eo ñnote. ²² Ie jira Jusiñamui naimiena marebicaitate.

²³ Naie rafue jaie cuega; iadedi dama Abraham mícorimo duiñede; ²⁴ iadedi caimo jiai duide. Jusiñamuina ñnotinona marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fiodaite. Caina marebicaitallena, naimiena jai jillotate.

Jai cai marebicaidicai

5 Jusiñamuina cai ñnuamona cai marebicaiilla jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. ² Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuiridicai; ³ iadedi duere cai sefuiaidedi, jiai iobidicai. Duere sefuillamona, cai comeciai ocuiñocana cai jaillana uifnoticai. ⁴ Cai comeciai ocuiñuamona facacifidicai. Facacifillamona, Jusiñamuimo ocuiridicai. ⁵ Jusiñamui caina isiruilla jira, tainomo ocuirifeiticai. Ie Joreña caimo fecade. Ie Joreño cai comeciaimo illa jira, ie Joreño Jusiñamuidi caina naimie caina isiruillana uifnotade.

⁶ Cai jeacinomona dani jillonidicaimo, Cristo cairi fiodaite. Maraiñedicaí; iadedi naie facaiseconi cairi fiodaite. ⁷ Maraiñedimie facaina caimona jaca buna fiodaiacaiñede. Caimona nibaí damie maremie facaina fiodaite; iadedi nana comini iese fiodaiacaiñedimaci. Maraiñedimie facaina jaca buna fiodaiacaiñede; ⁸ iadedi nia maraiñedicaimo, Jusiñamui caina isiruillamona, Cristo cairi fiodaite. ⁹ Cristo cairi fiodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite. ¹⁰ Cai dinena Jusiñamuina cai enoilla facaiseconi naimie Jito cairi fiodailla muidona, ie Jito jillua muidona, Jusiñamui caina jai nabaide. Naimie caina nabailla jira, cai íco jilloillena raise uifnoticai. ¹¹ Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

Adán micorí finoca rafue

¹² Bie rafue jai suide. Adán micorí jeacinona finuamona, nana cai mo jeacinodí jai comuide. Jeacino cai mo illa muidona, cai jeacino ite diga nana fiodaicana jaidicai. ¹³ Moisés micorí llogacino nia iñenia, jeacinona finodimaci; iadedí Moisés micorí llogacino nia iñenia, Jusiñamuidí jeacino facaina ibana oñede. ¹⁴ Moisés micorí llogacino nia iñenia, Adán micorí facaisemona Moisés micorí facaisemo naimaci jeacino ite diga nana comini fiodaicana jaidimaci. Adán micorí isoi jeacinona finoñedimaci; iadedí fiodaicana jaidimaci. Adán micorídi Cristo isoiñede. Adán micorí finoca rafuemona jeacino comuide. Cristo finoca rafuemona Jusiñamui cai jeacinona oni dotade.

¹⁵ Adán micorí finoca rafuedí Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicai; iadedí Jusiñamui finoca rafue Adán micorí finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena. ¹⁶ Dama Adán micorí jeacinona finuamona, Jusiñamuidí nana caina duere finollicino anamo itatate; iadedí Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicai; iadedí marebicaidicai.

¹⁷ Dama Adán micorí jeacinona finuamona, cai jeacino ite diga nana cai fiodaicana jaidicai. Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui diga jaca iiticai.

¹⁸ Dama Adán micorí muidona, nana comini duere finollicino anamo itimaci; iadedí dama Jesucristo finoca mare rafuemona Jusiñamui diga naimaci jaca illena, nana comini marebicairidimaci. ¹⁹ Adán micorí Jusiñamuina iñoñenamona, nana comini jeacinona finodimaci. Jesucristo Jusiñamuina iñuamona, ailluena comini marebicaitimaci.

²⁰ Jusiñamui Moisés micorimo rafuena llote. Iena comini iñoñenamona, diga jeacinona naimaci finuana uiñotimaci. Jeacinona finocana jaidimaci; iadedí Jusiñamuidí naimacina eo duenaite. ²¹ Jeacino anamo jaie nana cai illa jira, cai jeacino ite diga fiodaicana jaidicai; iadedí Jusiñamui duenaillacino anamo birui iticai. Ie jira cai marebicaillamona, cai Nama Jesucristo muidona, Jusiñamui diga jaca iiticai.

Jesucristomo cai duillamona, jeacino anamo jai iñedicai

6 Jeacino anamo jai iñedicai; iadedí omoimona damierie comecina facaite: "Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenailana eo raise uiñoiticai". ² Iese comecina facañeno. Jeacino anamo jai cai iñena jira, jeacinona finocana cai jaiñena. ³ Biena uiñotomoi. Cristo Jesús díbeimo cai illamona, nana caidi bautizagacai. Cristo fiodailla jira,

cai comeciaino ite jearedicino anamo jai iñedicai.

⁴ Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie díbeimo cai illamona, cai jeacino anamona jillodicai. Cai comeciaino jiaie rafue birui illa jira, jiaie rafuedo jai jaidicai.

⁵ Cristo fiodaite; iadedí naiemona jillode. Naimie díbeimo cai illanona, cai comeciaino ite jearedicino anamona cai jillua jira, Cristo ie mare rafue anamo birui iticai. ⁶ Cristo fiodailla jira, cai comeciaino ite jearedicino anamo jai iñedicai. Cai mo jai jainaiañena jira, jeacino finocana cai jaiñena. ⁷ Jeacino anamo jai cai iñena jira, jeacinona finocana cai jaiñena. ⁸ Cristo fiodaite; iadedí jillode. Naimie fiodailla jira, cai jearedicino anamo jai iñedicai. Naimie jillua jira, jiaie rafuedo birui jaidicai. ⁹ Fiodaillamona Cristo jillua jira, naimiedi dane fiodaíñeite. Naimie fiodaitemo, cai jeacino facaina naimiedi jai fiodaite. Jai dane fiodaíñeite. ¹⁰ Jeacino facaina jeacinona oni dotallena, naimie dacaiño fiodaite; iadedí ie Moona jaca iobitanona, naimie ie Moo díbeimo jaca iite. ¹¹ Ie jira jeacino anamo iñenanomo omoi comeciaina faca. Cristo Jesús díbeimo jai omoi illanona, Jusiñamui jitailla rafuena finollemo omoi comeciaina faca.

¹² Jeacinona finocana jaiñeno. Omoi comeciaino jeacinona finoacania, iena iñoñeno. ¹³ Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina iño. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaítino isoidomoi; iadedí jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaie naimiemo duiñedomoi; ia birui naimiemo jai duidomoi. ¹⁴ Moisés llogacinuai anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micorí llogacino jaiñedomoi; iadedí jeacino omoi finoñellena, omoina Jusiñamui duenaillamona, naimie omoina birui canocabide.

Patrón anamo itinomona cai fueolle

¹⁵ Moisés micorí llogacino anamo jai iñedicai; iadedí omoimona damierie comecina facade: "Moisés micorí llogacino anamo cai iñenamona, jeacino cai finoia, Jusiñamui caina duere finoñeite". Iese comecina facañeno. Jeacinona finocana cai jaiñena. ¹⁶ Biena uiñotocai. Patrón anamo bu ia, ie patrón comeci jitailla rana finode. Ie ocuica rana iñote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico iñeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi. ¹⁷ Jeacino anamo jaie itomoi. Iemei omoimo jiaie comini Jesucristo rafuena jai llotimaci. Iena cacajanona, iena raise iñotomoi. Ie jira Jusiñamuimo iobillacinona fecadicue. ¹⁸ Jeacino anamona jai jillobillamona, marecinona finocana jai jaidomoi.

¹⁹ Cue lluana omoi raise cacaillena, bie isoide rafuena lloticue. Omoi comeciã railla jira, jeacinona navui finodomoï. Maraiñedicinona finocana navui jaidomoï. Cristo ðibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciã Jusiñamui jitailla isoi marena iitomoï.

²⁰ Jeacino anamo navui omoi ia, Jusiñamui jitailla isoi, marecinona finoñedomoï. ²¹ Jeacinona navui omoi finuamona mare rafuena oñedomoï. Ie jira iena birui meiruitomoï. Jeacinona finocabidino fiodaillamona, Jusiñamui illanomo ðo iñeitimaci. ²² Jeacino anamona jai jillobidomoï. Jusiñamui anamo omoi jai illa jira, naimie ocuica rafuena finodomoï. Iena omoi finuamona, Jusiñamui jitailla isoi, marecinona finocana jaitomoï. Ja muidomo naimie ðiga iitomoï. ²³ Jeacinona finocana omoi jaia, omoi jeacino ite ðiga fiodaïtomoï. Jusiñamui illanomo ðo iñeïtomoï; iadedi cai Nama Jesucristona omoi ðnuamona, Jusiñamuidi omoïna jaca itataite. Naimie illanomo ðo iitomoï.

Inirede riñomona cai fueolle

7 Cue amatiaï, Moisés micori llogacinuaina uiñotomoï; iadedi iena nia raise cacaiñedomoï. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo ðuiñede. ² Ie isoide. Nana naimie ille ðinori, inirede riño ie inimo ðuide. Iese Moisés micori jaie llote. Ie ini fiodailla mei, ie inimo jai ðuiñede. Naimie anamo naiñaiño jai iñena jira, jaiãmiena naiñaiño oia, ie inina illena, Jusiñamui-mona mare. ³ Ie ini nia fiodaïñenia, jaiãmie ðiga naiñaiño ia, ie ini abimo jeacinona jai finode, Moisés micori lloga uai naiñaiño ðnoñena jira. Ie ini fiodailla mei, naimie anamo naiñaiño jai iñena jira, jaiãmiena ie inino naiñaiño oia, jeacinona jai finoñede.

⁴ Ie isoide. Cristo fiodailla jira, Moisés micori llogacinuai anamo jai iñedicai. Iemo jai ðuiñedicai. Ie jira Cristomo jai ðuidicai. Jusiñamui jitailla rafuena finocana cai jaillena, fiodaillamona Cristo jai jillode. ⁵ Jusiñamuina nia cai ðnoñenia, cai jitaill rafuena finocana jaidicai. Moisés micori llogacinona uiñoticai; ia cai maraiñede jitailla rafuena finocana jaidicai. Cai jeacino ite ðiga fiodaicana jaidicai; ⁶ ia Moisés micori llogacino jai saide. Caimo jai ðuiñede. Navui ie anamo iticai; iadedi birui ie anamo jai iñedicai. Jusiñamuina cai sedajamona, Jusiñamui Joreño rafuedo jai jaidicai. Moisés micori ciegafuiaido jai jaiñedicai.

Cue comecimo ite maraiñedicino

⁷ “Moisés micori llogacino maraiñede” lloñeiticai; iadedi naie llogacino iñedena, jeacinona uiñoñedicue. Jaiãmiamo ite rana cue niciduana maraiñenana jaie uiñoñedicue. Moisés micori jaie llote: “Jaiãmiamo ite rana nicidoñeno” llote. Ie jira naiemona niciduanana maraiñenana uiñoticue. ⁸ Naie llogacino muidona cue comeci jeacinona finoacade. Ie muidona rana nicidoticue. Naie llogacino iñedena, jeacino finuana uiñoiacaiñedicai. Naie llogacino iñedena, jeacino

anamo iñedicai. ⁹ Moisés micori llogacinona nia cue uiñoñenia, caimare uri iticue. Naiena cue uiñuamona, jeacino cue finuana uiñoticue. Ico Jusiñamui ðiga cue iñenana uiñoticue. ¹⁰ Nano cue comecina facadicue: “Naiedo cue jaillamona, Jusiñamui ðiga ðo jaca iiticue”. Iese cue comecina facadicue; iadedi naie llogacinona cue uiñuamona, Jusiñamui ðibeimo cuena jaca itatañede. ¹¹ Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui ðiga jaca cue illena oñedicue; iadedi ðuere cue sefuillicinona oticue. Naimie ðibeimo Moisés micori llogacino cuena itatañede; ia naimie ðibeimona cuena itatate.

¹² Iese ite; iadedi Moisés micori llogacinodi mare. Jusiñamuimona ite. ¹³ Naie llogacino mare. Naie rafue muidona fiodaïñeiticue; ia jeacino muidona fiodaïticue. Jeacinona cue finua jira, Jusiñamui illanomo ðo jaca iñeïticue. Naie mare llogacinomona jeacino cue finuana eo maraiñenana uiñoticue.

¹⁴ Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraïmana iticue. ¹⁵ Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidicue. ¹⁶ Cue maraiñede finoacaiñega rafuena cue finoiade, Moisés micori llogacino marenana uiñoticue. ¹⁷ Cue comeci iena dama finoñede; iadedi cue comecimo ite jeacino cuena finotate. ¹⁸ Cue comecimo marecino iñede. Mare rafuena finoacadicue; iadedi iena finonidicue. ¹⁹ Cue mare finoacaga rafuena finoñedicue; iadedi cue maraiñede finoacaiñega rafuena finodidicue. ²⁰ Cue finoacaiñega rafue cue finoiade, cue comeci iena dama finoñede; iadedi cue comecimo ite jeacino cuena iena finotate. ²¹ Biese cuemo suicabide. Mare rafuena cue finoacaniadedi, jeacinona finocabidicue. ²² Cue comeci Jusiñamui lloga uaina gaide; ²³ iadedi cue comecimo maraiñede rafuena illana uiñoticue. Cue comecina namataacade. Cuena jeacinona finotaiacade.

²⁴ Eo ðueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, ðuere sefuiticue. Jusiñamui illanomo ðo jaca iñeïticue. Naiemona jaca buna cuena jillobitañede. Dama Jusiñamui cuena jillotaitate, cai Nama Jesucristo muidona. Ie jira Jusiñamuimo cue iobicabilasa.

Jusiñamui Joreño cai comeciaina namatacana cai jailla

8 Cristo Jesúmo ðuidinodicai. Ie jira Jusiñamuidi caina ðuere finoñeite. ² Jeacino anamo jai cai iñena jira, caina ðuere finoñeite. Jeacinona cai finuamona, Jusiñamui illanomo ðo jaca iñeïticai. ðuere sefuiticai; iadedi naiemona Jusiñamui Joreño caina jai jillotate. Jesucristomo cai ðuillanona, caina jaca itataite. ³ Moisés micori llogacinona cai raise ðnoñena jira, jeacinomona ðani jillonidicai. Ie jira Jusiñamuidi ie Jitona orede, ðimana naimie jaillena. Cai isoi naimie jaide; iadedi

naimiedi jeacinona finoñede. Jeacinona finorainidicai. Cai jeacino facaina fiodaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate. ⁴ Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

⁵ Cai comecimo ite maraiñede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai. ⁶ Maraiñede jitaillacinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci. ⁷ Jiaino Jusiñamuina enoidimaci. Jusiñamui lloga uaina jitaifidimaci. Iena ñnonidimaci. ⁸ Iese itino Jusiñamuina iobitanidimaci.

⁹ Iese iñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño iñenia, Cristomo nia duñede. ¹⁰ Jeacinona omoi finua jira, fiodaítomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira. ¹¹ Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiodaide, Jusiñamuidi ie Joreño uaido omoi abiaina jiai jillotaite.

¹² Cue amatai, iese caimo suite. Ie jira cai comeciaino ite maraiñedicinodo cai jaiñelli. ¹³ Naicinodo cai jiaia, Jusiñamui illanomo ico jaca iñeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iiticai.

¹⁴ Nana Jusiñamui Joreño namatadinodi Jusiñamui uruai. ¹⁵ Jusiñamui Joreño feiñoñedomoi, naimiena omoi jacruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: "Cai Moo" raillanona, Jusiñamuina uaidotomoi. Ie jira naimiena jai jaciruiñedomoi.

¹⁶ Cai comeciaina Jusiñamui Joreño uiñotajamona, cai comeciainomona Jusiñamui uruaidicaina jai uiñoticai.

¹⁷ Naimie uruaidicaina jira, ie uruaimo feacaacalle ra caimo jai duide, Cristomo jai duilla isoi. Naimie ñibeimo cai illanona, Cristo isoi cai duere sefuilla jira, naimie isoi ie Moo illanomo ico iiticai.

¹⁸ Biena uiñoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira. ¹⁹ Iese cai illemo nana Jusiñamui finoca radi iocire birui ocuridimaci. ²⁰ Nana enruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimiaci faidobidimaci. Iese suide; iadedi ico dane marena naimiaci illemo ocuridimaci, ²¹ naimiaci rifaillamona ico naimiaci jillua jira. Ie mei Jusiñamui uruaidicaina isoi marena iitimaci. Dane fiodaifñeitimaci. ²² Biena uiñoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci. ²³ Dani naimiaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uiñoticai. Monamo Jusiñamui

uruaina ico cai illemo ocuridicai. Cai fiodaia, fiodaillamona cai abiaina jillotaite. Jiaifo eruaite cai abiaimo meidollemo ocuridicai. Ie mei cai abiai dane fiodaifñeitimaci. ²⁴ Naiemo cai ocurillamona, cai jeacinomona navui jillobidicai. Bumo ie jitailla ra ia, iemo naimie ocuriñede. Ie feiñoñega ramo ocuride. Ie isoidemo ocuridicai. ²⁵ Caimo suiñede rafuemo cai ocurilla jira, iemo fecuise ocuridicai.

²⁶ Birui duere cai sefuia, ico marena cai illemo ocuridicai. Jusiñamui Joreño caina jiai canode. Jusiñamuimo cai jiaia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote. ²⁷ Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidicai. Ie Joreño cai facaina ñaiana cacade.

Jusiñamui caina isiruite

²⁸ Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñoticai. ²⁹ Caina isiruillanona, caina fetode. Nano dofoconimona caina naimie jito isoi cai illena itatate. Naimie jitudi cai ama doforamiena. ³⁰ Caina iese jaie itatajamona, birui caina uaidote. Caina uaiduanona, caina jeacinona jaca finoñedino jai isoitajamona, naimie illanomo ico cai ia, ebire iiticai.

³¹ Iese caina itataja jira, Jusiñamuidi cai facaina illa jira, bu cai facaina iñellena, damamai iesedicai.

³² Jusiñamuidi ie jitona duere sefuillamona jillotañede; iadedi namie jitailla jira, cai facaina ie jitona orede, cairi fiodaillena. Ie muidona naimie ñibeimo marena cai ille rafuena caimo jiai iite. ³³ Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite. ³⁴ Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite. ³⁵ Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai ñiroinia, jacirede rafue caimo ia, jiaie comini caina meineia, Cristo caina nia isiruite. ³⁶ Iena Jusiñamui facaina lloraima micori jaie cuela:

Jusiñamui muidona caina jaca meinetimaci, mercado-mo toica llaudaia fallena illa isoi

cuela. ³⁷ Cristo caina isiruilla jira, caina naimie canuamona, naga bie isoide rafue caimo suia, cai comeciaino ocuridimaci cai jailla. ³⁸ Jusiñamui caina isiruite.

Naimiemona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaidi, Taifedi, Janabadi Jusiñamui isiruillacinomona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo suia, Jusiñamui caina nia jaca isiruite. Jaca buna ie uaido Jusiñamui isiruillacinomona caina baironide. ³⁹ Monamo ite radi Jusiñamui isiruill-

lacinomona caina baironide. Eniruemo ite radi Jusiñamui isiruillacinomona caina baironide. Nana Jusiñamui finoca radi Jusiñamui isiruillacinomona caina baironide. Cai Nama Cristo Jesúmo cai duilla jira, Jusiñamui caina isiruillana uiñotícaí.

Jusiñamuidi judíuái railla cominina fetode

9 Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui joreño cue comecina uiñotajamona, iena uiñotícue. Cue cominiri sunaitícue. ³ Cue comini Cristo rafuena ñinoiacaiñedimaci. Ie muidona Jusiñamui ricaiñifue anamo birui itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amatiaí. ⁴ Israel railla cominidimaci. Jiaicidi judíuái railla cominidimaci. Jusiñamuidi naimacina fetode, ie uruiaína. Jusiñamui siño finoca rafuena cidimaci. Iena naimaci ñnollena, Moisés micorimo Jusiñamuidi rafuena jiaí lloite. Naimiena sedallena jiaí lloite. Naimaci dine naimaci jilloitaraimana oretallena jiaí lloite. ⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidícue.

⁶ Cai cominimo Jusiñamuidi ie uaina lloite; iadedi nana cai comini iena ñnoñena jira: "Jusiñamui ie lloga uaina finoñede" raiñeíticai. Jusiñamuina naimaci raise ñnoñena muidona, nana Israel micorimona comuide cominidi Jusiñamui duiñedimaci. ⁷ Nana Abraham micorimona comuidinodi naimiemo duiñedimaci. Jusiñamui iena jaie lloite: "Dama Isaacmona comuidinodi ua Abraham uruiaí". ⁸ Naie lluamona nana Abraham micorimona comuidinona ie uruiaíñenana uiñotícaí. Jusiñamui lloga uaina ñnotinodi naimie ua uruiaí. ⁹ Jusiñamuidi Abraham micorimo jaie lloite: "Jiaie año bie facaiseconi o dine abido biítícue. Naie facaiseconi o ai Saradi jitona jocoite" lloite. Ie mei iese suide.

¹⁰ Ie mei Isaac micoridi Rebeca micorina ote, naimie aína. Ie mei naiñaiño micoridi gorasana iaímaiaí micorina jocode. Nano doforamiedi Esaú micori. Jiaímiedi Jacob micori. ¹¹ Naiñaiño micori nia jocoñenia, Jusiñamuidi naiñaiño micorimo lloite: "Nano doforamie ie ama anamo jaca iite" lloite. Jusiñamui facaina lloraima micori Jusiñamui lluaña jiaí cuete: "Jusiñamui lloite: 'Jacobna eo isiruitícue; iadedi Esaúna janore isiruitícue' lloite". Naie iaímaiaí micori nia jeicíñenia, iaímaiaí micori marecinona nia finoñenia, iaímaiaí micori maraiñedicinona nia finoñenia, Jusiñamuidi iaímaiaí micorina iese lloite. Ie finoca rafuemona Jacob micorina fetode; iadedi Jusiñamui jitailla jira, Jacob micorina fetode.

¹⁴ "Jusiñamuidi dama Jacob micorina fetuana maraiñede" raiñeíticai. Jusiñamuidi maraiñedicinona jaca finoñede. ¹⁵ Jusiñamui bie isoide rafuena Moisés micorimo lloite: "Cue dinena cue jitaillanona duenaitícue; ia cue dinena cue jitaíñenanona duenaiñeítícue" lloite. ¹⁶ Comini naimiena jitaillamona,

Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite. ¹⁷ Jusiñamuidi bie isoide rafuena Faraón micorimo lloite. Moisés micori illa facaise Egipto railla enirue illaimadi Faraón micori. Naimiemo lloite: "Ona illaimana jai itataticue. O uicomo siño rafuena finodicue, cue uai siñonana jiaie comini uiñol-lena, nana cominido cue mameci sorillena".

¹⁸ Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiena ñnotañede.

¹⁹ Nibaí comeciaina facadomoi: "Cominina iese Jusiñamui itataia, ¿bue ñllena naimacina duere finoacade?" ²⁰ Iese comeciaina facañeno. ¿Niese nainona naimiemo ducaítomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. ²² Ie isoide. Nana comini dajena eruaiñedicai. Ie jitailla isoi, jiaíforie Jusiñamui caina comutate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiaí uiñotaacade; iadedi naimacina nia duere finoñede. ²³ Cominina Jusiñamuidi jiaí duenaila jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate. ²⁴ Jusiñamui caina iese itatate. Da judíuaina iese itatañede; ie iadedi judíuaiñedinona jiaí iese itatate. ²⁵ Jusiñamui iena jaie lluaña Oseas micori jaie cuete:

Cue cominiñedinodi cue cominina jaitimaci. Isiruiñeganona isiruitícue.

²⁶ Dane jiaí cuete:

Navui cue cominiñedomoi; iadedi jiaie comini omoina íco lloitimaci: "Naimacidi jaca cajede cai Jusiñamui ie uruiaidimaci" lloitimaci cuete. ²⁷ Isaías micori railla lloraima jaie cuete: "Mon-aillai fuemo conillie eo ite. Ie isoi Israel micori uruiaí eo jebuitimaci; iadedi Jusiñamuidi nana naimacina jillobitañeite. Dajerierna jillotajanona, ²⁸ jainomo ie lloga uaina raire finoite. Naimacina duere finoite" cuete.

²⁹ Isaías micori jiaí cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiaí jaie cuenode.

Naimaci micoriái isoi iñedicai, nana cai cominina naimiedi duere finoñena jira.

Judíuaidi Cristo rafuena jitaíñedimaci

³⁰ Biemo comeciaina faca. Judíuaiñedinodi Jusiñamui jitailla isoi, marena illana navui uiñoiacaiñedimaci; iadedi iena jai uiñotimaci. Jesucristona naimaci ñnuamona, marena illana jai uiñotimaci. ³¹ Jusiñamui jitailla isoi marena naimaci illena, judíuaidi Moisés micori llogacinodo jaidimaci; iadedi Moisés micori llogacinona naimaci raise ñnoñena jira, marena illana jaca uiñoñedimaci. ³² Naimaci finoca rafuemona marena iacadimaci. Marena naimaci illena, Jesucristona ñnoia-

caifñedimaci. Naimie muidona marena iñeitimaci.

³³ Isaiás micorí iena jaie cuete:

Jusiñamui llote: “Ero, Jerusalémo cue Jitona ore-taiticue.

Naimie muidona cominidí jilloñeitimaci.

Naimiena naimaci ññoñenia, faifitimaci;

iadedí naimiena ñnotinodí tainona ññoñeitimaci.

Suubicaifñeitimaci” llote.

10 Cue amatiai, judúuai cominí jilluana eo jita-idicue. Jusiñamui diga cue ññaia, iena jicadicue.

² Jusiñamui jitaillacinona eo fñoacadicue. Iena

uifñoticue. Iena fñoacadicue; iadedí iena fñuana

raise uifñoñedimaci. ³ Jusiñamui naimacina marena

itatallena uifñoñedimaci. Naimaci fñoca rafuemon

marena iacadicue. Jusiñamui llua isoi jaiacaiñedimaci.

⁴ Nana Cristona ñnotimiedí Moisés micorí llogacinodo

naimie marena illena jai jaiñede. Cristona ñnuamona,

Jusiñamui jitailla isoi, naimie marena jai ite.

⁵ Moisés micorí jaie cuete: “Naimie marena illena,

cue lluado jaidimiedí jaca ite, cue lluana naimie raise

ññoia” cuete. ⁶ Iese jaie cuete; iadedí jaca buna iese

ññoñede. Cristona ñnuamona, marena Jusiñamui jitaill-

la isoi, birui iticai. Jusiñamui uai llote: “Omoí comeci-

na facañeno: ‘Cristona cai baillena, naimiena bene cai

atillena, monamo jaiticai. ⁷ Fiodaitino dine jaiticai,

Cristona cai jillotallena’. Iese comeciaina facañeno”

llote. Cristodí eniruemo jaie bite. Fiodaite; ia naiemona

jai jillode. ⁸ Jusiñamui uai llote: “Naie rafue cai dine jai

ite. Iena jai uifñoticai”. Cai jilloillena Cristona cai ñnuana

birui lloticai. ⁹ Jiaie cominimo: “Cristodí cai Nama” omoí

lloia, Cristo fiodaillamona Jusiñamui naimie jillotajana

omoí ññoia, jilloitomoí. ¹⁰ Cai comecimona cai ñnu

ra, Jusiñamui caina marena illana itataite. “Cristodí cai

Nama” cai lloia, Jusiñamui caina jillotaite.

¹¹ Isaiás micorí iena jaie cuete: “Cristona ñnotinodí

tainona ññoñeitimaci. Suubicaifñeitimaci” cuega.

¹² Naie rafuedí nana cominina ññaite. Judúuaina ññaite.

Judúuaiñedínona jiaí ññaite. Jusiñamui anamo nana

cominidí itimaci. Nana naimiemo jicanotinona jaca

duenaite. ¹³ Cristodí naga naimiemo jicanotimiena jil-

lotaite; ¹⁴ iadedí Cristona naimaci nia ññoñenia,

naimiemo jicanonidimaci. Cristo naimaci facaina fio-

dailla rafuena naimaci nia cacaiñenia, naimiena ñnon-

idimaci. Naimacimo naie rafuena jiaie cominí lloñenia,

iena cacaiñeitimaci. ¹⁵ Jusiñamui ie rafue llorainina jai

orede. Isaiás micorí iena jaie cuete: “Mare rafuena

llotino cai dine billano, eo iobidicai” cuete.

¹⁶ Iese cuete; iadedí ailluena cominí naie rafuena nia

jitaifñedimaci. Isaiás micorí iena jiaí jaie cuete: “Jusiña-

mui, ailluena cominí cai lluana ñnoiacaifñedimaci”

cuete. ¹⁷ Cai lluamona Cristo rafuena cacadicue.

Cristo rafuena cacajamona, damierie naimiena ñnoti-

maci.

¹⁸ Judúuai cominí naie rafuena jai cacadicue. Jusiña-

mui facaina lloraima micorí iena jaie cuete:

Naga eniruemo ite cominimo Jusiñamui llorainí mi-

coriaidí naie rafuena jai llotimaci

cuete. ¹⁹ Judúuai cominí naie rafuena cacadicue; iadedí

iena ññoñedimaci. Moisés micorí iena jaie cuete:

Jusiñamuidí llote: “Cue rafuena naimaci feiñua jira,

judúuaiñedínona diga uradoitomoí.

‘Naimaci abina uifñoñedimaci’ raitomoí;

iadedí cue rafuena naimaci feiñua jira, naimaci diga

iciritomoí” llote.

²⁰ Isaiás micorí marefodo jiaí cuete:

Jusiñamui llote: “Cuen

ajenoñedínona cuena jai baiti-

maci. Naimacina cue jilloitallena cuena jicanoñedinomo jai

bairedicue” llote.

²¹ Jusiñamui judúuai cominina jiaí llote: “Naimacina cue

dine jaca uaidoticue; iadedí ñnoiacaifñedimaci. Cuen

jitaifñedimaci” llote.

Judúuai cominimona dajerie ñnoitimaci

11 Jusiñamuidí judúuaina fainonocaillamo omoí

comeciaina facañeno. Judío imiedicue. Abraham

uruiái micoriaimona comuidicue. Benjamín railla nairaí

imiedicue. ² Naimacina jaie naimie fetua jira, Jusiñamui

judúuaina fainonocaiñede. Elíamo jaie ite rafuena uifño-

tomoí. Jusiñamui naimiedí judúuaina llote: ³ “Cue

Nama, o facaina llorainí micoriaina meinetimaci. Ona

cai sedajanona judaidimaci. Dama cue fñebidicue. Cuen

ajiaí meineiacadicue”. ⁴ Jusiñamui dinena uai ote:

“Dama iñedio. Siete mil iññaí cue díbeimo nia

eenoticue. Baal railla jiraraina jaca sedañedimaci. Cuen

ajiaí sedadimaci” llote. ⁵ Birui ie isoide. Naimacina

duenaillamona, naimacina Jusiñamui fetua jira, dajerie

Jusiñamui díbeimo itimaci. ⁶ Naimacina duenaillam-

ona, naimacina fetode. Naimaci fñoca rafue muidona

naimacina fetode. Naimaci fñoca rafue muidona

naimacina fetodena, naimacina duenaillamona

naimacina fetode.

⁷ Ie jira iena iese lloiticue. Ailluena judúuidí marena

Jusiñamui jitailla isoi illana oñedimaci; iadedí Jusiña-

mui fetocano iena otimaci. Ailluena cominí iena ñnoi-

caifñedimaci. ⁸ Jusiñamui facaina llorainí micoriaí iena

jaie cuega: “Jusiñamuidí naimacina abina uifñoñede.

Jusiñamui fñoca rana naimaci cioia, iena uifñoñedi-

maci. Jusiñamui rafuena naimaci cacajia, iena ca-

caifñedimaci. Birui iese nia itimaci” cuega. ⁹ David mi-

corí iena jiaí llote:

Naimacimo aillue ra illamona, Jusiñamui naimacina

duere fñoite.

¹⁰ Naimaci comeciái Jusiñamui rafuena uifñoñeitimaci.

Naimaci fñoca rafue anamo duere sefuicana jaca

jaitimaci.

Judúuaiñedinomona dajerie ñnoitimaci

¹¹ Naimie rafuena judúuai cominí jitaifñena jira, Jusiña-

mui naimacina duere finode; iadedí naimacina

sofeñede. Jusiñamuina judúuai ññoñena jira, Jusiña-

muuidí judúuaiñedinona jai jillotate. Naimacina jai jil-

lotate, judúuai dinena judúuaiñedinona uradoillena.

Uradoillamona Jusiñamuidí naimaci naimiena ñnollena

jitaide. ¹² Cristona judúuai jitaifhena jira, Jusiñamuimona judúuaiñedínodi diga marecinona birui feiñotímaci. Cristo díbeimo íco judúuai ia, Jusiñamuimona judúuaiñedíno ailluena feiñotímaci.

¹³ Judúuaiñedíno, omoímo rafuena lloiacadicue. Omoí díne Jusiñamuidí cuena orede. Cue maijari eo mareña ñaiticue, ¹⁴ cue comíní cuena uradoillena, Cristona dajerie ñnotallena. ¹⁵ Cristona naimaci nia ñnoñena jira, judúuaiñedíno jai ñnotímaci. Cristona íco judúuai ñnoia, Jusiñamui diga jaca iitímaci. ¹⁶ Janore jisa juilliruñu marenia, nana juilliruaidí mare. Riara ie jainauai mareña, nana ie igaillai mare. Judúuidí ie isoidímaci. Naimaci jaiagai micoriai jainauai isoidímaci. Naimaci jaiagai marenia, naimacídí jiai mare. Birui ite judúuidí igaillai isoidímaci.

¹⁷ Taide igaillai díe amenamo jai duiñede. Ie isoidímaci. Naimacimona Cristona jiaíno ñnoñena jira, Cristomo jai duiñedímaci. Sotaca riara isoi, naimaci ifomo itomoi. Ie jira Jusiñamuimona rafuena jai feiñocabitomoi. ¹⁸ Naimaci ifomo omoí illa jira, abina uradoifheno. Igaillaimona jainao cajellena, ie ijina oñede; iadedí iemo duilla jira, jainaomona igaillai cajellena, ie ijina ote. Ie isoide. Naimiemo omoí duilla jira, Jusiñamuimona rafuena jai feiñocabitomoi.

¹⁹ Comeciaina facadomoi: "Taide igaillai ifomo iticai isoidímaci. Jusiñamui judúuaina oni dotade, caina fetollena". ²⁰ Uanaicinona comeciaina facadomoi. Naimaci ñnoñena jira, Jusiñamuidí naimacina oni dotade. Omoí ñnua jira, naimaci ifomo itomoi. Ie jira abina uradoifheno; iadedí Jusiñamuina omoí jacirui.

²¹ Naimiema naimaci ñnoñena jira, judúuaina duere finode. Naimiema omoí ñnoñena, daje isoi omoína duere finoite. ²² Biemo comeciaina faca. Naimiema ñnoñedínona jai duere finode; iadedí omoína duenaite. Naimiema ñnocana omoí jaia, naimie omoína nia duenaite. Iese omoí jaiñenia, naimie omoína dotaite.

²³ Judúuai Cristona ñnoñeno navui jaidímaci: iadedí Cristona naimaci birui ñnoia, naimie díbeimo Jusiñamui naimacina itatarede, igai riaramo sotaja isoi. ²⁴ Aillí riarana cuetícue. Naie amenamo nano duiñedomoi. Judúuai nainomo nano duidímaci. Jusiñamui jitailla jira, sotaca igai isoi, naimaci ifomo omoína jai itatate. Ie jira Jusiñamui jitaia, nainomo nano naimaci duilla jira, naimiedí judúuaina abido oite.

Eo ailluena judúuai jilloitímaci

²⁵ Bie rafuena omoí uifhena jitaídímaci. Iena navui uifhenedímaci. "Judúuai baífemo faitímaci" omoí raiñellena, biena omoímo llotícue. Diga judúuai Cristona birui ñnoiacaifhenedímaci. Jusiñamui jitailla díese judúuaiñedíno jillua facaisena, iese iitímaci. ²⁶ Ie mei eo ailluena judúuai jilloitímaci. Jusiñamui facaina lloiraí micoriai iena cuetímaci:

Jerusalémona caí Jilloitaraima biite.

Jacob micorí uruiaimona jeacinona dotaite.

²⁷ Naimaci jeacinona oni dotajanona, Jusiñamui jai lloga uai suite.

²⁸ Cristona birui ñnoiacaifhenedímaci. Jusiñamuina enoidímaci. Jusiñamuina naimaci jitaifhena jira, naimie omoína fetode. Ie jira jillodomoí; iadedí Jusiñamuidí judúuaina nano jai fetode. Naimaci jaiagai micoriaimo ie lloga uaina jira, naimacina nia isiruite. ²⁹ Jusiñamui ie lloga uaina saifhede. Naimacina fetua jira, naimacina fainonocaiñeite. ³⁰ Jusiñamuina navui ñnoñedomoi; iadedí Jusiñamuina naimaci ñnoñena jira, Jusiñamui omoína jai duenaite. ³¹ Jusiñamuina jai ñnoñedímaci; iadedí omoína naimie duenailla isoi, Jusiñamuidí naimacina íco jiai duenaite. ³² Jusiñamui nana comíní naimiema ñnoñenana uifhote, naimacina naimie duenaillena. ³³ Jusiñamui caina eo duenaite. Eo abina uifhote. Naga rana uifhote; ie iadedí naimie lloga uaina raise cacaiñedímaci. Naimie finoca rafuena raise jiai uifhenedímaci. ³⁴ Jusiñamui facaina lloiraí micorí iena jai cuete: "Jaca buna caí Nama Jusiñamui comecí facajacinona uifhote. Jaca buna naimiemo ie finoca rafuena lloñede. ³⁵ Jiairuido íbana feiñollena, jaca buna naimiemo rana fecañede" cuete. ³⁶ Naga ra naimiemo illa jira, naga ra naimiema bite. Naga rana finode. Naimiemo iobillacinona caí fecacabillasa. Iena jitaídímaci.

Jusiñamui anamo raise omoí i

12 Cue amatiaí, omoímo bie rafuena llotícue. Jusiñamui caina duenailla jira, omoí jeanide comeciaimona, naimie jitailla rafuena omoí finuamona naimie anamo raise omoí i. Naimie jitailla isoi omoí i. Naimiedí omoí iese illana gaide. Omoí comeciaimona naimiema raise omoí seda. ² Cristona uifhenedíno isoi omoí iñeno; iadedí omoí comeciái uaina meiduanona, jai rafuedo mai omoí jai. Ie mei Jusiñamui jitailla rafuena finuana uifhonomoi. Mare rafuena finuana uifhonomoi. Naimiema iobitajacinona jiai uifhonomoi. Eo mare rafuedo jaillana uifhonomoi.

³ Jusiñamui cuena duenaillamona, bie rafuena omoímo cue lloñena, naimie uai cuemo ite. "Jiaie comíní baífemo faitícue" raillamo o comecina facañeno; iadedí: "Ñie isoidímiedímaci" o raillamo o comecina raise faca. Jusiñamuimona o feiñoga díese ñnuacínomo o comecina faca. ⁴ Nagamie ie abimo diga ra ite. Ie onollí ite. Ie uisí ite. Ie jebe ite. Diga jiaie ra ite. Rana caí finollena, naga ra caí abimo ite. Caí abimo jainaiade. ⁵ Ie isoide. Cristona jai ñnotímaci. Aillosiedímaci; iadedí daajeña naimiemo jainaiadímaci. Daní caimo jiai jainaiadímaci.

⁶ Jusiñamuidí daje isoide uaina naimie díbeimo caí maijillena, caimo fecañede. Ie jitailla díese caimo fecade. Ie jira omoí feiñoga uaido naimie facaina maiji. Rafuena omoímo Jusiñamui lloia, iena raise lloño. Roracomo omoí maijillena Jusiñamui lloia, nainomo raise maiji. Omoí llofuellena Jusiñamui lloia, naimie rafuena raise llofue. ⁷ Roracomo maijacinona uifhonomoi nainomo raise maijia. Llofuacinona uifhonomoi raise llofuia. ⁸ Comecí ocuifhotaacinona uifhonomoi comíní comeciaina ocuifhotacana jailla. Rana fecajacinona uifhonomoi rana caidíñeno fecaja. Comínina sedajacinona uifhonomoi comínina raise sedaja.

Dueredinona canodimiedi dueredinona iocire canua. Cristomo daajena cai jainaiaillamona, iese coninina canocana jaiticai.

Cristo rafuedo cai jailla

⁹ Omoi comeciainona nana cominina isirui. Maraiñedicinona gaiñeno; iadedi mare rafuedo omoi jai. ¹⁰ Coninina isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

¹¹ Cristo rafuena sefuiruiñeno finocana omoi jai. Cai Namana iocire seda.

¹² Naimie dine omoi illemo iocire omoi ocuiri. Duere omoi sefua, omoi comeciaina ocuiño. Jusiñamui diga ñaicabillanona omoi jai.

¹³ Jiaie creyentiai rania, naimacina cano. Omoi jofue-mo creyentiai ria, naimacina nafue.

¹⁴ Jusiñamui dibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoñeno.

¹⁵ Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

¹⁶ Daje isoi omoi comeciaino lloillamona uri omoi i. Abina birioicaiñeno. Jamai bue isoidino diga nabairi. "Jiaie comini baifemo uiñoticaí" raiñeno.

¹⁷ Jiaie comini omoina jeare finoia, naimacina daje isoi jeare finoñeno. Ibana oñeno. Omoi marena illana jiaie comini uiñollena, marena omoi i. ¹⁸ Omoimona rafuena suiñoñeno. Nana comini diga uri omoi i. ¹⁹ Cue isiruigano, bu omoina jeare finoia, ibana oñeno. Jusiñamui naimacina duere finoite. Moisés micori iena jaiie cuete: "Cai Nama llote: 'Cominina duere finodicue. Ibana oiticue'" cuete. ²⁰ Ibana oñeno. Jusiñamui facaina lloiraíma iena jaiie jiai cueda: "Omoi enoigamie aimetaia, naimiena eca. Naimie jiroiacania, naimiena jirote". Ie mei naimie meire omoimo eruaite. ²¹ Jiaie comini omoina jeare finoia, iciriñeno; iadedi naimacimo mare rafuena fino. Iese omoi finoia, naimacina omoi dibeimo itataitomoí.

13 Nana illaicominina naimaci ifomo Jusiñamuidi itataja jira, illaicomini lloga uaina nana cai inua. ² Illaicomini uaina bu inoñenia, Jusiñamuina jiai inoñede. Ie mei Jusiñamui naimiena duere finoite. ³ Mare rafuena finodinodi illaicominina jaciruiñedimaci; iadedi maraiñede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaia, omoina marena ñaitimaci. ⁴ Jusiñamui facaina omoina canodimaci. Maraiñede rafuena omoi finoia, naimacina jacirui. Omoina duere finollena, naimacimo uai ite. Maraiñede rafuena finodimienona Jusiñamui facaina duere finoitimaci. ⁵ Ie jira naimaci uaina ino, Jusiñamuimona omoi duere sefuiñellena. Omoina: "Mare" jiai raitimaci. ⁶ Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷ Gobierno omoina ibataia, iena iba. Illaicominimo iobillacinona feca. ⁸ Ra omoi oia, ibañoñeno jaiñeno; iadedi coninina omoi isirui. Jiaie cominina isiruitimiedi nana

Jusiñamui lloga uaina jai finode. ⁹ Moisés micori diga lletarafuena jaiie cuete: "O aiñede riño diga iñeno. O iniñede iima diga iñeno. Jiaimienona meineño. Rana fiiñeno. Jiaimie mo ite rana nicidoño" cuete. Jiai lletarafue ite: "Dani omoi abiaina omoi isiruilla isoi, jiaie cominina omoi isiruilla". Bie lletarafuena omoi inoia, nana lletarafuena jai inotomoí. ¹⁰ Jiaie cominina omoi isirua, naimacina jeare jai finoñedomoí. Jiaie cominina omoi isirua, nana Jusiñamui lloga uaina jai inotomoí.

¹¹ Iena birui cai finua. Jesucristo billiruidi iaiei jai ite. Naimiena cai nano inua facaiseconi, naimie billiruimo cai comeciaina facadica; iadedi nagarui naimie billirui iaiei iñoicaide. ¹² Jesucristo nia dane biñena jira, eniruemo cai illa jira, jitreñinomo iticai isoidicaí. Naimie bia, naimie diga cai illemona, useredinomo raire ja iiticaí isoiticaí. Ie jira jeacinona finocana cai jailana mai cai faionocaili. Jesucristo rafue anamo raise cai illesa. ¹³ Cai marena illana nana comini uiñollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai furiñena. Cai abina uradoiñena. ¹⁴ Iese cai iñena; iadedi naimie caina namatallena, cai Nama Jesucristona raise cai nabaili. Cai jearede navui jitaillacinona finoacanamo cai comeciaina facañena.

Jiaie creyentena jeare ñaiñeno

14 Cristona inotimienona omoi dine biade, naimiena raise feiño. Naimie Cristona nia raise inoñenia, naimiena nafue; iadedi omoi isoi naimie inoñenia, conima uina caitañeno. ² Dajerie naga rana guitimaci; iadedi jiaimie difai guiga rana guite. Naimie riñede. Ie comecina facade: "Cue riia, jeacinona jai finoiticue". ³ Naga rana guiñedimienona miiñeno. Naga rana guitimienona miiñeno. Jusiñamuidi naimacina jai feiñote. Ie jira miiñeno. ⁴ Omoi facaina maijiñedimaci. Jusiñamui facaina maijdimaci. Jeacinona naimaci finoia, Jusiñamui naimacina duere finoite. Jeacinona finoi railanona, Jusiñamuidi naimacina canoite.

⁵ Dajerie creyentiai comeciaina facadimaci: "Judíuai rafue finuaruillai Jesuñamuina sedajiticaí, nairuillai jiaruillai baifemo uaila jira". Jiaino raitimaci: "Nagarui daje isoide" raitimaci. Nagamie ie comecina raise facajamona, ⁶ cai Namana iobitallena, nagamie ie jitaillarui mo cai Namana sedaite. Naga rana guitimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

⁷ Cristomo cai duilla jira, dani cai jitailla rafuena finonidicaí. Cai fiodailliruina jiai llonidicaí. ⁸ Naimiedi cai finolle rafuena ocuide. Cai fiodailliruina jiai lloite. Naimie mo cai duilla jira, iese iticaí. ⁹ Cristodi fiodaite. Ie mei jillode. Ie jira naimie anamo iticaí. Cai cajenia, naimie anamo iticaí. Cai fiodaia, naimie anamo jiai iiticaí.

¹⁰ Naimie baifemo omoi iñena jira, jiaie creyentena miiñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iiticaí. Jusiña-

muidi marañedinona duere finoite. Maredinona duere finoite. ¹¹ Isaías micorí jaie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

¹² Nainomo Jusiñamuimo nana cai finouiga rafuena lloiticai. Ie jira jiaie creyentiaí diga marena omoi i.

Jiaie creyentena jeacino finoi raillano, mare rafuedo cai jailla

¹³ Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla. ¹⁴ Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue ríia, jeacinona finoñedicue. Iena uiñoticue; iadedi jiaimie comecina facade: “Biena cue ríia, jeacinona jai finoñicue”. Naimie comecina iese facajamona, iena naimie ríia, naimiemona jeacinona jai finode. ¹⁵ O riga ra muidona jiaie creyente comeci marañeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañellena. ¹⁶ Ie jira o jitailla rana finoñeno. Jiaie comini ona miñellena, naie rana riñeno. ¹⁷ Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiaí cai facaja. Iocire cai illamo cai comeciaina jiaí cai facaja. Jusiñamui Joreño caimo illa jira, iese caina itataite. ¹⁸ Iese cai jaia, Cristona raise sedadicaí. Jusiñamuina iobitadicaí. Jiaie comini caina marena jiaí ñaitimaci.

¹⁹ Ie jira uri icana cai jailla. Dani cai comeciaina ocuiñocana cai jailla. ²⁰ Omoi ríiacaga ra muidona, jiaie cominina Jusiñamuina fainonocaitañeno. Naga radi mare, ríllena; iadedi bue isoide omoi ría muidona, jiaimie Jusiñamuina fainonocaia, jeacinona jai finoñodomoí. ²¹ Bue isoide omoi ría muidona, jiaimie jeacino finoi raillanona, iena riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide. ²² Mare ra omoi finoia, omoi comeciainona iena uiñotomoí. Jusiñamuidi omoi comeciaina uiñua jira, iena marefodo lloñeno. Omoi comeciainona jeacinona omoi finoñenana uiñotomoí. Ie jira iocire itomoí. ²³ “Nie isoide ra cue ríia, jeacinona finoñedicue” raillanomo bu iese comecina facaia, iena naimie riñena. Iena naimie ríia, Cristona naimie raise ñinoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

Jiaie creyentena cai canua

15 Cristo rafuedo raise jaidicaí; iadedi jaino Cristo rafuedo cai isoi nia jaiñedimaci. Naimacina cai canua. Ie jira dani cai jitaillu rafuena finoñeiticaí; ² iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena.

³ Eniruemo navui naimie ia, Cristo ie jitailla rafuena jiaí finoñede; iadedi Jusiñamui jitailla rafuena finode.

Naimiedi duere sefuide. Jusiñamui facaina lloraíma micorí Cristo ñaiana jiaí cuete: “Jusiñamuina jeare ñaia-cadimacimo, cuena jiaí jeare ñaitimaci” cuete.

⁴ Naiemona cai fueollena, naiemona cai comeciái ocuiñotallena, Jusiñamuina jaie ciegafuíaídi caimo ite. Naiemona Jusiñamui illanomo cai illemo ocuiridicaí.

⁵ Jusiñamui cai comeciaina ocuiñotade. Naimie coniniri omoína uri itatajana jitaídicue. Cristo Jesús llua isoi, omoi uri illana jitaídicue, ⁶ daje isoi omoi comeciái lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaídicue.

Judúuaiñedinodi Cristo rafuena jiaí cacadimaci

⁷ Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño. ⁸ Iena nia lloiticue. Judúuaína canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaímo ico suille rafuena jaie llote. Eniruemo billanona, Cristo iena fuiduaíbite. ⁹ Judúuaiñedinodi Jusiñamuina iobitallena, Jusiñamui naimacina duenaila jira, Cristodi bite. David micorí Cristo llua jaie cuete: Judúuaiñedinodi motomo cue illamona ona iobitaitimaci.

Ruamona cue muidona ona jiaí iobitaitimaci.

¹⁰ Moisés micorí jiaí cuete:

Judúuaiñedinodi, Jusiñamuimo duide comini diga iobi.

¹¹ David micorí jiaí cuete:

Nana judúuaiñedinodi, Jusiñamuimo iobillacinona feca.

Nana comini naimiemo iobillacinona fecacabillasa.

¹² Isaías micorí cuete:

Isaí micorí uruaímona damie comuitajamona, naimiedi judúuaiñedinona sedaite.

Naimie naimacina jillobitallena, naimiemo ocuiritimaci.

¹³ Jusiñamui iemo omoína ocuiritate. Naimiena omoi ñnuanona, naimie omoína caimare itatajana jitaídicue. Uri itatajana jiaí jitaídicue. Iemei Jusiñamui Joreño naimie siño uai diga omoi jilluamo omoína ocuiritaite.

¹⁴ Cue amatiaí, omoína uiñoticue. Eo maredomoí.

Cue lloga rafuena eo uiñotomoí. Coninina llofueredomoí. ¹⁵ Iena omoi comecillena, dafuerie rafuena omoi-marefodo cueticue. Jusiñamui cuena fetuanona, ie rafuena cue llollena, cuena orede. ¹⁶ Judúuaiñedinomo Jusiñamui ie mare rafuena cue llollena, Cristo Jesús facaina maijídicaí. Jusiñamui díbeimo naimacina cue itatajanona, Jusiñamui naimacina feiñollena, naimacimo lloticaí. Jusiñamui Joreñodi naimacina jiaí maretaite.

¹⁷ Jusiñamui díbeimo cue maijia jira, Cristo Jesús muidona cue maijari iobidicaí. ¹⁸ Cue maijiana marefodo lloiticue. Judúuaiñedinodi Jusiñamuina ñnotallena, Cristodi cuena canode. Cue llua ca cadimaci. Cue illana cioidimaci. ¹⁹ Cristodi cuena siño rafuena finotate. Jusiñamui Joreño uaido cuena finotate. Iemei

Cristona jai ñnotimaci. Jerusalémona Ilírico railla enirue dñnomo Cristo ie mare rafuena ailluena cominimo raise jai lloticue. ²⁰ Nainomo Cristona nia uiñoñedino dine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue. ²¹ Isaías micori bi-ena jai e cuete:

Cristo rafuena nia cacaiñedinodi iena cacaitimaci. Naimiena uiñoitimaci cuete.

Romamo Pablo jaiacade

²² Nainomo cue maijiacana jira, Romamo omoi dine nia jaiñedicue. ²³ Diga nairaimo Cristo rafuena bene jai cue llua jira, cue maijille bene jai iñede. Diga años omoi dine cue jaiacana jira. ²⁴ España mo cue jaia, omoi dine jaiticue. Omoi diga nano nigarui caimare ñaiticue. Ie mei España mo cue jaillena, cuena canoitomoi.

²⁵ Omoi dine jaiticue; iadedi Jerusalémo ite creyentiaina cue canollena, nainomo nano jaiticue. ²⁶ Macedoniamoi ite creyentiaidi ucubena ofitatimaci. Acayamo ite creyentiaidi ucubena jiai ofitatimaci. Jerusalémo ite duerede creyentiaina canoacadimaci. Jerusalémo ite creyentiaina canollena, iena birui uiticue. ²⁷ Iena fecaacadimaci. Judíuaiñedinomaci; iadedi judíuaina canoacadimaci, naimacimo Cristo rafuena navui judíuai llua jira. Ie jira naimacina birui canodimaci. ²⁸ Naimacimo bie ucubena raise cue fecaja mei, España mo cue jaillena, omoi dine nano jaiticue. ²⁹ Omoi dine cue ria, naimie rafuena cue lollena, Cristo cuena raise canoite.

³⁰ Cue amatiai, cai Nama Jesucristomoi omoi duilla muidona, Jusiñamui Joreño coniniña omoina isiruitaja muidona, Jusiñamuimo omoi jiiia, cue facaina jiai omoi jii. ³¹ Judeamo ite creyenteñedinomona cue jillobillena, Jerusalémo ite creyentiaimo cue fecaacalle ucubena naimaci raise feiñollena, cue facaina omoi jii. ³² Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue.

³³ Jusiñamui omoina uri itatajana jitaiddicue.

Romamo itinomo Pablodi ie uaina orede

16 Febe raillañaiño omoi dine jaite. Naiñaiño omoi uiñuana jitaiddicue. Naiñaiñodi creyente. Cencrea railla nairai iñaiño. Cristo dibeimo maijiano, nainomo ite creyentiaina canocabide. ² Cristomoi omoi duilla muidona, jiaie creyentiaina cai feiñoiacacabilla isoi, naiñaiño raise feiño. Diga cominina naiñaiño canua jira, naiñaiño jitaillie diese cano. Curna jiai canode.

³ Priscila dine cue uaina oredicue. Naiñaiño ini Aquila dine cue uaina jiai oredicue. Cristo Jesús facaina cue diga maijidiamaiai. ⁴ Cue facaina niadedi fioidaitiaimaiai. Ie jira iaiaiairi iobidicue. Diga nairaimo judíuaiñede creyentiaititaci. Cuemona Cristo rafuena cacadimaci. Cue facaina iaiaiaia niadedi fioidailla jira, iaiaiairi jiai iobidimaci. ⁵ Iaiaiaia jofomoi rollena bitino dine cue uaina oredicue. Epeneto dine cue

uaina jiai oredicue. Cue isiruigamie. Asia railla enirue- mo itinomona naimiedi Cristona nano ñnotimie.

⁶ María dine cue uaina oredicue. Omoina canollena, omoi motomoi maijide. ⁷ Andrónico dine cue uaina oredicue. Junias dine cue uaina oredicue. Naie iaiaiaidi cue comini. Cárcelmo danomoi navui iticai. Jesucristo oretaganodi iaiaiaina marena ñaitimaci. Naimiena nia cue ñnoñena facaise Cristona ñnotiaimaiai.

⁸ Amplias dine cue uaina oredicue. Cristomoi naimie duilla jira, naimiedi cue isiruigamie. ⁹ Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie.

¹⁰ Apeles dine cue uaina oredicue. Cristomoi naimiedi mare rafuedo jaicabide. Aristóbulo jofomoi itino dine cue uaina oredicue. ¹¹ Herodión dine cue uaina oredicue. Naimiedi cue comini. Narciso cominimoi dajerie ñnotimaci. Naimaci dine cue uaina oredicue. ¹² Trifena dine cue uaina oredicue. Trifosa dine cue uaina oredicue. Cai Nama facaina maijidi- aiñuai. Pérsida dine cue uaina oredicue. Cue isiruigañaiño. Cai Nama facaina eo maijide. ¹³ Rufo dine cue uaina oredicue. Cai Namana eo raise ñnote. Naimie ei dine cue uaina jiai oredicue. Naiñaiñodi cue ei isoide. ¹⁴ Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomoi ite creyentiaidi dine cue uaina oredicue. ¹⁵ Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpás dine cue uaina oredicue. Nana naimaci illanomoi ite creyentiaidi dine cue uaina oredicue.

¹⁶ Conini caimare omoi uaido. Diga nairaimo creyentiaititaci. Nana naimacidi omoi dine naimaci uaina oredimaci.

¹⁷ Cue amatiai, daje rafuena nia lloiticue. Omoi comeciai daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedinomaci; iadedi jiaie rafuena llotimaci. Naimaci diga nabairiño. ¹⁸ Cai Nama Jesucristo facaina maijideñedinomaci; iadedi danñ naimaci jitailla rana maijicabidimaci. Mare isoide llua mona abina raise uiñoñedinomoi jifuetimaci. ¹⁹ Ailluena cominidi Cristona omoi ñnuana uiñotimaci. Ieri iobidicue. Marecinona finuana raise omoi uiñuana jitaiddicue. Maraiñedinomoi finuana jitaiddicue. ²⁰ Jusiñamuidi omoina uri itatate. Naimie omoina canoite, Taifena anafefitallena. Cai Nama Jesucristo omoina duenaillesa.

²¹ Omoi dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

²² Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

²³ Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

²⁴ Erasto ie uaina orede. Naimiedi bie nairai ie ucube eenoraïma. Cuarto ie uaina orede. Naimiedi jiai creyente.

Jusiñamui iobillacinona jaca cai fecajasa

²⁵ Cue mare rafue llua isoi, Jusiñamui omoi comeciaïna ocuiñotarede. Jesucristo rafuena llocabiticue.

Jusiñamuidi cominimo naie rafuena jaie uiñotañede; ²⁶ iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini ñinollena, nana cominido bie rafuena llocana birui jaide. Jusiñamuidi jaca ite.

²⁷ Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablodicue.

1 CORINTIOS

Corintomo ite creyentiaimo Pablo cartana orede

1 Corinto railla nairaimo ite creyentiaï, çnie isoidomoi? Pablocicue. Carta omoïmo oredicue. Jusiñamui jitailla jira, Jesucristo rafuena cue llollena, cuena fetode. Sóstenes cue dïga illa jira, omoi dïne coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoïna jai marebicaitate. Jusiñamui omoïna fetode, naimie iena. Ua nana cai Nama Jesucristona sedadinodicaïdï Jusiñamui iena. ³ Cai Moo Jusiñamui, cai Nama Jesucristo dïga, omoïna jai duenaite. Iena uiñocana mai omoi jai. Iaimaiaï omoïna uri jai itatatiamaiaï. Iena omoi uiñocana mai omoi jai.

Cristo muidona Jusiñamuimona ailluena feiñoticaï

⁴ Jusiñamui dïga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoïna jai duenaite. Ie jira naimiemo omoi facaina iobillacinona jaca fecadicue. ⁵ Jusiñamui omoïna duenailamona, ie rafuena omoi llollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoïna eo canode. Omoïna naimiemo ite rafuena raise uiñotade. ⁶ Ie muidona Cristo rafuena raise ñnotomoi. Cristo rafuena cai jino lluamona, naimiemo raise ñnofidomoi. ⁷ Ie muidona Jusiñamuimona omoïmo jaca buena fiebiñede, naimie dibeimo omoi raise maijillena. Naimie dibeimo omoi raise maijiamona, naimie dibeimo jiaie creyentiaïna raise itatacana jaidomoi. Cai Nama Jesucristo abïdo billemo iocïre omoi ocuirillanona, Jusiñamuimona ailluena rafuena feiñotomoi. ⁸ Jeacinona omoi finocabi raillano, naimie nia abïdo biñelle dïnori Jesucristo omoi comeciaina raise sedaite. Cai Nama Jesucristo abïdo bia, ñicïno omoïmo iñena muidona, omoïna duere finoñeite. Naimie bia, naimacïmo jeacino nia illa jira, naimiena ñnoñedinona duere fïnoite. ⁹ Jusiñamui ie lloga uaina jaca fïnoite. Naimie ñnogamie. Naimie Jitona omoi nabaillena omoïna fetode. Naimie Jitodi cai Nama Jesucristo.

Naimaci comeciã daje isoi lloïñedimaci

¹⁰ Cue amatiaï, omoïmo rafuena lloiticue. Cai Nama Jesucristomo omoi duilla jira, iena lloiticue. Omoi comeciã daje isoi lloillana jitaïdicue. Daje isoi omoi comeciã facajana jitaïdicue. ¹¹ Cloé raillamie cominimona bie rafuena cue fidia jira, iese omoïmo lloticue. "Omoi comeciã daje isoi iñedomoi" naimie llote.

¹² Omoïmona damierie raitomoi: "Danï Pablo llofuia dïbecinodo jai jaidicaï". Damierie raitomoi: "Danï Apolos raillamie llofuia dïbecinodo jai jaidicaï". Damierie raitomoi: "Danï Pedro llofuia dïbecinodo jai jaidicaï". Damierie raitomoi: "Danï Cristo llofuia dïbecinodo jai jaidicaï" raitomoi. Nana iese itomoi. Iemona omoi comeciã daje isoi iñedomoi. Cloé cominimona iese fididicue. ¹³ Ero, dïga omoi jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fiodañedicue. Cue dibeimo omoi illena cue bautizañegaomoi. ¹⁴ Omoïna cue bautizañena jira, omoïmo ite rafue cuemona comuiñena jira, iobidicue. Dama Crispona bautizadicue. Gayona jiaï bautizadicue. ¹⁵ Estéfanas jofomo ite cominina bautizadicue. Jiaie cominina cue bautizajana comeciñedicue. Ie muidona: "Pablo facaina bautizadicaï" llonidomoi. Daje isoi omoi comeciã lloïñena, cue muidonañede. ¹⁷ Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraïma isoi omoïmo cue llofueticuedena, cue lloga rafuemo omoi comeciaina facañedomoi. Ie jira eo abina uiñoraïma isoi omoïmo llofueñedicue. Cristo fiodaillamona, omoi jeacinomona naimie omoïna jillotate. Iena omoi feitañenana jitaïdicue.

Cristo finoca rafuemona Jusiñamui uai siñonana uiñoticaï

¹⁸ Cristona ñnoñedinomona cruzmo Cristo fiodailla rafuedi jamaïfue. Naimacidi faïficana jai jaidimaci. Jusiñamuimona naie rafue illa jira, caïmona naie rafuedi siño. Naie uaidi dïga comini comeciã meidorede. Caidi naie rafuena ñnotinodicaï. ¹⁹ Ero, Jusiñamui facaina lloraima micori Cristona ñnoñedinona jiaie cuete: Jusiñamui llote: "Abina uiñoraïni imaci uiñuacinona saitaiticue.

Abina baitadïno imaci baitajacinona saitaiticue" llote. Ie muidona naie isoide comini jilloñenana jai uiñoticaï.

²⁰ Naie isoide comini uiñuacinomona jaca jillonidicaï. Abi uiñoraïma uiñuacinodi Cristo fiodailla rafue baïfemo faïñede. Moisés micori cuëgafuena uiñoraïma uiñuacinodi Cristo fiodailla rafue baïfemo faïñede. Uaina uaitatimie birui ite uiñuacinodi Cristo fiodailla rafue baïfemo faïñede. Jusiñamuidi naimiena uiñoñedïno imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñoticaï. ²¹ Ie jitaillacino diese Jusiñamui finua jira, naimaci abi uiñuacinomona naimiena

ñnoñedimaci. Ie jira naimie mare jitaillacinomona, naimiena ñnotinona jai jillotate. Naimaci jeacinomona naimacina jai jillotate. Cristo rafuena cai lluamona ñnotimaci. Jusiñamuina ñnoñedinodi naie rafuena: "Jamaifue" raitimaci.

²² Siño rafuena naimaci cioacana jira, judíuai railla cominidi iese raitimaci: "Siño rafuena Jusiñamui finoia, omoi lloga rafuena ñnoiticaí" raitimaci. Grieguai railla comini dinena raitimaci: "Omoi lloga rafuena cai abina uiñuacino ie isoi itena, iena ñnoiticaí" raitimaci; ²³ iadedi Cristo rafuena llocana jaidicaí. Cruzmo naimie jai fiodaillana lloticaí. Ie jira judíuaidi cai lloga rafue muidona iciritimaci. Naiena oiacañnenano iciritimaci. Damie naimaci illaimana jaillemo ocuridimaci. Naimaci ocurillamie fiodaillamo naimaci comeciaina facañedimaci. Cristo fiodailla jira, raitimaci: "Naimiedi cai ocuriñenamie" raitimaci. Judíuaiñedino dinena raitimaci: "Omoi lloga rafuedi jamaifue" raitimaci. Ailluena comini cai lloga rafuena jitaiñedimaci; ²⁴ iadedi Jusiñamui damierie judíuaina jai fetode. Dajerie judíuaiñedinona jiai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiai uiñotimaci. ²⁵ Jusiñamui Cristona orede, cai jeacino facaina naimie fiodaillena. Jusiñamuina ñnoñedinomona Cristo finoca rafuedi jamaifue. Ebinidífue. Caimona Cristo finoca rafuedi Jusiñamui ñnoñedinomona uiñuacino baifemo faite. ²⁶ Cue amatiaí, Jusiñamui omoína navui fetode; iadedi ¿nie isoidomoi? Jamai bue isoidomoi. Omoi comeciaina iemo faca. Jusiñamuina ñnoñedinomona abina uiñofedomoi. Omoi creyentiaí díbeimo eo abi uiñotino raise iñedimaci. Omoi creyentiaí díbeimo illaicomini raise iñedimaci. Omoi creyentiaí díbeimo ucuberedino raise iñedimaci. Jusiñamui ie isoidinona eo fetofede; ²⁷ iadedi abina uiñofedino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena. ²⁸ Jamai bue isoidinona fetode, jamai bue isoiñedinomoi baifemo faillena. Jusiñamuimona jamai bue isoiñedinomoi jamai comini. ²⁹ Ie muidona jaca buna Jusiñamui uicomo abina iedoñena. ³⁰ Caina ie cominina Jusiñamui jaitaja jira, Jesucristomo duidicaí. Cristomona Jusiñamuina uiñoticaí. Cristo fiodailla jira, Jusiñamui cai jeacinona feitate. Iemona jeacino cai fñoñellena, caina canocabide. Jusiñamuidi jeacino anamona caina jiai jai jillotate. ³¹ Jusiñamui facaina lloraima micori iena jaie cuete: "Bu abina iedoiacania, nana Cristo finoca rafue díga naimie abina iedua" cuete.

Pablodi cruzmo Cristo fiodailla rafuena llocabite

2 Cue amatiaí, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticedena, iese niade llofueñedicue. ² Daje rafuemo cue comeciaina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueia-

cadicue. ³ Omoi motomo navui cue ia, meiruoicaillamona jacinaioidicue. Jusiñamui facaina cue raise jino lloñeni raillano jaciruioidicue. ⁴ Comini abi uiñuacino omoimo llofueñedicue; iadedi omoi jeacinomona omoi jilluamona, Jusiñamui Joreñodi omoína cue lloga rafue siñonana uiñotade. ⁵ Jusiñamuidi cue iese llofuiana jitaide. Comini abina uiñuacina omoi cacajamona, Cristona ñnoñedomoi; iadedi Jusiñamui omoína jillotaja jira, jai ñnotomoi.

Jusiñamui Joreñodo bie rafuena uiñoticaí

⁶ Comini abi uiñuacino llofuecabiñedicue; iadedi Jusiñamuimona ite abi uiñuacino llofueticue. Cristona raise ñnofidinomona abi uiñuacino llofueticue. Cristo facaina llorainidi cue isoi jiai llofuecabitimaci. Cominimo jai ite uiñuacino llofueñedicai. Illaicomini uiñogacino llofueñedicai. Ico faifitimaci. Ico jiai uainicaitimaci. Ie jira naimaci uiñogacino llofueñedicai; ⁷ iadedi Jusiñamuimona abi uiñuacina cai feiñuamona, iedo llofueticaí. Nano dofoconi, enirue nia fñoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñofedicai. Jusiñamui jaca buna iena jaie uiñofetade. ⁸ Birui ite illaicomini Jusiñamuimo ite rafuena nia uiñofedimaci. Iena uiñotimaciden, cruzmo cai ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñofedimaci; iadedi Jusiñamui caina iena uiñotade. ⁹ Jusiñamui facaina lloraima micori iena jaie cueba:

Jaca buna naimiena ñnotino facaina Jusiñamui finoca rafuena cioiñede.

Jaca buna iena cacaiñede.

Jaca buna iemo comeciaina facañede cueba. Jusiñamui rafuena uiñofedino naie rafuena jaca uiñofeitimaci; iadedi naimiena isiruitino naie rafuena uiñotimaci. ¹⁰ Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

¹¹ Jaca budi jiaimie comecimo iticinona uiñofede. Dama naimie iena uiñote. Ie isoide. Jaca budi Jusiñamui comecimo iticinona uiñofede. Dama naimie Joreño iena uiñote. ¹² Jusiñamuimona ie Joreña jai feiñoticaí. Jiaie cominimona naie Joreña feiñofedicai. Jusiñamui Joreñodi caina Jusiñamui caimo caidñeno fecaca rafuena uiñotade. ¹³ Omoimo naie rafuena llofuecabiticaí. Cominimona fueoga uaido llofueñedicai; iadedi Jusiñamui Joreño caimo llofuia uaido llofueticaí. Ie jira Jusiñamui Joreño ite cominimo naie rafuena llofuecabiticaí. ¹⁴ Jusiñamuina ñnoñedinodi Jusiñamui Joreñomona iticinona feiñofedimaci. Naimacimona naie rafue jamaifue. Iena cacaiñedimaci. Iena jiai uiñofedimaci. Dani Jusiñamui Joreño illa cominidi naiemo cacarefidimaci. ¹⁵ Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñofedimaci. ¹⁶ Jusiñamui facaina lloraima micori iena jaie cueba: "Jaca buna Jusiñamui comecimo iticinona

uiñoñede. Budi naimiena jiaí llofuenide” cuega. Ero Cristo comecimo iticinona caí uiñua jira, Jusiñamuina ñnoñedinodí caina raise uiñoñedimaci. Caina jiaí llofuenidimaci.

Danomo Jusiñamui díbeimo maijidimaci

3 Cue amatiai, Jusiñamui Joreño anamo itinona omoi raise itomoidena, omoína llofueñedicue. Omoi jitaillacinodo nia omoi jailla jira, omoína llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedí monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaína omoi jailla mei, Cristo rafuedo eo jaiñedomoi. ² Feinide rafuena navui llofueticue. Eo feirede rafuena omoimo llofueñedicue. Omoína iena nia llofueñedicue. Omoi uruiái janore moonailla mei, guitimaci. Ie isoide. Cristona caí ñnua mei, naimie rafuena ñnocana caí jailla; iadedí omoi raise jaiñena jira, Jusiñamuimona nia moonaiñedinó isoidomoi. ³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloñíedomoi. Jusiñamuina ñnoñedinó isoi nia itomoi. Jamai ebe isoi nia itomoi. ⁴ Omoimona damierie: “Pablo llofuia díbecinodo jaidícaí” raitomoi. Jiaíno: “Apolos raillamie llofuia díbecinodo jaidícaí” raitomoi. Iese omoi raia, Jusiñamuina ñnoñedinó isoi itomoi. Ie jira iese raiñeno.

⁵ Jamai bue isoidicue. Apolos jiaí jamai bue isoide; iadedí Jusiñamui díbeimo coco maijiamona, Cristo rafue coco llofuiamona, iena ñnotomoi. Jusiñamui cocomo llua isoi, ie rafuena llotícoco. ⁶ Naie rafuena cue llofuiamona nano ñnotomoi. Ie mei Apolos iena dane llofue. Iese llofueuidícoco; iadedí dama Jusiñamui omoína naie rafuena ñnotacana jaide. ⁷ Ie muidona naiemona caí fueua. Jamai bue isoidícoco. Jusiñamui coco baífemo faite. Ie jira naimie omoína ñnocana jaitate. ⁸ Daje uaina Apolos díga maijidicue. Coco maijia diese Jusiñamuimona coco íbana feiñotícoco. ⁹ Jusiñamui facaina maijidícoco; iadedí naimiedí omoína ñnocana jaitate. Naimiedí omoi comeciaina marena itatacana jaitate. ¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue lluamona Cristona ñnotomoi. Birui jiaimie omoína naie rafuena jai llofue. Omoi comeciáimo naie rafue raise itabillena, omoína llofue. Bu omoína llofueia, omoi comeci marena illacinomo naimie comecina facajanona, omoína naimie llofuecabilla. ¹¹ Omoi jeacinomona omoi jilloillena, jaca daje rafue ite. Jiaíe rafuedí iñede. Iena omoimo jai llofueticue. Naie rafuedí Jesucristona ññate. ¹² Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedí naimaci comeciáimo raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedí naimaci comecimo raise itabiñede. ¹³ Jusiñamuidí nagamie ie llofuiacinona íco lloite. Jesucristo abído bia, Jusiñamui

nie isoidicinodo naga naimie facaina maijidino llua nalloite. Naimaci llogacinona eo facaciite. ¹⁴ Ie mei Cristo rafuena raise atona llotinodí Jusiñamuimona íbana feiñoitímaci. ¹⁵ Cristo rafuena raise atona lloñedinodí Jusiñamuimona íbana feiñoñeitímaci. Naimaci niade jiaí faífitímaci; iadedí faíñíñeitímaci. Jusiñamui díga jaca iitímaci; iadedí tainomo maijidímaci.

¹⁶ Jusiñamui ie illano omoi comeciáimo illana uiñotomoi. Naimie Joreño omoimo illa jira, Jusiñamui ie illanodí omoi creyentiaí. ¹⁷ Cristo díbeimona omoi creyentiaína bu abído danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie díbeimona omoína itatatiñena duere finoite.

¹⁸ Bie rafuedo omoi raise jaillena, daní omoi abiaína jífueñeno. Creyenteñedinó uiñuacinodo jaiñeno. Omoimona bu iedo jaiacania, naimiemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedinó uiñuacinodo omoi jaiñeno.

¹⁹ Jusiñamuimona naimiena ñnoñedinó uiñuacinodí jamaífue. Jusiñamui facaina lloraíma micorí jaie cuega: “Jusiñamuidí cominí abí uiñuacinona uiñuanona, naimacina jai emodofide. Naimacina jai duere finode”. ²⁰ Jiaí cuega: “Jusiñamuidí abí uiñotino railla cominí imaci comeciái facajacino jamaífueña uiñote”. ²¹ Ie jira omoi llofuerainí abí íedoñeno. Jusiñamuimona nana rafue omoimo jai illa jira, naimaci abí uiñuacinodo abina íedoñeno. ²² Marena omoi comeciái illacino jítai railano, Cristo omoi díne caina oretate. Cuenaa oretate. Apolona oretate. Pedrona oretate. Naiemona omoi raollena, omoi jítai raillano, eníruedí ite. Omoi jítai railano, birui nana omoimo ite rafuedí suide. Omoi jítai raillano, jiaíruido nana omoimo ite rafuedí suite. Nia omoi fiodaiñenia, Cristo omoína canoite. Omoi fiodaia, naimie díne jaitomoi. Naiemona marena omoi comeciái illacino jítai raillano, ua nana rafue omoimo jai ite. ²³ Cristomo omoi jainaiáilla jira, naimie anamo itomoi. Jusiñamuimo Cristo jainaiáilla jira, naimie Jusiñamui jitailla rafuena jaca fínocabide. Ie jira naimie jitaillacinona fínocana omoi jai.

Cristo fetocano naimie díbeimo maijide

4 Caímo omoi comeciaina faca. Cristo díbeimo maijidícaí. Jusiñamui rafuena llocana jaidícaí. Iena jaie uiñoñedicai; iadedí naimie caina uiñotaga rafuena birui llofuetícaí. ² Ero, naga patródí naimie díbeimo maijidíno naimie lloga uaina ñnuana jitaide. Ie isoide. Jusiñamuidí ie facaina lloraíní naimiena naimaci ñnuamona naimie rafuena raise llua najaide. ³ Cue uaina omoi uaitañenia, iena omoi uaitaia, jiaíno iena uaitaia, iemo comecina facañedicue. ⁴ Cuemo nicino ia, iena uiñoñedicue; iadedí Cristomona cue comecimo jeacino níbaí ite. Ia, naimie cuemo lloite. Iemona cuena duere finoite. ⁵ Ie jira: “O lluacino mare” cuemo lloñeno. “O lluacino marañede” cuemo jiaí lloñeno. Caí Nama nia abído bíñenia, iena cuemo omoi lloñeno. Naimie bia,

nana comini comeciáimo ite rafuena uiñotaite. Naimaci comeciáimo ite jitaillacinona uiñotaite. Iemona naimaci maijia dinori Jusiñamuimona iobil-lacinona feiñotimaci. Naie facaise cuemo ite rafuena lloite. Ie jira nia cuemo lloñeno.

⁶ Cue amatiai, naie rafuena omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cue-gafue llua isoi, omoi illana jitaidicue. Omoi llorainiri tainomo iobiñeno. Omoi Cristo facaina llorainimona damie jiaie lloraima baifemo faiamo omoi comeciaina facañeno. ⁷ Nana omoi llofuerainidi daje isoidimaci. Jusiñamuimona nana naimacimo ite uaina feiñotimaci. Dani naimaci comeciáimona iena naimaci oñena jira, ie diga abina iedoñeno.

⁸ “Nana Jusiñamuimona iticinona jai feiñoticaí. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticaí” omoi comeciaina facadomoi; iadedi nia iese iñedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue. ⁹ Jusiñamuidi nana omoína cue baifemo faitatate raillanomo cue comecina facadicue. Cristo rafuena llorainidicaí; iadedi cue baifemo omoi faiamo cue comecina facadicue. Omoimona jamai bue isoidicaí. Nana comini duere cai illamo raise eruaidimaci. Jusiñamui jaienisaídi duere cai illamo jiai eruaidimaci. ¹⁰ Cristo rafuena cai llua muidona, omoimona ebe isoidicaí. “Cristo rafuena raise ñnuanona, iedo raise jaidicaí” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi. ¹¹ Cai guille buedi jaca iñede. Iniroinidicaí. Jiaie comini caina duere finodimaci. Jofonidicaí. ¹² Cai ra ollena, cai onolli diga duere maijidicaí. Comini caina jeare ñaitimaci; iadedi ibana oñedicai. Naimaci diga marena ñaiticaí. Caina duere finodimaci; iadedi uai oñeno ibana oñedicai. ¹³ Cai joreñona jeare ñaitimaci; iadedi cai dinena naimaci diga marena ñaiticaí. Naimacimona jamai bue isoidicaí. Iese caimo naimaci comeciái nia facadimaci; ia Cristo ðibeimo ie rafuena nia llocana jaiacadicaí.

¹⁴ Bie carta cue cuiamona, omoína meiruitaicaíñedicue; ia omoína nia llofueiacadicue. Isiruiga uruaidomoi isoidomoi. Ie jira bie rafuena omoi raise uiñuana jitaidicue. ¹⁵ Omoína Cristo rafuena llofuelleña, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruina jai jaidomoi isoidomoi. ¹⁶ Ie jira omoimo cue llogacinodo mai omoi jai.

¹⁷ Iedo omoi jaillena, omoína canollena, omoi ðine Timoteona jai oredicue. Naimiena isiruiticue. Naimiedi Cristo ie ñnogamie. Cuemona Cristo rafuena naimie cacajanona, iena ñnote. Ie jira naimiedi cue jito isoide.

Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoína llofueite. ¹⁸ “Pablo caina jaciruilla jira, naimie cai ðine biñeite” raillanomo omoi comeciaina facajamona, omoimona damierie jai abina biridomoi. ¹⁹ Iese comeciaina facadomoi; iadedi Jusiñamui jitaia, omoi ðine raire jaiticue. Ie mei nie isoide uai naie abina biridinomo illana uiñoiticue. Naimaci ñaiacinodo iena uiñoñeiticue; iadedi naimaci finoca rafuemona iena uiñoiticue. ²⁰ Ero, jamai ñaiamona, Jusiñamui anamo naimie jitailla isoi iñedicaí; iadedi naimie finoca rafuedo cai jaillamona, naimie jitailla isoi iticaí. ²¹ Omoi ðine íco cue ria, ¿ñiese omoi diga ñaiticue? Cuemo llono. Cue lluana omoi ñnoñenia, omoimo riire lloiticue. Cue lluana omoi ñnoia, omoína cue isiruillamona, omoimo fecuise lloiticue. Ie jira cuemo llono.

Pablo eo jearede rafuena finodimiena riire lloite

5 Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina ñnoñedino naie isoide rafuena finodimaci; iadedi omoimona damie ie eicañona ote, ie aína. ² Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellenena sunaiñedomoi? Omoi rocabillacomo naimie bia, naimie fo billana rairui. ³ Omoi ðine iticuedena, bie rafue dani omoi siadollena, omoi danomo ofillena lloticue. Omoi ðine cue iñena jira, cue comecidi omoi ðine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uiñoticue. ⁴ Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoína canollena, cai Nama Jesucristo omoi diga ite. ⁵ Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo ðibeimo dane iite. Cristo íco abido bia, naimiedi Cristo ðibeimo dane raise illa jira, Cristo naimiena duere finoñeite.

⁶ Jearede rafue omoi motomo illa jira, ¿buena abina iedotomoi? Janorede siritate ra juilliruaímo faiamona, nana naie juilliruaí siricana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa. ⁷ Judíuaí railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciáimo ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judíuaí cominidi toica llaudaíai fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicaí. Ie jira jeacinona finocana cai jaiñeno. ⁸ Cai facaina Cristo fiodailla jira, cai jeacinona fainonocaillanona,

Jusiñamui jitailla isoi mai cai i. Jeacinona finocana cai jaiñelli. Uanaicnodo mai cai jailli.

⁹ Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iñiaai diga itañaiñuai diga nabairiñellena lloticue. ¹⁰ Nibai iena raise cacaiñedomoi. Ie jira iena dane lloticue. Cristona ñnoñedinona ñaiñedicue. Naimaci aiñede riñoniai diga ia, naiñaiñuai iniñede iñiaai diga ia, naimaci rana nicidoia, rana naimaci fiiia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo Jusiñamuina uiñoñedinono illa jira, ¿ninomo niadedi iticai? ¹¹ "Cristona ñnoticai" raitinona ñaiticue. Naimaci aiñede riñoniai diga naimaci ia, naiñaiñuai iniñede iñiaai diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci fiiicabia, naimaci diga nabairiñeno. Naie isoidino omoi jofuemo feiñoñeno. ¹² Cristona ñnoñedinona ñaiñedicue. Naimaci rafue cuemo duiñede; iadedi maraiñedinona naimaci finoia, Jusiñamui naimacina duere finoite; iadedi Cristona ñnotino maraiñedinona finoia, naimacimo riire lloño. Omoi motomo ite jearede rafuena finodimiena omoi rocabillacomo bia, naimie fo billana rairui.

Cristona ñnoñede juezmo jiaie creyentena llogidoño

6 Jiaie omoi finoca rafuena fididicue. Jiaie creyent-edimie diga omoi nicino ia, ¿bue ñellena jiaie creyentiaai dine jaiñedomoi, naicinona siadollena? ¿Bue ñellena Cristona ñnoñede juez dine naimiena meiruiñeno llogidotomoi? ² Jesucristo abido bille mei, Cristona ñnotinodicaidi Cristona ñnoñedinona duere sefuillena lloticai. Taife comini duere sefuillicinona ico jiaai lloticai. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi? ⁴ Nicino omoimo ia, ¿bue ñellena Cristona ñnoñedinono dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci. ⁵ Omoi meidail-lena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. ⁶ Iese finocabiñedomoi; iadedi nicino omoi creyentiaimo ia, Cristona ñnoñedimie mo jiaie creyentena llogidocabitomoi.

⁷ Jiaie creyentena omoi llogidoia, Cristo ñibeimo raise iñedomoi. Naicino raise omoi finoñenia, uai oño anamo ee. Naimiemona omoi duere sefuia, dama ite.

⁸ Iese iñedomoi; iadedi dani conini jiaie creyentiaina duere finocabidomoi. Naimaci rana fiiidomoi. Omoi amana duere finodomoi.

⁹ Jusiñamui sedajanomo naimiena ñnoñedinono duiñeitimaci. Naimaci isoi nia iacadomoi; iadedi Cristo ñibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima

aifñedotino, daje isoide riño diga conioño aifñedotino, ¹⁰ rana bainino fiiicabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci. ¹¹ Omoimona dajerie iese jiaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemona abina rairui

¹² Cristo ñibeimo omoi illa jira, ¿ñiese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiaai iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi.

¹³ Raitomoi: "Nie isoide guille cai guiacania, nie isoide rafue cai finoacania, caimona mare" raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite.

¹⁴ Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiaai diga caina ico jillotaite. Cai abi jaca illa jira, jearede rafuena birui cai finoñena.

¹⁵ Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. ¹⁶ Ie aiñede riño diga bu ia, ie ai illa isoi, jai dajena jaidiaimaiaai. Ie jira Jusiñamui jiaie llote: "Riño diga iima illa jira, jai dajena jaidiaimaiaai" llote. ¹⁷ Cai Nama Cristomo bu duia, dajena jai jaidiaimaiaai. Jusiñamui Joreño iaimaiaimo illa jira, iaimaiaai comeci daje isoi jai lloide.

¹⁸ Ie jirari naie jearede rafuemona abina rairui. Iesede bu finoia, jearede rafue ie abimo jai finode. Cai manide rafue ie abi diga finode. Jiaie maraiñede rafue bu finoia, naimie abimo jearede rafue finoñede.

¹⁹ Naimiemomo omoi duillanona, Jusiñamui Joreño omoimo illana uiñotomoi. Ie illanodi omoi creyentiaai. Jusiñamui jai jainaiaidomoi. Ie muidona omoi jitaillacinodo jaiñeno. ²⁰ Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

Pablodi iima ie aina ua rafuena ñaite

7 Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiaai mare;

² iadedi jeacino omoi fino raillano, nagamie ie aina otena, jiai mare. Nagañaiño ie inina otena, jiai mare. ³ Naga ini ie ai diga iniacania, naimiemonai naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena. ⁴ Naiñaiño abi dañoñede; iadedi daño ie ini abimo jiai duide. Naimie abi damañede; iadedi dama ie ai abimo jiai duide. ⁵ Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico comeci daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomo ramo fai railano.

⁶ Dane lloiticue. Jeacinona omoi fino raillano, nagamie ie aina otena, mare. Nagañaiño ie inina otena, jiai mare. Iese omoimo lloiticue; iadedi iese ocuñedicue. ⁷ Ainidicue. Cue illa isoi omoi illana jitaidicue; iadedi daje isoiñedica. Jusiñamui caina itataja diese iese itica. Dajerie ainidimaci. Dajerie airedimaci. Dajerie inidimaci. Dajerie iniredimaci.

⁸ Nia ainidinomo lloiticue. Nia inidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare; ⁹ iadedi omoi ocuñeniadedi, ana ono. Jiaie riño diga illemo o comecina facañellena, daje riñona ono, o aina. Jiaie imamo o comecina facañellena, daje imana ono, o inina.

¹⁰ Creyentiaino nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jaie lloite: “Riño ie inina sofeño. ¹¹ Ima ie aina sofeño” lloite. Iese lloite; iadedi nie riño ie inina sofeia, jiaie imana naiñaiño oñena. Imana naiñaiño oiacania, ie ini diga dane abido illasa.

¹² Nia lloiticue. Cai Nama biena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoona dotaño” naimiemo lloño. ¹³ Omoi nairaimona creyentena daiñaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiño lloño. ¹⁴ Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona fñoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona fñoñede. Naie creyente muidona, naie iaimaia uruiaia, jiaie creyente iaimaia uruiaia isoi, omoi roracomo feiño. ¹⁵ Ie inina creyenteñede ai sofeiacania: “Naiñaiñoona dotaño” naimiemo lloño. “Naiñaiño jaillena rairuiño” naimiemo lloño. Ie aina creyenteñede ini sofeiacania: “Naimiema dotaño” naiñaiño lloño. “Naimie jaillena rairuiño” naiñaiño lloño. Sofeia mei, jai dajemo duiñediamai. Jusiñamui naga creyente uri illana jitaide; ¹⁶ iadedi ie ini diga ie ai fiebia, ie ini creyentenamona, naiñaiño nbaie creyentena jaite. Ie ai diga ie ini fiebia, ie ai creyentenamona, naimie nbaie creyentena jaite.

¹⁷ Iena lloticue; iadedi Jusiñamuiomona ie feiñoega uaido nagamie jailla. Creyentiaina omoi jailla facaiseconi, omoi majjuilla ramo nia raise omoi majji. Naga creyentiaino biena llofuecabiticue. ¹⁸ Nia creyentiaina omoi jaiñenia, juduaia isoi omoimona dajerie omoi abiaia detatamoi. Naie detatafuemo omoi comeciaina birui facañeno. Omoimona dajerie omoi abiaia nia detatañedomoi. Iemo omoi comeciaina birui facañeno; ¹⁹ iadedi Jusiñamui uaina omoi inuamo omoi comeciaina birui faca. Jiaie rafue baifemo faite. ²⁰ Creyentiaina omoi jailla facaiseconi, omoi majjuilla ramo nia raise omoi majji. ²¹ Creyentiaina omoi jailla facaise omoimona dajerie patrón anamo itinodomoi. Nia patrón anamo itino isoi omoi jai. Iemo omoi comeciaina jarire facañeno. Jairuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai. ²² Cristona omoi inua facaise, patrón anamo omoimona damierie navui itomoi; iadedi Jusiñamui omoina fetode. Naimiema omoi inuamona, omoi jeacino anamo jai iñedomoi. Patrón anamo omoimona damierie navui iñedomoi; iadedi Jusiñamui omoina fetode. Ie jira naimie anamo jai itomoi. ²³ Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie comiñia jai jaidomoi. Ie jira comiñi jitaillacino anamo iñeno; iadedi Jusiñamui jitaillacino anamo i. ²⁴ Cue amatia, creyentiaina omoi jailla facaiseconi omoi majjuilla ramo nia raise omoi majji. Jusiñamui omoina canuanona, jearede rana omoi majjiñenia, nie isoide rana omoi majjia, Jusiñamuiomona mare.

²⁵ Navui cuemo cartana oredomoi. Faidaiñuaia illa rafuena uiñoiacadomoi. Cai Nama naie rafuena jaie lloñena jira, iena birui lloiticue. Naimie cuena duenailla jira, naimie uaina inoticue. Ie muidona comi inogamedicue. ²⁶ Birui duere omoi sefuilla facaise illa jira, omoi illa isoi omoi i. ²⁷ Omoimona bu airenia, naiñaiñoona dotañena. Bu aia, dama ainide. Riñona oñena; ²⁸ iadedi o aina illena ininide riñona o otiodena, jeacinona fñoñedio. Omoimona o inina illena ainide imana o otiodena, jeacinona fñoñedio; iadedi aina bu ua mei, inina bu ua mei, eo duere majjiite. Iese omoi duere sefuiñellena, omoimo iena lloticue.

²⁹ Cue amatia, biemo omoi comeciaina faca. Jesucristo abido dane billirui iaieite. Naimie jitailla rafuena omoi raise finollena, omoi ainiaimo ite rafuemo omoi comeciaina facaja; iadedi Cristo rafuemo omoi comeciaina eo facaja. ³⁰ Omoimona damierie sunaia, damierie caimare ia, iemo omoi comeciaina eo facañeno. Damierie raruaia iabaia, naieri eo iobiño. ³¹ Omoimona damierie bene ite rana eburitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

³² Omoi comeciaina jarire iñenana jitaidicue. Nia ainidimie abi juarede, dama Cristo rafuena majjillena. Naimiema iobitaicade; ³³ iadedi airedimie bene ite ra-

fuemo ie comecina facade. Ie aina iobitaiacade. Naiñaiño ite rafuemo naimie comecina facade. Cristo rafuemo ie comecina jiaí facade; ³⁴ iadedi mena rafuemo ie comecina eo facallemo abi juanide. Ininidiñaiño abi juarede, daño Cristo rafuena maijillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

³⁵ Aina uana rairuiñedicue. Inina uana jiaí rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaidicue. Dani Cristo rafuemo omoi comeciaina facajana jitaidicue.

³⁶ Ero, omoi mona naiñaiño oiacaga iimamo ie moo, ie jisa caidiñeno fecaca. Naiñaiño jai moonaila jira, naiñaiño jitailla jira, naiñaiño feca. Fecaia, ie moo jeacinona finoñede; ³⁷ iadedi inina naiñaiño oiacañenia, naimie comeci llumona, ie comecina eo facajamona, ie jisa fecaacañenia, jiaí mare. ³⁸ Ie jisana fecaia, mare. Cristo rafuena naiñaiño eo maijillena, ie jisa fecañenia, jiaí mare.

³⁹ Jiaie rafuena lloiticue. Riño ie ini nia fioidañenia, naiñaiño naimiemo jaca duide. Ie ini fioidaille mei, jiaie iimana ie ini ifomo naiñaiño oiacania, mare; iadedi creyentedimiena naiñaiño ua. ⁴⁰ Naie feciñodi iimana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo cai mare iite.

Jusiñamuina eruaide jiraraimo llicisi fecaja rafue

8 Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena jañaiticue. Naie jiraraina naimaci navui sedaja jira, omoi mona damierie naie isoide llicisi riana: "Maraiñede" raitimaci. Creyentiaimona Jusiñamuina eruaide jirarai jamai rana illa jira, damierie naie llicisi riana: "Mare" raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie riia, jiaie creyentiaimo comecina facañede. Jiaie creyentiaina bu isiruia, naimacimo ie comecina facade. Cristo rafuedo jiaie creyentiaí raise jaillana jitaide. ² "Eo abina uiñotícue" ie comecina bu facaia, nia eo raise abina uiñoñede; ³ iadedi Jusiñamuina ua cai isiruillamona, jiaie creyentiaina cai isiruia, jai abina uiñoticaí. Jusiñamui dinena caina jiaí uiñotaacade.

⁴ ¿Niese Jusiñamuina eruaide jiraraimo fecaca llicisina ñaiticaí? "Jusiñamuina eruaide jirarai jaca cajeñenana uiñoticaí" raitomoi. "Jusiñamui jaca dajede. Iena uiñoticaí" raitomoi; ⁵ iadedi "Monamo diga sedalle ra ite" dajerie comini raitimaci. Jitomana sedacabidimaci. Fivuina sedacabidimaci. "Eniruemo diga sedalle ra ite" dajerie comini raitimaci. Taifena sedacabidimaci. Janabana sedacabidimaci. ⁶ Iena sedacabidimaci; iadedi cai dani Jusiñamuina sedacabidicaí. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina

jillotate. Naimiena cai sedallena, Jusiñamui caina finode.

⁷ Jusiñamuina eruaide jirarai jamai rana nana creyentiaí uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: "Naie jirarai sedadicaí" naimaci comeciaina facadimaci. Naie rafue naimaci raise uiñoñena jira: "Jeaicinona finodicaí" raitimaci. ⁸ Ero, nie isoide llicisi cairiamona, llicisi cai riñenamona, Jusiñamui caina feiñoñede. Naimiena cai iñuamona caina feiñote. Buena cai riñenia, buena cai riia, jeacinona finoñedicaí. Naiemona marecinona jiaí finoñedicaí. ⁹ Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi riia, naimiemona jeacinona jai finodomoi. "Jusiñamuina eruaide jiraraina omoi nia sedadomoi" raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaite. ¹⁰ Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoi nia Cristo dibeimo raise iñedimie cioia, nainomo jiaí guisaite, comecina facajano: "Cue ama Jusiñamuina eruaide jiraraina nia sedaja jira, naiena jiaí nia sedaiticue". ¹¹ Omoi ama abido danomo jaia, omoi muidona. Cristo naimie facaina fioidaite; iadedi omoi finoca rafue muidona, omoi ama abido danomo jaite. ¹² Iese omoi finoia, omoi amana jeacinona finotatomoi. Naimie comecina ocuiñotañedomoi. Ie muidona Cristomo jeacinona jiaí finodomoi. ¹³ Cristomo jeacino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

Cristo facaina llorainidi naimaci jitailla rana jamai feiñua

9 Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuenajaie fetua facaise cai Nama Jesúna cioticue. Creyentiaina omoi jailla jira, cai Nama facaina cue maijiana uiñotomoi. ² Jiaie comini Jesucristo oretagamiedicuena nibai uiñoñedimaci; iadedi omoi iena uiñotomoi. Cristona omoi iñua jira, Jesucristo cuena oretajana uiñotomoi.

³ Cue llofuiaicinona bu uaitaia, iese cue llofuiaicinona riidoticue. ⁴ Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa. ⁵ Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiaí macaria, omoi dine Pedro macaria, naimaci jitailla rana naimacimo jamai fecauidomoi. Ie jira, ¿niese cue jitailla rana cuemo jamai fecañeitomoi? ⁶ Jiaie llorainimo naimaci jitailla rana jamai fecacabidomoi; iadedi cue onolli diga cue maijiana nibai nia jitaidomoi. Bernabé ie onolli diga naimie maijiana nibai nia jitaidomoi. ⁷ Ero, soldadodi ie guille ibañede. Iena jamai feiñote.

Naga illimo maijuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoi mo Cristo rafuena llocabiticue. ⁸ Jamai comini uaido naiena llofueñedicue; iadedi Moisés micori cuega-fuiaimona iena fueoticue. ⁹ Naimie micori jaie cuega: "Jusiñamui llote: 'Jurareta trigo oni juillena saisia, iemona ie guillesa, ie fuena maiñeno. Maiñenia, ie maijia fuemona quite' llote". Ie isoide. Omoi motomo cue maijia fuemona cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade. ¹⁰ Cristo rafuena cue llofuecabilla jira, cue llua fuemona cue jitailla rana jamai cue feiñua. Iemo ocuridicue. Ie isoide. Ie illimo bu maijia, naiemona riaru ollena, nainomo maijide. Iemo ocuride. ¹¹ Omoi motomo Cristo rafuedo omoi raise jaillena, navui llofueticue. Ie jira cue jitailla raruia omoi mona jamai cue ua. ¹² Omoi mona raruiaina jaie lloraini feiñocabilla jira, cuemona Cristo rafuena nano omoi cacaja jira, cue jamai jia feiñua; iadedi omoi mona raruiaina jicañedicue.

Cue jitailla raruia cue ollena, cue onolli diga duere maijidicue. Ie jira nana cue jitailla raruiaina oñedicue. Cristo rafuena omoi cacaiacaiñeni raillano, omoi mona raruiaina jicañedicue. Raruiaina cue jicaia, omoi comecina nibaí facaitomoi: "Raruia oicananano Cristo rafuena naimie llocana uite". Ie mei Cristo rafuena cacaiacaiñetomoi. Ie jira omoi mona raruiaina jicañedicue. ¹³ Ero, Jerusalémo judúai comini Jusiñamuina sedauilla jofu ite. Nainomo naie comini toiniaina atiuidimaci, Jusiñamuimo fecallena. Moisés micori jaie llua isoi, naimaci jeacino facaina toiniaina fajanona fecadimaci. Nainomo maijuidino comini atica toiniaina naimaci rillena, ibajanona ocabitimaci. Iena uifnotomoi. ¹⁴ Ie isoide. Cristo rafuena llorainidi naimaci rafuena innotinomona naimaci jitailla rana imaci ua. Cristo iena jai llote. ¹⁵ Omoi mona raruiaina jaca jicañedicue. Raruia birui cue ollena, bie cartana jiaí cueñedicue. Dama cuemo ite ra diga iiticue. Omoi mona iena feiñoticuedena, meiruioicaida feiñoticue. Omoi mona cue feiñoñena jira, omoi facaina Cristo rafue cue llua mona, abina iedoticue. Raruia cuemo jamai omoi fecaia, ¿niese abina iedoiticue?

¹⁶ Jiaie lloraini rana feiñua isoi cue feiñoia, Cristo rafuena cue llua mona abina iedoñeiticue. Jusiñamui cuena oretaja jira, naie rafuena lloticue. Iena cue lloñenia, Jusiñamui cuena duere finoite. ¹⁷ Dama cue comeci jitaillamona Cristo rafuena cue lloiacania, Jusiñamui mona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue. ¹⁸ Ie jira, ¿niese ibana feiñoiticue? Ibana nibaí feiñoiticue; iadedi omoi mo Cristo rafue cue lloia, cuemona mare. Omoi mona cue jitailla rana cue oñenia, cuemona mare.

¹⁹ Omoi mona raruiaina cue feiñoñena jira, omoi anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena,

Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ail-luena cominina Cristo dibeimo cue itatallena. Iese jaiñedicuedena, eo janore comini Cristo dibeimo nibaí jai itataticue. ²⁰ Judúai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo dibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue. ²¹ Judúaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiaí jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiaí jaidicue. Cristo lloga uaido jiaí jaidicue. Naimacina Cristo dibeimo itataiacadicue. ²² Naimaci diga cue nabairillena, Cristo rafuena nia raise inoñedino diga cue ia: "Omoi baifemo Cristo rafuena uifnoticue" raiñedicue. Naimacina iciaicaiñedicue, naimacimo jeacinona cue finoi raillano. Naimacina cue isiruillamona, naimacina canoacadicue. Naimacina Cristo rafuena raise inuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: "Cue muidona damierie Cristona nibaí inoitimaci". ²³ Cristo rafuena ail-luena comini inollena, iese jaidicue. Iena llocana jaidicue. Naimaci inua jira, iobidicue.

²⁴ Ero, daní caí jitaillacinodo caí jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, raire uicodo ridimie rana ote. Ail-luena comini aisidimacimona, damie naie rana ote. Ie isoide. Cristo rafuena inocana mai caí jailli, ico Jusiñamui illanomo monamo ibana nana caí feiñollena.

²⁵ Naga aisidimie riire aisillena, ie abina mairitallena, ie abina eenote. Mairillena, ie abina nagarui jiaí facatabite. Ibana feiñollena, iese finode. Ibana bu oia, dal-lu iobide. Ero, jeacinona caí finoi raillano, caí abiaina caí eenua. Naimie jitailla isoi caí illena, Cristo rafuemo jiaí caí facacabilla. Monamo caí rillanona, ibana caí feiñollemo, jaca iobiticaí. ²⁶ Riire aisiacadimie ebena aisifede. Onolli diga mena iaiaiaí jamai jifanoia, jafaicina jamai ducoifñediamiaiaí; iadedi conimana ducoidiaiaiaiaí. Ie isoide. Cristo rafuedo raise cue jaia-cania, jamai ebena jaiñedicue; iadedi nana cue comecimona iedo jaidicue. ²⁷ Cue comecina raise sedadicue. Dama Cristo rafue anamo iacadicue. Dama iena inoia-cadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

Jiraraina sedañena rafue

10 Cue amatiaí, bie rafuena feitañeno. Caí jaiagai micoriaí finoca rafuemonu fueoiticaí. Egipto rail-la enruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jai-

cania, Jusiñamuidi naie monaillai oni ñaijitate, safefodo nana naimaci ruica jaillena. ² Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci. ³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci. ⁴ Nainomo jinui jiaí iñena jira, Jusiñamui llua jira, Moisés micori noficina butajamona, toide jinuína nana jirodimaci. Naimaci nine macaria, Cristona cioiñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; ⁵ iadedi Jusiñamuina naimaci ñnoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fioidaitade.

⁶ Cai jaiagai finoca rafuemona cai fueua. Maraiñede jearede rafuena naimaci finua isoi ebiruiñeno. Abimo omoi oñeno. ⁷ Jusiñamuiñedimiena sedañeno. Cai jaiagaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oñeno. Jusiñamuiñedimiena omoi sedañeno. ⁸ Naimaci jearede rafuena finodimaci. Naimacimona damierie naimaci aiñede riñoniai diga itimaci. Ie jira naimacimona daruidemo veintitrés mil comini fioidaitimaci. Jusiñamui naimacina fioidaitade. Naimaci finoca rafue isoi abimo cai oñeno. ⁹ Cai jaiagaimona damierie Jusiñamui Joreñona ñaitimaci. Naimaci guisoiga radi Jusiñamuimona bite. Naiena ñiamona, Egiptomo ite guillemo comeciaina facadimaci. Ie muidona naimiena riicaitadimaci. Ie jira Jusiñamuidi jaioniaina naimacina ainitate. Iemona ailluena fioidaitimaci. Naimaci finoca rafue isoi abimo cai oñeno. Jusiñamuina riicaitañeno. Cristona cai nia ñnoñena facai finoca rafuemo cai comeciaina facañeno. ¹⁰ Cai jaiagaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oñeno. Jusiñamui facaina lloraini joreñuaina cai ñaiñeno.

¹¹ Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona. ¹² Naie isoide rafue omoimo suiñellena, omoi abiaina rairui. Omoi comeciaina nibaí facadomoí: “Cristona cai eo raise ñnua jira, iena finoñeiticai” comeciaina facadomoí; iadedi omoi abiaina omoi rairuiñenia, jeacinona finoitomoí. ¹³ Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitañeno. Jusiñamuidi ñnogamie. Ie muidona omoi comeciái ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi ñnoñellena, Jusiñamuidi omoína canoite.

¹⁴ Cue amatiaí, Jusiñamui omoína canuamona, Jusiñamuiñedimie facaina finoca rafuemona oni i.

¹⁵ Abina uiñotomoí. Ie jira omoimo cue lluacinona

omoi cacaja mei, iemo omoi comeciaina omoi faca.

¹⁶ Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruanona, janore llomeniconona guiticai. Jusiñamuimo iobillacinona nano fecadicai. Ie mei janore vino jirodicai. Iena cai jiruamona, Cristona cai nabaillana uiñotocai. Cruzmo Cristo fiodailla jira, naimiena nabaidicai. Naie facaise llomeniconona cai tairuñuamona, naimiena cai nabaillana uiñotocai. Cristo fiodailla jira, iese iticai. ¹⁷ Diga creyentiaidicai; iadedi daje llomenicomona jaca guiticai. Daje llomenicomona cai guilla jira, dajena Cristomo cai duillana uiñotocai.

¹⁸ Ero, judíuai railla cominimona cai fueua. Naimaci jeacino facaina iba oñellena, toñiaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. ¹⁹ Omoi illanomo Jusiñamuina ñnoñedinodi Jusiñamuina eruaide jiraraimo guillena fecacabidimaci. Cai creyentiaidicaimona naie guilledí jamaí guille. Naie jiraraidí jamaí ra. Cajefede; ²⁰ iadedi Jusiñamuina ñnoñedinomona jamaí rañede. Naimacimona nanoca ra. “Temo rille cai fecajia, cai moona sedadicaí” raitimaci; iadedi naie ramo naimaci comeciaina facañedimaci; iadedi imaci moomo comecina facadimaci. Ero, Jusiñamuiñedimie mo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoí. Taife diga omoi nabairillana jitañedícue. Taifemo omoi duillana jitañedícue. ²¹ Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoí. Comini rafue dine omoi jaillamona, Taifena nabaidomoí. Cristo diga, Taife diga, daje facaina nabairinidomoí. Iese omoi finoia, maraiñede. ²² Iese omoi finoia, Jusiñamuina jai iciritaitomoí. Naimiena omoi icia, ¿niese naimie riicaillafuemona jilloitomoí? Jaca jilloñeitomoí.

Jiaie creyentiaina canocana cai jailla

²³ Ero, Jusiñamui dibeimo omoi illa jira, ¿niese dani omoi jitaillacinodo jaiacadomoí? Diga Jusiñamui rairuiñega rafue ite. Creyentiaí iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo dibeimo itatañedicai. Iena cai finoia, cai amana Cristo rafuena ñnotacana jaiñeiticai. Naimiena ramo faicana uitataticai. ²⁴ Omoimona nagamie dama naimie mo ite rafuemo comecina facañena; iadedi naga jiaie creyentemo ite rafuemo ie comecina jiaí facaja.

²⁵ Ero, ninena o llicisina omoi ibaia, Jusiñamuiñedimie mo naie llicisina fecajana jicanoñeno; iadedi jicanoñeno iena jaricitañeno rino. ²⁶ Iena David micori jaie cuela: “Jusiñamui bie eníruena finode. Nana rana finode. Cai guillena, cai guille rana nana comuitaga” cuela. Ie jira ¿niese fimaiticai? Naimie mare finoca rana cai riia, jeacinona finoñedicai.

²⁷ Ero, naimie diga o guillena Cristona ñnoñedimiedi ona uaidoia, naimie ðine o jaiacania, naimie ðine guisai. Nana omo ecaja guillena guiño. Jamai uainino guiño. “¿Ninena ñbadio bie llicisina?” jicanoñeno. O começi jarire finoñeno; ²⁸ iadedi Cristona raise ñnoñedimie nainomo jiai guitemo, omo lloia: “Bie llicisidi Jusiñamuiñedimie mo jai fecaca llicisi”, iena o riñeno. Iena o riia, Cristona raise ñnoñedimie começina facaite: “Jeacinona finodio. Taifemo fecaca llicisina ritio. Creyentedimie iena riñede” começina facaite. O isoi naie llicisimo naimie começina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno. ²⁹ Naimie começina facajacino do cai jaiñenamona, nana Jusiñamui comuitaga guillena guiredica; iadedi Cristona nia raise ñnoñedimie mona nana guinidica; iadedi naimie começina facajacino do jaiñedica. ³⁰ Cai guia, Jusiñamui mona naie guille comuitaja jira, Jusiñamui mo iobilacino na fecadica; iadedi cai guillamona damierie cai joreño na ñaiamona, iena guineitica. ³¹ Omoimo iena nia lloiticue. Nie isoide rana omoï guia, nie isoide rana omoï riia, nie isoide rana omoï jiroia, nie isoide rafuena omoï finoia, naieri Jusiñamuina iobita. ³² Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotino na jiai canocabi, naimaci abido danomo uaiñellena. ³³ Buena cue finoia, nana cominimo cue começina facadicue. Ie jira nagarui cue jitaillacino do jaiñedicue; iadedi Cristo rafuena naimaci ñnollena, nana cominina canocana jaidicue.

11 Cristo lloga rafuedo jai jaidicue. Cue isoi omoï jai.

Roracomo riñoñiaï illa rafue

² Cuen a nia feitañedomoï. Cristo oretagano jaiie llogacino na omoïna llofueticue. Cue llofueillacino do nia jaidomoï. Ie jira omoïri iobidicue; ³ iadedi jiaie rafuena nia lloiacadicue. Cristo ie Moo anamo ite. Naga ñima Cristo anamo jiai ite. Nagamie ai ie ñni anamo ite. Omoï afemo itino uaina omoï ñnoñenia, maraiñede. ⁴ Roracomo omoï cominï oficabia, ie ñni anamo ie ai illa jira, omoï cominï finocabilla isoi, naga riño ie ifogimo ñiroina bicuano jailla. Iese naiñaiño bicoñenia, ie ñni anamo naiñaiño iñede isoi eruaide. Jusiñamui diga nie ñima ñiaï, Jusiñamui uaina nie ñima jino lloia, naimie ie ifogi icona jitaño, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide. ⁵ Nie riño Jusiñamui diga ñiaï, Jusiñamui uaina nie riño jino lloia, ie ifogimo ñiroina bicoñeno jaia, ñima isoi naiñaiño iacana jira, ie ñni afemo illana eruaide. Ie ñni anamo iacaiñena jira, ie ñino meidaitade. ⁶ Nie riño ie ifogimo ñiroi bicoñeno jaiacania, ñima isoi eruaillena, ie ifogidi rijiruda gareca. Iemona naiñaiño meidaillamona, ie ñni anamo illamona, ie ifogimo ñiroina bicuano naiñaiño jaita. ⁷ Jusiñamui diga naimie ñiaï, Jusiñamui anamo naimie illa jira, ñima ie ifogi icona jitañena. Jusiñamui naga ñimana comuitate. ñimana

naimie finuamona, naimiena cai iobitajamona, Jusiñamui cai afemo illana uifotica. Ie ñina iobitajamona, naiñaiño afemo ie ñni illa jira, riño ie ifogimo ñiroina bicuano jailla. ⁸ Ero, Eva micorimona Adán micorï comuiñede; iadedi ie ñni micorimona ie ciraiofemona naiñaiño micorï comuide. ⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai ñnollena, naimiena canollena, naiñaiño comuide. ¹⁰ Ie ñni anamo naiñaiño illa jira, riño ie ifogimo ñiroina bicuano jailla. Naiñaiño iese ia, naiñaiño na naimaci cuanona, Jusiñamui jaienisaimona jiai mare. ¹¹ Naga riño ie ñni anamo ite; iadedi Cristona cai ñnua jira, riño baiñemo ñimadi faiñede. ñima baiñemo riño jiai faiñede; iadedi daiñiaï conimana iañiaï canua. Cristo naga ñimana, naga riño na daje isoi feiñote. ¹² Naga cominï Jusiñamui comuitaga. Nano facaiseconi Adán micorimona Eva micorina jaiie comuitate; iadedi birui naga ñima riño mona comuide.

¹³ Biemo omoï começina omoï faca: Omoï roracomo Jusiñamui diga nie riño ñiaï, omoï einamaci finocabilla isoi, ie ifogina bicoñeno jaia, ñiese omoï começiaidi raite? Cue começi: “Maraiñede” raite. Ie ñni anamo naiñaiño iñedena eruaide. ¹⁴ Nana omoï biesedena raicabito moï: “Nie ñima ie ifotiraï eo areniadedi, cai cominimona maraiñeno ciode; ¹⁵ iadedi nie riño ifotie eo arenia, mare” raicabito moï. Naiñaiñuaï ieri iobidimaci. Jusiñamui iena scotajamona, naiñaiño ifotie ie ifogina raise ñbaide. ¹⁶ Iena jaca llofuecabiticue. Jiaie creyentiaï illanomo cue isoi começina lloidimaci. Omoïmona bu cue llogacino na uaitaiacania, damamei ite.

Cristo fiodailla rafuena raise começiñedimaci

¹⁷ Jiaie rafuena lloiticue. Omoï maraiñede finocabilla rafuena jai fididicue. Cristona sedallena omoï oficabia, Cristo rafuena ñnocana jaiñedomoï; iadedi naiemona maraiñede rafue comuide. ¹⁸ Rollena omoï oficabia, omoï começina daje isoi lloñenana jai fididicue. ¿Bue ñellena omoï começina daje isoi lloiacaiñedomoï? Naie rafuena omoï diga ja ñiacadicue. Omoï oficabia, nagamiai guillena aticabidomoï. Mare; iadedi danomo guñedomoï. Omoïmona damierie ucuberena jira, dueredino diga guiacaiñedomoï. Omoï guille caididomoï. ¹⁹ Omoï iese illana jitañedicue; iadedi daje isoi omoï começina lloñenamona, Jusiñamui ðibeimo raise itinodi uifoga. Omoïmona damierie danomo omoï guillamona, Jusiñamuina omoï isiruillana uifotica. ²⁰ Cristona sedallena omoï oficabia, guitomoï; iadedi vino jiruanona, llomenicono guillanona, cai Nama fiodailla rafuena raise começiñedomoï. Maraiñede rafuena omoï finua jira, iena nia lloiticue. ²¹ Nagamiai guillena aticabidomoï. Dani cominïri raise guñedomoï. Danie omoï atica guillena guitomoï. Jiaïnona guillena iñedomoï. Damierie omoïmo ailluena guille ite. Damierie omoïmo guille raise iñede. Jiaïnona guillena omoï iñena jira, damierie jaca aimetaitimaci; iadedi jiaïno monidimaci. Damierie guilla motomo jiai jifaidi-

maci. Conini nabaiñedomoi. Ie jirari Cristo fiodailla rafuena raise comečinidomoi. ²² Ero, omoi jofue ite, jamaí guillena. Omoi oficabia, ¿bue ñe guillaredomoi? ¿Bue ñe jiaínomo guille feacaaiñedomoi? Jiaie creyentaina omoi isiruiñenamona, Jusiñamuina jiaí isiruiñedomoi. Janore guille itinona duere finodomoi, naimacina omoi eacaaiñena jira. Iese omoi illa jira, omoi iobiñedicue.

Cristo fiodailla rafuena llofuicacino

²³ Navui omoína buena llofueticue; iadedi omoi raise ñnoñena jira, iena dane llofueticue. Cai Nama iena cuemo jaie lloste. Cai Nama Jesús ie gaitatajarui facaiseconi, ie llofueoicaigano diga ia, naimaci guia, llomeniconona llinote. ²⁴ Iena llinuanona, Jusiñamuimo iobillacinona fecade. Ie mei iena tairuanona raite: “Mai, buena guiño. Bie llomenicodi omoi guillamona, cue fiodaillana omoi começi. Cue fiodaillamona omoi jeacinomona jilloitomoi. Buena omoi guillamona cuena começi. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci. ²⁵ Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie começina facade: “Adán micori facaisezona cominina imaci jeacino facaina Jusiñamui duere finoñellena, toiniaina atiuidimaci, naimiemo fecallena”. Iemo ie começina facajano, raite: “Cue fiodaillamona, dama cue diaillamona, Jusiñamuidi omoi jiaie rafuena birui lloste. Omoi jeacinona oni dotajana lloste. Bie vinodi naie rafue facai ie. Cue llua isoi, bie vinona omoi jiruamona, cuena começi. Mai, iena jiro” raite. Ie mei jirodimaci. ²⁶ Naga icaiño Cristo facaina llomeniconona omoi guia, Cristo facaina vinona omoi jiroia, omoi jeacino facaina cai Nama fiodaillana uiñotomoi. Naimie nia abido dane bille ñinori naiena começi.

Cristo fiodailla rafuena raise começiacadicaí

²⁷ Cristo fiodailla rafuena raise começi. Naie llomeniconona Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie ñnoñena jira, Cristomo jeacinona finode. ²⁸ Jeacino omoi começaimo illamo omoi começaina faca. Jeacino omoi começaimo ia, iena guiño. Iena jiroño. Jeacino omoi começaimo iñena, iena guiño. Iena jiro. Jeacino ia, Jusiñamuimo iena llono. Jiaimie diga ñicino ia, iena raise fino. Ie mei iena guiño. Iena jiro. ²⁹ Jeacino naimie começimo nia illamona, iena guia, iena jiroia, maraiñede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiema duere finoite. ³⁰ Ie muidona omoi mona ailluena irareside. Ie jira omoi mona damierie fiodaite. ³¹ Cai começaina raise cai facajamona, jeacinona cai fainonocaia, Jusiñamui caina duere finoite. ³² Jusiñamui caina birui duere finoa, caina naimie ñibeimo raise illena itataiacade. Jesucristo abido bia, naimiema ñnoñedinona

duere finoite. Naimaci diga cai duere sefuiñellena, birui caina duere finode.

³³ Cue amatiaí, Cristo fiodailla rafuena omoi começilena omoi ofia, daacaiño omoi guillesa, jiaíno riñedinona seda. ³⁴ Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñena, Jusiñamui omoi na duere finoí railano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

Cristo facaina raise maijillena, Jusiñamui Joreño naga creyentena canode

12 Cue amatiaí, jiaie rafuena cuemo jai jicanotomoi. Iena ja ñaiticue. Jusiñamuimona diga uaina feiñoticaí. Naimiemona naimie facaina maijia uaina feiñoticaí. Naimie facaina cai maijillena, jiaie creyentaina cai canollena, naimiemona cai oga uaina ñaiticue. Iena omoi raise uiñuana jitaicue.

² Ero, Cristona nia omoi ñnoñena, Jusiñamuiñedimiede jiraraina sedaudomoi. Iedo jaie tainodo jai-jaisoidomoi. Taife iedo omoína jifute. ³ Ie jira biena omoi raise uiñuana jitaicue. Jusiñamui Joreño uaido ñie creyente ñaia, Jesús Joreñoña jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido ñie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiño.

⁴ Jusiñamui Joreño caimo jai illa jira, Jusiñamui Joreñomona cai maijia uaina oticaí. Naga creyente daje isoi oñedicaí. ⁵ Naga creyente Cristo facaina daje isoide uai diga maijñedicaí; iadedi Cristo facaina nana maijidicaí. ⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena. ⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticaí. ⁸ Damierie creyentemo Cristo rafue jino llole uaina itatate. Damierie creyentemo Cristo rafue llofuelle uaina itatate. ⁹ Damierie creyentemo Jusiñamui siño rafue finuana ñnotaja uaina itatate. Damierie creyentemo duidinona jillotaja uaina itatate. ¹⁰ Damierie creyentemo siño rafuena finua uaina itatate. Damierie creyentemo jino llole uaina itatate. Naimacimo Jusiñamuidi ie rafuena llocabite, jiaínomo jino llole. Dajerie creyentemo uaina itatate, ñie isoide uaido Cristo rafuena railla lloraíma llua uiñollena. Jusiñamui Joreño uaido ñie lloraíma lloia, iena uiñote. Taife uaido ñie lloraíma lloia, iena jiaí uiñote. Damierie creyentemo naimaci uiñoñega uaido ñaia uaina itatate. Damierie creyentemo naie uiñoñega uai oni dobaiñolle uaina itatate, comini iena raise uiñollena. Iena naimaci nia dobaiñoñena, iena jiaí raise uiñoñedimaci. ¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicai

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai. ¹³ Dama Jusiñamui Joreñodi dajena Cristomo nana creyentiaidicai duidicai. Dajerie judúaidicai; dajerie judúaiñedicai; dajerie patrón anamo iticai; dajerie patrón anamo iñedicai. Diga nairaiaidicai; iadedi dajena Jusiñamui Joreñona nana feñotical.

¹⁴ Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai. ¹⁵ Ero, cai abimona cai eilli nibai facaite: "Onolli isoñedicue. Onolli cue baifemo faite. Bie abimo duiñedicue" facaite. Iese facaia, jaca iese iñede. Cai abimo jaca duide. Onolli eilli baifemo faiñede. Dafaconi ite. ¹⁶ Ero, cai jefo nibai facaite: "Uisi isoñedicue. Uisi cue baifemo faite. Bie abimo duiñedicue" facaite. Iese facaia, jaca iese iñede. Cai abimo jaca duide. Uisi jefo baifemo faiñede. Ie isoide. Dajena Cristomo omoi duilla jira: "Jiaimie baifemo iticue" raifeno. Jiaie creyentena abina uradoiñeno.

¹⁷ Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticai? ¿Niese nadedi ra sorillana cacadical? Ie isoide. Dajena Cristomo omoi duilla jira, naga creyentena jitaedomoi, Cristomo dajena ñnocana omoi jaillena. Jiaie creyentena uaitaño. ¹⁸ Jusiñamui cai abimo diga rana comuitate. Naimie jitailla isoi, cai abimo naga rana comuitate.

¹⁹ Cai abimo diga ra iñedena, ¿buedo cajenitica? ²⁰ Diga ra cai abimo ite; iadedi jaca dajede cai abi.

²¹ Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comei ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena ñnocana jaillana jitaidicai. Jiaie creyentemona abina iedoño. ²² Naga cai abimo ite rana jitaidicai, raise cai illena. Naga cai abimo ite ra jiaie ra baifemo iñede. Nana daje isoi itena, mare; ²³ iadedi dajerie ra ebire eruallena, cai abi jifollena, ñiroina jitaidicai. Meiruiñellena, cai abi bainillena, ñiroina jia jitaidicai. ²⁴ Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiaie ra baifemo iñede. ²⁵ Jusiñamuidi naga cai abimo ite ra dajena maijiana itatate. Dajena maijicana jaide. ²⁶ Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai. Jiaie creyente duere sefua, naimiena cai canoia, Cristo dibeimo caimare marena iticai. Naimiena cai canoñena, caimare marena iñedicai.

²⁷ Ero, caidi naimie cominina jira, Cristomo dajena nagasaia duidicai. ²⁸ Ie jira Jusiñamuidi naimiena ñnotinomona damieriena nano fetuanona, Cristo naimacina oretate, ie rafuena llollena. Ie mei jiaionona fetode, naimacimo ie rafuena llua mei, jiaionomo ie ra-

fuena jino llollena. Jiaionona fetode, ie rafuena llofuel-lena, cominina ie rafuena raise uiñotallena. Jiaio ie uaina itatate, naimie facaina naimaci maijillena, jiaie creyentiaina naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena. ²⁹ Ero, Jusiñamui nana omoina fetofede, ie rafuena jino llollena. Damieriena fetode. Nana omoina fetofede, ie rafuena llofuel-lena. Damieriena fetode. Nana omoina fetofede, siño rafuena finollena. Damieriena fetode. ³⁰ Nana omoina fetofede, duidinona jilloitallena. Damieriena fetode. Nana omoina fetofede, omoi uiñoñega uaido ñaillena. Damieriena fetode. Nana omoina fetofede, naie uiñoñega uai jino dobañollena. Damieriena fetode. ³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoimo illena, Jusiñamuimo jica; iadedi jiaie rafuena omoi ol-lena, omoimo lloiticue. Nana jiaie rafue baifemo ite. Jiaie cominina omoi isiruillena lloiticue.

Nana jiaie cominina cai isiruillafue

13 Cai uiñoñega uaido ñaia uaina cai ñaia, Jusiñamui jaienisa isoi cai ñaia, cominina cai isiruiñenia, jamai ñaiafuena ñaiticai. ² Jusiñamui rafue jino llole uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo ñnoia, cominina cai isiruiñenia, Jusiñamuimona jamai bue isoidicai. ³ Jiaie cominina cai canollena nana caimo ite rana cai fecaia, Cristo rafuena cai llollena cai niadi fio-daiania, cominina cai isiruiñenia, jaca buena oñedicai. Jusiñamuina jaca iobitañedicai.

⁴ Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoiñedicai. Abina birioicaiñedicai. ⁵ Cominina cai isiruia, abina iedoñedicai. Naimacimo cai comeiaina facacabidicai. Cai rana caidicabiñedicai. Naimaci diga iciricabiñedicai. Naimaci caina jeare finoia, ibana ocabiñedicai.

⁶ Cominina cai isiruia, naimaci jeare finoca rari iobicabiñedicai. Naimaci uanai mare finoca rari iobicabidicai. ⁷ Cominina cai isiruia, naimaci caina duere finoia, ibana ocabiñedicai. Cai joreñona bu ñaia, caina taino lloia, iena ñnocabiñedicai. Cai marena illamo ocuridicai. Cai comeiaina ocuiñocana jaidicai.

⁸ Jusiñamuidi cominina jaca cai isiruillana jitaide; iadedi caimo ie rafuena jino llole uaina jaca itatañeite.

Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite.

⁹ Nana Jusiñamui caina uiñotagacinona nia raise caicaiñedicai. Nana Jusiñamui rafuena nia raise jino lloñedicai; ¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai

illemona naimiena raise uifñoticaí. Naimiemo ite rafue-na jiaí raise uifñoticaí.

¹¹ Jiaíe rafuedo iena llofueticaí. Jaie nia cue uruenia, urue isoi ñaiticaí. Urue isoi comecina facadicaí; iadedi eimiena cue jaillamona, urue isoi jaiñedicaí. Cue uruenamona ite rafuena fainonocaidicaí. Eimie comecina facajacinodo birui jaidicaí. Urue isoi Jusiñamui rafue-na birui janore uifñoticaí; iadedi monamo caí ia, eimie isoi iena raise uifñoticaí. ¹² Ero, jacaíe acaranimona caí joreñodi raise bainide. Ie isoide. Jusiñamuimo ite rafuena nia raise uifñoticaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicaí; iadedi naimie dine cue ria, Jusiñamui cuena jai uifñua isoi, jiaí raise uifñoticaí. ¹³ Ja muidomo lloiticaí. Jesucristo billanona, Jusiñamui Joreñomona caímo ite uaidi saite; iadedi Jusiñamui llogacinodo jai abina ñnoticaí. Naimie llogacino suillemo jai ocuridicaí. Jusiñamuina caí isiruillamona, jiaíe cominina jiaí isiruíticaí. Naie isiruillacino jiaicino baífemo faíte. Ie jira coninina isiruicana omoi jai.

Omoi uifñoticaí uaido omoi ñaia rafue

14 Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido. ² Ero, omoi uifñoticaí uaido ñaia uaina omoi ñaicabia, jaca buna omoiñna cacaiñena jira, cominina canollena ñañedomoí; iadedi Jusiñamuina iobitallena ñaitomoí. Omoi uifñoticaí rafuena omoi comeciainona ñaitomoí. ³ Jusiñamui rafuena jino omoi lloia, cominina canodomoí. Naimacina Jusiñamuina ñnotadomoí. Naimie díbeimo raise itatadomoí. Naimaci comeciaina ocuifñotadomoí. ⁴ Nana creyentiaína canodomoí; iadedi naie uifñoticaí uaido omoi ñaia, daní omoi comeciaina canodomoí.

⁵ Rollena omoi oficabia, naie uifñoticaí uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uifñoticaí uai baífemo faíte. Naie uifñoticaí uaido omoi ñaia, nana creyentiaí iena raise cacareillena, iena omoi oni dobaiñoia, cuemona jiaí mare. Ie mei naie ñaiamona, Jusiñamui rafuena naimaci cacajamona, creyentiaína canodomoí. ⁶ Cue amatiaí omoi dine cue jaiacanana uifñotomoí. Omoi dine cue ria, cue uifñoticaí uaido cue ñaiticuedena, omoiñna canoñedicaí; iadedi Jusiñamui cuemo jai lloga rafuena omoiñna cue lloticuedena, omoiñna canodicaí. Jusiñamui rafuena raise cue jai uifñua jira, omoiñna cue llofueticuedena, omoiñna jiaí canodicaí.

⁷ Ero, quena jamai tainuaido bu fia, ie figana uifñoticaí. Guitarra bu jamai tainuaido taia, ie tailana uifñoticaí. ⁸ Ejércitomo trompetana jamai tainuaido fia, soldaduái maijillena raise uifñoticaí. ⁹ Ie isoide. Caí cacaiñena uaido omoi ñaia, omoi ñaiana uifñoticaí. Iese omoi ñaia, jamai tainona ñaite isoi cacadicaí. ¹⁰ Eo ailluena nairaí ite. Naga nairaí ie uai ite daní naimaci ñaillena; ¹¹ iadedi nie nairaí ie uaina cue uifñoticaí, naimacimona jiaíe nairaí imiena eru-

aídicaí. Cuemona naimaci jiaíe nairaína eruaidimaci. Conini diga ñaiana cacaiñedicaí. ¹² Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, daní conini Cristo rafuena ñnocana omoi jaillena. Jusiñamui Joreñomona daní daje uaina nicidoñeno; iadedi nana nicido.

¹³ Ie jira ie uifñoticaí uaido bu ñaia, ie oni dobaiñoia uaina naimiemo illena, jiaíe creyentiaí iena cacaillena, Jusiñamuimo jicaja. ¹⁴ Jusiñamui diga cue uifñoticaí uaido cue ñaia, Jusiñamui Joreño cuena ñaitatate; iadedi iena cacaiñedicaí. Iena uifñoticaí. ¹⁵ Ie jira, ¿ñiese cue nibaille? Jusiñamui diga cue ñaia, cue uifñoticaí uaido ñaiticaí; iadedi comini cue ñaiana raise uifñoticaí, Jusiñamui diga jamai cue uaido jiaí ñaiticaí. Jusiñamuimo cue roia, cue uifñoticaí uaido roiticaí; iadedi comini cue ruana raise uifñoticaí, Jusiñamuimo jamai cue uaido jiaí roiticaí. ¹⁶ Iobillacinona Jusiñamuimo omoi fecajano, omoi uifñoticaí uaido omoi ñaiana, ¿ñiese omoiñna cacaiñedino: “Jee” raitimaci? ¹⁷ Iobillacinona Jusiñamuimo raise fecadomoí; iadedi omoiñna cacaiñedino Jusiñamuina uifñoticaí. Ie jira omoi uifñoticaí ñaia uaina oni dobaiñotimie omoi roracomo iñenia, naie uaido ñañeno. ¹⁸ Cue uifñoticaí uaido cue ñaicabilla jira, Jusiñamuimo iobillacinona fecadicaí. Omoi baífemo naie uaido cue ñaiana uifñoticaí; ¹⁹ iadedi roracomo cue ia, cominina raise cue llofueñena, janore cue ñaiadi, mare; iadedi eo are cue uifñoticaí uaido cue ñaia, cominina Jusiñamui rafuena cue llofueñena, cuemona marañede.

²⁰ Cue amatiaí, omoi uifñoticaí ñaia uaido daní jai jaidomoí; iadedi jiaíe Jusiñamui Joreño itataja uaimo omoi comeciaina facañedomoí. Omoi abina jai uifñuamona, jiaíe uaimo omoi comeciaina faca. ²¹ Jusiñamui facaina lloraima micori jaie cuela: “Jusiñamui llote: ‘Cue comini dine jiaíe nairaína cue oretajamona, cue cominina cuena ñnotallena, naie jiaíe nairaí uaido cue cominimo lloiticaí; iadedi iena jitaíñeitimaci. Cuena jaca uifñoticaí llote’”. ²² Ie isoide. Uifñoticaí uaido omoi ñaiamona, Cristona ñnotedino iena raise cacaiñedimaci; iadedi Cristona ñnotino iena cacadimaci. Iemona fueotimaci. Jusiñamui rafuena omoi llofuiamona, Cristona ñnotedino iena cacajamona, Cristona ñnotedimaci; iadedi Cristona ñnotinona canodomoí. ²³ Danomo nana omoi ofia, omoi uifñoticaí uaido nana omoi ñaia, Cristona ñnotedino iena cacajanona, omoiñna; “Uairico” raitimaci; ²⁴ iadedi omoi ofia, Jusiñamui rafuena omoi jino lloia, iena Cristona ñnotedimie cacajamona, naimiedi jeacino naimie comecimo illana uifñote. Naie rafue naimiemo riire baite. ²⁵ Naimie comecimo ite jearede rafue naimie uifñuamona, Jusiñamuimo ie jeacina lluanona, Jusiñamuina ñnoite. Ie muidona raite: “Uanai, Jusiñamui omoi motomo ite”.

Roracomo omoi ia, raise marena omoi i

²⁶ Cue amatiaí, rollena omoi oficabia, ¿ñiese omoi nibaille? Iena ja ñaiticaí. Omoi ofia, omoiñna damierie nibai roite. Jiaimie Cristo rafuena llofueite.

Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo ðibeimo creyentiaina raise itatallena, nana omoi ñnuva rafuena raise ñno.

²⁷ Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite. ²⁸ Naie ñaiana oni dobaiñotimie iñenia, naie uiñoñega uaido ñaitimie roracomo ñaifena; iadedi naimie ñaiacania, Jusiñamuimo dama ie jofomo ñaia. ²⁹ Jusiñamuimona ite rafuena bu jino lloiacania, damie amani iena lloite.

Damierie lloite. Jiaino llorainidi Jusiñamuimona naie llucino billana uiñuanona llua. ³⁰ Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raie lliicailla. Iemei jiaimie lloite. ³¹ Iese damierie nana llotomoi, naie llua-mona Jusiñamui rafuena raise omoi uiñollena, omoi comeciai jiai ocuiñollena. ³² Naga llotimiedi ie uiñua diese lluaana uiñote. Ie jira jiaimie nia lloia, iena cacarei. Iemei jiaimie llua. ³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

³⁴ Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jaie llua isoi, naiñaiñuai in anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, marañede, nainomo ite jino lloraima uaina naiñaiñuai raise cacaiñena jira.

³⁶ ¿Niese cue llucinodo jaiacaiñedomoi? Jusiñamui rafue omoimona comuiñede. Dani omoimo naie rafue ðuiñede; iadedi nana creyentiaimo ðuide. Dani omoimo Jusiñamui ie rafuena lloñede. Nana creyentiaimo iena lloite. ³⁷ "Rafuena Jusiñamui cuemo llote" omoimona ie comecina bu facaia, "Jusiñamui Joreño ie ñaia uaina cuemo itatate" ie comecina bu facaia, "Caí Namamona ite uaina omoimo cueticue" naimiedi uiñote; ³⁸ iadedi naimie iese uiñoñenia, Jusiñamui Joreñomona naimie uai iñenana uiñoiticaí.

³⁹ Cue amatiai, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiai ñaia, iena rairuiñeno. ⁴⁰ Omoi ofia, cue llua isoi, Jusiñamuina raise marena seda.

Fiodaillamona Cristo jai jillode

15 Cue amatiai, iena omoi feitañellena, bie rafuena dane lloiticue. Cristo ie mare rafuena omoina navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena inocana jaidomoi. ² Naiena omoi inuamona, Jusiñamui omoi jeacinomona omoina jillotote. Naiedo nia omoi jaia, iena raise omoi inoia, jai jillobidomoi.

³ Nanoca rafuena omoina llofueticue. Jiaie creyentiaimona biena jai cacadicue. Jusiñamui facaina lloraini micoriai jaie ciegafuiaí isoi cai jeacino facaina Cristodi

fiodaite. ⁴ Raiafomo naimiedi jonega. Darui amani illanona naiemona Jusiñamuidi naimiena jillotote, Jusiñamui facaina lloraini micoriai jaie llua isoi. ⁵ Ie mei Pedro naimiena ciode. Ie mei ie once llofueoicaigano naimiena ciodicaci. ⁶ Ie mei quinientos naimiena inotino naimiena daruido ciodicaci. Naimacimona damierie jai fiodaitimaci; iadedi ailluena nia fiodaiñedi-maci. Cristo jilluana uiñotimaci. ⁷ Ie mei Jacobo naimiena ciode. Ie mei nana ie oretagano naimiena ciodicaci.

⁸ Ie mei naimiena jiai ciodicue. Ie jira fiodaillamona naimie jilluana uiñoticaí. Ie doce llofueoicaigano fetua mei, ðiga años illanona, naimiena nia cue uiñoñena fa-caise cuena fetode. Ie mei ie rafuena cue llollena, cuena oretate. ⁹ Ailluena creyentiaina jaie cue ðuere ñnuva jira, nana jiaie Cristo oretagano cue baifemo faitimaci. Jamai bue isoidicue; iadedi Cristo cuena fetode.

¹⁰ Jusiñamui cuena duenaillamona, Cristo oretagamienajaidicue. Jusiñamui cuena jamai tainomo ðuenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue. ¹¹ Jiaie oretagano Cristo rafuena llofueia, iena cue llofueia, daje isoide rafuena llocana jaidicaí. Naie rafuena omoi cacajamona, iena inotomoi.

Fiodaillamona nana creyentiai ico jilloitimaci

¹² Fiodaillamona Jusiñamui Cristona jillotajana llofuecabiticaí; iadedi omoimona dajerie raitomoi: "Fiodaillamona, nana comini imaci abiai ðiga ico jilloñeitimaci".

¹³ Ero, omoi llua isoi fiodaillamona comini ico jilloñede-na, ie isoi Cristo jiai nia raiafomo ite. Niade jilloñede.

¹⁴ Cristo jilloñenia, Cristo rafuena jai tainona lloticaí. Naie rafuena jiai tainona inotomoi. ¹⁵ Cristo fiodaillamona Jusiñamuidi naimiena jillotajana llofuecabiticaí. Fiodaillamona creyentiaina ico Jusiñamui jillotañenia, Cristona jiai niade jillotañede. Jusiñamui rafuena tainona jai llofueticaí. ¹⁶ Fiodaillamona nana creyentiai ico jilloñenia, Cristo jiai jaie jilloñede. ¹⁷ Cristo nia jilloñenia, naimiena tainona inotomoi. Jusiñamui omoi jeacinona niadedi oni ðotañede. ¹⁸ Cristona inuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca litimaci. ¹⁹ Nana cai ille ðinori ðani Cristo caina jilloitallemo cai ocuria; iadedi naimie jilloñenia, jai ðuere iticaí. Jai tainomo ocuridicaí.

²⁰ Ero, tainomo ocuriñedicai; iadedi fiodaillamona Jusiñamui Cristona jai jillotote. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentiai jiai jilloitimaci. ²¹ Adán micori jeacinona ñnuva jira, fiodaite. Fiodaillamona jilloñede. Jeacino naimie ñnuva jira, fiodaicana jiai jaidicaí; iadedi fiodaillamona Cristo jai jillua jira, fiodaillamona ico jiai jilloiticaí. ²² Adán micorimona cai comuilla jira, nana fiodaicana jaidicaí; iadedi Cristomo cai ðuilla jira, jilloiticaí, naimie ðiga jaca cai illena.

²³ Cristo jai jillode. Cai fiodailla mei, naimiemo cai ðuil-

la jira, ico dane abido naimie bille facaise jilloiticaí. ²⁴ Ie mei naimie dinena nana naimie díbeimo iñedinona anafefitaite. Nana naimie díbeimo iñede joreñuaina jiaí anafefitaite. Illaimana Cristo illamona, nana naimie díbeimo iñedinona anafefitaite. “O uai cuemo o illamona, nana o jitailla rafuena jai fuidodicue” ie Moomo lloite. ²⁶ Nana naimie díbeimo iñedino naimie anamo jai illa mei, Cristo muidona naimie comini jai jilluamona dane fioidañeítimaci. ²⁷ Jusiñamuidi nana cominina Cristo anamo itataite. Ie muidona creyentiadicaí dane fioidañeíticaí; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede. ²⁸ Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiaí iite. Jusiñamui nanocamiñena jira, nana naimie finoca ra naimie anamo iite. Nana comini naimie anamo iitimaci.

²⁹ Cristo jilloñedena, fioidaillamona jilloñeítomoidena, ¿ñiese bautizagaomoi? Fioidaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese iñofnedomoi. Dajerie creyentiaí marena illamona, omoimona dajerie creyentiaína jaidomoi. Naimiaci jai fioidaitimaci; iadedi fioidaillamona ico jilluana iñotimaci. Iena omoi iñuanona, bautizagaomoi.

³⁰ Cristo jilloñenia, cue jilloñedícuedena, ¿bue ñellena nagarui Cristo rafuena cue llofuiamona, eo jacirederama niadedi fioidacabiticue? ³¹ Cue amatiaí, cai Nama Jesucristomo omoi duilla jira, omoiri iobidicue; iadedi nagarui niadedi fioidacabiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci. ³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llua-mona jaca buena oñeíticue. Ie muidona fioidaillamona cai jaca jilloñeíticaidena, Cristo rafuena fainonocaida, ico raire jamai cai fioidailla jira, jamai ua jai jaicaillafuena cai jaiacaiticaí. Ie ia iese iñede. Cristo jai jillode.

³³ Ie jira omoi abiaína jifueñeno. “Jilloñeíticaí” railla comini diga omoi nabairia, naimiaci llogacinodo jiaí jaitomoi. Ie muidona naimiaci diga nabairiñeno. ³⁴ Ie jira raise abina uíñuanona, mai jai. Jeacinona finocana jaiñeno. Omoimona dajerie Jusiñamuina raise uíñoñena jira: “Jusiñamuidi cominina jillotañeite” raitimaci. Omoi meidaillena, omoimo iese lloticue. Jusiñamui rafuedo raise mai omoi jai.

¿Ñiese creyentiaí jilloitimaci?

³⁵ Omoimona damie nibai jicanoite: “¿Ñiese fioidaillamona creyentiaidicaí jilloiticaí? Naimiaci abiaí nibai jai rifaidimaci. ¿Nie isoide abiaí diga dane iiticaí?” ³⁶ Iese bu jicanoia, raise começina facañede. O illimo buena o ria, janore sicua meinoconi, o riga radi jai abidi rifaide. ³⁷ Nie isoide icoñona o ria, nie isoide iñina o ria, nie isoide idona o ria, naie ra sicua mei, jai jiaífo eruaide. O riga rana eruaíñede. ³⁸ Naga riarra daje isoi eruaíñede. Jusiñamui jitailla isoi, jiaíforie eruaide. Ie isoide. Naga fioidaitimie jillua mei, Jusiñamui jitailla isoi, ie abina jiaíforie itataite. ³⁹ Diga isoide cai abiaína

Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciaí abi ite. Ua diga isoide abi ite. Jusiñamuidi cai jiaíforie eruaite abiaína finorede. ⁴⁰ Jusiñamui dine ico cai ia, cai abiaí iite, nainomo cai illena. Bene cai abiaí jiaí ite, bene cai illena. Monamo cai ia, ebireniticaí. Bene cai ia, jiaí ebire iticaí; iadedi daje isoi ebire iñedicaí. ⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuaí isoi lligaiñoñede. Naga ucuaí daje isoi lligaiñoñede. Monamo cai ico illena, naimie jitailla diese cai abiaí caimo iite. ⁴² Ie isoide. Fioidaillamona cai jillua mei, cai abiaí jiaífo eruaite. Cai fioidaillamona cai abiaí rifaide; iadedi cai jilluamona, cai abiaí dane jai rifaíñeite. ⁴³ Cai fioidaillamona cai abiaí jai ebinide; iadedi cai jilluamona, cai abiaí ebireniticaí. Fioidaillamona cai jiailla jira, cai abiaí birui raise mairiñede; iadedi ico cai jilluamona, cai abiaí mairite. Nana Jusiñamui jitailla rafuena finoreniticaí. ⁴⁴ Cai fioidaia, come abiaí isoi caimo birui ite; iadedi cai jilluamona monamo ico caimo cai abiaí jiaí iite. Enirue iena cai abiaí birui caimo ite. Ie jira monamo cai jiaífo eruaite abiaí caimo iite.

⁴⁵ Adán micori comuilla rafuena Moisés micori jaie cuela: “Jusiñamuidi nano comuidimie dofomo jafaicina firaiñuamona, naimie micori comena jaide” cuela. Naimiemona cai comuilla jira, fioidaiticaí. Fioidaillamona Cristo jillua jira, ico cai jiaí jilloille jira, caina jiaífo eruaite abiaína ico itataite. ⁴⁶ Eniruemo birui cai illa jira, caimo birui ite abiaí diga iticaí. Fioidaillamona ico cai jillua mei, monamo cai ia, jiaífo eruaite abiaí diga iiticaí. ⁴⁷ Adán micoridí enirue ie. Imuicimona Jusiñamuidi naimiñena finode. Cristodi eniruemo billanona, iimana jaide; iadedi Jusiñamui dinena monamona naimie bite. ⁴⁸ Imuicimona Adán micori finua jira, naimie fioidailla mei, dane imuicina jaide. Naimiemona cai comuilla jira, cai fioidaia, jiaí imuicina jaiticaí; iadedi Cristomo jiaí duidicaí. Cai jillua mei, naimie isoi ico iiticaí. ⁴⁹ Adán micorimona cai comuilla jira, naimiñena eruaidicaí. Eniruemo Cristo jaie ia, naimie abi ite. Fioidaillamona naimie jillua mei, naimiemo jiaífo eruaite abi naimiemo ite. Cai jillua mei, Cristona eruaíticaí.

⁵⁰ Cue amatiaí, biena lloticue. Caimo jai ite abiaí diga monamo Jusiñamui ie cominina sedajanomo iñeíticaí. Cai abiaí rifailla jira, cai fioidailla facaise naie isoide abiaí diga nainomo jaca iñeíticaí. ⁵¹ Ero, Jusiñamui cuena uíñoñedicaí. Nana creyentiaidicaí fioidañeíticaí; iadedi Jusiñamui cai abiaína jiaífo meidotaite. ⁵² Omoi uisi jarire cuirorilla isoi, iena ua raire meidotaite. Ie trompeta fillanona, jai fioidaite creyentiaína Jusiñamuidi jillotajanona, naimiaci abiaína meidotaite. Nia fioidañedindicaí cai abiaína jiaí meidotaite. Dane fioidañeíticaí. ⁵³ Cai abiaí birui rifaicade. Ie jira birui fioidaicana jaidicaí. Jusiñamuidi cai abiaína ico meidoite. Ico monamo jiaífo abiaí caimo ia, cai abiaí rifaíñeite. Fioidañeíticaí. ⁵⁴ Iese caimo sua, Jusiñamui facaina llo- raíma micori jaie cuela uai jiaí suite. Cuela: “Nairui-

mona creyentiaí jaca fioidañeítimaci". ⁵⁵ Cai jaca illa jira, fioidaicana jaiñeíticai. Fioidaillana jaciruiñeíticai, dane cai fioidañeíticaina jira. ⁵⁶ Jeacino illa jira, birui fioidaicana jaidicai. Moisés micori jaie llogacino illa jira, iena cai raise finonina jira, jeacino caimo illana uiñoticaí; ⁵⁷ iadedi cai jeacino facaina cai Nama Jesucristo fioidailla jira, jeacino anamo jai iñedicai. Cai fioidailla mei, dane fioidañeíticai. Jusiñamui caina iemona jai jillotate. Ie muidona naimieri cai iobillasa.

⁵⁸ Cue amatiái, fioidaillamona nana creyentiaí ico jillua jira, Cristo rafuena ñnocana jai. Naganomo iñeno; iadedi Cristo rafuena llocana omoi jai. Naimie jitailla rafuena finocana omoi jai. Naimie facaina omoi maijia, tainona maijiñedomoi. Naiemona diga mare rafue comuite. Iena jai uiñotomoi.

Jerusalémo itinomo ucubena oredimaci

16 Jiaie rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue llua isoi, omoimo lloticue. ² Naga domingo omoi ucubemona daje diese eneno oni eeno. Omoi maijia bailla diese ucubemona cue bille dinori iena eeno. Iese naga domingo omoi eenoñenia, ico cue bia, ¿niese dacaiño ofrendamo ail-luena ucubena joneitomoi? ³ Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaiticue. Cartana jiaí oretaiticue, omoi fetocano mareuidinona Jerusalémo itino uiñollena. ⁴ Jerusalémo cue comeci jiaí jaiacania, cue diga jaitimaci.

Pablo jai macariacade

⁵ Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue. ⁶ Diga irui omoi diga ñibai iiticue. Nana rollime facaise omoi diga ñibai iiticue. Ñibai daje amani fivui iiticue. Ie mei cuena omoi canollemona oni jaiticue. Omoi dinomona cue jaia, cue jaillinona nia uiñoñedicue. ⁷ Omoi dine birui nia jaiñeíticue. Omoi dine birui cue jaia, dallu omoi diga iiticue; iadedi jiairuido omoi dine cue jaia, cai Nama jitaia, omoi diga are iiticue. ⁸ Beno Efesomo nia iiticue. ⁹ Beno diga comini Cristo rafuena cacaacadimaci. Naimacimo iena llofueiacadicue. Diga comini cue llua uaitatimaci. Cue llua jitaíñedimaci Ie jira bene nia lloiacadicue. Pentecostés railla rafue fuille mei, jaiticue.

¹⁰ Omoi dine Timoteo ria, naimiena raise marena nafue. Cue isoi cai Nama facaina naimie maijicabide. ¹¹ Ie muidona naimie llucacina jamaiñeno. Omoimona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentiaí diga naimie billemo ocuridicue.

¹² Apolona jicanotomoi. Jiaie creyentiaí diga omoi dine naimie jaillana naimiemo lloticue; iadedi naimie comeci nia jaiacaiñede. Jiairuido abi juarenia, omoi dine jaite.

Fuiduacino

¹³ Jeacinomona abina rairui. Cristo rafuena ñnocana omoi jai. Eimie isoi omoi comeciaina ocuiño. ¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amatiái, Acaya railla eniruemo Estéfanadi, ie comini diga, nano creyentiaidimaci. Iena uiñotomoi. Naimaci jitailla jira, jiaie creyentiaina canocabidimaci.

¹⁶ Naie isoidino lloga uaina cacarei. Naga Cristo díbeimo maijidino uaina cacarei. Iedo omoi jai.

¹⁷ Omoimona cue dine Estéfanos bite. Fortunato diga, Acaico diga naimie billa jira, iobidicue. Cue dine iñedomoi; iadedi naimaci billa jira, omoi isoi cuena canodimaci. ¹⁸ Naimaci billamona cue comeci caimataide. Omoi comeciái jiaí caimataide. Naie isoidinomo: "Marena maijidomoi" omoi railla.

¹⁹ Diga creyentiaí Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiaí orediaimaiaí. Iaimaiaí jofomo dajerie creyentiaí ro-cabitimaci. Cristomo naimaci duilla jira, omoína isiruillanona, nana naie creyentiaí imaci uaina jiaí oredimaci. ²⁰ Nana bene ite creyentiaí imaci uaina oredimaci. Nana creyentiaina eo caimare uaido.

²¹ Omoimo cue uaina jiaí oredicue. Cuena canollena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena ñno. Pablocicue.

²² Omoimona Cristona bu isiruiñenia, Jusiñamui naimiena duere finollesa. Cai Nama abido dane bille-sa.

²³ Cai Nama Jesús omoína duenaillasa. ²⁴ Jesucristomo cai duilla jira, omoína cue isiruillana omoi uiñuana jitaídicue. Mai. Macaibaite.

2 CORINTIOS

Corintomo ite creyentiaimo Pablo cartana orede

1 ¿Nigacino? ¿Nie isidomoi? Pablodícue. Corintomo ite creyentiaí, omoi díne bie carta oredícue. Nana Acaya railla eníruemo ite creyentiaimo bie carta jiaí oredícue. Jusiñamui jitailla jira, ie rafuena cue jino llollena, Jesucristo oretagamiedícue. Cue díga Timoteo illa jira, naimie ie uaina omoi díne jiaí orede. ² Cai Moo Jusiñamui, cai Nama Jesucristo díga, omoína duenaite. Iena uiñocana mai omoi jai. Iaimaiaí omoína uri jai itatate. Iena omoi uiñocana mai omoi jai.

Pablo ie duere sefuilla rafuena cuete

³ Cai Moo Jusiñamuimo iobillacinona cai fecacabilasa, naimiedí cai Nama Jesucristo ie Moo illanona. Jusiñamui cai Moo illanona, caína jaca duenaite. Cai comeciaina jaca ocuiñotade. ⁴ Nie isoide rafuemonona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiaínona canoredícue. Nie isoide rafuemonona naimaci duere sefuia, nie isoide ramo naimaci jiria, Jusiñamui caína ocuiñotaja isoi, naimaci comeciaina ocuiñotaredícue. ⁵ Cristomo jai cue duilla jira, naimie isoi cue duere sefuia, naimie cue comecina ocuiñotade. Iemonona jiaínona comecina ocuiñotajana raise uiñotícue. ⁶ Duere cue sefuillamonona, omoína canoredícue. Jusiñamui jitaillacino omoi finocana jaillana jitaídícue. Cuenona naimie ocuiñotajamonona, Cristona omoi faínocaiñellena, cue isoi omoi duere sefuia, omoína ocuiñotaredícue. ⁷ Cue isoi omoi duere sefuia, cue isoi Cristo omoi comeciaina ocuiñotaite. Iena raise uiñotícue.

⁸ Cristomo cai duillamonona, cue amatiái isoi itomoi. Asia railla eníruemo jaie eo duere sefuídícue. Iena omoi raise uiñollena, ie rafuena dane omoímo lloiacadícue. Eo duere cue sefuilla jira, cue comeci niadedí ocuiñonedícue. Niadedí fioidaitícue. ⁹ “Naie facaise fioidaitícue” raillanomo cue comecina facadícue. Cue finoca rafuemonona dama jillonidícue; ia Jusiñamui uai siñona jira, naimie cuena jillotate. Fioidaitínona naimie jillotarede. Niadedí fioidaitínona jiaí jillotarede. Naimiedí naimie cuena jillotajana cue inuana jitaide. ¹⁰ Naie facaise eo duere sefuillamonona cuena jillotate. Ico cue duere sefuia, iemonona dane cue jilloillena inotícue. ¹¹ Iena cue facaina omoi jicabi. Jusiñamui faírua meinomo, ailluena comíni cue facaina Jusiñamuimo iobillacinona fecaitímaci. Cuenona Jusiñamui canua jira, iobillacinona fecaitímaci.

Pablo Corintomo navui jaiñede

¹² Cuenona gaiñedíno cuena níbai jeare ñaitímaci; ia daie rafueri abina íedotícue. Cue comecimonona iena uiñotícue. Cristona inoñedinona marena finodícue. Omoína marena finodícue. Jusiñamui jitaillacino finocana jaidícue. Jusiñamuimonona jeacinona finoñecana jaidícue. Cue comecina facajacinomonona íese jaiñedícue; ia Jusiñamui cuena canuamonona, íese jaidícue. ¹³ “Íese cuetío; íadedí o comecimo jiaie rafue íte díga caimo cuetío” raitomoi. Omoína jifueiacaiñedícue. Cue cuela cartaiaina jai facadomoi. Cue cuela rafue omoi raise cacajana jitaídícue. ¹⁴ Cuenona íe raise uiñonedomoi; ia cuena uiñocana omoi jaiillanona, cueri omoi iobillana jitaídícue. Cai Nama Jesús abído bia, omoíri cue iobilla isoi, cueri omoi iobillana jitaídícue. ¹⁵ Omoímo íese cue comecina facajamonona, omoi díne navui jaiacadícue. Macedoniamona cue jaiacadícuemo, raise omoína cue iobitallena, omoi díne nano navui jaiacadícue. ¹⁶ Macedoniamonona cue abído bia, omoi díne navui dane jaiacadícue. Judeamo cue díga jaillena, omoímonona damieriena omoi oretajana jitaídícue. Íese cue jaiilleno navui comecina facadícue. ¹⁷ Omoi díne cue jaiñena jira, cue comeci naganomo illa isoi, comeciaina facadomoi. Damierie íe lloga uaina jaca finoñedímaci. Dani naimaci rafuemo comeciaina facadímaci. “Jii” raitímaci; ía: “Dama íte” comeciaina facadímaci. ¹⁸ Íese ínedícue. Jusiñamui uanaicinona jaca lla isoi, cue comeci naganomo íñede. Omoímo cue lloga uai finodícue. ¹⁹ Jusiñamui Jito Jesucristo rafuena omoímo navui llotícue. Cristo íe llogacinona jaca meidoñede. Silvano íena jiaí llofueite. Timoteo íena jiaí llofueite. Nagarui dajé isoide rafuena llofuetícaí. Jiaíruído jiaie Cristo rafuena llofueñedícaí. ²⁰ Nana Jusiñamui jai lloga uai Cristo finoca rafuemonona suicabide. Jusiñamuina cai sedaia: “Cristo íe rafuena raise finode” cai lloia, Jusiñamuina iobitadícaí. ²¹ Jusiñamui Cristo díbeimo caína jai itatate. Ie rafuena cai llollena, caína jai fetode. ²² Íe comínina caína itatate. Iena cai uiñollena, íe Joreño caimo jai itatate. ²³ Jusiñamuidí cue uanaicinona lluanona uíñote. Uanaicinona cue lloñena, Jusiñamui cuena duere finuana jitaídícue. Omoi finoca rafue jai cue uiñuamonona, omoímo cue ríire lloí raillano, omoi díne navui dane jaiñedícue. ²⁴ Cristona jai omoi inuana uiñotícue. Cristona inocana omoi jailla jira, omoi finolle rafuena lloñedícue; ía omoi íocíre illana jitaídícue.

2 Omoï ðine nia cue jaiñellemo começina facadicue. Omoï ðine navui cue ia, iocire coniniri iñedicai. ² Omoïna jai icidicue. Cueri omoï iobillana jitaïdicue; ia omoïna cue dane icia, coniniri iocire iñeitiçai. ³ Omoïmo cartana navui oredicue. Omoï ðine ite rafuena raise finollena, iena oredicue. Cuen a iobitajana uiñotomoi. Omoï ðine ite rafuena omoï raise finoia, coniniri iocire iiticaï. “Cuen a iobitaitomoi” raillanomo cue começina facadicue. ⁴ Cue começi eo sunaillamona, cue começi eo eiamona, carta navui oredicue. Omoïna iciaçaiñedicue; ia omoïna cue eo isiruillana omoï uiñuana jitaïdicue. Ie jira omoï ðine ite rafuena raise fino.

Maraiñede rafuena finodimie rafuena feita

⁵ Maraiñede rafue navui damie finua jira, sunaiticaï. Naimie muidona cue começido duere jaide; ia daje isoi omoï começai jiaï duere jaide. ⁶ Omoï nabei ðine ite cominimona naimie jai duere sefuilla jira, dama iesede. Naimiena dane duere finoñeno; ⁷ ia naimie finoca rafuena mai feita. Iena dane linoñeno. Naimie começina ocuiñota. Naimiena iese omoï canoñenia, omoïmona duere sefuillamona, abido danomo jaite. ⁸ Ie jira: “Ona nia isiruiticaï” naimiemo llono. Iena eo jitaïdicue. ⁹ Nana cue lluaana omoï ñnuana cue facacillena, carta omoï ðine navui cueticue. ¹⁰ Naimie finoca rafuena omoï feitaia, iena cue jiaï faitaiticue. Cristo rafuena omoï ñnocana jaillana cue jitailla jira, naimie rafuena faitaiticue. Cristo cuena uiñuamona, iena faitaiticue. ¹¹ Taife ramo çai faiana uiñoticaï. Cristo rafuedo çai raise jaiñellena, naimie jitaillana uiñoticaï. Cristo ðibeimona çaina Taife itatañenia, omoï motomoti mie finoca rafuena faitaiticaï.

Troamo navui Pablo ia, uri iñede

¹² Troamo navui jaidicue. Cristo rafuena cue llollena jaidicue. Çai Nama comini começaina jetajamona, naimie ðibeimo cue maiçiamona, ie rafuena lloticue. ¹³ Tito nainomo cue çioiñena jira, uri iñedicue. Naimiedi cue ama isoide. Ie jira nainomo ite creyentiana facaduanona, Macedoniamo jaidicue.

Jusiñamuidi Cristo ðibeimo iñedinona anafefitaite

¹⁴ Jusiñamui fue eo mare. Cristo ðibeimo iñedinona naimie anafefitajanona, Cristo cominina çai illamona, naimie rafuena uicana jaidicaï. Ie rafuena çai lloia, iena comini ñnoia, Jusiñamui naimaçina jai çaimare itatate. ¹⁵ Cristomo çai duillamona, ie rafuena çai lloia, Jusiñamuina iobitadicaï. Çai lluaamona, damierie jillodimaci. Iena jitaïñenamona, damierie faifidimaci. ¹⁶ Iena cacajamona, damierie faificana jaidimaci. Jusiñamui illanomo jaca iñeitimaci. Iena cacajamona, jaino Jusiñamui illanomo jaca iitimaci. Jamai bue isoidicue; ia bie rafue llocana jaidicue. ¹⁷ Damierie Jusiñamui rafuena lluaamona, ucubena oiacadimaci. Omoïmo começina facañedimaci; ia iese llofueñedicue. Omoïmo cue começina facajanona, bie rafue cue lluaamona, buena

oñedicue. Jusiñamuimona cue llogacinona oticue. Jusiñamui cuena çua jira, Cristomo cue duilla jira, uanaicinona jaca lloticue.

Cristo çaimo lloga rafuedo birui jaidicaï

3 Omoï ðine damierie llofueraini jaia, cartaiaina uicabitimaci. Naimaci cartaiaimo jiaïnodi: “Bie llofueraini mare” raillanona cuetimaci. Omoïmona jiaïno cueda cartaiaina: “Bie comini mare” raillana jitaïñedicue. Cuenona jiaïno cueda cartaiaina: “Pablo mare” raillana jiaï jitaïñedomoi. ² Omoï marenana jai uiñotocue. Cue maremienana jai uiñotomoi. Carta isoidomoi. Jusiñamui ðibeimo omoï começai meidua-mona, cue começimona omoïna raise uiñotocue. Omoï birui illamona, omoïna fidiamona, nana comini omoïna raise uiñotimaci. Ie jira jiaïnodi: “Bie comini mare” raillana omoïmona jitaïñedicue. ³ Cristo rafuena omoïmo lloticue; ia Cristo omoï começaina jai meidotaja jira: “Omoï mare” raillanona naimie jai cuedadena, nana comini uiñotimaci. Tinta diga naimie cueñede. Jusiñamui Moisés micorimo jaie lloga rafue jamai noçimo cueda. Çai çajede Jusiñamui birui iese cueñede; ia naimie Joreño uaido omoï começaina birui meidote. ⁴ Cristomo cue jai duilla jira, Jusiñamuina cue ñnuamona, omoïna iese lloticue. ⁵ Cue finoca rafueamona iese lloñedicue; ia Jusiñamui uai cuemo illamona, iese omoïmo lloticue. ⁶ Jiaie rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue ñnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena çai ñnuamona, Jusiñamui Joreño Jusiñamui illanomo çaina jaca itatate.

⁷ Moisés micorimo lloga rafuedo jaillamona, Jusiñamui ðine buna jaca iñena. Noçimo Jusiñamui cueda. Moisés micorimo Jusiñamui llua mei, Jusiñamui uai ebirena jira, Moisés micori uieco eo quenirecaide. Jusiñamuimona naimie abido bia, Israel comini Moisés micori uiecomo eruainidimaci. Nagarui Jusiñamui diga naimie ñaiñenia, naimie micori uieco ja muidomo queninide. ⁸ Jusiñamui Moisés micorimo jaie lloga uai ebirede; ia Jusiñamui Joreño birui çaimo lloga uai baifemo ebirede. ⁹ Moisés micori rafuedo bu jaia, faificana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baifemo ua eo faite. ¹⁰ Moisés micori rafue jaie ebirede; ia jiaie rafue birui illa jira, Moisés micori rafue jai birui ebinide. ¹¹ Birui ite rafue jaca saïñena jira, ua eo ebirede.

¹² Iena çai uiñuamona, bie rafuena marefodo jaciruiñeno lloticue. ¹³ Iniroi diga, Moisés micori isoi cue uiecona ñbaiñedicue. Naimie micori ie uieco ñbaide, ja muidomo ie uieco quenirena feioicaillana comini çioiñellena; ia cue lloga rafuena marefodo llocabiticue. ¹⁴ Moisés micori comini Jusiñamui rafuena jaca ñnoñedimaci. Naimaci começai jitaïñena jira, ñnoñedimaci. Moisés micori rafuena birui juduaï comini faca-

ia, iena nia raise cacaiñedimaci. Dani Cristona ñnua-mona, naimaci comeciã raise cacareitimaci. ¹⁵ Cristo rafuena birui naimaci ñnoñena muidona, Moisés micorã rafuedo nia jaidimaci. ¹⁶ Cai Nama ðibeimo bu jaia, naimie comeciã raise cacade. Moisés micorã rafuedo naimiediã cai jaiñenana raise uifñote. ¹⁷ Cai Nama Joreño lloiticue. Cristo ðibeimo cai jaia, naimie Joreño caimo jiaie ite. Cristona cai nabaillamona, jeacino anamo jai iñedicaie. Moisés micorã rafue anamo jai iñedicaie. ¹⁸ Cristomo jaiã cai duilla jira, naimiena cai comeciãmona raise uifñua jira, ie ebirede uaina uifñoticaie. Acaranimo cai eruailamona, cai abina ciodicaie. Ie isoide. Cai illamona jiaie cominiã Cristona uifñotimaci. Cai Nama Joreño caina canuamona, naimie ebirena isoieã illena, icana jaidicaie.

4 Jusiñamui cuena duenaillamona, cue comeciã ocuiñocaida, Cristo rafuena llocana jaidicue. ² Meirede rafuena llofueñedicue. Iena bainino llofueñedicue. Jifuiãmona omoina llofueñedicue. Omoirã iobitallena, Jusiñamui rafuena meidoñedicue. Jusiñamui cuena ciuana cue uifñuamona, naimie rafuena uanaicinona llofuecabiticue. Cue llofuiãna bu raise cacacia, uanaicino cue llofuecabilana uifñote. ³ Faificana jaidinodã cue mare lloga rafuena raise cacaiñedimaci. ⁴ Taife anamo naimaciã illamona, naimie naimacina cacarefitañede. Cristo uai ebirede. Jusiñamui isoieã naimie ite. Taifediã Cristo rafuena naimaciã raise uifñuana jitañede. ⁵ Cue finoca rafuena llofueñedicue; ia Jesucristodiã cai Namanana llofuecabiticue. Naimie ðibeimo cue maijiamona, omoina canollena, naimie rafuena llofuecabiticue. ⁶ Enirue finua facaise Jusiñamui lloite: "Jitiredino nana eniruemo iñellena, useredino mai iite". Naimiena cue nia uifñonena, jeacino anamo cue illamona, cue comeciã jitiredinomo ite isoide. Naimiena cuena naimie jaiã uifñotaja jira, cue comeciã useredino jaiã ite isoide. Jesucristo monamo illanona jaiã cue ciuanona, Jusiñamui uai ebirede siñonana llofueticue.

Cai comeciã ocuiñocaida ñnocana jaidicaie

⁷ Enirue ie imuicimona comuidicue; ia Cristo ie mare ebirede rafue cuemo jaiã ite. Iemona cue lloga rafue cuemona iñenana uifñotomoiã; ia ie uai siñonana illamona, Jusiñamui illana uifñotomoiã. ⁸ Bie mare rafue cue llofuiãmona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefitañeno comeciã ocuiñocana jaidicue. ⁹ Damierie cuena duere finodimaciã; ia Jusiñamui cuena faionocaiñeno cuena canode. ¹⁰ Eniruemo jiaie Jesús ia, duere sefuillamona, ja muidomo fiodaite. Jesús isoieã duere sefuicana cue jaia, naiemona niadedã nagarui fiodaicue. Iemona cuena naimie jillotaja muidona, Jesús siño uaina uifñocana jaidicue. ¹¹ Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uifñotomoiã. ¹² Naimie rafue cue llua muidona, cuena meineiacadimaciã; ia bie rafuena omoiã ñnua-mona, Jusiñamui illanomo jaca iitomoiã. ¹³ Jusiñamui fa-

caina lloiaima jaiã cuela: "Cue ñnua jira, iena llofueticue". Naimie isoieã cue ñnua jira, bie rafuena jiaie llofuecabiticue. ¹⁴ Jesús fiodaillamona Jusiñamui naimie jaiã jillotate. Iena cue uifñuamona, cai fiodaie meiã, caina jiaie jillotaite. Jesúmo cai duilla jira, naimie illanomo danomo caina ico itataite. ¹⁵ Omoiã facaina nana cue rafue finodicue. Cristo rafuena cominiã uifñollena, duere sefuidicue. Iemona Jusiñamui naimacina duenaillana uifñotimaciã. Jusiñamui ðibeimo naimaciã illamona, naimiemo iobillacinona fecacabitimaciã. Ieri naimiena iobitaitimaciã. ¹⁶ Ie jira iena sefuiruiñedicue. Cue mairiciã fuicana nagarui jaiã; ia cue comeciã nagarui ñnocana ocuiricana jaidicue. ¹⁷ Birui duere sefuidicue; ia iemo cue comeciã eo facañedicue. Cristo rafue muidona birui duere cue sefua, Jusiñamui illanomo ico cue ia, nainomo ebire marena iiticue. Iemo cue comeciã eo facañedicue. ¹⁸ Cuemo birui suide rafuemo comeciã eo facañedicue. Jusiñamui illanomo cue nia cioñena rafuemo comeciã eo facañedicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama ðiga iocire jaca iiticue.

5 Caimo ite abiã rifaillemona, Jusiñamui illanomo caiã illemona, Jusiñamui jiaie isoide abiã caimo itataite. Nainomo caiã abiã jaca rifaiñeite. ² Birui cue duere sefuillamona, Jusiñamui cuemo ico itatalle abina eo oiacadicue. ³ Cue fiodaie meiã, Jusiñamui cue joreño jiaie isoide abina itataite. ⁴ Cue jiaie isoide abiã cuemo illena, cue jamai fiodaicaiñedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaie abiã ifomo jaca ille abina cuemo iite. ⁵ Jusiñamuidã ie Joreño caimo itatajamona, caiã abiaia iese jiaie itatajana uifñoticaie. ⁶ Iena cue uifñuamona, ñie isoide rafue ia, ñnocana jaca jaidicue. Nia cue fiodaieñena, caiã Nama illa ecimo nia iñedicue. ⁷ Naimiena birui cioñedicue; ia naimiena ñnocana jaidicue. ⁸ Iese jaidicue. Cue Nama ðiga cue illena, fiodaicadicue; ⁹ iadedã nia cue fiodaieñena, naimiena jaca iobitaiacadicue. Cue fiodaia, naimiena jiaie jaca iobitaiacadicue. ¹⁰ Naimie llua jira, Cristo uicomo ico nana iiticaie. Caiã bene finoca rafuena uifñotaite. Maraiñede rafuena caiã bene finua ðiese, naimiemona ibana feiñoñeiticaiã. Mare rafuena caiã bene finua ðiese, naimiemona ibana feiñoñeiticaiã. Ie muidona naimie jitaillacinona jaca finoacadicue.

Jusiñamui ðiga caiã uri illafue

¹¹ Cue Nama uicomo ico cue illemona, iena cue jaciruillamona, naimie ðibeimo cominina jaiã itatacana jaidicue. Jusiñamui cue illana raise uifñote. Cue illana raise omoiã uifñuana jitaicue. ¹² "Cuediã maremedicue" lloñedicue; ia cue abiã facaina omoiã riidollena, bie rafuena lloticue. Omoiã motomo damierie llofuerainã naimaciã llofuiãcino ðiga abina ðedotimaciã; ia naimaciã comeciãmo iticino ðiga abina ðedoñedimaciã. ¹³ "Naimiediã uairico" cuena raitimaciã. Iese cue iticuedena, Jusiñamui facaina iese iticue; ie iadedã uairicoñedicue. Omoina llofuellena, omoiã facaina

maijidicue. ¹⁴ Nie isoidicuenta, Cristo cuena isiruillana cue uiñuamona, jaca llofueiacadicue. Nana comini facaina damie fiodaillana jai ñnoticue. Naimaci jeacino ifomo naimie jai fiodaite. ¹⁵ Nana cai facaina naimie fiodaite. Fiodaillamona Jusiñamui naimiena jai jilloitate. Naimiena nia cai ñnoñenia, dani cai comeciaino ite rafue diga iobidicai; ia naimiena jai cai ñnua mei, dani cai comeciaino naimiena cai iobitajana naimie jitaide. Ie jira cue illana jai uiñotomoi.

¹⁶ Damierie llofuerainidi jainomo eruailamona, naimaci comeciaina facajamona: "Naimaci mare" raitimaci. Jiaicaiño: "Naimaci marañede" raitimaci; iadedi Cristona cue ñnua facaisemona iese cominimo eruañedicue. Naimiena nia cue ñnoñenia, Cristona jai raise uiñofedicue. "Naimiedi jamai ñima" raillamo comecina facadicue; ia iese naimiemo birui comecina facañedicue. ¹⁷ Cristona cai ñnua mei, naimiemo jai cai duillamona, cai comeciaino iuaina meidotica. Jai jiaie isoidicai. Jiaie rafuedo jai jaidicai. Jai comi ite rafuedo jai jañedicai. ¹⁸ Jusiñamui cai comeciaino iuaina meidotade. Cristo fiodaillamona, Jusiñamui ñbeimo caina itatate. Iemona naimiena jai nabaredicai. Naimacimo ie rafuena lollena, cuena fetode, jiaie cominina ie ñbeimo itatallena. ¹⁹ Cristo finoca rafue muidona, Jusiñamui ñnena cominina nabaiacade. Naimaci jeacino facaina ñbana jai oiacañede. Bie rafuena lollena, cuena jai fetode. ²⁰ Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia ñnoñenia, Cristo facaina cue illa jira, Jusiñamuina omoi nabaillanona, naimie diga uri i. ²¹ Cristo jeacino jaca finofede; ia cai jeacino facaina, Jusiñamui jitailla jira, jeacino finodimie isoi jai. Naimiemo cai duillamona, Jusiñamui jitailla isoi, jai marebicaidicai.

6 Bie rafuena nia lliacadicue. Jusiñamui facaina cai maijamona, naimie ñbeimo cominina itataticai. Naimie caina duenaillana uiñoticue. Iena omoi ñnocana jaillana jitaide. ² Jai Jusiñamui cuetata: Cue jitailla facaise omoi jitaillacinona jai cacadicue. Omoi jilloillena, omoina jai canodicue.

Ero, Jusiñamui birui omoina cacaacade. Birui omoina canuanona, omoina jillotaicade. Ie muidona naimiena ñnocana jai. ³ Bie rafuena omoi ñnoñellena, cue llofuiacinona omoi jamañellena, bu diga rafuena comuitaicañedicue. ⁴ Jusiñamui ñbeimo cue maijamona, nie isoide rafuemono ramo cue jiria, cue illamona naimiedi: "Mare" cuena raillana jitaide. Eo duere sefuidicue. Diga icaiño damierie cuena duere finodimaci. Diga icaiño ramo jiridicue. ⁵ Damierie cuena fatimaci. Cárcelmo cuena jonetimaci. Naimaci illanuaimona cuena riire dotadimaci. Eo cue maija jira, diga icaiño eo raise inañedicue. Aime guisoidicue. ⁶ Jearede rafuena eburañedicue. Cristo rafuena uiñocana jaidicue. Icirañedicue. Jiaimona canocabidicue. Jusiñamui joreño anamo iticue. Cominina raise isiruiticue. ⁷ Uanaicinona llocabiticue. Jusiñamui uai cuemo illamona, llofuecabiticue. Cue comecina riidollena, Taifena emodofillena, Jusiñamui jitailla isoi,

marecinona finocana jaidicue. ⁸ Damierie cuena marena jai ñaitimaci. Jiaimona cuena jeare nia ñaitimaci. Damierie cueri jai iobidimaci. Jiaimona cue joreña jai ñaitimaci. Damierie: "Caina jifuetio" cuena raitimaci; ia nia uanaicinona llocabiticue. ⁹ Damierie: "Jamai bue isoidio" cuena raitimaci; ia jiaimona cuena raise uiñuamona, naimaci ñnena jamai bue isoñedicue. Nagarui niadedi fiodaicabiticue; ia nia iticue. Duere sefucana jaidicue; ia Jusiñamui cue comecina ocuiñotacana nia jaidicue. ¹⁰ Sunaiticue; ia iocire jaca iticue. Dueredicue; ia ailluena comini comeciaina eo caimaretadicue. Buenidicue; ia Jusiñamuimona ailluena marecinona feiñoticue. Iese jaca jaidicue. Cue illamona: "Naimiedi mare" cuena omoi raillana jitaide.

¹¹ Corintomo itino, cue nabaiñia, cue comecimo ite rafuena marefodo jai lloticue. Cue comecimona omoi diga marena iacadicue. ¹² Cuemona omoina raise isiruiticue; ia omoi ñnena nia cuena eo isiruñedomoi. ¹³ Cue urui omoi isoilla jira, omoi diga ñaiticue. Omoina cue isiruilla isoi, cuena omoi isirui.

Jusiñamui cai comeciaino illanodicai

¹⁴ Creyentedimie jearede ramo faitatai raillano, daje isoide rafuedo iaiaia jañena jira, daje isoi rafuena iaiaia comeciaino lloñena jira, creyente creyenteñedimie diga daje rana namatañena. Aina illena, creyentena inañedimie creyentedimie oñena. Inina illena, creyentena inañedimie creyentedimie oñena. Marecinodo jaiacadimiedi marañedicinodo jaiacadimie daje isoi diga nabairinide. Jusiñamuina uanaicinona uiñotimiedi useredimie jai ite isoide. Jeacino anamo nia itimie jitedimie nia ite isoide. Cristo rafuena naimie uiñofede; ia Cristo rafuena omoi uiñuamona, useredimie jai itomoi isoidomoi. ¹⁵ Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comeciaina facañede. ¹⁶ Creyenteñedimiedi Jusiñamuina sedañede; ia jiraraina sedade. Creyente comecimo Jusiñamui illamona, Jusiñamuina sedade. Nana creyentia comeciaino Jusiñamui ite. Iena jai Jusiñamui llote: Comini motomo iticue. Naimacina nabaiticue. Naimaci Jusiñamuiticue. Cue comininitimaci. ¹⁷ Ie muidona cuena ñnoñedino diga daje rana namatañeno. Naimaci jearede jetaca rafuena abimo oñeno. Iemona omoina raise feiñoiticue. ¹⁸ Omoi Moona iticue. Cue uruiaina jaitomoi. Siño jitodicue.

7 Cue isiruiganodomoi. Bie llogacino Jusiñamui camo jai llua jira, naga marañede rafuena fainonocada, cai jailla. Naga cai comeciaina jearetade rafuena fainonocada, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo cuegacino diese finodimaci

² Omoi comeci a mona cuena raise feiño. Buna jeare finoñedicue. Buna jifueñedicue. ³ Marañede rafuena jai omoi finuana lloñedicue. Omoimo cue comecina nagarui facadicue. Iena ailli lloticue. Nia cue ia, raire cue fiodaia, omoina jaca uibiñocabiticue. ⁴ Cue llucina omoi inuana raise uiñoticue. Omoiri iobidicue. Omoi diga jai uri iticue. Duere sefuidicue; ia iocire iticue.

⁵ Macedoniamos navui cue jaidicue, cue comeci uri iñede. Cue dibeimo iñedinomona nagarui duere sefuilamona, cue comeci jarire ite. Cristo dibeimona creyentiaina naimaci itatallemo cue comeci jarire ite. ⁶ Comeci a mona ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade. ⁷ Cue dine naimie ria, iocire iticue. Omoimo ite rafue cue cacajamona, jia iocire iticue. Cuena omoi cioacanana llote. Cue comeci jarire illari sunaitomoi. Cuena riidoiacadomoi. Iena cue cacajanona, iocire iticue. ⁸ Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunañedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue. ⁹ Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cuega carta muidona iciriñedomoi; ia Jusiñamui jitailla isoi sunaitomoi. ¹⁰ Jusiñamui jitailla isoi, ie jecino facaina bu sunaillamona ie comeci iuai Jusiñamui dibeimo meidoia, sunañede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca iñeite. ¹¹ Jusiñamui jitailla isoi omoi sunaillamona, omoi comeci a mona raise finodomoi. Marañede rafue dibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cuena dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, marañede rafuena finodimena duere finodomoi. Nana bie rafuena raise fuidodomoi. ¹² Carta navui omoi dine cue oretaia, marañede rafuena finodimie mo cue comecina eo facañedicue. Naimie mona duere sefuidimie mo cue comecina eo facañedicue. Cuemo omoi comeci a mona facajana omoi uiñollena, navui cueticue. Jusiñamui iena uiñote. ¹³ Ie jira cue comecina ocuiñoticue. Tito jia iocire illa jira, dane iobidicue. Naimie comecina caimare omoi itataja jira, iobidicue. ¹⁴ Omoi dine Tito nia jaiñenia, naimie mo omoina lloticue. "Naimaci ona feiñotimaci. Naimaciri iobidicue" naimie mo navui lloticue. Iese naimie mo omoi feiñua jira, ieri meidañedicue. Omoimo uanacina jaca lloticue. Naimie mo cue llua isoi jia suide. ¹⁵ Naimie llofuicino omoi inoiacana jira, naimie mo omoi birui raise isiruite. Meiruiocaida, comeci a jarire illamona, naimie mo feiñotomoi. ¹⁶ Omoina raise uiñoticue. Cristo inocana omoi jaillana raise inoticue. Omoiri iocire iticue.

Creyentia Jusiñamui ucubena fecaja rafue

8 Cue amatai, omoimo jiaie rafuena lloiacadicue. Jusiñamui naimacina canuamona Macedoniamos ite creyentiaina omoi uiñuana jitaidicue. ² Eo duere sefuidimaci. Jia eo dueredimaci; ia iocire illamona, jiaie creyentiaimo ucubena caidiñeno fecacabidimaci. ³ Naimacimo ite ucube diese fecadimaci. Iena uiñoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue. ⁴ Naimacimo iese lloñedicue; ia iena naimaci eo fecacana jira, jiaie creyentiaina canollena, cuemo iena eo jicantomaci. Ucube diga jaino creyentiaina naimaci canuana cue llua eo jitaidimaci. ⁵ Cue comecina facaja isoi, fecañedicue. Ucubena fecadimaci; ia: "Cai Nama dibeimo maijiacacai" jia llotimaci. Nie isoide rafuena naimaci finuana cue ocuillena, Jusiñamui jitailla isoi, jitaidimaci. ⁶ Omoi dine Tito dane jaillana jitaidicue. Omoi dine naimie navui ia, ucube omoi uana naimie canode. Iemona janore tainedomoi. Jiaie creyentiaina omoi canuana raise fuiduana jitaidicue. ⁷ Cristona inocana jaidomoi. Iena jainomo llocabito mo. Cristo rafuena raise uiñotomoi. Cristo jitaillacinona eo finocana jaidomoi. Cuena jia isiruitomoi. Ie muidona omoi ucube diga, jiaie creyentiaina omoi raise canuana jia jitaidicue. ⁸ Omoina iese riire lloñedicue. Macedoniamos ite creyentiaina eo canuana omoi uiñuamona, jiaie creyentiaina omoi canoia, Cristona omoi isiruillana uiñotica. ⁹ Cai Nama Jesucristomona cai fueua. Naimie cana duenaillana uiñotomoi. Ie Moo ecimo naimie nano illamona, naga ra naimie mo ite; ia enruemo ie billamona, cana canollena, imana jaillanona, duere ite. Iemona Jusiñamui rafuena cai cacaja jira, duere iñedicai. ¹⁰ Ie jira omoimo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jai jitaidicue. ¹¹ Omoi jitaillamona bie rafuena fuido. Omoimo ite ucube diese feca. ¹² Ailluena ucubena omoimo iñenia, dama iesede. Omoi jitailla jira, omoimo ite ucube diese omoi fecaia, Jusiñamui mona mare; ¹³ ia omoi jitailla rana omoi ollena, omoi ucube iñeni railano, omoi jitailla baifemo omoi fecajana lloñedicue. ¹⁴ Jiaie creyentiaimo ra birui raise iñena jira, naimacina omoi canuana jitaidicue. Omoi ra ico iñenia, naimaci dinena omoina canuana jitaidicue, nana omoimo daje isoi omoi ra illena. ¹⁵ Moisés micori illa facaise ite comimona cai fueua. Naimacina jiaie iese cuega: "Jusiñamui oretaga guiga ramona ailluena guillena, nagarui damerie iraiuidimaci. Jaino janore guillena, iraiuidimaci; ia coniniri fecajamona, imaci jitailla diese nagarui nana guitimaci". Ie muidona omoimo ite ucubemona naimaci jitailla ra illena, jiaie creyentiaimo omoi fecajana jitaidicue.

Pablo Titona ñaite

¹⁶ Omoi dine Tito dane oretaiacadicue. Cue isoi naimie omoimo comecina facade. Omoina canoacade.

Naimie comecina Jusiñamui iese itataja jira, Jusiñamui iobidicue. ¹⁷ Omoï ðine jaillena naimiemo lloticue, naimie ðinena: “Jee” raite. Naimiemo nia iese cue lloñenia, omoïna naimie eo canoiacana jira, naimie omoï ðine jailleno ie comecina facade. Omoï ðine raire jaite. ¹⁸ Naimie ðiga jiaimie oretaiticue. Naga nairaimo ite creyentiaidï: “Cristo rafuena eo raise llo-fuecabit” naimiena raitimaci. ¹⁹ Cue ðiga jaillena, naimiena fetodimaci. Dueredïnomo omoï ucubena cue uillena, cue ðiga naimie jaite. Iemona cai Namana iobitaiticai. Iemona nana creyentiaidï naimacina cue canuana uiñoitimaci. ²⁰ Omoï ucubena raise cue sedajana jitaidicue. Iemona: “Pablo cai ucube fiide” omoï lluaana jitaiñedicue. “Iena Pablo raise fecañede” omoï lluaana jitaiñedicue. ²¹ Iena raise marena sedaadacue. Jusiñamui iena uiñoite. Nana creyentiaï iena uiñuana jiaï jitaidicue. ²² Iaimaiaï ðiga jiaimiena jiaï oretaiticue. Naimie Cristona eo ñnocana jaillana raise uiñoticue. Omoï rafuena naimie fidiano, jiaïe creyentiaïna omoï canuana naimie ñnuana, omoï ðine naimie eo jaicade. ²³ Omoïmo Titona bu jicanoïa, naimacimo naimiena raise llono. Danomo Cristo ðibeimo maijidicoco. Cue ðiga omoïna canode. Jiaïe iaïmaïaïna bu jicanoïa: “Jiaïe creyentiaï iaïmaïaïna fetuamona bitiaïmaïaï” llono. Cristona iobitaiacadiïaïmaïaï. ²⁴ Cueno omoï isiruillamona: “Omoï mare” omoïna cue llua-mona, naimacina raise nafue. Nana cue jitailla rafuena omoï ñnuana naimaci uiñuana jitaidicue. Omoï ucubena eenuana raise fuiduana jitaidicue. Iena omoï ñnuamona, abido naimaci bia, naimacina oretaga creyentiaïmo iena lloitimaci.

Jiaïe creyentiaïna canollena, omoï ucube olle rafue

9 Bie rafuena omoï jai uiñua jira, iena dane lloñeiticue. ² Ucubena omoï jai fecaacana uiñoticue. “Benomo Macedoniammo ite creyentiaïmo omoïri iobidicue” llocabiticue. “Navuidï añomona fecaacadomoï” llocabiticue. “Acaya railla provinciammo ite creyentiaï fecaacadimaci” llocabiticue. Iese omoï illamona, bene ite creyentiaï jiaïno creyentiaïna jiaï cano-acadimaci. ³ Iese uiñoticue; ia omoïna cue canollena Titona oretaiticue, cue jitaillacino omoï raise fuidollena. Ucubena dajena uana raire jitaidicue. ⁴ Omoï ðine Macedoniammo ite creyentiaï ðiga cue rillanona, omoï ucube dajena nia iñenia, iese omoïna cue lluaconi meidaiticue. Omoïdï jiaï meidaitomoï. ⁵ Ie muidona Tito idai jaillana jitaidicue. Ucube dajena uana omoï llua isoi, omoïna canoite. Omoï ucube dajena uana lloiacañedicue; ia omoï começiaïmona jiaïno creyentiaïna canuana omoï jitailla jira, iena jitaidicue. ⁶ Jiaïe rafuedo iena lloiticue. Janore iduaina bu ria, janore llisillana oite. Ailluena iduaina bu ria, ailluena llisillana oite. Cue llua jira, omoï ucube dajena oia, eo caïmare iñeïtomoi; ia omoï começiaï jitaillamona omoï ucubena dajena oia, eo caïmataïtomoi. ⁷ Ucube dajena omoï oia, nagamie ie começina facajamona fecaia. Naimie jitaiñenia fecañena. Naimie jitailla jira, naimie fecaia. Jiaïmie omoïna ñaï raillano, “Cai ucubena fe-

caiticaï” raiñeno; ia o jitaillamona iena feca. Começiaï iocire illamona omoï fecaia, Jusiñamuina iobitadomoï. Iena Jusiñamui jitaide. ⁸ Jusiñamui omoï jitailla baïfemo omoïmo fecarede. Nana omoï jitailla ra omoïmo naimie illamona, jiaïnomo omoï fecaia, naimacina canorenitomoï. ⁹ Jusiñamui facaina lloraïma micori iena jaie cuela: “Jusiñamuina ñnotimie dueredïnona canocabide. Mare rafuena finocana jaide”. Ie omoï finollemo, Jusiñamui omoïna canoite. ¹⁰ Ero, illimo maijirainimo Jusiñamui iduaina itatate. Iena sicuamona, monaillamona, nainomo maijirainidï naiemona guicabite. Ie isoide. Omoïmo Jusiñamui nana omoï jitailla rana jaca itataite. Iemona jiaïe creyentiaïna raise canorenitomoï. Omoï ucubena cai uia, iena jiaï creyentiaï feiñoia, Jusiñamuimo iobillacinona eo fecaitimaci. ¹² Ucubena omoï oretaia, dueredi creyentiaïna canodomoï. Omoï muidona naimaci Jusiñamuimo iobillacinona jiaï fecadimaci. ¹³ Iemona Cristona omoï raise ñnuana uiñoitimaci. Ieri Jusiñamuimo iobillacinona fecaitimaci. Omoï iga ucube facaina iobillacinona Jusiñamuimo fecaitimaci. Naimacina canoitomoï. Iemona nana jiaïe creyentiaïna canoitomoï. ¹⁴ Omoï facaina Jusiñamuimo jiaïtimaci. Omoïna naimaci isiruillamona, Jusiñamui omoïna eo canuana naimaci uiñuamona, omoï facaina jiaïtimaci. ¹⁵ Jusiñamui caina eo canua jira, iobillacinona naimiemo cai fecallena, cai uai raise iñede. Uainicaidicai. Naimie eo mare. Naimiena cai iobillasa.

Cai Nama Pablona fetua jira, ie uai Pablomo ite

10 Jiaïe rafuena lloiacadicue. Omoïmona damierie llotimaci: “Cai ðine Pablo ia, naimiedï caina jaciruite. Riire caïmo naimie rafuena lloñede; ia cai ðine naimie iñenia, riire caïmo naimie rafuena llote” llotimaci. Ero, Cristo iciricabiñena isoi iacadicue. Naimie isoi omoïmo lloiacadicue. ² Riire omoïmo lloiacañedicue. Omoïmona damierie cuena raitimaci: “Pablodï Cristona ñnoñedimie isoi icabite”. Naimaci iese nia lloia, omoï ðine cue ria, naimacimo jaciruiñeno riire lloiticue. ³ Comena iticue; ia comini ðiga cue rafue iñede. ⁴ Taïfe ðibeimo itino ðiga cue rafue illa jira, jamaï cue uai ðiga naimacina llïcaitañeiticue; ia Jusiñamui uai ðiga naimacina llïcaitaiticue. ⁵ Cristo uai ðiga Jusiñamui ðibeimo iñedino lluaçinoconi uainicaitaiticue. Abina ñedotimaci; ia Jusiñamuina uiñoiacañedinona uainicaitaiticue. Naimaci começiaïna facajacinona uainicaitaiticue, naimacina Cristo rafuena cue ñnotallena. ⁶ Cristo anamo omoï raise ia, cue lloga uaina omoï raise ñnocana jaia, omoïmona raise ñnoñedinona duere finoiticue. ⁷ Cominimo jamai eru-aillamona: “Naimaci mare” raitomoï. Jiaïcaïño: “Naimaci marañedimaci” raitomoï; ia naimaci começiaïna uiñoñedomoi. Omoïmona damie ñibai começina facade: “Cristomona cue uai illamona, Pablo baïfemo faiticue”. Cue ðinena raiticue: “Cristomona cue uai illamona, daje isoidicoco. Cue baïfemo naimie faïñede”. ⁸ Abina ñedoñedicue; ia cue abi ñedoia, ieri meidaiñedicue. Cristomona cue uai illa jira, cue uai ite,

naimie dibeimo omoi raise itatallena. Omoina cue canollena cue uai ite. Cristo dibeimona omoina itataia-caiñedicue. ⁹ Omoimo riire lollena cue uai ite; ia cue carta diga omoina jacinaitaiacaiñedicue. Omoina canoiacadue. ¹⁰ Omoimona damierie cuena raitimaci: "Cartana Pablo cueia, eo riire caimo llote; ia cai motomo naimie ia, ie uai riinide. Cristo rafue raise lluana raise uiñoñede". ¹¹ Iese iñedicue. Omoi motomo cue ia, cartana cue cueia, daje isoi llofuecabitue. ¹² Omoimona damierie coniniri raitimaci: "Maredicai". Iese coniniri naimaci comeciaina facaia, abina uiñoñedicue. Naimaci isoi cue illemo cue comecina fa-cañedicue. ¹³ Jusiñamui cue maijiana cuemo llote. Naimie llua baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidue. ¹⁴ Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue. ¹⁵ Jiaie llofueraini llofuaimona buena oiacañedicue. Cristo rafuena omoi inocana jaillamona, omoi motomo cue illamona, Jusiñamui jitailla diese omoina cano-acadicue. ¹⁶ Jiaie nairai illanuaimo Cristo rafuena nia lloiacadicue; ia nainomo jiaie llofueraima llofuaimona buena oiacañedicue. ¹⁷ Bu abina iedoiacania, cai Nama finua rafueri naimie abina iedua. ¹⁸ Ie llofuia diga bu abina iedoa, Jusiñamui naimie llofuiaicunona: "Mare" raiñeite; ia Jusiñamui finoca rafueri bu abina iedoa, Jusiñamui naimiena: "Mare" raite.

Pablodí Cristo oretaganona abí caitadinona llote

11 Abina cue raise uiñoñenia, cue diga iciriñeno. Cue lluomo nia cacarei. ² Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Iima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina fe-caacadue. Omoimo jeacino iñena isoilla jira, omoina Cristomo fecaacadue. ³ Jiaie rafuemo omoi comeciaina facacana omoi jaillamo jacinaitue. Jiaie jaiona eru-aillamona, Taife Eva micorina jifue. Jiaie llofueraini Cristo rafuedo omoi raise jaiñenana itatajamo jacinaitue. ⁴ Diga llofueraina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedicue. Jusiñamui joreño omoimo illana cue isoi llofuecabiñedicue. Cue mare lloga rafue isoi llofuecabiñedicue; ia naimacina jaca feiñotomoi. Ie jira Cristo dibeimona omoi jaillemo jacinaitue. ⁵ "Cristo oretaganodica" raitimaci; ia naimaci cue baifemo faiamo cue comecina facañedicue. ⁶ Naimaci isoi rafuena jino llua eo uiñoñedicue; ia Cristo rafuena eo raise uiñoticue. Nana cue finoca rafuemonona omoina iena diga icaiño uiñotadicue. Uanaicinona omoina jaca llofuecabitue. ⁷ Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijidue. Iese cue illa jira, damieriemona marañede rafuena finodicue; ia cuemona eo mare rafuena jai uiñotomoi. Iemona abina jai uiñotomoi. ⁸ Omoina cue canollena, jiaie creyentiamona ucubena feiñoticue.

Omoi facaina naimacimona feiñoticue. ⁹ Rana cue jitailla facaise omoimona ucubena jicañedicue; ia Macedoniamona bite creyentia cuena canodimaci. Omoimona navui ucubena cue oñena jira, birui cue oñena jira, cuemona ibana oñetomoi. ¹⁰ Cristo cue illana uiñuamona, naimie uanaicnodo cue jaillamona, nana Acaya railla provinciamona iena jaca lloiticue. ¹¹ Omoina cue isiruilla jira, ucubena omoina jicañeiticue. Jusiñamui cue comecina raise uiñote. ¹² Abina iedumona omoi motomo damierie: "Pablo isoi llofuetica" raitimaci. Ucubena omoimona feiñotimaci. Naimaci isoi iacañedicue. "Daje isoi maijidica" naimaci raiñellena, ucubena omoimo jaca jicañeiticue. ¹³ Cristo oretaganona abí caitadinodimaci. Cristo dibeimo raise maijinedimaci. "Cristo caina oretate" raicabitimaci; ia Cristo naimacina oretañede. Jifuecana jaidimaci. Cristo oretaganona itimacina jaidimaci. ¹⁴ Ieri rajicañedicue. Cominina jifuellena, Taifedi Jusiñamui jaienicina abí caitadimiena jaicabide. ¹⁵ Taife dibeimo itinodi Jusiñamui ie mare rafuena llofueraina jaicabidimaci. "Cai lloga rafuedo omoi jiaie, Jusiñamui naimie marebicaitomoi" llofuecabitimaci. Naimaci finolle rafue diese Jusiñamui naimie duere sefuitimaci.

Cristo oretaganona naimie illa jira, Pablo duere sefuidue

¹⁶ "Pablo abina uiñoñedimie" raillamo omoi comeciaina facañeno; ia iese cuena omoi comeciaina facaia, cue lluomo nia cacarei. Omoi motomo ite llofueraini abina iedua isoi, iacañedicue; ia janore cuemo iticino diga abina iedoticue. ¹⁷ Abina iedumona cue lloia, cai Nama Cristo isoi lloñeiticue. Naimie cuemo llua jira, iena lloñeiticue; ia abina uiñoñedimie isoi lloiticue. ¹⁸ Omoi dine damierie llofueraini naimaci illa diga abina iedua isoi lloiticue. ¹⁹ Abina uiñoñedicue; ia: "Abina eo raise uiñotica" omoi llumona, naimaci llofuiaicunona cacacabidomoi. ²⁰ Naimaci anamo omoina itataiacadimaci. Omoimo ucubena jicacabidimaci. Omoina ocuicabidimaci. Icirillamona, omoi uiecuaina bofedimaci. Iese omoina finocabidimaci; iadedi buena naimacimo finoñedomoi. Ibana oñedomoi. ²¹ Iese omoimo finoñedicue, omoina cue jaciruilla jira. Cue illana omoimo ja lloiticue. Nibaie abina raise uiñoñedicue; ia naie llofueraini isoi cue illa diga abina iedoticue. ²² Omoi motomo ite damierie llofueraina ja lloiticue. Judíuai uaido ñaitimaci. Iena jiaie ñaitue. Judíuai nairai imaci. Daje isoidue. Judíuai nairai imedicue. Abraham micori uruaidimaci. Jiaie naimie micori uruedue. ²³ "Cristo dibeimo maijidica" raitimaci. Abina uiñoñedimie isoi llotue; ia naimaci baifemo Cristo dibeimo maijidue. Naimaci baifemo duere sefuidue. Diga icaiño cárcelmo itue. Diga icaiño fajamona duere sefuidue. Diga icaiño niadedi fiodaicabitue. ²⁴ Judíuai comini cinco digacaiño cuena fatimaci. Naga icaiño treinta y nueve digacaiño rao diga cuena jicuidimaci. ²⁵ Dacaiño amani radosi diga cuena fatimaci. Nofici diga cuena dacaiño fairinotimaci. Dacaiño amani bote diga namo anabaitue.

Darui naio monaillaimo botedo jamai fuiri baiticue. ²⁶ Eo jacirede illedo jaicabidicue. Fiiriruidino eo illa jira, jaciruoicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaimo cue ia, diga icaíño duere sefuidicue. Naisodo cue macaria, duere sefuicabidicue. Monaillaido cue jaia, duere sefuicabidicue. Cristo rafuena llorainina abi caitadinomona jiaí duere sefuicabidicue. ²⁷ Cue ucube ollena, duere maijicabidicue. Diga icaíño raise iniñedicue. Diga icaíño aime guiticue. Rollimemona duere sefuicabidicue. Iniroininamona jiaí duere sefuidicue. ²⁸ Diga jiaie rafuemona duere sefuicabidicue. Duenaillamona naga creyentiaí illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue. ²⁹ Nie creyente Cristo rafuedo nia raise iñoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue. ³⁰ Cue abina iedoiacania, jamai bue isoidimiedicuena lloiacadicue. ³¹ Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue llumana uiñote. ³² Cue illana nia lloiacadicue. Damasco jaie creyentena cue jailla facaise cuena gaitatallena, Aretas railla illaima anamo ite gobernadori nairai llaiga nasena sedatate; ³³ iadedi llaigafo ecimo ite jofo a ite ventanamona cirigai isoide diga ana jaillanona, naiemona jillodicue.

Pablo nicairilla isoide rafuena ciode

12 Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiaí lloiacadicue. ² Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoí cue joreño, cue abi diga, uillana raise uiñoñedicue. Nibaí dama cue joreñoña uite. Dama Jusiñamui iena uiñote. Naimie mare illanomo iticue. ⁴ Nainomo cue ñainina rafuena cacadicue. ⁵ Ie diga abina iedoñeiticue. Cue jamai bue isoidimie diga abina iedoiticue. ⁶ Uanaicinona cue llumona cue abina iedoiacania, tainona abina iedoñeiticue. Omoí cuena ciuamona, cue lloga rafuena omoí cacajamona, cuena uiñotomoi. Ie baifemo cuena omoí comeciaina facajana jitañedicue. ⁷ Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoí Jusiñamui cuemo illamona, duere sefuidicue. Taife jaienici cuena duere finua isoí, duere sefuicabidicue. ⁸ Cuemona iena naimie oni oretallena, cai Namamo dacaiño amani jiidicue; ⁹ ia cuemo llote: "Ona jillotañeiticue; ia cue ona duenaillacinodo jaca ocuiñoitio. O abi eo mairiñenia, ona cue canuana raise uiñoitio" llote. Cue abi eo mairiñenia, ierí iocire iobiticue. Naimie uaido cue jaillamona, cuena naimie canuana raise uiñoiticue. ¹⁰ Cristo muidona duere cue sefuia, cue comecina ocuiñoiticue. Cue jamai bue isoia, cuena bu jeare ñaia, bumona

duere cue sefuia, cuena bu duere finoia, cue comecina ocuiñoiticue. Cue duere sefuia, cue Nama cuena eo canode.

Pablo Corintomo ite creyentiaimo comecina eo facade

¹¹ Abina uiñoñedimie isoí iticue. Cue illana cue cuia jira, abina uiñoñedimie isoí iticue; ia iese cuena itatatomoi. Cuena riidoñedomoi; ia jiaíno eo mare railla llofuerañina raise feiñotomoi. Jamai bue isoidicue; ia naimaci cue baifemo fañedimaci. ¹² Omoí motomosiño rafuena cue finua jira, Jusiñamui cuena oretajana uiñotomoi. Cristo rafuena sefuiruiñeno omoí motomoi iticue. ¹³ Cuemona duere sefuiñedomoi. Jiaie creyentiaí omoí baifemo faiamo cue comecina facañedicue. Nibaí iese omoí comeciaina facadomoi. Omoímo ucubena cue jicañena jira, jiaie creyentiaí isoíñedomoi. Iena omoí gaiñenia, iena feita. Cue diga iciriñeno.

¹⁴ Menacaiño navui omoí dine jaidicue. Omoí dine dane jaiacadicue. Omoímo ucubena jicañeiticue. Omoí rana jitañedicue; ia Cristo díbeimo omoí illana, naimiena omoí raise iñuana jitañedicue. Cue uruiaí isoidomoi. Rana eenoñedomoi, omoí mootiaí iena; ia omoí mootiaí rana eenotimaci, omoíena. Ie isoide. Cue uruiaí isoí omoí illamona, omoímona rana jitañedicue; ia omoímo rafuena iacadicue. ¹⁵ Nana cuemo ite ra omoímo fecaacadicue. Nana cue comecimo iticinona omoímo jiaí iacadicue. Omoína eo isiruiticue; ia cuena janore isiruitomoi. ¹⁶ "Caimona ucubena jicañedio; ia jifuecana caimona otio" raicabitomoi. ¹⁷ Ero, omoí dine menamiena cue oretajamona, omoímona ¿nie isoide rana otiaímaiaí? ¿Niese omoína jifuetiaímaiaí? ¹⁸ Omoí dine Titona oretaticue. Jiaisie creyente imiema Tito diga oretaticue. ¿Niese Tito omoína jifuate? Omoímo coco comecina daje isoí facadicoco. Daje rafuedo jaca jaidicoco. Omoína jaca jifueñedicoco. ¿Niese omoí comeciaina raitomoi? ¹⁹ "Caimona ie abina riidote" cuemo nibaí comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo díbeimo omoí raise illena, naimiena raise omoí iñollena, bie rafuena llocabiticue. ²⁰ Omoí dine cue ria, cue jitailla isoí omoí iñenamo jacinaíticue. Iese omoí ia, omoí diga cue illana jiaí nibaí gaiñeitomoi. Ierí cue comeci jarire ite. Nibaí nia uaina uaitatomoi. Nibaí nia abina iedotomoi. Nibaí nia iciricabitomoi. Nibaí nia omoí rana caidicabidomoi. Nibaí nia jiaínona jeare ñaicabitomoi. Nibaí nia jiaíno joreñoña ñaicabitomoi. Nibaí nia abina uradoidomoi. Nibaí daje isoí comeciaina nia lloíñedomoi. Omoí iese illari cue comecidi jarire ite. ²¹ Omoí dine dane cue ria, omoí muidona Jusiñamui cuena meidaitajamo jacinaíticue. Cristo díbeimo omoí raise iñenia, sunaiticue. Jearede rafuena omoí nia fainonocaiñenia, omoí aiñede riño diga illana omoí fainonocaiñenia, omoí iniñede iima diga illana omoí fainonocaiñenia, sunaiticue.

Iraicaiño Pablo naimacina llofuate

13 Menacaiño omoi ðine navui jaidicue. Omoi ðine dane jaiticue. Coninimo omoi rafue ia, iena raise fino. Moisés micorí jaie llote: “Mena iaímaiaí daje isoi lloillamona, daje amani daje isoi lloillamona, maraiñedicinona finodimiena duere finua”.

² Maraiñede rafue finodimono navui riire lloticue. Nana omoimo riire lloticue. Omoi ðine navui cue illa isoi, iena dane riire lloiacadicue. Omoi ðine cue ria, naimaci comeciai iuai nia meidoñenia, naimacina duere finoiticue. ³ Iemona Cristo uai cuemo illana uiñoitomoí. Naimiena omoi ñnuamona, naimie uai siñonana uiñotomoí. Jamai uaido naimie omoína jillotañede; ia ie siño uaido omoína jai jillotate. ⁴ Jamai bue isoidimie isoi cruzmo naimie fiodaite; ia fiodaillamona Jusiñamui uaido jillode. Cristomo cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue.

⁵ Cristona ñnocana omoi raise jaillemo omoi comeciaina faca. Cristo jitaillacino omoi finollemo comeciaina faca. Cristomo omoi duillamona, Cristo omoi diga illana uiñotomoí. Cristomo omoi duiñenia, naimie omoi diga nia iñede. ⁶ Cristo omoi diga illana omoi uiñuamona, Cristo uai cuemo illana jiaí uiñoitomoí.

⁷ Maraiñedicino omoi finocana jaillana jitaíñedicue. Jusiñamuimo iena jiiiticue. Omoi comeciai iuai omoi

meidoñenia, Cristo uai diga omoína duere finoacaiñedicue. Omoi comeciai iuai meiduana jitaídicue; ia Cristo uai diga omoína cue duere finoñenia, Cristo uai cuemo illana nibai uiñoñeitomoí. ⁸ Cristomona cue uai illana omoi uiñollena, maraiñedicino omoi finuana jitaíñedicue. Mare rafuena omoi finocana jaillana jitaídicue. Iena finocana jiaí jaiacadicue. ⁹ Cristo rafuena ñnocana omoi raise jaia, iobidicue. Omoimo cue riire lloñenia, iobidicue. Cristo jitaillacino eo raise finocana omoi jaillana jicabidicue. ¹⁰ Birui bie rafuena cueticue. Omoi ðine iñedicue; ia bie cartana omoi feiñua mei, omoi comeciaina raise finuana jitaídicue. Cai Namamona cue uaina feiñoticue. Iedo omoimo riire lloiacaiñedicue; iadedi iedo naimie dibeimo omoi raise itataiacadicue. ¹¹ Cue amatiaí, bie carta cuiana jai fuidoacadicue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiaí comeciai daje isoi lloicana jai. Coniniri uri omoi i. Iemona Jusiñamui omoína isiruillana uiñoitomoí. Jusiñamui omoína uri itatajana uiñoitomoí. ¹² Nana creyentiaína eo caimare uaido. ¹³ Nana cue diga ite creyentiaí imaci uaina oredimaci. ¹⁴ Cai Nama Jesucristo omoína jaca duenaite. Jusiñamui omoína jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitaídicue. Mai. Macaibaite. Pablodicue.

GÁLATAS

Uaiduacino

1 Galaciamo ite creyentiai, omoi dine bie carta oredicue. Pablodícue. ¿Nigacino? ¿Nie isoidomoí? Omoimo cue uai oredicue. Nana cue díga ite creyentiaidi imaci uaina jiai oredimaci. Jesucristo fetocamiedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue llollena, cuena orediaimaiaia. Comini cuena oreñedimaci. Cue lloga uaina cominimona jiai oñedicue. ³ Cai Moo Jusiñamui, cai Nama Jesucristo díga, omoína jai duenaite. Iena uiñocana mai omoi jai. Omoína uri jai itatatiamaiaia. Iena omoi uiñocana mai omoi jai. ⁴ Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite. ⁵ Cai Moona jaca cai iobillasa. Iena jitaídícue.

Pablo lloga rafuedi jaca dajede

⁶ Jusiñamuina raire omoi fañonocaillari rajicaidícue. Cristo díbeimo omoi illena, omoína Cristo duenaillamona, Jusiñamui omoína jai uaidote; iadedi omoi jeacinomona omoi jilloillena, jiaie rafuedo jai jaidomoí. ⁷ Jiaie mare rafue jaca iñede; iadedi Cristo rafuena jiaiforiedo llofuiamona dajerie omoi comeciaina uri itañedimaci. ⁸ Jesucristo rafuena omoimo jaie lloticaia. Jiaie rafuena lloticaidena, Jusiñamui riicaillafue anamo nia cai illasa. Jusiñamui jaienici jiaie rafuena llotena, Jusiñamui riicaillafue anamo jiai naimie illasa. ⁹ Omoimo jaie iese llotícue. Dane ja lloitícue. Cai llua isoi Cristo rafuena omoimo bu lloñenia, Jusiñamui riicaillafue anamo naimie illasa. ¹⁰ Comini cueri iobillana jitaíñedicue; iadedi Jusiñamui cueri iobillana jitaídícue. Cominina iobitaiacadícuena, Cristo díbeimo nia majiñedicue.

Ie oretagamiena jaillena, Cristo Pablona fetua rafue

¹¹ Cue amatiaia, cue lloga rafuena omoi raise uiñuana jitaídícue. Omoi jeacinomona omoi jilluana jaie llotícue. Bie rafuena comini comeciiaí facajacinomona oñedicue. ¹² Cominimona oñedicue. Bu jaca cuena iena llofueñede; iadedi Jesucristo cuena uiñotade. ¹³ Jesucristona nia cue ñnoñenia, cue judíuai einamací lloga rafuedo cue jaillana jai fidídomoí. Cristona ñnotinona jaie eo duere finodícue. Naimacina fuidoacadícue. ¹⁴ Cue einamací jaie llua isoi, Jusiñamuina raise ñnotícue. Naimaci llogacinauido eo duere cue jailla jira, daje facai cue díga itino baifemo ñnotícue; ¹⁵ iadedi

nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote. ¹⁶ Omoi judíuaiñedomoimo naie Jito rafuena cue llollena, cuemo ie Jitona jaie bairetate. Naie facaise cuemo jai suide rafuena bu díga ñañedícue; ¹⁷ ia Arabia railla enñuemo jaidícue. Nainomo comini iñena jira, cuemo jai suide rafuemo comecina facadícue. Jerusalémo Jesucristo nano oretagano dine jaiñedícue. Cuena Jesucristo nia oretañenia, naimacina orede, ie uai llollena. Arabia railla enñuemo cue illa mei, Damasco railla nairaimo abido jaidícue. ¹⁸ Cristo cuemo bairia facaise tres años illamona, naimiena cue uiñollena, Jerusalémo Pedro dine jaidícue. Naimie ñnomo quince dígarui itícue. ¹⁹ Naie facaiseconi nana Jesucristo oretaganona cioíñedícue. Pedrona ciodícue. Jacobona jiai ciodícue. Naimiedi cai Nama ie ama Jiañona cioíñedícue. ²⁰ Omoimo nana cue ciegacinodi uanaicino. Tainona cueñedícue. Tainona cue cueia, Jusiñamui cuena duere finuana uiñotícue. ²¹ Jerusalémo cue illa mei, Siria railla enñuemo jaidícue. Cilicia railla enñuemo jiai jaidícue. ²² Judeamo ite Cristona ñnotinodi cuena nia cioíñedimaci. ²³ Cuena iese fidídimaci: “Navui caina duere finocabidimiedi Jesucristo rafuena jai llote. Jesucristona cai ñnuana navui jitaíñede. Caina fuidoacade”. Jiaie cue finoca rafuena fidiñedimaci. ²⁴ Ie fidiñamona, cueri Jusiñamuimo iobillacinona jai fecadimaci.

Jerusalémo Pablo jailla rafue

2 Catorce años illanona, Jerusalémo dane jaidícue. Bernabé cue díga jaide. Titona uitícue. ² Jusiñamui cuemo llua jira, nainomo ite creyentiaimo jaidícue. Judíuaiñedino Cristo rafuena jai ñnuana cue llollena, jaidícue. Cue llofuiana naimaci raise uiñollena, creyentiaia illaicominimo anado nano llotícue. Cue llofuiana: “Mare” naimaci raillana uiñoiacadícue. Tainona Cristo rafuena cue lloi raillanona uiñoiacadícue. Naimaci díga cue ñaia mei, cue llofuiana: “Mare” raitimaci. ³ Tito cue díga ite. Naimiedi judío nairai imieñede; iadedi naimaci abina detacabilla isoi, creyentiaia illaicomini ñnena naimie abi detatajana lloñedimaci. ⁴ Creyentiaina abi caitadino billa jira, Tito abina detatajana siadoticaia. Naimacina cai uaidoñeno bitimaci. Moisés micori llogacinauai anamo cai iñenana naimaci uiñollena, bitimaci. Cristo Jesús cai ñnuua jira, Moisés micori llogacinauido jai jaiñedicaia. Moisés micori llogacinauai anamo caina dane itatallena, iena uiñoiacadimaci. ⁵ Cai mare rafuena jiaiena jaca meidoñellena, naimaci ñañana dallu cacareñedicaia. Uanaicinsona omoi uiñua-

na jitaídicaí. ⁶ Naie creyentiaí illaicomini omoimo llo-lena, cuemo jiaie rafuena lloñedimaci. Illaicomini na raillanodimaci; iadedi cuemona jamaí bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede. ⁷ Cue llofuiana rairuiñedimaci; iadedi creyentiaí illaicomini cuena Bernabé diga marena feiñotimaci. “Daje isoi comeciaina facadicaí” raillamona, cue llofuiana: “Jai mare” raitimaci. Creyentiaí illaicomini di Jacobo, Pedro, Juan digamie. Judíuai dine Pedrona Jusiñamui oretaja isoi, cue lluamona judíuaiñedino dine Jusiñamui cuena oretajana uifotimaci. Pedro lluamona Jusiñamuidi ailluena judíuaina creyentiaína itatate. Cue lluamona, Jusiñamuidi ailluena judíuaiñedinona creyentiaína jiaí itatate. Iemona Jusiñamui uai cuemo illana jai uifotimaci. Judíuaiñedinomo Jesucristo rafuena llocana nia coco jaillana jitaídimaí; iadedi judíuaimo Jesucristo rafue llocana nia jaidimaci. ¹⁰ Daje rafue cocomo llotimaci. “Duerede creyentiaína canocabi” llotimaci. Iena iocire finoacadícue.

Antioquíamo suide rafue

¹¹ Antioquíamo cue jailla mei, Pedro nainomo jiaí jaide. Nainomo Pedro bia, maraiñedifue naimie finua jira, naimie uiecomo naimiemo riire llotícue. ¹² Nainomo Pedro nano rilla mei, nana creyentiaí diga nainomo naimie guisoide. Judíuai creyentiaí diga, judíuaiñede creyentiaí diga, danomo guisoide. Iemei Jacobo dinena damerie bitimaci. Moisés micori llogacínodo jaisoidimaci. Moisés micori llogacínodo Pedro jai jaiñede; iadedi naimaci billa mei, naimacina naimie jaciruilla jira, judíuaiñede creyentiaí diga Pedro jai guiñede. Ie ñnoga rafuedo naimie jai jaiñede. ¹³ Naimie iese illamona, judíuai creyentiaídi judíuaiñede creyentiaí diga jai jiaí guiñedimaci. Pedro illa isoi, Bernabé iedo jiaí jaide. ¹⁴ Naimaci iese illa jira, Jesucristo rafuedo raise jaiñedimaci. Uanaicínodo jaiñedimaci. Iena cue uíñua jira, nana comini uicomo Pedromo llotícue: “Judío nairai imiedio; iadedi o jeacínomona o jilloillena, cai einamaci lluacínodo birui jaiñedio. Ie jira, ¿bue ñellena judíuaiñedino cai einamaci lluacínodo jaillana jai jitaídio?”

Judíuaidi creyentiaína jailla mei, Moisés micori llogacínuaído jai jaiñedimaci

¹⁵ Nia llotícue: Judíuaiñedinodi Moisés micori lloga uaina jaie uifñedimaci. Caidi judíuaina jeicigacaí. Ie muidona Moisés micori llogacínuaí anamo jaie jeicigacaí. ¹⁶ Iese iticaí; iadedi Moisés micori llogacínuaído jaillamona, Jusiñamui jitailla isoi, jaca bu marebicaíñede. Jusiñamui jitailla isoi, Jesucristona ñnuamona marebicaídicaí. Iena uifñoticaí. Ie jira Cristo Jesúsna ñnoticaí, cai marebicaillena. Cai marebicaillena, Moisés micori llogacínuaína ñnoñedicaí. Moisés micori llogacínuaína ñnuamona, jaca buna marebificainide. ¹⁷ Jusiñamuimona cai marebicaicallena, Cristona cai ñnuamona jeacino finoraiñedicaí. “Cuena ñnuamona,

marebicaítomoi” Cristo iese llofueuide. Naimie llua isoi cai marebicaíñenia, cai jeacínomona nia cai jilloñenia, Cristo muidona; iadedi iese iñedicaí. ¹⁸ Moisés micori llogacínuaí jai jamaíñocaidícue. Ie jira naicínuaí dane abido cue oia, iena birui cue ñnoñena jira, jai jeacino finoraimiedícue. ¹⁹ Iemona cue marebicaíñena jira, Moisés micori llogacínuaí cuemo jai duiñede. Ie anamo jai iñedícue. Ie muidona Jusiñamui llogacínuaído jai jaidícue. Cristo anamo jai itícue. ²⁰ Naimie dibeimo jai itícue. Cristo cuemo ite. Cristo cuena namatade. Jusiñamui Jitona cue ñnocana jai jaidícue. Cuena isiruillamona, naimie jitaillamona, cueri fio-daite. ²¹ Jusiñamui caina duenaillana jamaíñedícue. Jusiñamui jitailla isoi, Moisés micori llogacínuaína cai ñnuamona marebicaídicaína, Cristo tainomo niade fio-daite.

Jesucristona ñnuamona judíuaidi Jusiñamui Joreñona feiñotimaci

3 Gálatas imaci, abina jai uifñedomoi. Jiaíno omoína birui jifueite. Omoímo Jesucristo cruzmo fiodailla rafuena jaie marefodo llotícue. Iena raise cacadomoi. ² Ie jira omoímo biena jicanoiacadícue: ¿Ñiese Jusiñamui Joreñona jaie feiñotomoi? Moisés micori llogacínuaído jaillamona iena feiñofñedomoi. Jesucristo rafuena omoi cacajamona, ñnotomoi. Ie mei Jusiñamui Joreñona feiñotomoi. ¿Ñiese birui abina uifñedomoi? ³ Omoi marebicaillena, Jusiñamui Joreño omoímo jai ite; iadedi Moisés micori rafuena dane omoi jaiacanamona, omoi jiaie finolle rafuemona jai marebicaíacadomoi. ⁴ Jusiñamui Joreñomona diga marecínuaína feiñotomoi; iadedi iena jai jitaíñedomoi. Iese omoi illana ñnoñedícue. ⁵ Dane jicanoitícue: ¿Ñiese Jusiñamuidi ie Joreño omoímo fecade? ¿Ñiese siño rafuena omoíri finode? Moisés micori llogacínuaído omoi jaillamona ie Joreño omoímo fecañede. Moisés micori llogacínodo omoi jaillamona, siño rafuena omoíri finoñede; iadedi Jesucristo rafue omoi cacajamona, iena omoi ñnua jira, ie Joreñona fecade. Iemona siño rafuena omoíri jiaí finode.

Abraham micori Jusiñamuina ñnua muidona marebicaide

⁶ Abraham micori ie rafuena llotícue. Naimie micorimona fueoiticaí. Moisés micori naimiema cuete: “Abraham micori Jusiñamuina ñnua jira, Jusiñamuimona naimiedí marebicaide”. ⁷ Iena cai cacajamona, Abraham micori isoi cai ñnuamona, naimie ua comini cai illana uifñoticaí. ⁸ Jusiñamuidi judíuaiñedino íco marebicaillena jaie uifñote. Naimiema íco naimaci ñnollena jaie jiaí uifñote. Iena uifñuamona, Jusiñamuidi íco sülle rafuena Abraham micorimo jaie llote. Mare rafue naimiemo llote: “Nana cuena o isoi ñnotinona marebicaítaitícue” llote. ⁹ Abraham micoridi ñnote. Jusiñamui naimiema marebicaítate. Ie isoide. Nana Jusiñamuina ñnotinona marebicaítate; ¹⁰ iadedi nana Moisés micori llogacínuaído jaidíno jai faidobidimaci. Moisés micori

iena jaie cuega: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicai. ¹¹ Biena uiñoticai. Moisés micori llogacinuaido jaillamona, Jusiñamui mona jaca buna marebicaiñede. Jusiñamui facaina lloraima iena jaie cuete: “Jusiñamuina ñnuamona marebicaidimaci. Ie mei jaca iitimaci”. ¹² Moisés micori llogacinuai daje isoñede. Nana Moisés micori llogacinuaina ñnuamona comini marebicaide. Moisés micori iena jaie cuega: “Cue lloga uai ñnuamona, marebicaidimaci. Iemei jaca iitimaci”. Jusiñamuina ñnuana lloñede: ia ie lloga uai ñnollena cominimo llore. Nana ie lloga rafuena ñnuamona, cominidi marebicaidimaci.

¹³ Moisés micori llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuega: “Cruzmo cuinacami Jusiñamui mona jai faidobide”. ¹⁴ Jusiñamuina naimie ñnua jira, Abraham micori jaie marebicaide. Jesucristo fiodailla muidona, naimiena judíuainedino ñnuamona, Abraham micori isoi marebicaidimaci. Jusiñamuidi ie Joreñaona caimo fecallena jaie llore. Ie muidona Jesucristona ñnuamona, Jusiñamui Joreñaona birui feñoticai.

Jusiñamui lloga rafue

¹⁵ Cue amatiai, bie rafuemo comeciaina faca. Nie isoide rafuena menaimie finoacania, naie rafuena feitañellena, rabemo cuetiñaimaiaia. Iaimaiaia mamecina nainomo cuia mei, jiañruído damie naie rafuena jiañfo dama meidonide. ¹⁶ Ie isoide. Jusiñamuidi Abraham micorimo ico suille rafuena jaie llore. Iena naimie llua jira, iena meidonide. Ie uruaimo ico suille rafuena lloñede; ia daje uruemo ico suille rafuena llore. Cristona ñaite. ¹⁷ Biena lloiacadicue. Naimie jilloillena, Jusiñamuina naimie ñnuamona, Jusiñamui Abraham micorimo rafuena llore. Cuatrocientos treinta años illanona, Moisés micorimo Jusiñamuidi jiaie rafuena llore; iadedi Abraham micorimo jaie lloga rafuena meidoñede. ¹⁸ Jusiñamui llua jira, Abraham micori jillode; iadedi Moisés micori llogacinuaido cai jaillamona, cai jilloiadedi, Abraham micori isoi jilloñedicai. ¹⁹ Iese itena, ¿bue ñellena Jusiñamui Moisés micorimo jiaie rafuena llore? Naiemona jeacinaona cai uiñollena, iena llore. Naie rafue ite, Cristo enñruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena oñedicai. Jusiñamuidi ie jaienisaimo naie rafuena llore, Moisés micorimo iena llollena. Ie mei Moisés naie rafuena cominimo llore; ²⁰ iadedi Jusiñamuidi Abraham micorimo ie rafuena atona llore. Jiaimie iese lloñede, Abraham micorimo iena llollena.

²¹ Moisés micorimo Jusiñamui rafuena llore; ia naiemona Abraham micorimo llogacino nia saiñede. Cai jilloillena, cai jaca illena, Moisés micorimo Jusiñamuidi rafue ñnuana llotena, naie rafuena cai ñnuamona marebicaidicai; ²² iadedi Moisés micori cuega-

fuiaidi nana comini jeacino anamo illana llore. Moisés micori llogacinuaido jaillamona, jeacino anamona jilloñedicai. Jesucristona cai ñnuamona Jusiñamui llua isoi, jeacino anamona jilloñedicai. ²³ Jesucristona ñnuana nia cai uiñoñenia, Moisés micori llogacinuai anamo iticai. Jesucristo billamona, naimiena ñnuana uiñoticai. ²⁴ Moisés micori llogacinuaidi cai lletarafue. Cristo ñibeimo cai illena caina lletade. Cristona cai uiñuamona, naimiena cai ñnuamona, marebicaidicai. ²⁵ Naimiena ñnuana jai cai uiñuamona, naie lletarafuena jai oñedicai.

Abraham micori ua uruiai

²⁶ Cristo Jesúsna ñnuamona, nana omoi Jusiñamui cominidomoi. ²⁷ Cristo ñibeimo omoi illamona, bautizagaomoi. Iemona naimie Moodi jiañ omoi Moo. ²⁸ Jusiñamui mona dajena itomoi. Naimiedi nana cominina feñote. Judíuaina omoi illamona, omoina feñote. Judíuainedino omoi illamona, omoina feñote. Mullaiaina omoi illamona, omoina feñote. Mullaiañednodomoidena, omoina feñote. Iññiaina omoi illamona, omoina feñote. Riñoniaina omoi illamona, omoina feñote. Jesucristona omoi ñnuana jira, jaca damacidomoi. ²⁹ Cristomo omoi jai duiadedi, Abraham micori cominidomoi. Ie jira Jusiñamui Abraham micorimo lloga rafuemo jiañ jainaiaidomoi.

Jusiñamui uruina jaidicai

4 Moisés micori llogacina dane lloiticue. Jiaie rafuedo iena lloiticue. Riañ uruiai moo fiodailla mei, ie moo raruiadi nano doforaimo fiebide. Naie nano doforaimie uruena, naimie mamecido naimie mo jide. Naimie mo nia raise jiañede. Naimiedi nia jamai ite isoide. Naimie ie jofomo mullaiañ isoi ite. ² Naimie moo llua ñnori jiañno anamo naimie ite. Ie moo raruiadi jiañno anamo jiañ ite. Naimie jai eimiena illemona naimie moo raruiadi naimie mo raise jai duite. ³ Jaie daje isoidicai. Uruiai isoidicai. Cai jaiagai llogacinuai anamo iticai; ⁴ iadedi ie jitaññruimo Jusiñamuidi ie Jitona orede, naicinomona caina jilloitallena. Jusiñamui uruina cai jaillena, ie Jitodi naicino anamo riñomona jeiciga. ⁶ Naimie uruiaidicaina jira, Jusiñamuidi ie Jito Joreño cai comeciaino orede. Naimiena cai feñuanona, naimiedi caina Jusiñamuina: “Cai Moo” raiatate. ⁷ Ie jirari jiañno anamo jai iñedomoi; iadedi Jusiñamui uruiaidomoi. Jusiñamui uruiaidomoina jira, nana naimie lloga rafue omoimo jai duide.

Moisés micori llogacinuai anamo omoi jaiia, danomo abido jaidomoi

⁸ Jaie Jusiñamuina nia omoi uiñoñenia, ua jusiñamui laiñede ra anamo itomoi. Naie isoide rana sedauidomoi. ⁹ Jusiñamuina jai uiñotomoi. Naimie omoina jai uiñote. ¿Bue ñellena omoina marebicaitañede rafuedo dane jaiacadomoi? Omoina jilloitañede rafue anamo dane iacadomoi. ¹⁰ Judíuain comini rafuena ñnocabilaruimo jiañ ñnocabidomoi. Iemona: “Marebicaiticai”

raillanona iese finocabidomoi. ¹¹ Cue lloga uai omoi finoñena jira, omoimo tainona jai lloticue. Nibaí jai tainomo maijdicue.

Pablo naimaci diga illana uibiñote

¹² Cue amatiai, omoi dine nano cue jaia, Moisés micorí llogacino anamo iñedomoi. Naie llogacino anamo jaie iticue; ia birui ie anamo iñedicue. Birui cue illa isoi omoi illana jiai jitaidicue. Omoi dine cue nano ia, cuena raise feñotomoi. ¹³ Cristo rafuena omoimo nano cue llua facaiseconi duidicue. Iena uiñotomoi. ¹⁴ Cue duico omoimona jacire eruaide; iadedi cuena jearuiñedomoi. Jusiñamui jaienici omoi dine billa isoi, cuena feñotomoi. Jesucristo omoi dine billa isoi, cuena jiai feñotomoi. ¹⁵ Jaie caimare iticai. ¿Niese birui cue diga caimare iñedomoi? Cuena omoi canoitena, cuemo fecallena, omoi uisi jaie jino juiconoiacadomoi. ¹⁶ Omoimo jicanoiacadicue: ¿Uanaicinuai omoimo cue llua jira, omoi enoillamiena jai jaidicue? ¹⁷ Moisés micorí llogacinuaido jaidino omoina eo nabairitimaci; iadedi mare rafuena finoacaiñedimaci. Naimaci diga omoi nabairillena, cue diga omoi nabairillana jai jitaiñedimaci. ¹⁸ Mare comeciainona cuena omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiai mare. ¹⁹ Cue uruai, Cristo omoi comeciaina raise namataja dinori, omoi cue comeci eo duere dane llicidaite. ²⁰ Omoi diga ja iacadicue, omoi diga atona raise ñaillena. Omoimona are cue illa jira, dane raise cai nabairillena, omoimo cue llua raise uiñoñedicue.

Jesucristo rafue Moisés micorí llogacinuai baifemo faite

²¹ Moisés micorí llogacinuai anamo iacadino, omoimo daje rafuena jicanoiacadicue: ¿Moisés micorí cuegafuiaina raise cacadomoi? ²² Moisés micorí jaie cueda: "Abraham micorímena jito ite. Daje jito ie mullaiñomona comuide. Jiaie jito ie mullaiñediñaiñomona comuide. Naiñaiñodi ie nanoca ai. ²³ Abraham micorí jitailla jira, ie mullaiño jitona comuitate; iadedi ie mullaiñediñaiño jito comuide, Jusiñamui llua jira". ²⁴ Naie rafuemono cai fueolle. Ie iaiñuaidi mena jai lloga rafue isoidiañuui. Abraham micorí mullaiño mameci Agar micorí. Naiñaiñodi Sinaí railla anedumona lloga rafue isoide. Arabia railla eniruemo Sinaímona Jusiñamuidi Moisés micorímena rafuena llote. Naiñaiño mullaiñona jira, ie urue mullaimana jeiciga. Ie nama anamo jaca ite. Ie isoide. Moisés micorímena llogacinuaido jaidinodi naie rafue anamo itimaci. Jerusalémo itino Moisés micorí llogacinuai anamo jai nia illa jira, Agar micorí Jerusalén railla nairai isoide. ²⁶ Jiaiñaiñodi jiaie lloga rafue isoide. Naiñaiño Abraham micorí ai. Naiñaiñodi Sara micorí. Naiñaiñodi monamo ite Jerusalén isoide, naiñaiño mullaiñoñena jira. Nainomo jainaiaidicai, Moisés micorí llogacinuai anamo jai cai iñena jira. ²⁷ Isaías micorí iena jaie cuete: Oiniño, mai iobi.

Urue nia jocoñediñaiño, ado iobi.

Iñediñaiño baifemo eo uruaiñenitio.

Iemona Moisés micorí llogacino anamo iñedinomona Cristona iñotinona ailluena jaillana uiñoticaí.

²⁸ Cue amatiai, bie rafue omoimo duide. Jusiñamui llua jira, Abraham micorí jito Isaac micorí comuide. Ie isoide. Jusiñamui llua jira, caidi ie uruaiaina jaidicai. ²⁹ Ero, mullaiño jiodi mullaiñediñaiño jitona jaie duere finouide. Daje isoi Moisés micorí llogacinuai anamo itinodi Jusiñamui Joreño anamo itinona birui duere finocabidimaci. ³⁰ ¿Niese cai nibaille? Moisés micorí Sara micorí llua jaie cuete: "Mullaiñona, naiñaiño jito diga, oni dota. Ie moo fiodailla mei, mullaiño jito ie moo raruiaina feiñoñeite. Dama mullaiñaiñoñede jito ie moo raruiaina feiñoite". ³¹ Ie jira mullaiño urue isoideicaí Moisés micorí llogacinuai anamo jai cai iñena jira, mullaiñediñaiño urue isoidicai.

¿Nie isoide rafuedo jaitomoi?

5 Moisés micorí llogacinuai anamona Cristodi caina jai jillotate. Ie jira omoi comeciaina ocuiño. Jaie omoi illa isoi, dane jaiñeno. Omoi marebicaiñede rafue anamo jaie itomoi. Ie jira Moisés micorí llogacinuai anamo iñeno. Iemona marebicaiñetomoi.

² Jeacinomona omoi jillobillena, Moisés micorí llogacinodo omoi jaiacanamonona, omoi abina omoi detataia, Cristo rafuena jai jitaiñedomoi. ³ Dane lloticue: Jeacinomona omoi jillobillena, naga abina detatagame nana Moisés micorí llogacinuaina iñua. Nana iena iñoenia, naimie jilloñeite. ⁴ Moisés micorí llogacinuaina iñuamonona omoi marebicaiacania, Cristo rafuena jai duiñedomoi. Jusiñamui caina duenaillamona, Cristona jaie cai dine orede. Moisés micorí llogacinodo omoi jaiacania, Cristo rafuena jai jitaiñedomoi. ⁵ Moisés llogacinuaina iñuamonona marebicaiñedicaí; iadedi Jesucristona cai iñuamonona, Jusiñamui Joreño caina canuamonona, cai marebicaillemo iocire ocuiridicai. ⁶ Abina detatajamona, cai jeacinomona jilloñedicai. Abina cai detatañenamona, jiai jilloñedicai. Dama Cristona cai iñuamonona jillobidicai. Naimiena cai iñua jira, nana cominina isiruicana jaidicai. ⁷ Cristo rafuedo navui marena jaidomoi; ia damerie uanaicinona omoi iñuana jai jitaiñedimaci. ⁸ Jusiñamuimona naimaci uaina oñedimaci. Jusiñamui omoina navui uaidote, naimie dibeimo omoi illena.

⁹ Jiai rafuedo iena lloticue: Janore jisa siritate ra ifecimo joneia, jai nana siritate. Ie isoide. Damie jiaie rafuedo jaia, diga cominina jifuerede, naimie jailla dibeido jaillena. ¹⁰ Jiaie rafuedo omoi jaiñellemo cue comecina jai facadicue. Cai Nama cue iñua jira, cue lloga uaido omoi jaillemo cue comecina jai facadicue. Omoi comeciaina naganomo itatatiniena uiñoñedicue; iadedi Jusiñamui naimiena duere finoite.

¹¹ Cue amatiai: "Abina detataja" omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira. ¹² Omoi comeciaina naganomo itatatinodi raitimaci: "Janore jisa

abina detatajamona, cai jeacinomona jillobidicai". Iese itena, Jusiñamuina uifioñedino finua isoi, namiena naimaci abiai diana jiai jitaicue.

¹³ Moisés llogacinuai anamona Jusiñamui omoia jai jillobitade; iadedi maraiñede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiaie cominina cano. ¹⁴ Moisés micori iena jaie llote: "O abi o isiruilla isoi, o ecimo itinona isirui". Iena omoi finoia, nana Moisés micori llogacinuaina jai finodomoi. ¹⁵ Iese omoi finoñenia, conima diga omoi riire iciria, jaca danomo iñeitomoi.

Jiaie cominina omoi isiruilla rafue

¹⁶ Omoimo nia lloiticue. Jusiñamui Joreño omoi comeciaino namatajano omoi i. Omoi comeciaino ite maraiñedicinodo omoi jaiñeno. ¹⁷ Cai comeciaino ite maraiñedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; ¹⁸ iadedi Jusiñamui Joreño anamo omoi raise ia, naimie lluaana omoi raise ñnoia, Moisés micori llogacinona jai jitañedomoi. ¹⁹ Ero, maraiñede comeciaino iticinodo omoi jiaia, bie isoidicinona finocabidomoi: añede riño diga illacina, inñede iima diga illacino, jeare ñaiacino, diga eo jearede rafuena finuacino, ²⁰ jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitillacino, damacina iñenacino, ²¹ dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jaie lloticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite. ²² Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeci caimare illacino, uri illacino, raire iciriraininacino, duenaillacino, jiaie cominina canuacino, ie lloga uaina finuacino, ²³ uai oñenacino, abina eenuacino. Moisés micori llogacinuai bie isoidicinona ñaiñede. ²⁴ Cristo Jesúsomo jainaiñidinodi naimaci maraiñede comeciaino jitaillacino anamo iñedimaci. ²⁵ Jusiñamui Joreño caimo illa jira, naimie cai comeciaina namatajacinodo cai jaillesa. ²⁶ Iemona abina cai biriñellesa. Abina jiai cai iedoñellesa.

Jiaie llofuaciño

6 Cue amatiai, omoimona damie ebena jamai jeacinona finoia, dane Jusiñamui dibesimo naimie raise illena, naimiemo fecuise icñeno llono. Omoi cominimona Jusiñamui Joreño comeciaino raise na-

matadinodi iese naimiemo llofuellesa. Jeacino finoi raillano, nagamiiai abi rairuillesa. ² Bu duere sefuia, bu Taife ramo faia, coninina cano. Iese omoi canoia, Cristo llogacinuaina jai ñnotomoi. ³ "Cuemo iese suiñeite. Dama abina sedadicue. Jamai bue isoñedicue" comecina facadimie dama abina jifuate. Naimie jamai bue isoide. ⁴ Maraiñeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jiaimiemo ite maijia rafuedi naimiemo duñede. ⁵ Naimie finoca rafuemono nagamie jeacinona finoia, dama naimie muidona. ⁶ Naga Jesucristo rafuena fueotimiedi ie llofuegamiemo mare ra fecalle. ⁷ Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamuimona iba feiñoite. ⁸ Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faiñeite. ⁹ Jusiñamui Joreño jitaillacinona finuana sefuiruiñeno. Cai comeciaino cai ocuiñoia, Jusiñamui jitailla facaiseconi ibana feiñoiticai. ¹⁰ Ie jira nana cominina canocabi. Nana creyentiaina ua eo canocabi.

Facaduacino

¹¹ Ero, jerie cuiano omoimo bie facaimo cueticue. ¹² Jiaie cominimona iobillacinona omoi abiaina detatajana jitaicidino feiñoiacana jira, omoi abiaina detatajana jitaicimaci. Cristo rafue lloticainadedi: "Cristo rafuena uifioñedinodi niade duere caina finodimaci" raillanomo comeciaina facajamona, iese jitaicimaci. ¹³ Omoi abiaina detatajana jitaicidinodi Moisés micori llogacinodo raise jaiñedimaci. Nana iena ñnoñedimaci. Omoi abina iedoiacana jira, omoi abiaina detatajana jitaicimaci; ¹⁴ iadedi Jusiñamuidi jiaie rafueri abina cue ieduanana jitañede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaiñedicue. Naie rafue anamo jai iñedicue. ¹⁵ Abina diamona cai jeacinomona jilloñedicai. Abina deñenanomona jaca jilloñedicai; iadedi Jusiñamui Joreño caina comonori comuitajamona jillobidicai. ¹⁶ Jusiñamuidi nana bie lluacinodo jaidino uri itatatesa. Naimie naimacina duenaillasa. Jusiñamui cominidi ua jaca iese illasa.

¹⁷ Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellañona jai oticue.

¹⁸ Cue amatiai, cai Nama Jesucristo omoimona duenaillasa. Mai. Pablodicue.

EFESIOS

Efesomo ite creyentiaimo Pablo cartana orede

1 Efeso railla nairaimo ite creyentiai, Pablodicue. Bie carta omoi dine oredicue. Ie rafue llollena, Jusiñamui jitailla jira, Jesucristo oretagamiedicue. Naimiemo omoi jai jainaiilla jira, Jesucristona ino-cana jai jaidomo. 2 Cai Moo Jusiñamui, cai Nama Jesucristo diga, omoina duenaicabillana uiñocana mai omoi jai. Iaimaiai omoi comeciaina uri itatajacabillana uiñocana mai omoi jai.

Cristomo jai cai jainaiilla jira, Jusiñamui marena itata-jacinona feiñotica

3 Cristomo cai jainaiilla jira, Jusiñamui caina eo marena itatate. Ie jira cai Moo Jusiñamuimo iobil-lacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiilla jira, cai comeciaina marena itatajacinona Jusiñamuimona jai feiñotica. 4 Iena ja lloiticue. Enirue nia iñenia, Jusiñamui nana naimiena inotinona jaie fetode. Cai facaina Cristo ico fiodaillena naimie uiñuamona, caina jaie fetode. Naimiemona cai marebicaillena, jeacinona cai finoñellena, caina fetode. 5 Caina isiruillamona caina fetode. Naimie eo jitailla jira, naimie uruiaina cai jail-lena, caina fetode. Jesucristo fiodaillamona Jusiñamui uruiaina jaidica. 6 Naimie caina fetuamona, naimie caina duenaillana jai uiñotica. Iemona naimiedi eo mareuidimiena jiai jai uiñotica. Ie isiruiga Jitomo cai jainaiillamona iena uiñotica. Naimiemo buena cai finoñenia, caina duenaite. Naimiena cai iobitallena, caina fetode. 7 Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jiai oñeite. 9 Naimiena cai raise inollena, caina abina jai uiñotade. Jusiñamui caina naimie nana caina birui jilloitaiacanana jai uiñotade. Cai cominidi iena jaie uiñoñedimaci; iadedi Jusiñamui jitailla diese Cristo finoca rafuedo caina iena jai uiñotade. 10 Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamienna raise itataite. "Cristo cai Nama" raitimaci.

11 Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uiñuanona, caina jaie fetode. Ie muidona naimie cominina jai jaidica. 12 Naimie caina fetuanona Cristona jaie inotica. Naimie diga ico jaca cai illemo birui ocuridica. Naimiena cai iobitallena caina fetode.

"Naimie fue eo mare" cai raillena caina fetode.

13 Cristona jai birui inotomo. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomo. Jusiñamui Joreño omoimo illano, navui Cristo llua isoi, naimie dibeimo omoi illana uiñotomo. 14 Jusiñamui Joreño caimo jaca illa jira, Jusiñamui diga ico cai jaca illena uiñotica. Jusiñamuidi caina ie cominina jai jaitate, naimiena cai iobital-lena. "Naimie fue eo mare" cai raillamona, naimiena iobitaitica. Naimiemo cai jainaiilla jira, naimiemona nana cai comeciaina marena itatajacinona feiñotica.

Naimaci facaina Pablo jide

15 Cai Nama Jesuna omoi inuana jai fididicue. Nana jiaie creyentiaina omoi isiruillana jiai fididicue. 16 Ie jirari Jusiñamuimo cue jiaa, omoina feitañedicue. Omoi facaina naimiemo iobillacinona jaca fecadicue. 17 Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jianona, omoi facaina jicanoticue. Naimie Joreño uaido naimie rafue raise uiñocana omoi jaillena jicanoticue. Naimiena raise uiñocana omoi jaillena jicanoticue. Iese omoi facaina jicanocabiticue. 18 Naimie dibeimo omoina naimie jai uaidua jira, naimie diga ico jaca omoi illemona, iena omoi raise uiñuana jitaidicue. Naimie cominina omoi jai jailla jira, naimie illanomo ico eo marena iocire itomo. Iena omoi raise uiñuana jitaidicue. 19 Naimie uai ua eo siñonana omoi uiñuana jitaidicue. Naimiena cai inua muidona, ie uaido naimie caina canorede. Iena omoi raise uiñuana jitaidicue. 20 Fiodaillamona Cristona ie uaido Jusiñamui jai jillotaja jira, naimie uai siñonana uiñotomo. Fiodaillamona Cristo jillua mei, monamo Cristo abido jailla mei, ie eci-mo Jusiñamuidi Cristona illaimana dane itatate. 21 Ie jira Cristo nana Jusiñamui jaienisai afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaimaiai isoide joreñuai afemo naimie ite. Birui iese ite. Ico iese nia iite. 22 Jusiñamuidi naga ra Cristo anamo ua jai itatate. Cristona nana creyentiai imaci illaimana jiai ua jai itatate. 23 Cristomo daajena nana cai creyentiaidicaidi duidica. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

Jusiñamui caina isiruilla jira, cai jeacinomona jai jillobidicai

2 Jusiñamuina jaie omoi nia ñnoñenia, naimiemo omoi duiñena jira, naimiemonona fioidaitino isoidomoi. Jeacino anamo omoi illa jira, naimiemonona fioidaitino isoidomoi. Jeacino finocana jaidomoi. Maraiñedicinona finocana jaidomoi. 2 Jeacinona eburitomoi Jusiñamui ðibeimo iñedino rafuedo jaidomoi. Taife ðibeido jai jaisoidomoi. Jusiñamuina oia-caiñedino Taife jitailla rafuedo jaisoidimaci. 3 Naimiaci isoi jaie nana iticai. Cai comeciaino ite jearede jitaillacinona finodicai. Iedo jai jaisoidicai. Ie jira Jusiñamui riicaillafue anamo jaie iticai. Iese jaie nana iticai. 4 Jeacinona jaie cai finua jira, jeacino anamo iticai. Jusiñamuina ñnoñedicai; iadedi Jusiñamui caina eo duenaillanona, caina eo isiruillamona, naimie ðiga ico jaca cai illena, naimie ðibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticai. 6 Cristona jillotaja mei, Jusiñamui ie ecimo naimiena dane itatate. Cristomo cai jai jainaiailla jira, Jusiñamui nainomo caina jiai jainaiaitate. 7 Cristo finoca rafuemonona caina iese jai itatate. Caina iese jai itatajamona, nana cominidi Jusiñamui caina eo duenaillana uifioitimaci. 8 Naimie caina duenaillanona, caina jai jillotate. Jaca buena cai finuamona jillobiñedicai; iadedi naimie jitailla jira, naimie caina jai jillotate. 9 Cai jilloillena jaca buena cai ñnoñena jira, abina iedoñedicai. 10 Jesucristomo cai jainaiaillamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciaina marena itatate.

Cristomo jai cai duilla jira, jiaie nairaiat ðiga birui uri iticai

11 Omoi jaie isoillana uifiotomoi. Iena comecitomoi. Jusiñamuina jaie uifioñedomoi. Judúuaiñedinona omoi jeicifñena jira, cai judúuai comini isoi abiaina detatañedomoi. Ie jira cai cominimona maraiñedomoi. 12 Omoi jeacinomona Cristo omoina jilloitaicanana naie fa-caiseconi uifioñedomoi. Cai judúuai nairaimo jainaiñedomoi. Ie muidona Jusiñamui cai judúuai cominimo jaie lloga rafuena uifioñedomoi. Jusiñamuina nabaiillana uifioñedomoi. Jusiñamui ðiga omoi ico jaca illena uifioñedomoi. Jusiñamuina omoi uifioñena jira, naimiena sedañedomoi. 13 Naimie ðibeimo jaie jaiñedomoi; iadedi Jesucristomo birui duidomoi. Jusiñamui jaie ñnoñedomoi; iadedi Cristo jai fiodailla jira, naimiena birui ñnotomoi. Naimiena omoi jai ñnuamona, cai ðiga naimie ðibeimo jai itomoi. 14 Naimie omoi comeci jai uri itatate. Cai comeci jai jai uri itatate. Cai judúuaimona omoina jaie jearuiticai. Iese jaie iticai; iadedi Cristo muidona dani coninina nana birui nabaidicai. 15 Cristo fiodaillamona Moisés micori jaie llogacino anamo jai iñedicai. Naie llogacino dani cai judúuaimo duilla jira, Jusiñamui ðibeimo jaie iñedo-

moi; iadedi Cristo finoca rafue muidona, birui daajena jaidicai. Omoina jaie cai gaiñena jira, omoina jaie nabaiñedicai; iadedi Cristomo daajena cai duilla jira, birui nabairedicai. 16 Cruzmo Cristo fiodailla jira, Jusiñamui ðibeimo cai illamona, mena nairaimona caina daje nairaina jai itatate. Ie jira daje nairaina uri iticai. 17 Cristo jaie billanona, mare rafuena lloite. Omoi judúuaiñedinomo, cai judúuaimo, comeci uri illana lloite. Nana caina jilloitaicanana lloite. 18 Naimie muidona Jusiñamuina jai nabairedicai. Jusiñamui Joreño caina canuamona, naimie ðiga birui nabairedicai. 19 Jusiñamui cominina omoi jai illa jira, nana naimiena ñnotino ðiga Jusiñamuimo daajena duidomoi. Caimona birui jiaie cominiñedomoi. 20 Jofo isoidicai. Jofona cai finoacania, naie ibiri nano finodicai. Ie mei ðiga rana cai atiamona, iena niticai. Ie isoide. ðiga jiaie isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena ñnoticai. Iena cai ñnuamona, naimie jitailla isoi, mare rafuena finocana jaidicai. Cai ðiga Cristomo omoi jai duillamona, Jusiñamui Joreño nana cai comeciaino jai ite.

Judúuaiñedinomo Pablo Cristo rafuena llofuate

3 Jesucristo rafuena omoi judúuaiñedinomo cue llofueuilla jira, cárcelmo iticue. 2 Omoina naimie duenaillanona, omoina llofuellena, Jusiñamui cuena oretate. Iena jai uifiotomoi. 3 Jusiñamui cuemo jaie uifioñega rafuena jai lloite. Naie rafuena janore como jai cueticue. 4 Bie carta omoi facaia, Cristona jaie uifioñega rafuena cue jai uifnuana uifioitomoi. 5 Jusiñamuidi cominimo iena jaie raise uifioñede; iadedi ie Joreño Cristo facaina llorainina iena birui jai uifiotate. 6 Iena lloiticue. Judúuaiñedomoi; iadedi Jusiñamui cuemo jaie lloite: "Judúuaiñedino Cristona ñnuamona, omoi judúuai isoi jilloitimaci" lloite. Omoi facaina Cristodi fiodaite. Naimiena omoi ñnoia, omoina ie uruina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi ñnuamona, naimie jai llua isoi, Jusiñamui ðiga ico jaca iitomoi. Jusiñamui cuena iena jaie uifiotate. 7 Jusiñamui jitailla jira, cuena naimie duenaillanona, naimie uai cuemo illamona, naie mare rafuena llofuecabiticue. 8 Creyentena nia cue jaiñena facaiseconi, creyentaina jaie cue duere finouilla jira, jamai bue isoidicue. Nana jiaie creyentia cue baiñemo faitimaci; iadedi Jusiñamui cuena duenaillanona, ie rafuena cue lloillena, cuena oretate. Cristo caina eo raise marena canocabillana llofuecabiticue. 9 Naie jaie uifioñega rafuena nana comini birui uifioillena, cuena oretate. Jusiñamui naga rana finode; iadedi naimie jitailla jira, naie jaie uifioñega rafuena jaca buna jaie raise uifioñede. Nana comini iena birui raise uifioillena, cuena oretate. 10 Judúuaiñedino judúuai ðiga creyentaina jaillamona, Jusiñamui jaienisa naimie uai siñonana uifioitimaci. "Naimie fue eo mare" raitimaci. 11 Jusiñamui jaca jitailla isoi, naie rafue suicana jaide. Cai Nama

Jesucristona naimie oretajanona, cai facaina Cristo fio-daite. Iemona Jusiñamui jitailla rafuedi suide.

¹² Cristona cai ñnua jira, Jusiñamui diga jaciruiñeno birui jai ñairedicai. Naimie caina cacajana jiai uifoticaí.

¹³ Cristo rafuena omoimo cue llua jira, birui duere se-fuidicue. Cárcelmo cue duere sefuilla jira, Cristo rafue-do jaillena omoi comeciai sefuiruisiñeno; iadedi Cristo rafue omoimo cue lluanona cue duere sefuia, iobicana omoi jai.

Cristo caina eo isiruite

¹⁴ Cai Moo Jusiñamui caina eo canocabillanomo cue comecina facaia, naimiemo jidicue. ¹⁵ Naimiedi nana creyentiaí imaci Moona jira, naimiemo jidicue.

¹⁶ Naimiemo cue jianona, omoi facaina jidicue. Naimiemo eo ebirede siño iticino illamona, ie Joreñodo naimie omoi comeciaina raise ocuiñotallena jicanotícue. ¹⁷ Cristona omoi ñnuamona, naimie omoi comeciaina raise namatallena jicanotícue. Jusiñamuina omoi isiruicana jaillana jidicue. Jiaie cominina omoi isiruicana jaillana jiai jidicue. ¹⁸ Cristo caina jaca eo isiruillana, nana jiaie creyentiaí diga jaca eo isiruillana, omoi eo raise uifuaana jidicue. Naimie caina eo isiruillacino cai comeciai facajacino baifemo uailla jira, naimie caina eo isiruisoillacinona jaca raise uifioñedicaí; iadedi iena janore cai uifuaamona, Jusiñamui omoi comeciaina namatallena jidicue. Iese omoi facaina jicabidicue.

²⁰ Ie jira Jusiñamuimo iobillacino cai fecajasa. Ie uaido cai comeciai marena icana jaitate. Naimiemo cai jicajacino baifemo naimie fecarede. Cai comeciai facajacino baifemo naimie jiai finorede. ²¹ Ie muidona naimiemo iobillacinona nana cai creyentiaídicaí feca-cabillasa. Jesucristo finoca rafue muidona iobillacinona jiai cai fecacabillasa. Mai.

Jusiñamui Joreño jai caimo illa jira, cai comeci daje isoi lloide

4 Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaína omoi jai jailla jira, Cristo jitailla isoi omoi i. Jusiñamui omoína jai fetode naimie jitailla rafuena omoi finollena. ² Ie muidona abina jaca iedoñeno. Raie iciriñeno. Jiaimie ona duere finoia, ibana oñeno; iadedi uai oñeno naimiena jaca isirui. ³ Jusiñamui Joreño omoimo illamona, omoi comeciai daje isoi lloicana jai. Daje isoi omoi comeciai lloillamona, omoi jitaillamona daní uri omoi i. ⁴ Iena nia lloiticue. Cristona cai ñnuamona, daajena naimiemo jainaiáidicaí. Jusiñamui Joreño nana caimo illamona, daní omoi comeciai lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuridicaí. ⁵ Jaca dajede Nama sedacabidicaí. Caina jilloitallena, da naimiena ñnoticaí. Dama naimie facaina bautizaganodicaí. ⁶ Cai Moo Jusiñamui jaca dajede. Jaca dajede Jusiñamuina nana cai creyentiaídicaí sedadicaí. Naimie anamo nana iticaí. Naimie jitaill-

lacinona cai finollena, caina canocabide. Caina canollena, naimie Joreño caimo jaca ite.

⁷ Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaína naimiemo ñnotacana jaillena, ie uai caimo fecade.

⁸ Iena cai raise uifollena, David micori jaiie cuegafue-mona fueoiticaí. Naimie cuega: "Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade". Cristona ñaite. Iemona Cristo cai maijiacino caimo illana uifoticaí. ⁹ Biemo omoi comeciaina faca. Monamo abido naimie jailla jira, monamona eniruemo Cristo nano bil-lana uifoticaí. ¹⁰ Eniruemo bite; iadedi monamo abido jaide. Nana cominina birui sedade. Naimie baifemo jaca buna ifiede. ¹¹ Ie jira caimo ie uai jai fecajanona, ca-mona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino lollena, ie uaina fecade. Ie rafuena nia ñnoñedinomo lollena, damieriemo ie uaina fecade.

Creyentiaína ie rafuena llofuellena, damieriemo ie uaina fecade. ¹² Iese ie uaina fecade, naimie facaina raise cai maijillena, nana jiaie creyentiaína cai canollena, Ie mei Cristo rafuena daajena ñnocana jaiticaí. ¹³ Iena cai ñnuamona, Jusiñamui Jitona raise uifocana jaiticaí. Cai comecidi daje isoi lloicana jaiticaí. Naimie jitaillacinodo raise jaiticaí. Naimie marena icana illa isoi jaiticaí. ¹⁴ Cai uruai facaise cai comeciai naganomo ite. Naie facaise nie isoide rafuena cai cacajia, iena raie ñnoticaí. Cristo ñnocana cai jaillamona, uruai isoi cai iacaiñena. Damierie naga llofueraima uaido jaidimaci. Damierie llofueraínidi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena; ¹⁵ iadedi jiaie cominina cai isiruillamona, uanaicnodo cai jailla. Cristo isoi icana cai jaillamona, abina uifoticaí. Cristodi cai illaimana jira, caina ocuide.

¹⁶ Naga creyente naimiemo jainaiáide. Aillosiedicaí; iadedi daajena naimiemo jainaiáidicaí. Daajena naimiemo cai jainaiáillamona, naimie jitaillacino cai finoia, naimiena ñnocana jaiticaí. Iemona daní coninina isiruicana jaiticaí. Daajena naimiemo cai jainaiáilla jira, cai comeciai daje isoi lloicana cai jailla.

Cristomo jai cai duilla jira, naimie rafuedo birui jaidicaí

¹⁷ Omoimo nia lloiticue. Cai Namamo cue duilla jira, biena lloiticue. Jusiñamuina ñnoñedino isoi dane omoi ifeno. Jaiie naimaci isoi itomoi. Naimaci comeciáidi tainomo jai jaide isoide. Cacarefiacaiñedimaci.

¹⁸ Jusiñamui rafuena uifioñedimaci. Iena cacaiñedimaci. Abina naimaci uifioñena jira, Jusiñamui díbeimo illana jaca uifioñedimaci. Uanaicnona uifioacaiñedimaci. ¹⁹ Jearede rafuena naimaci finoia, meiruiñedimaci. Naimaci comeciai oiacana rafuedo jai jaidimaci. Naga jearede isoide rafuena eo finocana jaidimaci; ²⁰ iadedi Cristo rafuena omoi cacajamona, naimiena omoi raise uifuaamona, naimaci isoi omoi illena fueoñedomoi. Cristo rafuena omoi cacajamona, jiaiena illena jai fueotomoi. ²¹ Naimiena cacajanona iena ñnotomoi. Naimiena cue llofuiamona, naimiena Cristo fa-

caina lloraini llofuiamona, danomo omoi roracomo omoi ofia, Cristo uanaicinona cacadomo. ²² Biana omoina llofuecabiticue. Cristona jaie nia omoi ñnoñena isoi, omoi jaiñeno. Omoi comeciaino jaie iticinodo jaiñeno. Naga jearede rafue omoi comeciaino oiacanamonona faificana jaie jaidomo. Iedo birui jaiñeno; ²³ iadedi Cristo ñibeimo omoi jai illanona, naimiemo omoi comeciaino facajano, Jusiñamui omoina canuamona, omoi comeciaino iuaillaina meidocana jai. ²⁴ Cristo rafue na birui ñnotomo. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide. ²⁵ Ie jira tainona lloñeno. Cristomo daajena jai jainaiaila jira, coninimo uanaicinona jaca omoi lloño. Jiañona omoi jifueñeno. ²⁶ Maraiñedicinona bu finoia, naimiemo riire lloño; iadedi iese o lloia, naimiena jeare ñaiñeno. Jiaimie ona icia, naimiena jeare ñaiñeno. Naimie diga o rafue ia, naie rafue nairuido marena fino, ²⁷ Taiife ramo o fai raillano. Bu diga o ñicino ia, iena raire marena o finoñenia, ibana oiacanitio. Naie raire o feitañena jira, Taiife ona jeacinona finotaite. Iese suiñellena, naicino raire marena fino. Iena feita. Iena dane abido lloñoñeno. ²⁸ Naimiemo ra illena, fia-mona omoimona navui bu ia, creyentena naimie jai jailla jira, naimie dane fiañena; iadedi ra naimie jitaia, naimie maijiite. Ie maijiamona ie ra ollena, ucubena feiñoite. Ie mei dueredinona naimie jia canoite. ²⁹ Jeare ñaiñeno; iadedi nie isoide rafue ia, marecinona ñaino. Ie mei naiemona jiaie cominina canoitomo, Jusiñamui ñibeimo naimaci raise illena. ³⁰ Jusiñamuimo omoi jai jainaiaila jira, jeacinona finoñeno. Jeacino omoi finoia, Jusiñamui joreñodi sunaite. Naimiena sunaitaño. Naimie caimo illamona, caina jillotajana uiñotica. Cristo dane abido billemona, naimie dine cai jaca illena, caina jai jillotate. ³¹ Jiaie cominina icineno. Icinineno. Uaina uaitaño. Jiaie cominina jeare ñaiñeno. Naimacina duere jeare finoñeno; ³² iadedi coninina canua. Jiaie cominina duenai. Jiaimie diga omoi ñicino ia, naimie finoca rafuena faitajanona, naimie diga marena ñaino. Naie rafuena dane abido lloñoñeno. Cristo finoca rafue muidona, Jusiñamui omoi jeacinona jai faitaja isoi, jiaimie diga omoi rafue ia, naifuena omoi feita.

Jusiñamui cominina jai cai illamona, naimie jitaillacinona finoitica

5 Jusiñamui isiruiga uruaidomo. Naimie marecinona finua isoi, omoi fino. ² Cristo caina isiruilla isoi, coninina isiruicana omoi jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade. ³ Jusiñamui cominidomo. Omoi aiñede riño diga iñeno. Omoi iniñede iima diga iñeno. Rana ñicidoño. Jearede rafue finuamo omoi comeciaina facañeno. ⁴ Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobillacinona fecacana omoi jai. ⁵ Ie

aiñede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede iima diga icabitñaiñodi Cristo ie cominina sedajanomo jia duiñede. Ie rana Jusiñamui ifomo naimie sedaja jira, rana ñicidocabitimiedi Cristo ie cominina sedajanomo duiñede. Cue lloga rafuena jai raise cacadomo. ⁶ "Creyente naie isoide rafuena finorede" bu lloia, naimie omoina jifueiacade. Naimie iese lluaña ñnoñeno. Jusiñamui naie jeacinona finocana jaidinona duere finoite. ⁷ Ie jira naimaci jearede finoca rafuedo jaiñeno. Naimacina nabaiñeno. ⁸ Jusiñamuina jaie omoi uiñoñena jira, jitiñedinomo itomo isoidomo; iadedi cai Namamo omoi duillamona, uanaicinona ñnocana omoi jai. ⁹ Jusiñamuina omoi jai uiñoia, jeacinona omoi fañonocaia, Jusiñamui jitaillacinona finocana jaitomo. Uanaicinona llocana jaitomo. ¹⁰ Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai. ¹¹ Jitiñedinomo nia itino finoca rafuedo omoi jaiñeno. Naimaci finoca rafuemona marecinodi jaca comuiñede. Naimacimo: "Maraiñede" lloño. ¹² Iena cue meidaila jira, naimaci jearede bainino finoca rafuena ñaicaiñedicue. ¹³ Marecinona omoi jaca finuamona, jiaie comini naimaci finoca rafue eo maraiñenana raise uiñotimaci. ¹⁴ Cai ofia, naiena rocabitica:

Mai casi. Inineno.

Jai fiodaitino isoidomo;

iadedi omoi comeciaina Cristo jai llgaiñoite.

¹⁵ Ie jirari omoi marena illena, abina rairuicana omoi jai. Jusiñamuina ñnoñedinomo ebena jaicabidimaci. Naimaci isoi jaiñeno. ¹⁶ Diga maraiñede rafue birui comucabilla jira, cominina Cristo ñibeimo raise omoi itatajallena, nagarui Cristo jitaillacinona finocana omoi jai. ¹⁷ Ie jira ebe isoi jaiñeno; iadedi Cristo jitaillacinona uiñocana omoi jai. ¹⁸ Iocire omoi iacania, naiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui joreño anamo raise omoi mai i. Iemei naiemona diga mare rafue comuite. Iocire jia iitomo. ¹⁹ Danomo omoi ofia, nana omoi comeciainona diga isoide ruana iocire ro-rona. Omoi ruamona jiaie creyentia comeciaina ocuiñota. Cai Namamo omoi ruamona, omoi fillamona, omoi taillamona, naimiena iobitaitomo. ²⁰ Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca fe-ca.

Cristomo jai cai duilla jira, cai comini diga marena iacadicai

²¹ Cristo anamo omoi illa jira, jiaie creyente baifemo omoi faiacinomo omoi comeciaina facañeno; iadedi coninina nagamiñaina cano.

²² Inirediñaiñuai, omoimo rafuena lloiacadicue. Cai Nama Cristomo omoi jainaiaila jira, naimie jitailla jira, omoi iniñai anamo raise omoi i. Naimaci uaina raise ñno. Cristo nana creyentia afemo illamona, naimacina naimie sedaja isoi, naga ini ie ai afemo illamona

naiñaiñona sedaja. Cristodí nana creyentiaí imaci jeacinomona jillotajamona, naimie anamo itimaci. ²⁴ Cristo anamo nana creyentiaí illa isoi, naiñaiñuái iniñiaí uaina jaca ñnuua. ²⁵ Airedino, omoímo jiaí lloiticue. Nana creyentiaína Cristo isiruilla isoi, omoí ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoí ainiaina omoí isirui. ²⁶ Nana creyentiaí marena illena naimie fiodaite. Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai ñnuamona, cai jeacinomona jai jillobidicai. ²⁷ Fiodaite, nana cai creyentiaí comeciaí marena illena. Cai comeciaí jeaninana jitaide. Cristo abido bille facaise-mo, Jusiñamui jitailla isoi cai marenana jitaide. ²⁸ Naimie abi naimie isiruilla isoi, naga ini ie aina isiruilla. Iaimaiaí daajena jira, ie aina isiruitimiedi ie abina jiaí isiruite. ²⁹ Jaca bu ie abina enoñede; iadedí ie abina sedade. ³⁰ Naimiemo nana cai creyentiaí duilla jira, Cristo caina isiruillamona, caina sedade. Ie isoi nagamie ie aina isiruilla. ³¹ Bie jai lloga uaimona iena uiñoticaí. Moisés micorí Jusiñamui lluaña jaiie cuega: “Ie aina ollena, iima ie moona, ie ei diga faionocaite. Iemei dajena iitiiaimaiaí”. ³² Naie llofuiacinomona jiaí rafuena fueoiticaí. Cristona ñaiticue. Creyentiaína ñaiticue. Naimiemo cai duillamona, daajena iticai. ³³ Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitañeno ñnuua.

6 Uruiaí, omoímo rafuena lloiacadicue. Cai Nama jitailla jira, omoí eiñiaí uaina ñno. Omoí mootiaí uaina jiaí ñno. Jusiñamui marenana jira, iaimaiaí uaina ñno. ² Moisés micorí Jusiñamui lloga uaina jaiie cuega: “O moo uai ñno. O ei uai ñno. Marena o illena, raíre o fiodañellena, iaimaiaína o isiruillamona, iaimaiaí uaina ñno” cuega. Jusiñamui diga lletarafuena llote; iadedí bie nanoca rafuena llote. ⁴ Mootiaí, omoímo lloiticue. Omoí uruiaína jamai icíñeno; iadedí naimicina cai Namana naimaci uiñollena llofue. Naimaci ñnoiacañenia, abina naimaci uiñollena, naimacina isiruillamona, naimacina duere fino.

⁵ Patrón anamo itino, omoímo lloiticue. Omoí patrones ocuica uaina ñno. Omoí maijiana naimaci ocuica, naimacina iobitallena, jaciruioicaida raise maiji. Omoí comeciaímona naimaci jitailla rana maiji. Cristo iedena, naimaci ocuica uaina ñno. ⁶ Omoímo naimaci eruai, naimacina iobitallena, marena maiji; iadedí omoímo naimaci eruaiñenia, naimacina iobitallena, nia marena maiji. Naimacina iobitallena maiji; iadedí Cristomo omoí duilla jira, Jusiñamui jitailla jira, omoí comeciaí maiji raillamona, marena omoí maiji. ⁷ Patrón facaina maijiacinomo daní comecina facañeno; iadedí iocire maiji, cai Nama facaina omoí maijidomoidena. ⁸ Biena uiñoticaí: Marena bu maijiia, cai Nama Cristomona ibana ico feiñoite. Patrón anamo itino iena feiñoitimaci. Patrón anamo iñedino iena jiaí feiñoitimaci. ⁹ Patrones, omoímo lloiticue. Omoí Nama Cristo monamona omoímo eruilla jira, Cristo monamona naimacimo jiaí eruilla jira, omoí anamo itinona mare-

na fino. Naimacina riire ocuiñeno. Naimacina jeare finoñeno. Cristo nana naimie cominimo daje isoi comecina lloide. Ie jira omoí anamo itinona marena fino.

Cristomo jai cai duilla jira, naimie cai comeciaina ocuiñotaite

¹⁰ Ie muidona nia lloiticue. Cai Namamo omoí duilla jira, naimiedi omoí canocabillamona, omoí comeciaina ocuiñotacana omoí jai. ¹¹ Ero, Taife caina ramo jifueoicaida faite. Caina anafeditaicaide. Naimie isoidino caina jiaí anafeditaicaidimaci. Naimacidi aillosie. Naimaci anamo nana Jusiñamuina ñnoñedino jai itimaci. Jitiredinomo naimaci illanona, Jusiñamui díbeimo iñedimaci. Beno eniruemo itimaci. Jusiñamui illanomo duíñedimaci. Cominina ñañedícue. Taifena, Janabana, Dofina, jananiaína, Dusisiñona ñaiticue. Naimaci isoide joreñuaina ñaiticue. Cai díbeimo iñedimaci. Naimacimona abina omoí rairui. ¹³ Jobaime illa facaiseconi, soldaduaí imaci ra diga imaci abiaína riidotimaci. Cinturón jítadimaci. Lloemamona finoca ra jogobemo jítadimaci. Zapatona jítadimaci. Uico riidollena, naimaci uico riidua rana llinotimaci. Ifogí icona jítadimaci. Llobina llinotimaci. Ie isoide. ¹⁴ Cristomo omoí comeciaí facajanona, uanaicinona jaca llono. Jusiñamui jitailla isoi, marecinona finocana omoí jai. ¹⁵ Cristo rafuemonona omoí comeciaí uri itatajamona, iena meiruiñeno llocana uiño. ¹⁶ Taifemona nana jearede rafuedí comuide. Naimiedi ramo faiacana jai jaide. Cristona omoí ñnuamona, Taife ramo faiacinona jamai. ¹⁷ Jusiñamui caina jai jilloitajana jai uiñotomoi. Iena omoí uiñuamona, Taife ramo faiacinona ñnoñeno. Taifena anafenollena, Jusiñamui Joreño omoína canuamona, Jusiñamui diga ñaicabi. Taife ramo omoímo faia, iena omoí ñnoñellena, Jusiñamui omoína canoite. Iese abina omoí rairuia, Taifena anafeditaitomoi. Taife ramo faiacino naimaci ñnoñellena, nana jiaie creyentiaí facaina jiaí jiaicabi. ¹⁹ Cue facaina jiaí omoí jii. Marefodo nana Cristo ie rafuena cue lluaña omoí jii. Cristo nana cominina jilloitaiacanana nia lloiacadicue. ²⁰ Naie rafuecue llollena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluaña mai omoí jii.

²¹ Tíquico omoí dine oretaiticue. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoímo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoí comeciaí ocuiñoitomoi. ²³ Cai Moo Jusiñamui, cai Nama Jesucristo diga, omoína uri itatajamona, Cristona jai omoí ñnuamona, coniniri uricana jaillana jitaídícue. Iaimaiaí omoína isiruillamona, iaimaiaína omoí ñnuamona, nana jiaie creyentiaína isiruicana omoí jai. ²⁴ Cai Nama Jesucristona omoí eo isiruilla jira, Jusiñamuidí omoína duenailasa. Mai. Pablocícue.

FILIPENSES

Uaiduacino

1 Filipomo ite creyentiaí, Jesucristomo jai omoí duillamona, bie carta omoí dine oredicue. Pablodícue. Timoteo cue diga ite. Naimie cominina coco illamona, Jesucristo díbeimo maijicabidícoco. Omoímo coco uaina oredicoco. Omoí creyentiaí illaicominimo coco uaina ua oredicoco. ¿Nigacino? ¿Nie isoidomoi? Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoí jai. Iaimaiaí omoína uri jai itatate. Iena omoí uiñocana mai omoí jai.

Jusiñamuimo iobillacino fecade

3 Naga icaiño omoína cue comecia, Cristo rafuedo omoí jailla jira, Jusiñamuimo iobillacinona fecadicue. **4** Naga icaiño Jusiñamui diga cue ñaia, omoí facaina caimare jiidicue, **5** Jesucristo rafuena cue llua cuena omoí canua jira. Nano bie rafuena omoí cacajamona, cuena canodomoi. Cuena nia canodomoi. **6** Jusiñamuidi omoí comeciaina jai marena itataja facaiseconi mare rafuena tainede. Omoí comeciaino mare rafue illicinona tainede. Cristo Jesús dane billiruimo Jusiñamui bie rafuena fuidoite. Iese fuidollemo ocuridicue. **7** Omoímo iese cue comecina cue facajia, omoína cue isiruilla jira, cuemona mare. Cárcelmo cue illamona, Jesucristo rafuena cue riiduano, Jesucristo rafuedi uanaicino cue llua, Jusiñamui cuena canocabide. Iemona naimie caína duenaillana jai uiñoticaí. **8** Cuena omoína Cristo Jesús isiruitajamona, nana omoína isiruiticue. Jusiñamuidi uanaicinona cue llua uiñote. **9** Jiaie cominina eo isi-isiruicana omoí jaillena, Jusiñamuina raise omoí uiñollena, nie isoide rafue omoímo ia, abina raise omoí uiñollena, Jusiñamuimo jicabidicue. **10** Iese omoína jitaidicue. Mare rafuedo omoí jaiacanana jitaidicue. Jiairuido Cristo abido biite. Ie jira omoí comeciái jeanillena jitaidicue, Jusiñamui jitailla isoi omoí comeciái marena illena. **11** Jusiñamui jitailla isoi omoí illamona, mare rafuena jaca omoí finuana jitaidicue. Jesucristona omoí inuamona, naimie omoína iena finotarede. Iese omoí finocana omoí jaia, Jusiñamuina eo iobitaitomoi.

Cárcelmo Pablo illamona, diga comini Jesucristo rafuena cacadimaci

12 Cue amatiaí, bie rafuena omoí uiñuana jitaidicue. Cárcelmo cue illamona, diga comini Jesucristo rafuena cacadimaci. **13** Cai illaima jofomo itino cacadimaci. Nana bene itino jiaí cacadimaci. Jesucristo rafuena cue

llua jira, cárcelmo iticue. Iena jai uiñotimaci. **14** Cárcelmo iticue; ia jaciruiñeno Cristo rafuena nia lloticue. Iemona diga creyentiaí naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

15 Cuena uradoillamona, cue afemo iacanamona, damierie Cristo rafuena llofuetimaci. Jiaie llofueraini marecinona finuacanamona llofuetimaci. **16** Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uiñotimaci. **17** Cue afemo iacadino mare comeciainona llofueñedimaci. Iemona cuena duere finoacadimaci. **18** Iese itimaci; iadedi uradoillamona naimaci llofuia, marecinona finuacanamona naimaci llofuia, cuemona damamei iesede. Cristo rafuena llocana jaidimaci. Iena jai iobidicue. Nia iobiticue. **19** Cueri Jusiñamuimo omoí jiano, Jesucristo Joreño cuena canuano, nana cuemo ite rafuemona jilloiticue. Iena cue uiñuamona, nia iobiticue. Jesucristo Joreño ie Moo diga daje. **20** Cue finolle rafuemona cue meiruiñellena eo jitaidicue. Jaiie cue finocabilla isoi, Cristona marefodo birui iobitaiacaducue. Cue nia fioidaiñenia, naimiena iobitaiacaducue. Cue fioidaillemona naimiena jiaí iobitaiacaducue. Iemona jiaie creyentiaídi Jusiñamuimo iobillacinona fecaitimaci. **21** Nia cue fioidaiñenia, Cristo rafuena nia lloiticue. Mare; iadedi cue fioidaia, naimie dine cue illena jiaí eo mare. **22** Nia cue fioidaiñenia, diga cominimo Cristo rafuena nia lloiticue. Ie jira nie isoide cue illana cue comeci niese rainide. **23** Nia raise uiñoñedicue. Jiaicaiño fioidaiacaiñedicue. Jiaicaiño fioidaiacaducue. Cue comeci Cristo dine jaiacade. Nainomo cue illena cuemona eo mare; **24** iadedi omoína cue canollena, nia fioidaiacaiñedicue. Cue nia fioidaiñenia, omoína nia canoacaducue. **25** Cue comeci na jai facajano, raite: "Nia fioidaiñeiticue. Omoí diga nia cue illana uiñoticue". Cristona omoí innotacana omoí jaillana jitaidicue. Omoí inuamona, caimare omoí illana jiaí jitaidicue. **26** Iemei omoí dine dane cue illa jira, cuerí Cristomo iobillacinona eo fecaitomoi.

27 Cue fioidaia, cue fioidaiñenia, Cristo ie mare rafuedo omoí jai. Omoína cue cioia, omoína cue cioiñenia, mare rafuena omoí finuana fidiacaducue. Cristo rafuena innotacana omoí jaillana, omoí comeciái daje isoi lloillana, Cristo rafuena omoí riiduana fidiacaducue.

28 Omoí díbeimo iñedinona omoí jaciruiñenana fidiacaducue. Iese omoí ia, Jusiñamuidi omoí díbeimo iñedino faifillana uiñotaite; iadedi naimiedi omoína omoí jilluana uiñotaite. Naimie diga omoí jaca illena, omoína jai jillotate. **29** Jusiñamui Cristona omoí innotacana omoína fetode; iadedi Cristori omoí duere sefuil-

lena omoina jiai fetode. ³⁰ Omoi nairaimo cue nano illa facaise Cristona ñnoñedinomona duere sefuidicue. Iena ciodomoí. Cárcelmo birui cue illamona, naimacimona iese nia birui duere sefuidicue. Iena birui fididomoí. Naimacimona cue isoi birui jiai duere sefuidomoí.

Jiaie creyentiaí diga raise omoi illacino

2 Jiaie creyentiaí diga omoi marena illena, dajerie rafuena lloiacadicue. Cristomo omoi duilla jira, coninina omoi comeciaí ocuiñotajamona, Cristo omoi-na isiruillana omoi uiñuamona, Jusiñamui Joreño nana omoina nabaitajamona, coninina omoi comeciaí eo duenaillacino illamona, ² cue comecina caimare itata. Omoi comeciaí daje isoi lloillamona, coninina omoi isiruillamona, daje uaido omoi comeciaí lloillamona, cue comecina caimare itata. ³ Jaca buena finoño, jiaimie afemo jamai omoi illena. Abina ieduamona buena finoño. Abina iedoño jiaimacimo comeciaí-na faca: "Naimaci cue baifemo faite". ⁴ Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca. ⁵ Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. ⁶ Naimiedi jaca Jusiñamui; iadedi naimiedi Jusiñamui diga danomo jaca illana jitaíñede. Naimie comecina iemo facañede; ⁷ iadedi iena fañonocaida, ie Moo ocuica rafuena finollena, imana naimie jaide. ⁸ Jamai bue isoidimiena jaide; iadedi ie Moo uaina ñnote. Ie Moo jitailla jira, fiodaite. Maraiñede rafue finodimie isoi, cruzmo fiodaite. ⁹ Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitade. ¹⁰ Jesúsna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisaí naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiai fecaitimaci. ¹¹ Nana lloitimaci: "Jesucristodi cai Nama". Iese naimaci llua jira, cai Moo Jusiñamuina iobitaitimaci.

Maraiñedino comeciaina lligaiñotomoí

¹² Cue isiruiga amatiadomoí. Ie Moona Jesucristo ñnua jira, cue llua nia ñnocana omoi jai. Jiaie omoi diga cue ia, Cristo rafuena raise ñnotomoí. Birui omoi diga iñedicue; iadedi Jusiñamuina omoi ñnua jira, naimie jitailla rafuena jaciruiocaida, ñnocana omoi jai. ¹³ Ie jitailla rafuena omoi finollena, Jusiñamui omoi comeciaina birui marena itatate. Naimie omoina iena finotaiacade. Naimie mare jitaillacinomona, omoina iena finotaite. ¹⁴ Nana omoi finolle rafuemo abi jafueoicaíño fino. Uai uaitaño fino, ¹⁵ jiaie comini omoi ñai raillanona, Jusiñamui uruiaina omoi illa jira, omoi comeciaí jeanidemonona marena omoi i. Maraiñede comini motomo itomoí. Naimaci comeciaí jearede. Naimaci comeciaina lligaiñotomoí, naimacimo ite jeacinona uiñotallena. ¹⁶ Jesucristo rafuena llocana

uitomoí. Iena naimaci ñnuamona, bie rafue Jusiñamui dine cominina jaca itatate. Cristo dane billirui omoi cue iobiacana jira, omoi dine: "Tainona jaiel loticue" cue raillano, Jesucristo rafuena llocana nia omoi jai. ¹⁷ Jusiñamuina omoi ñnua jira, naimiemo ailluena ucubena caidiño fecadomoí. Ie baifemona cue fiodaillana Jusiñamui jiai jitaia, iobiticue. Omoi diga jiai caimataitocue. ¹⁸ Ie muidona caimare iitomoí. Cue diga caimataitomoí.

Pablo Timoteona orede

¹⁹ Cai Nama Jesús jitaia, omoi dine Timoteona raire oretaiacadicue. Cue dine abido naimie bia, omoi rafuena cue fidiano jiai iobiticue. ²⁰ Cue dine jaino naimie isoi iñede. Dama naimie omoi ite rafuemo comecina facade. ²¹ Jaino dani naimacimo ite rafuemo comeciaina facadimaci. Jesucristo rafuemo comeciaina facañedimaci. ²² Timoteodi mareuidimiena uiñotomoí. Cue jito isoide diga, Cristo rafuena lloticoco. ²³ Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadicue. ²⁴ Cárcelmona cue jino jaillena cai Nama jitaia, omoi dine jiai raire jaiacadicue.

Pablo Epafroditona abido orede

²⁵ Epafroditodi cue ama isoide. Danomo Cristo rafuena lloticoco. Danomo Cristo rafuena riidotococo. Naimiena oredomoí, cuena canollena. Naimiena omoi dine abido oretaiacadicue, ²⁶ omoi dine naimie illemo naimie comecina facaja jira. Naimie navui duillana omoi fidia jira, naimie uri iñede. ²⁷ Navui niadedi fodiacanamona jillode, Jusiñamui naimiena duenaila jira. Naimie fiodaillamona, eo cue duere sefuiñellena, Jusiñamui cuena jiai duenaite. ²⁸ Ie jira Epafroditona eo raire oretaiacadicue, naimiena omoi ciuanona omoi iobillena. Iemei jiai uri iiticue. ²⁹ Cai Nama mamecido naimiena eo caimare feiño. Jiaie naimie isoidinona omoi dine ia, naimacina iobita. ³⁰ Cristo facaina navui naimie llofuiamona, omoi facaina cuena canollena, niadedi fiodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

Moisés micori llogacinuaido jaidinomona abina rairui

3 Cue amatiaí, omoi mo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite. ² Jearede rafue finode cominimona abina rairui. Jiconiaí isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaína detatatimaci; iadedi naimaci comeciaí nia raise finoñedimaci. ³ Cai abiaína detatajamona, cai comeciaí raise finobiñede. Cai comeciaí raise finuamona, Jusiñamui Joreñodi caina Jusiñamuina raise sedatate. Cristo Jesúsna iobidicaí. Cai jillobillena, cai abiaína detatañedicaí. ⁴ Buena cai finuamona cai illamona jillobidicaídena, cue jilluana

raise uiñoticue. Cue cominimona jamai bue isoiñedicue. ⁵ Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judúuai imacina jira, cue uruenamona judúuai uaido ñaiticue. Fariseo cue imiena jira, Moisés micori llogacinuaido fainonocaiñeno iedo eo jaidicue. ⁶ Iena eo cue jitailla jira, Cristona ñnotinona duere finodicue. Nana Moisés micori llogacinuaido eo raise jaidicue. Iena raise finodicue. ⁷ Iese jaie iticue. Cue comeci iena: "Mare" raites; iadedi Cristona jai cue ñnua jira, birui nana bie rafuedi cuemona ieñedicinuai. Naie isoide rafue cuemo illamona, cue jeacinomona jilloñedicue. ⁸ Dane lloticue: Cue Nama Cristo Jesúsna cue uiñoiacana jira, jiaie rafue cuemona ieñedicino. Naimiena cue uiñuacinodi nana jiaie rafue baifemo faite. Jeacuai isoi jai marañena jira, naimie muidona cue jaie illacinona jai sofecaidicue. Iena sofeticue, Cristo dibeimo raise cue illena, ⁹ naimiemo raise cue duillena. Moisés micori llogacinuaido cue jillamona marebicaiñedicue; iadedi Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate. ¹⁰ Cristona raise uiñoiacadicue. Naimie fiodaite; ia iemona jillode. Naiemona cue comeci marena illena, naimiena jillotate uaina uiñoiacadicue. Naimie rafuena cue lluamona, naimie isoi duere sefuiticue. Iemona nibai fiodaiticue. ¹¹ Cue fiodaille mei, fiodaillamona naimie isoi cue jilloillemo ocuridicue. Ie jira naimiena uiñocana jaiacadicue.

Pablo jitaillacino

¹² Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote. ¹³ Cue amatiai, iena nia iñedicue; iadedi jaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue. ¹⁴ Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena. ¹⁵ Caiñona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite; ¹⁶ iadedi caimo jai ite uiñuacinodo mai cai jailli.

Pablo illa isoi cai illa

¹⁷ Cue amatiai, Cristona cue ñnua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena. ¹⁸ Jaie omoimo llouidicue. Cue sunaillamona dane lloticue. Ailluena comini Cristo fiodailla rafuena birui jitaifedimaci. ¹⁹ Ja muidomo faifitimaci. Naimaci Jusiñamuidi imaci guille, daní guille ramo naimaci comeciai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena. ²⁰ Monamo ite Jusiñamui mo cai jainaiilla jira, monamona cai Jilloitaraima abido dane

billemo ocuridicai. Cai Nama Jesucristodi cai Jilloitaraima. ²¹ Naimie bia, cai fiodaille abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

4 Ie jira Cristo rafuena ñnocana nia omoi jai. Cue amatiai, omoina isiruiticue. Omoina cioacadicue. Omoi iobidicue. Cue lluamona Cristona jaie ñnotomoi. Ie rafuedo omoi jailla jira, iobidicue. ² Evodia railañaiñomo rafuena lloiacadicue. Sintique railañaiñomo jiai lloiacadicue. Cai Namamo iaiñuai duilla jira, iaiñuai comeci daje isoi lloillana jitaicue. Coniño diga icirillana jitaifedicue. ³ Cue mare nabai, omo jicanoticue, iaiñuaina canollena, coníño diga iaiñuai dane marena ñaillena. Cristo rafuena cue diga llotiañuai. Clemente diga llotiañuai. Cue diga llofueuidino diga llotiañuai. Monamo ite rabenicomo nana naimaci mameciai jai cueda. Jusiñamui diga monamo jaca iite comini mameciai diese cueda.

Iobillacino, uri illacino diga

⁴ Cai Namamo omoi duilla jira, jaca iobi. Dane lloticue: Iobi. ⁵ Omoi riinana nana comini uiñuana jitaicue. Cai Nama dane abido billirui iaie ite. ⁶ Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamui mo llono. Naimiemo jica. Naimiemo omoi jiaia, naimiemo iobillacinona jiai feca. ⁷ Iemei Jusiñamui omoi comeciaina uri itataite. Omoi comeciai facajacino baifemo omoina uri itataite. Cristo Jesúsna omoi ñnuano, omoi comeciaina eenoite. ⁸ Cue amatiai, ie muidomo daje rafuena nia lloticue. Uanaicinomo comeciaina faca. ñnogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca. ⁹ Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi ciua rafuedo omoi jai. Iemei omoi comeciaina uri itatajanona, Jusiñamui omoi diga iite.

Filipomo ite comini Pablona eo canodimaci

¹⁰ Cai Namari iobidicue, diga irui illamona dane cuena omoi comecia jira. ¹¹ Cuemo comeciaina facadomoi; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue. ¹² Duere cue illana uiñoticue. Duenino cue illana jiai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue. ¹³ Nie isoide rafue cuemo ia, Cristo cue comecina ocuiñotaja jira, naga rafuena finocana jaiticue. ¹⁴ Cue duere sefuillamo cuena omoi duenailamona, cuena omoi canua jira, cuemona mare. ¹⁵ Omoimo Cristo rafuena nano cue lluamona, cuena canodomoi. Macedoniamona cue jailla mei, jiaie creyentiai

cuenta canoñedimaci. Dani omoi cuenta canodomoí. Iena uñotomoí. ¹⁶ Tesalónicamo nia cue ia, diga icaiño ucube cuemo oredomoí; ¹⁷ iadedí omoi ucubena nidoñedicue; iadedí cuenta omoi canuamona, Jusiñamui-mona ibana omoi feñuana jitaídícue. ¹⁸ Nana cue jitaílle rana jai feñoticue. Ailluena cuemo ite. Epafroditomona cuemo omoi oretaga rana feñoticue. Jusiñamui fecadomoí isoide. Jusiñamui díbeimo cue maijia jira, mare rana finodomoí. Ie jira Jusiñamui iena gaide, caimare soride rana cai gaia isoi. Naimie iena jiaí feñote. ¹⁹ Naimiemo ailluena ite ramona cue Jusiñamui nana omoi jitaílle rana fecaite, Cristo Jesús-

mo cai duilla jira. ²⁰ Cai Moo Jusiñamui iobillacino jaca cai fecacabillasa. Iena jitaídícue.

Fuiduacino

²¹ Cristo Jesús mamecido cue facaina nana creyentiaímo cue uaina llono. Cue diga amatiaí imaci uaina jiaí oredímaci. ²² Nana benomo ite creyentiaí imaci uaina oredímaci. Cai illaíma César jofomo maijidino imaci uaina ua oredímaci. ²³ Cai Nama Jesucristo omoi comeciaina jaca caimare itatajana jitaídícue. Mai. Pablodícue.

COLOSENSES

Colosamo ite creyentiaimo Pablo carta orede

1 Colosas railla nairaimo ite creyentiaí, Pablodicue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiaí duilla jira, naimiedi cai amana eruaide. Jusiñamui jitailla jira, ie rafue lollena, Jesucristo oretagamiedicue. Naimiemo jai duidomoi. Naimiena raise ñnocana jaidomoi.

Naimaci facaina Pablo jide

3 Cai Nama Jesucristo Moodi Jusiñamui. Omoi facaina Jusiñamuimo coco jiaia, naimiemo iobillacinona jaca fecadicoco. **4** Jesucristona nia omoi ñnuana coco fida jira, nana creyentiaina nia omoi isiruillana coco fida jira, iobillacinona jaca fecadicoco. **5** Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino. **6** Diga illanomo, diga comini iena jiaí jai cacadimaci. Iena ñnuamona Cristo ñbeimo naimaci comeciaí jai meidoga. Iena ñnuamona marecinodo jai jaidimaci. Ie isoidomoi. Jusiñamui omoína duenaillana jai uiñotomoi. Uanaicinona omoi raise uiñuamona, iedo jaidomoi. Ie marecinona ñnocana jaidomoi. **7** Epafras lluamona naie rafuena cacadomoi. Naimiena isiruiticaí. Jesucristo ñbeimo coco isoi, naimie jiaí llofuiana maijide. Omoi motomo cai iñena jira, Cristo ñbeimo cai facaina naimie raise maijuide. **8** Naimiemonona omoimo ite rafuena fidiadicoco. Jusiñamui Joreño omoína canuamona, jiaie creyentiaina omoi isiruillana fidiadicoco.

9 Ie jirari omoi facaina jaca jidicoco. Omoi rafuena coco fidiadona, Jusiñamuimo omoi ñnolle rafuena omoi eo raise uiñollena jidicoco. Nana naimiemo ite abi uiñuacinona omoi eo raise uiñuana jitaidicoco.

10 Cai Nama: "Mare" omoína raillana jitaidicoco. Naga mare rafue omoi ñnocana jaillana jitaidicoco. Jusiñamuina raise omoi uiñocana jaillana jitaidicoco. **11** Nie isoide ramo omoi jiria, nana naimie siño ebirede uaido naimiedi omoi comeciaina ocuiñotajana jitaidicoco. Iocire omoi illana jitaidicoco. **12** Caina ie cominina naimie jai itataja jira, nana ie comini diga naimie illanomo ico jaca iiticaí. Ie muidona naimiemo iobillacinona omoi fecacabillasa. **13** Jeacino anamo navui cai illa jira, jitreñonomo iticaí isoidicaí. Jeacino anamona caina Jusiñamui jai jillotajamona, caina ie isiruiga Jito cominina itatate. **14** Naimie Jito muidona cai

jeacinomona jillobidicaí. Naimiedi cai jeacinona oni dotajamona, naimana jai feitate. Naimana ico abido llinofeite.

Cristo muidona Jusiñamui riicailifue anamo iñedicaí

15 Jusiñamuina cionidicaí; iadedi Cristomona naimiena uiñoticaí. Jaca bue nia iñenia, Crsito nano jaca ite. **16** Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioñena rana finode. Cominina finode. Ie jaienisaína finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode. **17** Nano dofoconi Cristo jaca ite. Naimie uaido naga ra marena icana jaide.

18 Naimiedi nana creyentiaí imaci illaima. Fiodaitinomona naimie nano jillodimiena jira, cai fiodaia, ico jiaí jilloiticaí. Naimiedi naga ra baifemo faite. Naimiedi nana comini baifemo jiaí faite. **19** Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite. **20** Cristo finoca rafue muidona, Jusiñamuidi nana cominina naimie ñbeimo itataiacade. Ua nana naimie ñbeimo iñedinona naimie ñbeimo itataiacade. Cruzmo Cristo fiodailla jira, Cristo diaillamona, Cristona cai ñnoia, Jusiñamui riicailifue anamo jai iñedicaí. **21** Jusiñamui ñbeimo navui iñedomoi. Naimiena nabaillana jitañedomoi. Omoi comeciaimona naimiena enoidomoi. Maraiñedinona ñnuidomoi; **22** iadedi cruzmo naimie abi illanona, nainomo Cristo fiodailla jira, naimiedi naimie ñbeimo omoína itatate. Jusiñamuimona mareuidinona omoi illena, omoimo nicino iñellena, Jusiñamui dine ico omoi ia, naimie ñbeimo omoína jai itatate. **23** Naimiena raise ñnocana omoi jaia, danomo abido omoi jaiñenia, iese iitomoi. Cristo rafuena navui cacadomoi. Ie jira Cristo dine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

Pablo Cristo rafuena llofuecabite

24 Omoimo Cristo rafue cue llua muidona, duere sefuidicue; iadedi iocire nia iticue. Omoi creyentiaí facaina Cristo isoi duere sefuidicue. **25** Jusiñamui cuena oretaja jira, naimie rafuena ailluena cominimo eo raise cue lollena, omoi creyentiaí facaina llofueticue. **26** Cai jaiagai bie rafuena uiñoñedimaci; iadedi Jusiñamuina ñnotinodi iena birui uiñotimaci. **27** Jusiñamui naimacina iena uiñotade. Naie rafuedi eo ebirede. Judíuainodomoí; iadedi bie rafue omoimo jai duide. Omoi comeciaimo Cristo illana jai uiñoticaí. Ie jira naimie

ebirede illanomo ico omoi jaca illemo ocuridomoi.
²⁸ Cristo rafuena llofueticaí. Nana cominimo Cristo díbeimo naimaci iacanana lloticaí. Cristona naimaci eo raise ñnollena, Cristo isoi naimaci marebicaillena, naimaci abí uíñuana lloticaí. ²⁹ Ie jira bie rafuena llofuecabiticue. Nana Cristo cuemo iga uaido eo llofuecabiticue.

2 Omoimo eo comecina facadicue. Iena omoi uíñuana jitaidicue. Laodicea railla nairaimo jiaí eo comecina facadicue. Diga cominí cuena nia cioñíedimaci. Naimacimo jiaí eo comecina facadicue. ² Omoi comeciaina ocuñíotallena, iese omoimo comecina facadicue. Daní omoi isiruillamona, ni Jusiñamui rafuena omoi eo raise marena uíñollena, omoimo comecina facadicue. Naie rafuedí Cristona llote. ³ Cristodí nana rafuena uíñote. Eo abina uíñote. Naimie rafue raise cai uíñollena, naimie caina canocabide. ⁴ Naimaci ñaiamona omoína bu jífuei raillanona, buena omoimo lloticue. ⁵ Omoi díne iñedícue; iadedí cue comecidí omoi díne ite. Omoimo cue comecina facadicue. Danomo omoi marena illa jira, Cristona omoi raise ñnocana omoi jailla jira, iobidicue. ⁶ Cai Nama Jesucristona omoi ñnuamona, naimie lloga rafue finocana omoi jai. ⁷ Naimie díbeimo raise icana omoi jai. Naimiena ñnocana omoi jai. Omoi llorainí omoína llofuia isoi, naimiena ñnocana omoi jai. Jusiñamuimo iobillacino eo fecacana omoi jai.

Cristona cai ñnuano, cai illa rafue

⁸ Jiaie cominí naimaci jamai comeciái facajacinomona omoi jífuei raillanona, abina omoi rairui. Ua-naíñedícinomo comeciaina jamai facadimaci. Naimaci einamacimona iena otimaci. Naie rafuedo omoi jailana jitaidimaci. Cristo rafuedo omoi jaillana jitaiñedimaci.

⁹ Ero, Cristomo nana Jusiñamui uai ite. Eníruemo bilanona, Cristo ñimana jaide. Naimiemona Jusiñamuina uíñoticaí. ¹⁰ Cristomo omoi jainaiaila jira, naimiemona nana omoi jitaillacinona oitomoi. Nana cominí naimie anamo itimaci. Nana illaicominí naimie anamo itimaci. Taife naimie anamo ite. Janaba naimie anamo ite.

¹¹ Cristomo omoi duilla jira, omoi comeciáimo ite jeacino anamona omoína naimie jillotate. Omoi abiaína detatajamona naimie iena finoñede; iadedí omoi comeciáimo ite jearede iuai meiduamona jillobidomoi. Naimie iena finode. ¹² Naimie díbeimo cai illamona, jai bautizagacai. Naimie díbeimo cai illamona, cai jeacino anamo jai iñedícaí. Cristo fiodaite; iadedí fiodaillamona Jusiñamui naimiena jillotate. Jusiñamuina omoi ñnuajira, jeacino anamo jai iñedomoi. Naie anamona Jusiñamui omoína jiaí jillotate. ¹³ Jeacino anamo jaie omoi illamona, naimiemona fiodaitino isidomoi. Omoi maraiñede jitaillacino anamo jaie itomoi. Cristomo omoi jai duillamona, omoi jeacinona oni dotajamona, naie anamona Jusiñamui omoína jai jillotate. Cristo díbeimo omoína itatate. ¹⁴ Moisés micorí jaie llogacina jaie cai ñnoñena jira, Jusiñamui ricailífue anamo iticaí; iadedí cruzmo Cristo fiodailla jira, naie

llogacino anamo jai iñedícaí. Ie muidona Jusiñamui caimo ibana oñeite. ¹⁵ Cruzmo Cristo fiodailla facaiseconi Taifedí anafefide. Janabadí anafefide. Dofidí anafefide. Dusisiñodí anafefide. Naimie siño rafuena finuamona, Cristo uai naimaci uai baífemo uaillana uíñoticaí.

Cristomo ite rafuedo omoi jai

¹⁶ Cristo rafuedo omoi jailla jira, omoi guiga rana bu fímaia, naimaci ñaiamo cacarefiñeno. Judíuai einamací rafue díne omoi jaiñenia: “Omoi mareíñedomoi” bu raia, naimaci ñaiamo cacarefiñeno. ¹⁷ Naie isoide rafuedo jaie jaidicaí; iadedí iedo birui jaiñedícaí. Cristo rafuedo birui jaidícaí. ¹⁸ Dajerie llofueraíni jiaie rafuedo jaidimaci. “Abina íedoñeno” raitimaci. “Jusiñamui jaienisaina seda” raitimaci. Nicairillacinodo jaidimaci. Naimaci isoi omoi jaiñenia: “Maraiñedomoi” omoína naimaci raia, naimaci ñaiamo cacarefiñeno. Naimaci illa isoi iñeno. Naimaci llucino anamo iñeno. Naimaci llucinodo omoi jaia, omoi jitaillanomo Cristo díne riñeitomoi. Naimaci comeciái jearena jira, jamai buena uíñoñenano abina íedotimaci. ¹⁹ Cristo rafuedo jaiñedimaci. Cristomo cai duilla jira, naimie caina ocuicabide. Naimiemona cai illena Jusiñamui jitailla isoi, fueoticaí. Jusiñamui jitailla isoi, naimie díbeimo cai raise illena, naimiena cai raise ñnollena, naimiemona fueoticaí. Cristomo cai duilla jira, daní coninina nabaidicaí.

²⁰ Cristo fiodaillamona, jiaie rafue anamo jai iñedícaí. Naimiena ñnoñedíno rafue anamo jai iñedícaí; iadedí naie rafuedo nia jaidomoi. Damierie llofueraíndí diga rana fímaidimaci. ²¹ “Biena jetañeno. Biena guiñeno” raitimaci. ²² Ero, naie fímaica guille ra ite, cai guillena. Iena cai guilla mei, jai buena iñede. Naimaci fímaiduacino cominimona otimaci. Jusiñamuimona oñedimaci. ²³ Naie fímaiduacínodí eo abí uíñuacino isoide. Naiedo bu jaia: “Jusiñamuina eo raise sedadícaí” raitimaci. “Abí íedoñedícaí. Cai abina isiruiñedícaí” raitimaci; iadedí naie isoide llucinodo bu jaia, naimie comecimo ite jeacinomona jilloñede. Naimiedí jeacino finocana nia jaide.

3 Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite. ² Cristomo ite rafuemo omoi comeciaina facacana jai. Bene ite maraiñede rafuemo omoi comeciaina facañeno. ³ Bene ite maraiñede rafue anamo jai iñedomoi; iadedí Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoína naimie canoite. ⁴ Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca itomoi.

Omoi comeciáimo ite jeacinona fainonocai

⁵ Cristomo omoi jai duilla jira, omoi comeciáimo ite jeacinona fainonocai. Omoi aíñede riño diga iñeno. Omoi iniñede ñima diga iñeno. Jeare finoca rafuemo omoi comeciaina facañeno. Omoi maraiñede jitaill-

lacinodo omoj jaiñeno. Rana nicidoñeno. Rana omoj nicidoia, Jusiñamuina raise sedañedomoj; iadedi naimie ifomo rana sedadomoj. ⁶ Naie isoidicinona comini finua jira, naimiena naimaci ñinoñena jira, Jusiñamuidi naimacina duere finoite. ⁷ Naie isoide rafuedo jaie jaidomoj. ⁸ Nana bie isoide rafuedo jaiñeno. Icirifñeno. Omoj ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno. ⁹ Tainona lloñeno. Omoj comeciaino ite jeacino anamo jaie itomoj. Naicino anamo omoj jai iñena jira, naicinodo jaiñeno; ¹⁰ iadedi jiaie rafuedo birui jaidomoj. Bie rafue omoj comeciaina marena itatate. Omoj comeciaino bie rafue itatacana jaillamona, Jusiñamui rafuena uiñocana jaidomoj. Naimie isoi omoj illena, naimie omoj comeciaina iese itatate. ¹¹ Cristo rafuedo birui omoj jailla jira, Jusiñamuimona nana creyentiaidomoidi daje isoidomoj. Dajerie judíuai itinodomoj. Dajerie judíuaiñedinodomoj. Dajerie judíuai isoi abina detatatinodomoj. Dajerie abina detatañedinodomoj. Dajerie abina uiñotinodomoj. Dajerie abina uiñofñedinodomoj. Dajerie patrón anamo itinodomoj. Dajerie patrón anamo iñedinodomoj. Cominimona iese itomoj; iadedi Jusiñamuimona daje isoidomoj. Cristo díbeimo omoj illa jira, jai amatiaina eruaidomoj. Cristomo omoj duillacino jiaie rafue baifemo faite. ¹² Jusiñamui omoj na fetode. Omoj comeciaina maretate. Omoj ina isiruite. Ie jira jiaie cominina duenai. Jiaie cominina cano. Abi ñedoñeno. Abi biriñeno. Icirifñeno. ¹³ Dani omoj ibana oñeno; iadedi bu diga omoj icirillafue ia, naiena raise fino. Iena raise finuanona, abido ietañeno. Iena feita. Ie mei naimie diga marena ñaino. Ero, cai Nama omoj jeacinona oni dotade. Ie muidona omoj ecimo itino diga icirillafue omoj finoia, iena feita. ¹⁴ Coninina omoj isiruicana jai. Isiruillacino nana jiaie llucacino baifemo faite. Coninina omoj isiruia, danomo marena itomoj. ¹⁵ Jusiñamui omoj ina fetua jira, Cristomo daajena jai duidomoj. Cristo omoj comeciaina uri itatajamona, nana comini diga uri i. Omoj comeciaini uri illamona, Jusiñamuimo iobillacinona feca. ¹⁶ Cristo rafuena omoj eo ñnuana jitaídícue. Naie rafuena coninimo omoj llofue. Iena raise uiñollena, coninina omoj cano. Nie isoide Jusiñamui rafuena omoj roia, Jusiñamuimo iobillacinona fecajanona, nana omoj comeciainona iocire rono. David micori cuega salmos omoj roia, Jusiñamui Joreño omoj ina birui cuetataga ruana omoj roia, omoj comeciainona iocire rono. ¹⁷ Buena omoj lloia, buena omoj maijia, cai Namamo omoj comeciaina facajano, iena fino. Cai Nama muidona, cai Moo Jusiñamuimo iobillacinona jiaie feca.

Coniniri creyentiaie illa rafue

¹⁸ Inirediñaiñuai, omoj rafuena lloiacadícue. Cai Namamo omoj jainaiñaiñai jira, naimie jitailla jira, omoj iniñaiñai anamo raise omoj i. Naimaci uaina raise ñino.

¹⁹ Airedino, omoj jiaie lloiacadícue. Omoj ainaiñai isirui. Naiñaiñuai diga iciricabiñeno. Naiñaiñuaimo riire lloñeno.

²⁰ Uruiai, omoj rafuena lloiacadícue. Nana omoj mootiaie uaina ñino. Nana omoj eiñiaie uaina ñino. Iena omoj ñinoia, cai Nama eo iobite.

²¹ Mootiaie, omoj uruina jamaie icifñeno. Naimacina omoj jamaie iciaie, comecina facaitimaci: “¿Niese cai mootiaie uaina raise ñinoiticaie? Iena eo sefuiruiticaie”. Ie muidona omoj uaina raise ñinoñetimaci.

²² Patrones anamo itino, nana omoj patrones ocuica uaina ñino. Omoj naimaci eruaiñenia, omoj patrones facaina raise maijia. Cai Namana omoj ñnuua jira, cai Namana raise omoj iobitaicana jira, omoj patrones facaina raise maijia. ²³ Buena omoj maijia, omoj comeciainona maijia. Dani comini facaina maijiañedomoj; iadedi cai Nama facaina maijiaidomoj. Ie jira raise maijia. ²⁴ Naimie jai lua isoi, cai Namamona ibana ico feiñoitomoj. Cai Nama Cristo facaina omoj maijiaidomoj; ²⁵ iadedi Jusiñamui raise maijiañedinona duere finoite. Jusiñamuimona naga maijiaimie ie maijia diese feiñoite.

4 Patrones, omoj lloiticue. Naimaci omoj anamo illa jira, omoj diga maijiaidina raise iba. Naimacina jifueñeno. Omoj Nama monamo illamona, omoj eruaido. Naimie anamo omoj illa jira, omoj anamo itinona marena raise fino.

² Jusiñamui diga ñaicana jai; iadedi omoj comeciaina facajanona omoj jiaie. Naimie iobillacinona feca.

³ Cristo rafuena llocana cue jailla jira, cárcelmo birui iticue; iadedi naie rafue nia lloiacadícue. Jusiñamui nana comini Cristo díbeimo jai jitaillana lloiacadícue. Ie jira cai facaina omoj jiaie. Jusiñamuidi comini comeciaina jetajana omoj jiaie. Naimaci comeciaina Jusiñamui jetajamona, naimacimo naie rafuena lloiacadícue. ⁴ Naimaci iena raise cacailena, naie rafuena raise lloiacadícue.

⁵ Creyentiañedinomotoj omoj ia, marena omoj i. Naimacimo Cristo rafuena lloia. ⁶ Bu diga omoj ñaia, caimare ñaino. Nie isoide Cristo rafuena omoj bu jicanoia, raise marena fairio.

Damierie ie uaina orede

⁷ Tíquicodi nana cuemo ite rafuena omoj lloite. Naimiena isiruiticaie. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide. ⁸ Cai illana omoj uiñollena, omoj dine naimiena oredicue. Omoj comeciaina ocuiñotaite.

⁹ Naimie diga Onésimo jiaie oredicue. Naimiedi creyente. Cristo rafuedo raise jaide. Naimiena jiaie isiruiticaie. Naimiedi omoj comini imie. Nana bene jai suide rafuena omoj lloitiaimaiaie. ¹⁰ Cárcelmo Aristarco cue diga ite. Omoj ie uaina orede. Marcos ie uai jiaie orede. Naimiedi Bernabé ama. Omoj naimiena navui lloticue. Omoj dine naimie ria, naimiena feiño. ¹¹ Jesús ie uai jiaie orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fainonocailamona, Jusiñamui ie díbeimo cominina jai jitaide” naimaci llamamona, cue comecina ocuiñotadimaci. ¹² Epafras ie uaina jiaie orede. Naimie omoj comini imie. Jesucristo díbeimo naimie maijide. Jusiñamui diga naimie ñaia, omoj fa-

caina jaca duere jicabide. Jusiñamui rafuedo raise omoï jaillena, ie omoïmo raise itabillena, Jusiñamui jitaillacinona omoï raise finollena, omoï facaina jicabide. ¹³ Omoï facaina naimie eo maijide. Laodiceamo itino facaina eo maijide. Hierápolismo itino facaina jiaï eo maijide. ¹⁴ Cai médico Lucas ie uaina jiaï orede. Naimiena isiruiticaï. Demas ie uaina jiaï orede. ¹⁵ Laodiceamo ite creyentiaimo cue uaina cue oretajana lono. Ninfasmo cue uaina cue oretajana lono. Naiñaiño jofomo oficabide creyentiaimo cue uaina cue

oretajana lono. ¹⁶ Bie cartana omoï facaja mei, Laodiceamo ite creyentiaïna bie cartana facata. Naimacimo jiaïe cartana jiaï oredicue. Iena omoï jiaï faca. ¹⁷ Arquipomo lono: "Cai Nama fetocamiedio. Naimie rafuena llocana raise o jai" lono. ¹⁸ Cue uaina omoïmo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoï jii. Jusiñamui omoïna duenaioillasa. Mai. Cue cuega rafue jai fuite. Pablocicue.

1 TESALONICENSES

Uaiduacino

1 Tesalónicamo ite creyentiaí, omoímo cartana cueticue. Pablodicue. ¿Nigacino? ¿Nie isoidomoí? Silvano cue diga ite. Timoteo cue diga jiaí ite. Iaimaiaí uaina orediaimaiaí. Cai Moo Jusiñamuimo, cai Nama Jesucristomo jai jainaiaidomoí. Ie jira iaimaiaí omoí duenaillana uiñocana omoí jaillana jitaidicai. Iaimaiaí omoí uri itatajana omoí uiñocana jaillana jiaí jitaidicai.

Tesalónicamo ite creyentiaí Jusiñamui uaina raise ñnotimaci

2 Jusiñamuimo cai jiaí, naimiemo omoí facaina iobillana jaca fecacabidicai. Omoí facaina jicabidicai. **3** Cai Moo Jusiñamuimo cai jiaí, omoína comeciticai. Jusiñamuina ñnotomoí. Naimiema isiruitomoí. Ie jira naimie facaina duere maijidomoí. Cai Nama Jesucristo billemo eo ocuridomoí. Iese omoína comeciticai. **4** Omoína naimie isiruillamona, Jusiñamui omoína fetuana uiñoticaí. **5** Jamai cai uaido Cristo rafuena omoína llofueñedicai; ia siño uaido iena llofueticaí. Jusiñamui Joreño uaido iena llofueticaí. Naie rafuena ñnuanona llofueticaí. Omoí diga cai jaie ia, nie isoi cai illana raise uiñotomoí. **6** Cai illa isoi ificaidomoí. Cai Nama illa isoi ificaidomoí. Iemona duere sefuidomoí; ia Jusiñamui Joreño omoína iocire itatajamona, Jusiñamui uaina iocire feiñotomoí. **7** Ie jira nana Macedoniammo ite creyentiaí omoímona fueotimaci. Nana Acayamo ite creyentiaí omoímona jiaí fueotimaci. **8** Omoímona Macedoniammo ite cominí cai Nama uaina fididimaci. Acayamo ite cominí jiaí fididimaci. Ailluena nairaiaí Jusiñamuina omoí ñnuana jai fididimaci. Ie jira naimacimo Cristo rafuena omoí ñnuana jai lloñedicai. **9** Omoí ñine nano cai ria, caimare caina feiñotomoí. Cristo rafuena omoí cacajamona, jiraraina sedajana faínonocaida, cajede nanoca Jusiñamuina jai sedadomoí. Jusiñamui Jito abido billemo birui jiaí ocuridomoí. Iese jiaie creyentiaí omoína birui ñaicabitimaci. Cristo fiodaillamona Jusiñamui naimiema jaie jillotate. Naimiema cai ñnuamona, Cristo Jusiñamui riicailifue-mona caina jai jillobitade.

Pablo Tesalónicamo llofuia rafue

2 Cue nabaiñiaí, omoí diga jaie cai ia, tainomo jaiñedicai. **2** Omoí ñine cai nia riñenia, Filipomo iticai. Nainomo itinodi caina jeare finodimaci. Iena jai uiñotomoí. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoína

llofueticaí. Ailluena cominí iena jitaiñedicai; ia iena llofueticaí. **3** Uanaiñedicinona jaca llofueñedicai. Jearedicinona jaca llofueñedicai. Jifuerillacinona jaca llofueñedicai; **4** iadedi Jusiñamui uiñoganodicai. Ie jira caina naimie oretajamona, ie rafuena llofueticaí. Cominina iobitallena llofueñedicai; iadedi Jusiñamuina iobitallena llofueticaí, Jusiñamui cai comecina raise uiñua jira. **5** Cai llofuiacino diga omoína bifueñedicai. Omoímona ucube ollena, iese llofueñedicai. **6** Cominimona iobillacinona jitaiñedicai. Omoímona jitaiñedicai. Jiaínomona jiaí jitaiñedicai; iadedi Cristo oretaganona cai illa jira, cai jitaia, omoímona iobillacinona jicaredicai. **7** Uruiaína raise sedaraiño isoi, fecuise omoína llofueticaí. **8** Jusiñamui rafuena omoí raise uiñollena, omoína cai eo isiruillamona, niadedi omoí facaina fiodaicadicai. **9** Omoí motomo cai ucube ollena, jiaie rana maijiuidicai. Omoína cai duere finoñellena, nargarui iese maijiuidicai. Iena raise uiñotomoí. Iese Jusiñamui rafuena omoína llofueticaí.

10 Omoí motomo cai illana raise uiñotomoí. Jusiñamui jitailla isoi, nainomo iticai. Maraiñede rafuena finoñedicai. Mare rafuedo jaca jaidicai. Iena uiñotomoí. Jusiñamui iena jiaí uiñote. **11** Omoí uruiaí omoí llofuia isoi, omoína llofueticaí. Omoímo diga icaiño Jusiñamui rafuena llofueticaí. **12** Jusiñamui jitaillacinona omoí finollena, iena llofueuidicai. Monamo ie cominina sedajanomo omoí jaca illena, naimie omoína jai fetode. Nainomo ie siño uai anamo jaca iitomoí.

13 Jusiñamuimo cai jiaí, omoí facaina iobillacinona fecacabidicai. Jusiñamui rafuena caimona omoí jaie cacajamona, iena raise feiñotomoí. Cominimona cai oga rafue isoi feiñoñedomoí; ia Jusiñamuimona cai oga rafuena feiñotomoí. Cai lloga rafue omoí comeciaí iuai meidocana jaide. Ie jira Jusiñamuimo iobillacinona fecacabidicai. **14** Judeamo ite creyentiaí isoi duere sefuidomoí. Omoí cominimona duere sefuidomoí. Naimaci juduaí cominimona duere sefuidomaci. **15** Juduaí cominí cai Nama Jesúna jaie meinetimaci. Jusiñamui facaina llorainí micoriaína jiaí jaie meinetimaci. Caina jiaí birui duere finodimaci. Jusiñamuina iobitañedicai. Jusiñamui rafue díbeimo jiaí iñedicai. **16** Juduaíñedinomo Cristo rafuena cai lluaína jitaiñedicai. Jusiñamui juduaíñedinona jillotajana jitaiñedicai. Iese jeacino finocana nia jaidimaci; ia ja muidomo Jusiñamui riicailifue anamo jai itimaci.

Tesalónica comini dine Pablo abido jaiacade

¹⁷ Omoimona cai billa mei, nigarui illanona, omoina dane cioacadicaí. Omoina cioiñedicaí; iadedi omoimo comecina facadicaí. Omoi dine eo jaiacadicaí. ¹⁸ Ua eo jaiacadicaí. Diga icaíño jaiacadicaí; ia Taife cai jaillana jitaíñede. ¹⁹ Caina omoi jaca iobitaja jira, omoina cioacadicaí. Jesús abido bia, naie facaise omoi eo iobiticaí. Iemo ocuiridicaí. Caina iocire itaitomoi. Omoi muidona iobiticaí.

3 Cai comeci jarire illamona, Atenas railla nairaimo fiebidicoco; ² iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise ñnotallena, omoi comeciaina ocuiñotallena, naimiena oretaticoco. ³ Duere sefuillamona bu bie uai sefuiruillana jitaíñedicaí. Creyentena cai illamona, jaca duere cai sefuillana uiñotomoi. ⁴ Omoi motomo jaie cai ia, iena llofueticaí. Omoi birui duere sefuillamona cai llwana raise uiñotomoi. ⁵ Cue comeci jarire illamona, Cristona omoi ñnuana raise uiñoiacadicue. Omoina Taife ramo faicabillamona, tainomo cai maijjana jaitaicai. Ie jira Timoteona oredicoco. ⁶ Omoimona Timoteo jai abido billamona, omoie mare rafuena cocomo llothe. Cristona ñnocana jaidomoi naimie llothe. Coninina isiruitomoi. Cocona caimare comecitomoi. Omoina coco cioacana isoi, cocona dane cioacadomoi naimie llothe. ⁷ Birui duere sefuidicaí; iadedi omoie rafuena cai cacajano, cai comeci marena ite. ⁸ Cristo rafuena ñnocana omoi jaillana jai cai uiñuamona, cai comeci marena ite. ⁹ Omoi eo caimare jai iticaí. Ie jira Jusiñamui iobillacinona eo fecaacadicaí. ¹⁰ Omoina dane cai cioillena, naimiemo nagarui jiidicaí. Naimiena nia omoi raise ñnoñenia, omoina naimiena raise ñnotaacadicaí. Ie jira omoina cioacadicaí. ¹¹ Iese omoi facaina, cai Moo Jusiñamui, cai Nama Jesúsmo jicabidicaí. Omoi dine caina naimie oretajana jiidicaí. ¹² Cai Nama coninina isiruitacana omoi jaillana jitaídicaí. Caina omoi isiruilla isoi, nana jainona omoi isiruillana jiidicaí. ¹³ Omoi comeci ocuiñollena, omoi comeci Jusiñamui jitailla isoi, marena illena jiidicaí. Nana ie comini diga cai Nama Jesús abido bia, Jusiñamui dine omoi ia, omoi comeci marena illena jitaídicaí. Iese omoi facaina jicabidicaí.

Naimaci marena illena llofue

4 Jiaie rafuena lloiacadicue. Cai Nama Jesúsmo omoi jai duilla jira, Jusiñamui jitailla isoi omoi illana jitaídicaí. Iese birui itomoi; ia nagarui iese omoi illana jitaídicaí. Ie jira cai llua isoi, omoi jai. ² Cai Nama Jesús jitailla jira, navui iena llofueticaí. ³ Jusiñamui jitailla isoi omoi marena illena, omoi aiñede riño diga iñeno. ⁴ Nagamiai riñona ie aina otena, mare; ia maraiñede rafuena finoñeno. Nagamiai dajena daje riño uana Jusiñamui jitaide. Dañaiño diga iaimai jionaillena jai jitaide. ⁵ Naimiena ñnoñedino isoi, omoi ai uana jitaíñede. Naiñaiñuai abina jamai cioillena riñona oti-

maci. ⁶ Jiaie creyentemo jeacinona finoñeno. Naimie ai-na jamai aiñedoñeno. Naie isoide rafuena bu finoia, cai Nama naimiena duere finoite. Iena navui omoimo lloticue.

⁷ Jearede rafuena cai finollena, Jusiñamui caina fetode; iadedi mare rafuena cai finollena caina fetode. ⁸ Bie llofuiacino nie creyente ñnoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jai jamaide. ⁹ Jiaie creyentiaina omoi isiruillana omoimo eo lloñeticue. Jusiñamui omoina coninina isiruillana jai uiñotade. ¹⁰ Nana Macedoniamoi ite creyentiaina jai isiruitomoi; iade nia isiruicana omoi jai. ¹¹ Uri omoi i. Dani omoimo ite rafuena omoi uiuicai. Jainomona ucubena jicaiño; ia omoi ucube ollena, omoi onolli diga rairuioicaíño omoi maiji. ¹² Ie mei omoi jitailla ra iite. Iemona Cristona ñnoñedino omoina jai mameriñeiti-maci.

Jesucristo dane abido billena llothe

¹³ Omoi raise uiñollena, daje rafuena lloiticue. Omoi creyentiaimona dajerie jai fiodaitimaci. Jesúsna ñnoñedimona bu fiodaia, fiodaillamona jilluamo naimaci ocuiríñena jira, sunaitimaci; iadedi naimaci sunailla isoi, omoi illana jitaíñedicaí. Fiodaillamona jilluamo jai ocuiridomoi. ¹⁴ Jesús fiodaillamona naimie jilluana ñnoticaí. Ie jira Jesús abido billa facaise, jai fiodaite creyentiaina Jusiñamui jilloitajana jai jai ñnoticaí. ¹⁵ Cai Nama llofua isoi, bie rafuena lloiticue. Jesús abido bia, jai fiodaite creyentiaí, nia fiodaiñede creyentiaí diga, daacaiño naimie dine a jaiticaí. ¹⁶ Cai Nama Jesús abido bia, Jusiñamui dinena naimie billanona, caina jidaite. Ie jaienicí caina uaidoite. Jusiñamui ie trompeta daacaiño jai fiite. Jai fiodaitino nano jilloitimaci. ¹⁷ Iemei nia fiodaiñedimoi como jillodino diga uillie motomo naimiemo dafaífillena, Jesús caina uite. Iemei naimie diga jaca iiticaí. ¹⁸ Bie llofuiacino diga conini comeciaina omoi ocuiño.

5 Bie rafue suilliruina uiñoñedicaí. Bie rafuena omoi jai uiñua jira, iena dane eo cueñeticue. ² Cai Nama abido billana jai uiñotomoi. Fñredimie naiona ebena billa isoi, naimie abido biite. ³ "Uri iticaí. Marena iticaí" Cristona ñnoñedino raia, naie facaise naimacimo duere sefuillifue suite. Urue riño jigicomo casilla isoi, ebena suite. Naiemona jilloñeitimaci. ⁴ Naie facaise suia, Cristo billena omoi jai uiñuamona, fñredimie naiona ebena billa isoi, jacinaiñeitomoi. Cristona ñnoñedino isoi, iñedomoi. ⁵ Uanaicinona omoi jai uiñuamona, Cristo ie cominina jai jaidomoi. Jeacino anamo omoi jai iñena jira, Cristona ñnoñedino dibeimo jai duiñedomoi. ⁶ Ie jira abina sedacana omoi jai. Abina rairuioicaida omoi jai. Jifaidino isoi ebena omoi jaiñeno. ⁷ Cristona ñnoñedino abina sedacana jaiñedimaci. Rairuioicaida ebena jaidimaci. ⁸ Cristo ie cominina jai cai illa jira, ebena cai jaiñena. Imaci abina riidollena, soldaduai jogobe icodi ite. Imaci ifogí icodi jai ite. Ie isoide. Cai comeciaina eenollena, Cristona ñnocana mai cai jailli. Jaino isiruicana mai cai jailli.

Jusiñamui dine ico cai illemono ocuiricana mai cai jailli.
⁹ Caina duere finollena, Jusiñamui caina fetoñede; iadedi cai Nama Jesucristo finoca rafue muidona, duere finollemona cai jilloillena, caina fetode. ¹⁰ Cristo cai facaina jai fiodaite. Ie jira birui cai fiodaia, naimie bille facaise nia fiodaifinedinona cai ie, naimie diga jaca iiticaí.
¹¹ Ie jira coninina ocuiñotacana omoi jai. Cristo díbeimo coninina itatacana omoi jai. Iese birui jaido-moi; ia nia iese omoi jai.

Omoi creyentiaina llofueraini uaina ñno

¹² Cue amatiaí, jiaie rafuena lloiticue. Omoi creyentiaina llofueraini uaina ñno. Cristo jitailla jira, omoi afemo itimaci. Cristo díbeimo omoína raise itatallena, omoi facaina llofuetimaci. ¹³ Omoína naimaci canua jira, naimacina isiruillanona, naimaci uaina raise omoi ñno. Coniniri uri omoi i. ¹⁴ Omoi motomona maijia-caifinedinona imaci maijillesa oculi. Duere sefuillamona jai comecina ocuiñonidinona comecina ocuiñota. Raise ñnollena, Cristona nia raise ñnoñedinona jiai cano. Fecuisse naimacina ui-uillanona, naimacina cano. ¹⁵ Omoi-na jiaimie duere finoia, ibana oñeno; iadedi naimiemo

mare rafuena fino. Nana cominimo mare rafuena fino. ¹⁶ Nie isoide rafue omoimo ia, caimare omoi i. ¹⁷ Jusiñamui mo nagarui jii-jii. ¹⁸ Nie isoide rafue omoimo ia, Jsuiñemui jitailla jira, naimiemo iobillacinona feca. Jesucristomona Jusiñamui jitaillacinona jai uiñoticaí.
¹⁹ Jusiñamui Joreñoa jamaiño. ²⁰ Jusiñamui Joreño uaido lloraini llofuiana jamaiño; ²¹ iadedi Jusiñamui Joreño uaido naimaci llofuiana facaci. Mare rafuedo jaca omoi jai. ²² Nana marañede rafuemono eneno oni omoi i. Naie isoide rafuena omoi abimo omoi oñeno. ²³ Ie jira Jusiñamui omoi facaina jiiiticue. Naimie omoína jai uri itatate. Naimie omoína nagarui marena itatacana jaillana jitaidicue. Iese omoi jaia, cai Nama Jesucristo dane abido bille facaise, naimie jitailla isoi, omoi comeciaí marena iite. ²⁴ Jusiñamuidi ñnogamiéna jira, iese omoína finoite.

²⁵ Cue amatiaí, Jusiñamui omoi facaina omoi jiiicabi. ²⁶ Cue facaido nana creyentiaina caimare uaido. ²⁷ Cai Namamo cai duilla jira, naimie jitailla jira, bie cartana nana creyentiaí uicomo faca. ²⁸ Cai Nama Jesucristo omoína duenaillasa. Mai. Pablodicue.

2 TESALONCENSES

Uaiduacino

1 Tesalónicamo ite creyentiaí, omoímo cartana cueticue. Pablocúe. ¿Nigacino? ¿Nie isoidomoi? Silvano cue diga ite. Timoteo cue diga jiaí ite. Iaimaiaí uaina orediaimaiaí. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiaí omoi duenaillana uiñocana omoi jaillana jitaídicaí. Iaimaiaí omoi uri itatajana omoi uiñocana jaillana jiaí jitaídicaí.

Cristo dane abido bia, naimiena ñnoñedinona duere finoite

³ Jusiñamuimo cai jiaí, omoi facaina naimiemo iobillacinona fecacabidicaí. Cristona ñnocana raise jaidomoi. Coniniri isiruicana raise jaidomoi. ⁴ Ie jira marena omoi illana jiaíe creyentiaí illanomo llocana uiticaí. Duere sefuidomoi; iadedi danomo abido jaiñedomoi. Cristona ñnocana jaidomoi. Iena llocana uiticaí. ⁵ Jiaínomona birui duere sefuidomoi; ia ñnocana jaidomoi. Iemona Jusiñamui omoi facaina illana uiñoticaí. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

⁶ Jusiñamui omoína duere finodinona ico duere finoite. Omoi facaina ibana oite. Iese naimie finoia, naimiemon mare. ⁷ Cai Nama Jesús abido bia, duere sefuillamona jilloiticaí. Monamona ie siño jaienisai diga biite. Irai boua isoi ana biitimaci. ⁸ Jusiñamuina ñnoñedinona diese duere finoitimaci. Cai Nama Jesús rafuena naimaci ñnoñena jira, naimacina duere finoitimaci. ⁹ ñnoñena jira, jaca faifitimaci. Jaca llegi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. ¹⁰ Cristo bille facaise naimiemo iobillacinona fecaiticaí. Naimieri nana naimiena ñnotino rajicaitimaci. Omoi mo cai lloga rafuena omoi jai ñnua jira, iese iitomoi.

¹¹ Ie jira omoi facaina jicabidicaí. Naimie jitailla isoi, omoína naimie marena itatajana jiidicaí. Omoína naimie fetuamona, ie uaido mare rafuena finocana omoi jaillana jiidicaí. Ie uaido naimiena ñnocana omoi jaillana jiidicaí. ¹² Iese omoi jaillemona, naimie abido bille facaise naimiena iobitaitomoi. Omoi naimie jiaí iobite. Jusiñamui, cai Nama Jesucristo diga, caina duenaillamona iese iiticaí.

Jesucristo abido bille rafue

2 Cai Nama Jesucristo abido billena lloiacadicue. Naimiemo ico cai dafaifillena jiaí lloiacadicue.

² “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusiñamui Joreño iena cuemo jai llote” damie raia, iena ñnoñeno. Nie lloraima iena lloia, iena ñnoñeno. “Pablomona cue feiñoga carta iena llote” damie raia, iena ñnoñeno. ³ Naie isoide rafue diga omoína jiaíno jifueiacania, iena ñnoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; ⁴ iadedi nano jiaíe rafuena finoite. Taife dinena naimie billanona, jiraraí baifemo iacanite. Jerusalémo Jusiñamui jofomo illanona, “Jusiñamuidicue” raite. ⁵ Omoi dine navui cue ia, bie rafuena omoi mo lloticue. ⁶ Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite. ⁷ Taife marañede rafuena birui bainino finotate. Jusiñamui Joreño naimiena marañede rafuena birui marefodo finuana rairuide. Jusiñamui Joreño naimie rairuiñena mei, ⁸ Taife dinena marañedimie biite; ia cai Nama Jesús abido ebire bia, firaiñuamona naimiena meineite. ⁹ Cai Nama Jesús nia abido biñenia, comini jifuellena, Taife uaido bie marañedimiedi diga siño rafuena finoite. ¹⁰ Cominina eo marañedicinodo jifueite. Naie comini ico faifitimaci. Jusiñamui ie uanaicinona naimaci ñnoñena jira, jilloiacaiñeitimaci. ¹¹ Ie jira Jusiñamui naimacina tainocinona ñnotaite. ¹² Jusiñamui ie uanaicinona naimaci ñnoñena jira, marañede rafuena naimaci ebiruilla jira, Jusiñamui naimacina duere finoite.

Jusiñamui omoína jai fetode

¹³ Jusiñamuina ñnoñedinona isoi Jusiñamui omoína duere finoite. Naimie omoína jai fetua jira, naimiemo iobillacinona jaca fecacabidicaí. Omoi jilloillena, nano dofoconi omoína fetode. Ie Joreño uaido naimie jitaillacinona omoi finollena, naimie uanaicinona omoi ñnuamona, omoína fetode. ¹⁴ Ie rafuena cai lluaamona, Jusiñamui omoína jai jillotate. Iemona cai Nama Jesucristo ebirede illanomo jaca iitomoi. ¹⁵ Ie jira, Cristona ñnocana omoi jai. Cai llogacinodo omoi jai. Iena caimona jai cacadomoi. Cai cartamona iena jiaí cacadomoi. ¹⁶ Omoi facaina cai Nama Jesucristomo, cai Moo Jusiñamuimo, jicabidicaí. Naimie caina isiruite. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicaí. ¹⁷ Naimie omoi comeciaina nia ocuiñotallena jiidicaí. Nie isoide rafuena omoi finoia, naie rafue omoi marena finollena jiidicaí. Buena omoi ñaía, omoi marena ñaillena jiaí jiidicaí.

Cai facaina omoï jïana jitaïdicai

3 Daje rafue nia lloiacadicue. Cai facaina omoï jïana jitaïdicai. Cai Nama rafue llocana jaillana jitaïdicai. Omoï ñnua isoi, jïaïno ñnuana jïaï jitaïdicai. ² Maraiñedinomona cai jillobillena, omoï jïana jitaïdicai. Ailluena comini Cristona ñnoñedimaci; ³ ia cai Nama jaca ñnogamie. Omoï comeciaina ocuiñotaite. Maraiñedinomona omoïna eenoite. ⁴ Cristomo cai duilla jira, cai llogacinona omoï jai ñnuana jai uifoticaï. Iena nia ñnoitomoï. ⁵ Cai Nama Jesús omoïna Jusiñamui omoïna isiruillana uifotajana jitaïdicue. Cristo duere sefuide; iadedi ie Moo jitailla rafuena sefuiruiño finocana jaide. Iese Jusiñamuimo omoï facaina jïiticue.

Maijjuillasa

⁶ Cai Nama Jesucristo jitailla jira, jïaïe rafuena nia lloiticue. Jïaïe croyente maijiacaiñenia, naimie diga eo nabairiño. Iena navui omoïmo lloticue; ia damierie iese ia, naimaci diga eo nabairiño. ⁷ Caimona fueo. Navui omoï motomo iticaï; ia cai ucube ollena, jaca maijidicaï. ⁸ Guillena ibaño guiñedicaï; ia nagarui eo

maijidicaï, omoïna duere cai finoñellena. ⁹ Cristo facaina cai maijia jira, omoïmona ra jamai cai jicallena, caimo uai ite; iadedi caimona omoï fueollena iese jicañedicaï. Omoï ra ollena, omoï maijiana jitaïdicai. ¹⁰ Navui omoï motomo cai illa facaise lloticaï: “Bu maijiacaiñenia, guiñena”. ¹¹ Omoï motomo damierie jai maijiñenana jai fididicaï. Maijiño jai itimaci. ¹² Cai Nama Jesucristomo cai duilla jira, naie isoidinomo maijillena lloticaï. Uainino maijiamona ucube naimaci uana jitaïdicai. ¹³ Cue amatiaï, nie isoide mare rafuena finollena sefuiruiño. ¹⁴ Cue jai cueda cartamo ite rafuena bu ñnoñenia, nana croyentiaïna naimiena uifota. Naimie meidallena, naimie diga nabairiño. ¹⁵ Naimiena enoiño; ia croyentena naimie nia illamona, naimiena fecuise llofue.

Fuiduacino

¹⁶ Cai Nama omoï jaca uri itatajana jitaïdicai. Naimie omoï diga jaca iite. ¹⁷ Cuenca canollena, naimiemo cue llua isoi, jïaimie bie carta cueda; iadedi cue mameci buone dama cueticue. Nana cartamo iese cue mameci na cueticue. Pablodicue. ¹⁸ Cai Nama Jesucristo nana omoïna duenaillasa. Mai. Macaibaite.

1 TIMOTEO

Pablo Timoteona uaiduacino

1 Timoteo, bie carta omo cueticue. ¿Nigacino? ¿Nie isoidio? Pablodícue. Cristo Jesús oretagamiedícue. Ie rafue llollena, naimie cuena orede Naimiena cue cioillena, naimie isoi cue illena, naimie abido billemo ocuridícue. Jusiñamui cuena jiaí orede. Naimiedi caí Jilloitaraima. Cue llofuiacinomona Cristona o raise ñnua jira, cue jito isoi cue mamecao. Caí Moo Jusiñamui, caí Nama Jesucristo diga, ona jai duenaite. Iena uiñocana mai o jai. Ona jai uri itatatiiaimaiaí. Iena uiñocana mai o jai.

Cristo rafuena tainona llofueraini llofuiacinodo jaiñeno

3 Macedoniamoo jaie jaidicue, Efesomoo o fiebicail-lena omo llotícue. Nainomoo dajerie Cristo rafuena raise llofueñedimaci; iadedi jiaíforie llofuetimaci. Diga ñgaiaina faca-facadimaci. Imaci usumatiaí mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina caí ñnuamona, marena iticaí. Iena llofueñedimaci. Ie jira naimaci uaina llícaita. **5** Jusiñamuina comini isiruillena, jiaie cominina jiaí naimaci isiruillena, Jusiñamui uaina llofueticaí. Naimaci comeciáí jeaninana jitaídicaí. Jusiñamuina raise naimaci ñnuana jiaí jitaídicaí. Ie jira Jusiñamui rafuena llofuecabiticaí. **6** Dajerie llofueraini iese llofueñedimaci; iadedi jamai ñaitimaci. **7** Moisés micori jaie llogacinuaido llofueiacadimaci; iadedi iena llofuiana uiñoñedimaci. Naie llogacinuaina ua uiñoñedimaci.

8 Iena raise llofuegana, Jusiñamuina uiñoñedinona naimiena uiñotallena, mare. Iena uiñoticaí. **9** Moisés micori llogacinuaidi mareuidinomo jainaiñede. Jiaínomoo jainaiñede: Jusiñamui uaina ñnoñedinomoo lloga uaina ñnorainidinomoo, Jusiñamuina jitaíñedinomoo, jeacino ñnorainimoo, jeare ñaicabitinomoo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aiñede riño diga itinomoo, ñiñede ñima diga itíñaiñuaimoo, daje isoide ñima diga conini aifuedotinomoo, comena ñidinomoo, taino llorainimoo, taino lluaana jifueridinomoo, uanaí rafue facaisena iñedinomoo. Nana Cristo rafue facaina iñedinomoo Moisés micori llogacinuaidi ua jainaiñede; **11** ia naie rafue cuemo jai jainaiñede. Ie mare rafuena cue llollena, Jusiñamui cuena jai orede. Mareñiena Jusiñamui illamona, naimie rafue jiaí eo ebirede.

Jusiñamui caina duenailla jira, Pablodi iobide

12 Cuena fetua jira, caí Nama Cristo Jesúri iobidícue. Naimiena cue ñnollena, naimie cuena uiñuamona, cuena fetode, naimie rafue cue llollena. Iena llollena, cue comecina jiaí ocuiñotade. **13** Jaie naimiena jeare ñaitícue. Naimiena ñnotinona jiaí duere ñnodícue. Abina cue uiñoñena jira, naie facaiseconi naimiena nia cue ñnoñena jira cuena duenaillamona, naimie cuena fetode. **14** Cuena eo duenaite. Iemona naimiena ñnotícue. Naimiena jiaí isiruitícue.

15 Bie lluaí mare cue uiñuamona, nana comini biena ñnuana jitaídícue. Maraiñedinona naimaci jeacinomona jilloitallena, eniruemoo Jesucristo bite. Ero, nanoca jeacinona ñnoraimadícue; **16** iadedi Jesucristo cuena duenaite. Naimiena cue ñnuamoo jaie fe-cuise ocuride. Nana jeacinona ñnorainimoo fecuise ocuride, naimiena ñnollena. Naimiena caí ñnuamona, Jusiñamui diga jaca iiticaí. Cuena duenailla jira, biruimona naimiena ñnoitinodi naimie naimacina duenail-lana uiñoitimaci. **17** Jusiñamuidi nanocamie. Jaca fio-daiñeite. Naimiena cionidicaí. Naimie damiede. Jiaíena iñede. Naimiena jaca iobicabillasa. Iena jitaídícue.

18 Ero, Timoteo, cue jito, omo rafue lloiacadícue. Nano o llofueraimana jaiacana facaise ailluena Cristo rafuena llofuerainidi ona jiaie llotimaci: "Naimie raise marena llofueite" llotimaci. Iena comecianona, o comeci ocuiñocana o jai, Cristo rafuena riidocana o jaillena. **19** Cristona ñnocana o jai. O comecina marena ñnocana o jai. Dajerie naimaci comeciáí iuaimoo comeciaina facañedimaci. Ie jira Cristona jai ñnoñedimaci. **20** Iese ite Himeneo. Alejandro jiaí jai daje isoide. Jai ñnoñediaimaiaí. Ie mei iaímaiaina Taife anamoo jai itabicaítaticue, duere sefuillena. Iaímaiaí fueollena, Jusiñamuina jeare ñaiñellena, iese itabicaítaticue.

Nana comini facaina jiaiticaí

2 Diga rafue omo lloiticue; iadedi daje rafue motomoo ite. Nanoca rafue. Iena omo lloiticue. Jusiñamui diga omoi ñaia, nana comini facaina jiaí. Naimaciri iobillacinona Jusiñamuimoo feca. **2** Uri caí illena, Jusiñamuina raise caí sedallena, Jusiñamui jitailla rafuena caí ñnollena, illaicomini facaina caí jiaí. **3** Iese caí jiaí, Jusiñamuimona mare. Naimiedi caí Jilloitaraima. **4** Naimiedi nana comini naimaci jeacinomona jilluana jitaide. Uanaicinona naimaci uiñuana jiaí jitaide. **5** Nana naíraiaí imaci Jusiñamuidi jaca dajede. Comini diga Jusiñamui facaisena ñaíraíma jaca dajede. Naimiedi

Cristo Jesús. Comini Jusiñamui facaisena naimie ñaibate. Comini facaisena ñairaima jaca dajede. Naimiedi Cristo Jesús. Naimie iimananona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. ⁶ Cai jeacinomona cai eneno illena, Jesucristo nana cai facaina jai fiodaite. Naimie jitailla facaiseconi Jusiñamuidi cominina bie rafuena jai uiñotade. ⁷ Bie rafue cue llollena, Jusiñamui cuena fetode. Judíuaiñedinomo cue llollena, bie rafue naimaci iñollena, uanaicinona naimaci uiñollena, cuena orede. Tainona lloñedicue.

⁸ Ie jira naga roracomo ite iñiaí, cai comini onolliaí a ñuitacabilla isoi, comeciaino jeacino iñenanomona, Jusiñamuimo jiaa jitaídicue. Naimaci comeciaino icirillacino iñedemo, Jusiñamuimo jii. Naimaci comeciaino uaitajacino iñedemo, Jusiñamuimo jii. ⁹ Riñoniaimo jiai lloiticue. Roracomo omoi jaia, abi ied-uamo comeciaina facañamona, omoi ifotiena fino. Jamai ebinai raillano, abi ieduamona abina finora jitañeno. Jamai ebinai raillano, abi ieduamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina iñoticaí” omoi raillanona, naimie jitailla isoi, marena omoi finolle. ¹¹ Rol-lena comini ofia, ñaiñenanomona, uaitañamona omoi fueo. ¹² Omoi ofia, omoi iñiaína llofuiana jitaíñedicue. Nainomo omoi ñaiñena. Iñiaí omoi anamo illana jitaíñedicue. Iese omoi riñoniaimo lloiacadicue. ¹³ Jusiñamui Adán micorina nano finua jira, iese lloticue. Adán micorini finua mei, Eva micorina jiai finode. ¹⁴ Taifedi Adán micorina jifueñede; iadedi Eva micorina jifue. Ie mei naie riño jeacinona finode. ¹⁵ Iemona jilloite; iadedi uruiaí jococana jaite. Riñoniaidí Jusiñamuina iñoa, jiaie cominina isirua, Jusiñamui jitailla rafuena finoia, ie abina eenoia, jilloitimaci.

Crezentiaína sedaraini illa rafue

3 Bicinodi uanaicino. Crezentiaína llofueraimana bu jaiacania, naimie comecimo mare jitaillacino ite. ² Bie isoide llofueraimana jaiacadimiena jitaídicue. Naga comini naimie mare raillamie. Dañaiñona airedimie. Abi eenotimie. Ebena iñedimie. Iñogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie. ³ Jifairuiñedimie. Fuirirainidimie. Raie icirirainidimie. Ucubena nicidoñedimie. ⁴ Naimie cominina raise sedadimie. Naimie anamo naimaci illanona, naimie uruiaí ie uaina raise iñotadimie. Ie isoidimie llofueraimana jaillana jitaídicue. ⁵ Iese naimie iñenia, ie anamo itinona naimie raise sedañena, ¿niese jiaie crezentiaína raise sedaite? ⁶ Como creyentena jaidimiena crezentiaína llofueraimana fetohenno, naie diga naimie abi iedoi raillano. Abi ieduamona, Taife isoi jeacino finoite. ⁷ Llofueraimana jaiacadimiena creyenteñedino: “Mare” raiñenia, naimiena fetohenno. Iese naimiena raiñenia, naimie joreñona jeare ñaitimaci. Iemei Taife

ramo jiai faite, naimie abido danomo uaillena. Ie muidona naimie uaina jaca cacarefiñeitimaci.

Diáconuai illa rafue

⁸ Diáconuai creyentiaí llofueraíni isoi marena illa. Iñouiganona illa. Jifairaiñena. Ucubena nicidoñena. ⁹ Naimacidi Cristona cai iñua rafuena jeanide comeciainomona iñua. ¹⁰ Bu omoi fetocania, naimacina nano facaci. Roracomo jiaie rana nano maijita. Iena raise finoia, diáconuaina jaite. ¹¹ Diáconuai ainiaí jiai iñogañaiñuaina illa. Jiaie comini joreñona ñaiñena. Jirorainina. Naga rafuena marena raise finua. ¹² Nana diáconuai aidi dañaiñorie. Diáconuai uruiaí naimaci uaina raise iñua. Diáconuai imaci anamo itinona raise sedajana uiñua. ¹³ Diáconuai marena maijia, comini naimacimo iobillacinona fecaitimaci. Cristo Jesúsna iñuano, naimiena marefodo jiai lloitimaci.

Jusiñamuina iñotino

¹⁴ Timoteo, raie o dine jaiacadicue; iadedi uicodo bie rafuena omo cueticue. ¹⁵ Are cue riñenia, daní omoi creyentiaí diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicaí. Uanaicinona riidoticaí. ¹⁶ Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaí: Enruemo Cristodi iimana jai bairede. Jusiñamui joreñodi caina naimie uai siñonana uiñotade. Jusiñamui jaienisai naimiena jiai cioidimaci. Jiaie nairaiaimo naimiena lloticaí. Iena cacajamona, ailluena cominidi diga nairaiaimo naimiena birui iñotimaci. Monamo naimie abido jai jaide.

Jiaínodi jiaiforie rafuena lloitimaci

4 Jusiñamui joreño caimo raise llote: “Jesucristo nia abido biñena facaiseconi damerie creyentiaí Cristona fainonocaitimaci. Taife díbeimo ite lloraini lluaana cacarefillamona, Janabamona ite lluacinodo jaitimaci. Taifemona ite lluacinodo jaitimaci”. ² Naie llorainidi: “Uanaicinona lloticaí” raitimaci; iadedi taino llocabiitimaci. Naimaci comeciaino jai tainomo iite. ³ Iima riño ie aina ollena rairuitimaci. Riño iima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiaí uanaicinona uiñuanona, iobillanona guillena, naimiedi naga rana finode. ⁴ Nana Jusiñamui comuitaga guille radi mare. Iobillano iena cai feiñuanona, guiticaí. ⁵ Jusiñamui llua jira, Jusiñamuimo cai jiaa, nana guille radi jai mare. Iemona marañede rafue jaca caimo comuiñeite.

Jesucristo rafuedo raise iñocana jai

⁶ Timoteo, cue lluaana creyentiaímo o lloia, Jesucristo díbeimo raise maijidio. Cristo uaina iñocana o jailla jira, mare llogacinodo o jailla jira, raise maijidio. ⁷ Jamai rafuemo, jamai iñocaino o comecina facañeno; iadedi

Jusiñamui jitailla rafuena finocana o jai. ⁸ Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiño-taite. Jusiñamui dine jiairuido o jaillena, o comecina marena jiai raise finotaite. ⁹ Bie lluacinodi unaicino. Ie jira iena cai inua. ¹⁰ Cai jillobillena, cajede Jusiñamuimo ocuridicai. Ie jira duere sefuillano maijidicai. Jeacinomona Jusiñamuidi nana cominina jillobitaacade. Naimiena inotinona jai jillotate.

¹¹ Nana creyentiaimo cue lluana raise llofue.

¹² Naimacina o llofueia, coniruena nia o illamona: "O afemo iticai" naimaci raiadedi, damamai iese raitimaci. Mare illacinodo o jai. Ie mei iese raiñeitimaci. Marena o ñaiamona, marena o illamona, jiaie cominina o isiruillamona, Jusiñamuina o inuamona, o jeanide rafuena o finoñenamona, naimacidi fueoitimaci. ¹³ O dine nia cue riñenia, creyentiaí ofia, Jusiñamuina cuegafuina adofa. Iena llono. Iena llofue. ¹⁴ Creyentiaina llofueraini navui ofidemo, Jusiñamuimona o baitajacinona o feiñollena, naimaci onolliai o ifogimo jonetimaci onolliai o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fainonocaiñeno. ¹⁵ Iena eo uiuicai, nana comini Cristona inocana o jaillana uiñollena. ¹⁶ O comecina raise eeno. Marena raise llofue. Cristo uaina inocana o jai. Iese o jaia, jeacino finuamona jilloitio. Iese ona cacadino jiai jilloitimaci.

Timoteo afemo itino diga ie illa rafue

5 Eimiiaina illamona, o afemo itinona riire llofueñeno; iadedi o moomo o llua isoi, naimacina fecuise llofue. O anafemo itinona o amatiaimo o llua isoi, llofue. O afemo itinaiñuaina o eimo o llua isoi, llofue. O anafemo itinaiñuaina o miriñotiaimo o llua isoi, llofue. Naiñaiñuaimo jeare comecina facañeno.

³ Naiñaiñuaina canollena, feciñuai comini inenia, naiñaiñuaina cano. ⁴ Feciñomo uruiai ia, naimaci naiñaiñona canua, naiñaiño naimacimo duilla jira. Einamacina illamona, iemona naiñaiñodi ibana oite. Iese itena, Jusiñamuimona mare. ⁵ Feciñomo uruiai inenia, da Jusiñamuimo naiñaiño ocuride, naimie naiñaiñona canollena. Jusiñamuimo nagarui jicabite. Bie isoide feciñuaina cano; ⁶ iadedi Jusiñamuimo duiñede rana ebiruiga feciñona canoñeno. Jusiñamui anamo naiñaiño jai raise inenamona, Jusiñamuimona naiñaiñodi jai fioidaitiñaiño isoide. Fioidaite cominina jaca canoñedicai. ⁷ Ie jira creyentiaimo biena llono, feciñuaina jeare bu ñai raillanona.

⁸ Ie cominina canoñedimie Cristo uaina jai fainonocade. Naimiedi Cristona inoñedimie baifemo eo jearedimie. ⁹ Creyentiaina sedarainina canolle feciñuai mameciaina o joneia, iese jone: Jai jionaidiñaiñuai diese mameci jone. Dajede inirediñaiñuai mamecina jone. ¹⁰ Mare rafue naiñaiñuai finocabilla jira, jiaie cominidi naiñaiñuaidi mareñaiñuai raillañaiñuai. Ie uruiai raise sedadiñaiñuai. Cominina nafuecabitñaiñuai. Jiai creyentiaina abina iedoñeno

canocabidiñaiñuai. Duidinona canocabidiñaiñuai. Diese mare rafuena finocabidiñaiñuai mameci jone.

¹¹ Feciñuai diese mameci o joneia, nia jionaiñede feciñuai mameciaina joneñeno. Naiñaiñuai nano llotimaci: "Inina dane oñeiticai. Da Cristona sedaiticai" llotimaci. Ie mei uri inenanomona, imana nicidua-mona, inina jitaitimaci. Ie jira naiñaiñuai mameci joneñeno. ¹² Naiñaiñuai navui llucacina jai fainonocaila jira, jiaie comini naiñaiñuai joreñuaina ñaitimaci. ¹³ Naiñaiñuai diga jofomo macariruillamona, rairaidimaci. Eo ñaillaredimaci. Naiñaiñuai ñaiñenacinuaido ñaitimaci. ¹⁴ Nia jionaiñede itinaiñuai iese inellena, naiñaiñuai inina dane uana jitaicidue. Ie mei uruiairenitimaci. Naiñaiñuai jofona sedaitimaci. Ie mei budi naiñaiñuaina jeare ñaiñeite. ¹⁵ Cristona dajerie fainonocada, Taiñe dibeimo jai jaidimaci. ¹⁶ Creyente cominimona feciño iade, da naimie naiñaiñona canua. Jiaie creyentiaimo naiñaiñona canolle rana jicañena. Ie muidona cominide feciñuaina canorenitimaci.

¹⁷ Creyentiaina llofueraini marena maijia, raise ibauiga. Naimaci lloia, naimaci jiai llofueia, eo raise ibauiga. ¹⁸ Moisés micori jiaie cuegafuiai iena llote: "Trigo oni juillena jurareta saisia, ie fuena maiñeno, ie guillena". Guillamona ibana jai ote. Cristo jiaie llote: "Maijidimied i ibauiga". ¹⁹ Creyentiaí llofueraimana damie llogidoia, iena cacareñeno. Mena comini, nibai daje amani comini iese naimiena llogidoia, iemo cacarei. ²⁰ Creyentiaí llofuerainimona bu jeacinona finocabia, nana creyentiaí uicomo naimiemo riire llono, jiaie creyentiaí daje isoi inellena. ²¹ Dacinodo naga jeacino finoraimamo llono. Nagamiemo riidoñeno llono. Fecuisse damiemo lloñeno, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiai cioidimaci. Ie jira dacinodo llono. ²² Jeacino naimiemo ia, naimie jeacino facaisena o inellena, creyentiaí llofueraimana jaillena, buna raire fetoñeno. Jeacinomona oni eneno o i. ²³ Eo o duia, da jinuina jiroñeno. O duicabilla jira, janore vino jiro, o jebe manollena. ²⁴ Jeacino dajerie finoia, iena uiñoticaí, juez isoi Jusiñamui iena nia lloñenia. Jeacino jiaino finoia, iena uiñoñedicai; iadedi jiairuido Jusiñamui lloia, iena uiñoticaí. ²⁵ Ie isoide. Mare rafue bu finoia, iena uiñoticaí; iadedi birui iena cai uiñoñenia, jicarena finoñena jira, jiairuido iena uiñoticaí.

6 Jusiñamuina inote maijirainidi naimaci patrones eo inua. Ie mei Jusiñamuina inoñedino Jusiñamuina jeare ñaiñeitimaci. Cai llofuiacinona jamaiñeitimaci. ² Jesucristona naimaci patrones inoia, maijiraini naimaci uaina jiai inua. Naimaci comeciái facañena: "Patrón creyentena illa jira, dani conima cai isiruilla jira, raise maijiiñeiticaí"; ia: "Raise maijiiticaí" comeciaina facaja.

Unaiñedicinona llucacino

³ Cai llogacinodi unaicino. Cai Nama Jesucristona lloticaí. Bie llogacinomona naimie jitaillae isoi cai illanona, raise uiñoticaí. Jiacinodo bu llofueia, abi iedote. Abi uiñoñede. Uai eo uaitaiacade. Ie meinoconi

comini abina uradoidimaci. Daajena comeaiaina lloifedimaci. Jiaie comini joreñona ñaitimaci. Cai fiiena bitimaci. ⁵ Uai uaitatimaci, naimaci comeiaí marañeno illa jira. Uanaicinona jai uiñoñedimaci. “Cristo uai llua mona, ailluena ucubena oiticaí” rail-lanomo comeiaína facadimaci. “Temona caimare iiti-caí” raillanomo comeiaína facadimaci. ⁶ Ie iadedi iese iñede. Cristona eo raise cai ñnuamona, caimo diese ite ra diga caimare iticaí.

⁷ Cai jeicia, jaca buenidicaí. Cai fiodailla mei, cai rana uiñeiticai. Cai radi benomo fiebicaite. ⁸ Ie jirari, cai guille ia, cai ñiroi ia, caimare bene cai illa. ⁹ Eo ucuberedinona jaiacadinona Taife eo ramo faite. Taife uaina ñnuanona ucube ollena, ucuberedinona jaiacadinodi diga marañede rafuena finodimaci. Ja muidomo imaci abi faifitimaci. ¹⁰ Ucubena eburuil-lanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fañonocaidimaci. Ie muidona eo duere sefuidimaci.

Jusiñamui uaina ñnocana jai

¹¹ Ero, Timoteo, odi Jusiñamui fetocamiedio. Nana cue como lloga rafuemoni oni eneno o i. Mare rafuedo o jai. Jusiñamui jitailla rafuena ñnocana o jai. Jesucristona ñnocana o jai. Jiaie cominina isirui. Mare rafue dibeimo o comeina jone. Riicinado cominina llofueño. ¹² Jeacino dibeimo o iñellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca illena. Navui diga cominimo Jesucristona o ñnuana marefodo llotio. ¹³ Ie isoide Jesucristo. Poncio Pilato ñne jaiie naimie

itemo, marefodo: “Imiedicue” lloite. Jusiñamuidi nana rana cajetade. Naimie caina jaca ciode. Jesucristo caina jiaí jaca ciode. Ie jira uanaicinona omo lloticue. ¹⁴ Cai Nama Jesucristo nia abido biñenia, nana omo cue llogacinuai ñno. Jearede rafuena finoño, jiaie comini naie llogacinuaina uaitañellena. ¹⁵ Naimie jitaillirui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai mo-to illaíma. Cai nanoca Nama. ¹⁶ Da jaca naimie fioidañeite. Eo isire lligañote ra ñnomo naimie ite. Nain-omo jaca bu iaírei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaídicue.

¹⁷ Eo ucuberedinomo llono: “Abina iedoño. Ucubedi fuirede. Ie jira ucubena uamo ocuiriño; iadedi Jusiñamuimo ocuiri”. Cai comeiaí jaisillena, naimiedi caimo rana eo raise fecacabide. ¹⁸ Ucuberedinomo jiaí llono: “Omoi ucube diga mare rafuena fino. Jiaie cominimo ucubena caidiño fecajana cano”. ¹⁹ Ie muidona iese naimaci finoia, monamo naimaci isiruiga rana iite, jiaíruído iena. Iese naimaci jai, jaca itatajacinona marena raise ua uiñoitimaci.

Fuiduacino

²⁰ Timoteo, cue omo llogacinona fañeno raise uiuicaí. Jamai rafuemo cacarefiño. “Uanaicinona eo uiñoticaí” dajerie raitimaci; iadedi uiñoñedimaci. Naimaci ñañana cacarefiño. ²¹ Dajerie iena cacajano, Cristona nia uiñoñedimaci. Jusiñamui ona duenaillasa. Jaca ñnori omo rafuena lloticue. Mai. Pablodícue.

2 TIMOTEO

Uaiduacino

1 Timoteo, carta omo dane cueticue. ¿Nigacino? ¿Nie isoidio? Pablocicue. Jusiñamui cuena jitailla jira, Cristo Jesús oretagamiedicue. Cominimo jaca itatajacinona llollena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiiaimaiaí. Iena uiñocana mai o jai.

Jusiñamuimo iobillacinona fecade

3 Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jiaa, o facaisena iobillacinona fecadicue.

4 Cue comeci caimareficaillena, ona eo cioacadicue. Navui cue o facadoia, o eiana comeciticue. **5** Cristo Jesús o ñnuana dane jiaí comeciticue. O usuño Loidadi ñnote. O ei Eunicedi jiaí ñnote. Ie mei ñnotio. Naimiena o ñnuana jai uiñoticue.

6 Ie jira o comecina dane ocuiño, Jusiñamui uai o llofuellena. Cue onollí o ifogimo navui joneticue, ona fettollena, naimie uaina o llollena. Jusiñamuimona o baitajacinona naie facaiseconi feiñotio. **7** Jusiñamuidi cominina o jaciruillana jitaíñede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade. **8** Ie jira cai Nama rafuena o lluana meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefuia, rairuioicaíñeno i. Jusiñamui o comecina ocuiñotaite. **9** Naimie isoi cai marena illena, caina fetuano, jeacinomona caina jillotote. Cai finoca rafue muidona caina jillotañede; iadedi naimie jitailla jira, caina jillotote. Enirue nia finoñena facaiseconi caina jaie duenaite. Cristo Jesús caina iena jai uiñotade.

10 Cai jilloitaraimadi Cristo Jesús. Caimo Jesús jai bairia jira, Jusiñamui caina duenaillana jai uiñoticaí. Fiodaillamona naimie jai jillode. Iemona jiaí jilloiticaí. Naimie mare rafuemono naimie caina Jusiñamui ñbeimo jaca illacinona jai uiñotade. **11** Bie rafuena llollena, cuena fetode. Cuena oretaja jira, biena llofueticue. **12** Ie jira duere sefuidicue; iadedi cue illana meiruiñedicue. Cue ñnogamiena cue uiñua jira, naimie bille dinori naimiedi nana cuemo naimie jai iga rafuena cue llofuellena, cuena raise eenoite. **13** Cue llua isoi o i. Uanaicinona lloticue. Cristo Jesús ñnocana o jai. Jiaie cominina isiruicana o jai, Cristo Jesús omo o jainaiailla ji-

ra. **14** Jusiñamui Joreño caimo illa jira, omo naimie lloga uanaicinona fainonocaiñeno uiuicai. Uanaicinona o fainonocaiñellena, naimie ona canoite.

15 Diga Asiamo ite cominidi cuena fainonocaidimaci. Naimacimona Figelo cuena fainonocaide. Hermógenes cuena jiaí fainonocaide. **16** Onesíforo daje isoiñede. Diga icaíño naimie cue comecina ocuiñotade. Cuena meiruiñede. Cai Namadi Onesíforo jofomo itino duenaillasa. **17** Romamo Onesíforo navui ria, cuena isire jenuano, cuena baite. **18** Efesomo jaie cue ia, naimie cuena jiaí canode. Iena raise uiñotio. Cai Nama ico abido bia, cai Namamona naimie ñba feiñuana jitaidicue.

O maijia rafuena raise fuido

2 Cuena fainonocaidino isoi iñeno; iadedi cue jito, Cristo Jesús ona canuano, Cristo ñbeimo o comecina ocuiñocana jai. **2** Diga cominimo cue llua navui cacadio. O uaina ñnotinomo cue llua llono, iena jiaie cominina naimaci llofuellena. **3** Cristo Jesús rafue muidona duere o sefuia, rairuioicaíñeno i. Cai Nama rafuena o riiduamona, naimie soldado isoidio. **4** Ie illaíma uai naimie ñnoiacania, soldadodi soldadoñede rafuena maijiacaiñena. Ie illaíma iobitallena, ie illaíma ocuica rafuena finoacanite. Ie isoide. Da Cristo Jesús rafuena o fino, naimiena iobitallena. **5** Reglamientos llua isoi naimie raise jifanoñena, jifanoraimadi bue isoide rana cioíñede. Ie isoide. ñbana o feiñollena monamo o jaia, Cristo Jesús lluado raise o jai. **6** Illimo duere maijiraímadí maijia jira, naiemona naie guiledi oga. Ie isoide. Duere o maiji, ñbana feiñollena. **7** Cue llua o comecina facacabi. Cai Nama ona canoite, iena uiñollena.

8 Jesucristo fiodaillamona jillode. Iena comeci. Naimie usumadi David micori. Jesucristona cue llua jira, **9** maraiñedimie isoi cárcolmo duere jai sefuidicue; iadedi Jesucristo rafue nia llocana jaide. **10** Ie jira Jusiñamui fetocano facaina duere sefuidicue, Cristo Jesús naimaci ñnuamona naimaci jilloillena, monamo naimaci jaca illena. **11** Bie lluacinodi uanaicino: Naimie ñbeimo cai jaillamona, naimie diga jaca iiticaí.

12 Naimie muidona cai duere sefuia, naimie diga iiticaí, ie cominina naimie sedalle facaiseconi.

Naimiena cai janoia, naimie caina jiaí janoite.

13 Naimie raise cai ñnoñena, naimie uai meidoñena muidona, naimiedi nia ñnogamie.

Timoteo illa rafue

¹⁴ O cominimo biena dane llono, iena comecillena. Jusiñamui facaina naimacimo llono: Uaina jamai uaitañeno, mare rafuena naicinomona comuiñena jira, naicinona cacadino comeciaina maretañena jira.

¹⁵ Marena maiji, Jusiñamui ori iobillena. O meiruiñel-lena, naimie o maijia jibua, marena maiji. Uanaicino o uiñuamona, naimie uaina marena raise llofue. ¹⁶ Jamai ñaiana cacarefiñeno. Comini jamai ñainoicaia, Jusiñamui jitailla rafuena finocana jaiñedimaci. ¹⁷ Diga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiai jaide. ¹⁸ Uanaicinona fainonocaidiaimaia. Coco ñnua isoi, llofueñediaimaia. "Cai fiodaia, cai abi ico jilloñeite" llofuetiaimaia. "Cristona cai ñnua facaise jai jillodica. Cai fiodaia, cai joreño jaca iite" llofuetiaimaia; iadedi cai abi ico jillollena ñnoñediaimaia. ¹⁹ Ie ia Jusiñamui comini jaca ñnocana jaidimaci. Ie cominimo Moisés micori jaie lluaamona, iaimaia finoca rafuena jiai ñaite: "Jusiñamuidi ie cominina uiñote. 'Jusiñamuina ñnoticue' raitimiedi maraiñede rafuemona eneno illasa" llote. Ie jira iaimaiaimona eneno o i.

²⁰ Ero, ucuberedimie jofomo diga guillirue joneuilla ra jai ite. Eo jitairede rana jai ite. Janore jitairede rana jiai jai ite. ²¹ Ie isoide. Jusiñamui dibeimo itinomona naga isoide comini ite; iadedi jeacinomona eneno bu ia, Jusiñamui naimiena fetoite, ie eo jitaile rafuena finollena. Jusiñamui dibeimo raise maijiite. ²² Ie jira conirueni comeciã jitailla maraiñede rafuemona eneno o i. Marena i, Jusiñamui jitailla isoi. Jesucristona ñnocana jai. Nana cominina isirui. Uri i. Mare comeciãmona nana cai Namana sedadino diga iese i. ²³ Jamai ebena rafuemo iñeno. Naiemona icirillacinodi comuide. Iena uiñotio. ²⁴ Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Riicaiñena. ²⁵ Naimie uaina jitañedinona fecuise llofuega. Ie mei Jusiñamui naimaci comeciã iuaina nibai meidotaite, uanaicino dibeina uiñollena. ²⁶ Ie mei abi uiñuanona, Taife anamona jilloitimaci. Taifedi naimacina ie anamo jai itatate.

Jusiñamui dibeimo iñedinomona abina rairui

3 Bie lluacinomo comecina raise faca. Jesucristo abido bille facaise iairei ia, creyentena illena eo sefuienite. ² Naie facaiseconi comini dani imaci abina isiruitimaci. Ucubena ollena eo nicidoitimaci. Abina iedoitimaci. Abina biriitimaci. Jusiñamuina eo jeare ñaitimaci. Naimaci moo uaina, naimaci ei uaina ñnoñeitimaci. Jiaie cominimo iobillacinona jaca fecañeitimaci. Jusiñamuina jaca jitañeitimaci. ³ Jiaie cominina duenaiñeitimaci. Comeciãina jaiãrenitimaci. Jiaie comini joreñona eo jeare ñaitimaci. Naimaci comeciãina eenoñeitimaci. Ebe isoi naga rana duere finoitimaci. Mare rafuena jitañeitimaci. ⁴ Naimaci nabaiñiaina janoñeitimaci. Jiaie cominimo comeciãina facañeiti-

maci. Eo abina iedoitimaci. Naimaci comeciã jitailla rafuena finoacanitimaci. Jusiñamui rafuena isiruiñeitimaci. ⁵ "Jusiñamuina sedadica" raitimaci; iadedi Jusiñamui uaina jamaitimaci. Bie isoide comini diga nabairiñeno. ⁶ Naimacimona dajerie jiaie jofuemo macaritimaci, naie jofuemo ite riñoniaina jifuiãnona llofue-lena. Diga jearede rafuena finuano, naie riñoniai ebena itimaci. Naimaci comeciã iuailai raire meidocana uitimaci. ⁷ Naga lloraïma lluaamo naiñaiñuai cacareidimaci; iadedi uanaicinona jaca uiñoñedimaci. ⁸ Naimaci comeciã eo maraiñede. Jusiñamui uaina ñnoñedimaci. Jannes, Mambres diga, Moisés micori lloga uai jaie uaitaiãimaia. Ie isoi bie comini uanaicinona birui jiai jitañedimaci. ⁹ Nana comini naimaci rafue jamai ebe isoi finoca rafue uiñuamona, Jannes iaïmaia Mambres rafue jaie fuilla isoi, naimaci rafue raire fuite.

Timoteo uanaicinona ñnuanona jaiilla

¹⁰ Timoteo, cuena uiñotio. Cue llofuiãna uiñotio. Cue illana uiñotio. Cue jitailla rafuena uiñotio. Cristona cue ñnuana uiñotio. Icirñeno fecuise lloticue. Cominina isiruiticue. Duere cue sefuiã, cue comecina ocuiñoticue. Iena uiñotio. ¹¹ Antioquãmo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitate. ¹² Jusiñamui jitailla rafuena finuano, Cristo Jesús uaido jaidinodi duere sefuitimaci. ¹³ Ie facaiseconi maraiñedinodi maraiñede rafuena finocana jaitimaci. Jifuerãini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci; ¹⁴ iadedi cue llofuiã uaido ñnocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie ñnotio. ¹⁵ O uruenamona Jusiñamuina mare cuezafuãina cacadio. Naie cuezafuãia cai jilluana caïmo llote. Cristo Jesúsna cai ñnuamona, jillobidica. Iena caïmo jai llote. ¹⁶ Comini nana naie cuezafuãina cuetimaci; iadedi Jusiñamui jitailla isoi, naga cuetimie cuete. Ie jira nana naie cuezafuãia Jusiñamuimona ite. Cominimona iñede. Ie jira naie cuezafuãiaimona uanaicinona uiñotica. Cai maraiñedinona caïmo llote. Cai comeciã marena illena, Jusiñamui jitailla isoi, caïmo llote. ¹⁷ Iese llote, naimiemo cai duillamona, nana Jusiñamui rafuena cai raise uiñollena. Raise uiñuamona, Jusiñamui rafuena raise llofuerenitica. Naga Jusiñamui jitailla rafuena jiai raise finorenitica.

4 Jiañruido Cristo Jesúsdi illaïmana eniruemo abido biite. Illaïma isoi ie cominina sedajite. Naimiena ñnoñenamona nia cajedinona duere finoite. Jai fioidaitinona jillotajanona, naimiena ñnoñenamona, naimacina duere finoite. Jusiñamuidi birui caïna jaca ciode. Cristo Jesús birui caïna jaca ciode. Iena cue uiñuamona, bie uai omo lloiticue. ² Naimiena ñnoñedinona Cristo duere finoñellena, naimie rafuena naimacimo jaca llono. Comini o dafaïfia, comini ofia, comini o dine ria, naimacimo iena lloitiosa. Naimaci jitaia, llono. Jitañenia, jiai llono. Jeacinona bu finoa, naimacimo llono. Marena naimaci illena, naimacimo llono. Fecuise jaca llofue. ³ Jiañruido dajerie ua-

naicinona jitañeitimaci. Jiañfuenta jitañtimaci. Naimacimo danñ naimaci cacaacana rafuena llollena, ðiga lloufuerainña jenoñtimaci. ⁴ Uanaicinona fañnonocaida, ñgaññ icinuañdo facaññtimaci. ⁵ Timoteo, o começina eeno. Duere o sefuia, rairuioicaiñeno i. Jesucristo rafuena llocana o jai. O llofuiacinona marena fuido.

⁶ Jai iairei ite cue meinellirui. ⁷ Cai Nama rafuena llocana cue jaillano, iena marena jai riidoticue. Cue illa dinori jai fuiacade. Cai Namana fañnonocaiñedicue. ⁸ Cai Namamona marena cue illa jira, monamo ñbana feiñoiticue. Iemo jai ocuiridicue. Iena cai Nama cuejena eenote. Naimie abido billiruimo iena feiñoiticue. Caina raise uññuamona, dama cuemo fecañeite; iadedi nana naimie abido billena jitaññinomo ñbana jiañ feçate.

Pablo damierena ñaña rafue

⁹ Timoteo, raire cue dine bi. ¹⁰ Biniemo ite rafuena Demasdi eo ebiruilla jira, Tesalónicamo naimie jaillano, cuena fañnonocaide. Galaciamo Crescentedi jai jaide. Dalmaciamo Tito jai jaide. ¹¹ Dama Lucas cue ðiga ite. Marcos o ðiga ati. Cuena canollena, naimiena jitañdicue. ¹² Efesomo Tíquicono oredicue. ¹³ O bia, cue fiebide iniroina ati. Troasmo Carpio jofomo fiebide.

Cue libros ati, cue rabiai ðiga. ¹⁴ Alejandro raillamie navui cuena jeare finode. Naimiedi lloeomona rana finorañma. Cai Nama naimiemo ñba oite. ¹⁵ Naimie-mona o abi rairui. Naimie cue lluaña eo jitaññede. Iena uaitate. ¹⁶ Illaicomini dine cue rafue nano cue riidoia, jaca buna cue facaina riidoñede. Nana cuena fañnonocaidimaci. Jusiñamuidi naimacimo ñba uana jitaññedicue. ¹⁷ Cai Nama cue facaina ite. Cue começina ocuiñotade, nana judíuññedinomo naimie uai raise cue llollena. Naimie muidona cue fioidaisaillanomona jillobidicue. ¹⁸ Cai Nama naga maraññede rafuemona cuena eenote, monamo ie comiña sedajanomo cue raise rillena. Iobillacino naimiemo jaca fecacabillasa. Iena jitañdicue.

Fuiduacino

¹⁹ ðiga comiñimo cue uai oredicue: Priscamo, Aquilamo, Onesíforo jofomo itinomo. ²⁰ Corintomo Erasto fiebide. Miletomo Trófimo duide fañnonocaidicue.

²¹ Rollime ña iñña, cue dine bi. ðiga comiñi omo naimaci uai oredimaci: Eubulo, Pudente, Lino, Claudia, ua nana creyentiañ.

²² Cai Nama o começi ocuiñotajasa. Naimie nana omoña duenaillasa. Mai. Pablodicue.

TITO

Uaiduacino

1 Tito, omo cartana oretaiacadicue. ¿Nigacino? ¿Nie isoidio? Pablodicue. Naimie cominina cue illamona, naimie jitailla rafuena cue finuamona, Jusiñamui anamo llofuecabiticue. Ie rafuena llofuellena, Jesucristo ie oretagamiedicue. Jusiñamui fetocanona inotallena, naimacina uanaicinona uiñotallena, Jusiñamuina naimaci raise sedallena, cuena oretate. 2 Naimie diga jaca cai illemo cai ocuirilla jira, Jusiñamuina sedadicaí. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede. 3 Iemei naimie jitaillarui caina ie rafuena jai uiñotade. Naie rafuena cue llollena, naimie cuena oretate. Naimiedi cai jilloitaraima. 4 Tito, bie carta omo cueticue. Cue isoi o inua jira, cue jitona cue mamecao. Coco Moodi Jusiñamui. Coco jilloitaraimadi Jesucristo. Iaimaiaí ona jai duenaitiaimaiaí. Iena uiñocana mai o jai. Ona uri jai itatatiamaiaí. Iena uiñocana mai o jai.

Creyentiaina sedaraini illacinuai

5 Nainomo ite rafue o fuidollena, Creta railla uiasimo ona fainonocadicue. Creyentiaina sedallena, naga nairai illanomo llofuerainina o fetuana navui omo lloticue. 6 Creyentiaina llofuerainina o fetoia, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruai creyentiaina itimie. Nana comini naimie uruai mare raillamie. Naimie uruai ie uaina inotimie. 7 Jusiñamui facaina naimie maijia jira, creyentiaí sedaraimadi mareñena illa. Abina iedoñena. Raie iciriñena. Jifairuiñena. Fuiriruiñena. Ucubena nicidoñena. 8 Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua. 9 Naie uai raise llofuia mona comini comeciaina ocuiñotallena, naimie uaina uaitatinona llicaitallena, cai llofuia isoi uanaicinona inocana naimie jailla.

10 Ie isoidinona feto, ailluena comini Cristo rafuena raise inoñena jira. Tainocinuaina ñaicabitimaci. Cominina jifuecabitimaci. Judíuai creyentiaimona diga comini iese itimaci. 11 Ie jira naimacina llicaita. Naimacidi diga cominina uri itatañedimaci. Uañiñedicinona llofuetimaci, ucube bifuiano ollena. 12 Naimacimona comini rafuena lloraíma navui raite: "Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillaredimaci. Rairaidimaci" raite. 13 Naimiedi uanaicinona

llote. Ie jira creyentiaimo riire llono, naimaci Jusiñamui uaina raise inollesa. 14 Judíuai ñgaiaina naimaci inoñellena, comini lletarafuena naimaci inoñellena, naimacimo riire llono. Damierie uanaicinona jitañedimaci. 15 Ero, mareuidinomona naga ra mare. Jusiñamuina inoñedinomona naga ra jearede. Naimaci comeciadi jai jearena jira, jearerie comeciaina facacabidimaci. 16 "Jusiñamuina uiñoticaí" raitimaci; iadedi Jusiñamuina uiñoñedimaci. Naimaci finoca rafuemonia iena uiñoticaí. Jusiñamui naimacina eo gaiñede. Buena inoñedimaci. Ie jira mare rafuena finuana uiñoñedimaci.

Creyentiaí marena illena, uanaicinona llofue

2 Tito, Jusiñamuina inoñedino isoi iñeno. Odi uanaicino llofue, naimaci marena raise illana uiñollena. 2 Uaicimaiaina llofue. Canamacina jiaí llofue: Jifaiñeno. Inogamiena jai. Uairico isoi iñeno. Jusiñamui uaina raise ino. Omoi ecimo itinona isirui. Duere omoi sefua, omoi comeciaina ocuiño. 3 Uaicinuaina llofue. Cañaiñuaina iese jiaí llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeiñaiñuai mare rafuedo jaitimaci. 4 Naiñaiñuai inina isiruillena, naiñaiñuai uruaína jiaí isiruillena, 5 uairico isoi iñellena, jearede rafuena inoñellena, jofomo raise maijillena, cominina duenallena, naiñaiñuai iniñiaí uaina inollena, jiaie comini Jusiñamui uaina jamaiñellena, naie cañaiñuaimona fueoitimaci. 6 Einamacimo llono. Coniruenimo jiaí llono: Ieñede ramo omoi comeciaina facañeno. Uairico isoi iñeno. 7 Tito, naga rafue o finua diese, mare rafuedo o jai. O llofuia, uanaicinona llono. Jamaí ebe isoi llofueño. 8 Marena llofue. Marena o llofuia, ¿niese comini o uai uaitaitimaci? Uaitañeitimaci. Iemei o díbeimo iñedino meidaitimaci, caimo jearede rafue iñenia. Ie jira cairi ñañeitimaci. 9 Patrón anamo itinomo iese llono: Omoi patrón uaina ino. Naimie jitailla rafuena raise fino. Naimie uaina oñeno.

10 Rana fiñeno. Naimie raruiaí raise seda. Iese naimaci ia, naimaci raise maijia, naimaci patrón: "Jusiñamui uai mare" raite. Jusiñamuidi cai jilloitaraima.

11 Jusiñamui caina duenallana jai cai uiñua jira, naicinona llofue. Naimiedi nana cominina jillotaiacade. 12 Naimie uai caimo llote: "Cue díbeimo iñede rafuena eneno fainonocai. Maraiñede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina inocana jai". Iese cai illana Jusiñamui birui jitaide.

¹³ Jiaí caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiaí cai Jilloitaraima”. ¹⁴ Cairi naimiedi fio-daite, cai jearedicinomona cai jilloillena. Naimie cominina cai illena, mare rafuena iocire cai finollena, cai começiaina marena dote. ¹⁵ Naie rafuena llofue. Maraiñede rafue comini finoia, naimacimo llono. Illai-ma uai isoi llono. Cominidi o uaina jamaiñellena, raise llofue.

Creyentiaí illacinuai

3 “Omoi illaicomini uai anamo i” creyentiaimo dane llono. Omoi illaicomini llucinona ñno. Mare maijille ia, iena raise fino. ² Jiaie cominina jeare ñaiñeno. Fuirineno. Fecuisse uiuicai. Nana comini diga marena ñaino. ³ Jiaie cai jiaí ebe isoidicai. Jusiñamuina ñnoñedicai. Taife caina jifue. Dani cai começiái jitaillacino railla isoi finouidicai. Diga ie jearede rafuena finouidicai. Jiaie cominina jeare finouidicai. Marairainidicai. Abina uradoisoidicai. Cominidi caina enoisoidimaci. Coninina jiaí enoisoidicai. ⁴ Ie ia Jusiñamuidi maremenana jai fididicai. Naimie caina isiruillana jiaí fididicai. ⁵ Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai começiaina dote. Ie jira naimie ðibeimo cai começiaina dobaiñoticai. Jusiñamui joreño cai começiaina marena finode. ⁶ Ie joreño caimo raise fecade, Jesucristo finua muidona. Jesucristo cai Jilloitaraima. ⁷ Ie jira naimie-

mona marebicaidicai. Caina duenaillamona, marebicaidicai. Caina ie cominina itatate. Iemona naimie diga jaca illemo ocuiridicai.

⁸ Tito, cue llucinodi uanaicino. Jusiñamuina ñnotino marena maijillena, cue llucinona llo-llocai. Cue llucinona mare. Ie jira nana cominidi iena cacacabillasa. ⁹ Ebena ñaiñeno. Omoi usumatiaí mameçiaina jamai sia-siadoñeno. Moisés micori llogacinuaina uaitañeno. Naicino diga buena oñedicai, Jusiñamui jitaillacinona cai finollena. ¹⁰ Roracomo comini começi jiaifocaitatimie ia, naimiemo llono: “Tena finoñeno”. Dacaiño o lluamona naimie ñnoñenia, dane llono. Ie mei ñnoñenia, naimie diga omoi ñaiñeno. Naimie diga omoi nabairiñeno. ¹¹ Uanaicnodo naimie jai jaiacaiñede. Jeacinona jai finode. Naimie iena jai uiñote.

Fuiduacino

¹² Artemas o dine cue oretaia, Tíquico o dine cue oretaia, Nicópolis railla nairaimo are sedañeno raire bi. Nainomo rollime facaiseconi cue começi illana jitaide.

¹³ Zenas railla abogado Apolos iaimaiaí diga cano, iaimaiaí oni jaiacana jira. Iaimaiaí jitailla rana feca.

¹⁴ Dueredino ia, naimacina canollena, creyentiaimo: “Marena maiji” jiaí llono. Naimaci jamai iñellena, iese llono.

¹⁵ Cue diga itino naimaci uaina omo oredimaci. Jesucristona cai ñnua jira, caina isiruitinomo cue uaina llono. Jusiñamui nana omoina duenaillana uiñocana omoi jaillana jitaidicue. Mai. Pablocicue.

FILEMÓN

Filemómo Pablodí carta orede

1 Filemón, bie carta o dine oredicue. ¿Nie isoidio? Pablodicue. Jesucristo rafue cue lluamona, cárcelmó iticue. O dine cue uai oredicue. Timoteo cue diga ite. Ie uai jiaí orede. Cai Moo Jusiñamuimo jai cai jainaiilla jira, naimiedi coco ama. Coco diga Cristo facaina o maijia jira, ona isiruiticoco. ² Coco uaina Apiamo jiaí oredicoco. Cristo díbeimo naiñaiño illamona, naiñaiñodi coco miriño. Coco uaina Arquipomo jiaí oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiaí oredicoco. ³ Cai Moo Jusiñamui, cai Nama Jesucristo diga, omoína jai duenaite. Iena mai uiñocana omoi jai. Iaimaiaí omoína uri jai itatate. Iena omoi uiñocana mai omoi jai.

Filemón Cristona ñnocana jaide

⁴ Jusiñamui diga cue ñaia, o facaina cue jiaia, naimiemo iobillacinona fecadicue. Mare rafuena o finuana cue fidia jira, naimiemo iobillacinona fecadicue. ⁵ Cai Nama Jesúsna ñnocana o jaillana fididicue. Nana creyentiaina o isiruillana jiaí fididicue. ⁶ Cristo díbeimo cai illa muidona, naimiemo diga marecinona feiñoti-caí. Cristona o ñnuamona, jiaie creyentiaina o nabaia, omona naie marecinona uiñoitimaci. Naga mare ra uiñocana naimaci jaillana jitaídicue. ⁷ Cue ama, creyentiaina o isiruilla jira, iobidicue. O muidona creyentiái comeciái caimare uri illa jira, cue comeci iocire ite.

Onésimo facaina Pablo ñaite

⁸ Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue; ⁹ iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue. ¹⁰ Onésimo facaina ñaiacadicue. Cárcelmo cue illa facaiseconi, cue muidona Cristona naimie ñnua jira, naimie cue jitona jaide. ¹¹ Omo naimiedi marañede rafue navui finode. O mul-

laima naimie illanona, raise maijñede. Bene aisiamona, Cristona naimie ñnote. Cuena birui eo canode; iadedi birui o diga raise iacade. ¹² O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comeciña jiaí oretaiticue. ¹³ O facaina naimie cuena birui canode. Cue diga naimie fiebillana jitaídicue; ¹⁴ iadedi: "Jee" o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitaíñedicue; iadedi dama o comeci jitailla jira, mare rafuena o finuana jitaídicue. ¹⁵ O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaíma; ia naimiedi jiaí birui o ama. Naimiena isiruillanona feiño. ¹⁷ O nabaina iticuena cuena o feiñua isoi, naimiena feiño. ¹⁸ Naimie marañede rafuena omo navui finode. Omo naimie nia debia, cue facaina jone. ¹⁹ Iena ibaiticue. Bie carta dama cue cuamona, naimie debiana cue ibajana uiñotio. Omo eo lloñeiticue; iadedi cue muidona Cristona o ñnua jira, ailluena cuemo debedio. ²⁰ Cue ama, coco Nama Cristomo coco jainaiilla jira, cue jitailla rafuena fino. Ie mei cue comeci uri iite. ²¹ Cue jitailla rafue o finollena uiñoticue. Cue jitailla rafue baífemo o finollena uiñoticue. ²² Jiaie rafuena lloiacadicue. O jofomo daje cuarto cuejena fino. Cue facaina o jiaia, Jusiñamui jitaia, o dine jaiticue.

Damierie imaci uaina jiaí orede

²³ Omo Epafra ie uaina orede. Jesucristo rafue llua muidona, cárcelmo cue diga naimie ite. ²⁴ Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijñede. ²⁵ Cai Nama Jesucristo nana omoi creyentiái comeciaina ocuiñotajamona omoína duenaillasa. Mai. Macaibaite. Pablodicue.

HEBREOS

Jesucristo rafuena jai cai cacajamona, Jusiñamuiña jai uiñoticai

1 Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaina orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaina orede; ² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticai. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote. ³ Ie Jito uaido nana naie rana finocana uite. Naimie muidona Jusiñamui marena ebirenana uiñoticai. Jusiñamui marena naimie illa isoi, naimiemona Jusiñamuina uiñoticai. Eniruemo billanona, cai comecimo ite jeacino facaina naimie fiodaite. Monamo abido jailanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisai baifemo faite

⁴ Jusiñamui Jitona naimie illamona, naimie illano Jusiñamui jaienisai illano baifemo faite. Ie illanomona naimie Jusiñamui jaienisai baifemo faiana uiñoticai. ⁵ Jusiñamuidi: "Cue Jitodio" Cristomo llote; iadedi ie jaienisaimo iese lloñede. Jiaicaiño llote: "Naimie Moodicue. Naimie cue Jito" llote. Ie jaienisai ie Jito baifemo faiñena jira, ie jaienisaimo iena jaca lloñede. ⁶ Ie dajede Jito eniruemo oretaja facaiseconi Jusiñamui llote:
Nana cue jaienisai naimiemo iobillacinona fecaja; ⁷ iadedi jiaie rafuedo ie jaienisaina ñaite:
Cue ocuilla rafuena naimaci finollena, cue ocuilla diese naimacina oretacabiticue. ⁸ Ie Jitona ñaianona raite:
Cue isoi o illa jira, cominina o sedajafue jaca iite. Eo marecinodo cominina jaca sedadio. ⁹ Mare rafue finuana jitaideo.
Maraiñedinona finuana jitaideo.
Ie jira ona caimare jai itataticue.
Monamo o abido billanona, cue jaienisai baifemo ona caimare itataticue raite. ¹⁰ Jiaicaiño Jusiñamui ie Jitona raite:

Cue isoi o illa jira, o uai diga nanodofocni eniruena jaie finodio.

Mona jiai finodio.

¹¹ Bie eniruedi mona diga ico fuite.

Eniroi fuilla isoi, iñeite;

iadedi odi jaca iitio.

¹² Eniruena mona diga meidotaitio;

iadedi odi jaca daje isoitio.

Jaca iitio

raite. ¹³ Ie Jitomo biena llote; ia ie jaienisaimona damiemo iese lloñede. Ie Jitomo llote:

Illaimana o illamona, cue nabei dine ana rai.

Nana o ðibeimo iñedinona o anamo itataticue.

¹⁴ Ie jaienisaimo iena lloñede; iadedi naimacina oretacabite, ie Jitona inotinona canollena. Ie jira nana naiemona, ie Jito ie jaienisai baifemo faiana uiñoticai.

Jusiñamui caina jillotaja rafuena cai jamaiñena

2 Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai inuasa. ² Ero, Jusiñamui ie jaienisaina jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise inoñenia, Jusiñamui naimiena eo duere finode. Jusiñamui jaienisai lloga rafue mare; iadedi Cristo birui lloga rafue jaienisai jaie lloga rafue baifemo faia jira, Cristo rafuena cai inoñenia, Jusiñamui caina duere finollemona ua jilloñeiticai. Ero, naimie cai jeacinomona caina jillotaiacade. Naie rafuena cai jamaia, iena cai inoñenia, naimie caina duere finollemona ua jilloñeiticai. Cai Nama Cristo naie rafuena jaie llote. Naimiena cacadinodi caimo iena jai llotimaci. Cristo rafuedi uanaicinona llotimaci. ⁴ Jusiñamui uai diga jiaiforiede siño rafuena naimaci finuamona, Cristo rafuedi uanaicinona uiñoticai. Naimie jitailla diese naga creyentemo Jusiñamuidi ie uaina itatate. Naga creyente naimie ðibeimo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñoticai. Ie jira naie rafuena cai inuasa.

Cai isoi illena, Jesucristo imana jaide

⁵ Jusiñamuidi ie jaienisaina oretauide, ie jitailla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote.

⁶ Jusiñamuimo David micori iena jaie llote:

Cai jamai bue isoidicai; iadedi caimo comecina facadio.

Jamai cominidicai; iadedi caina canodio.

⁷ Caina cominina o finua jira, o jaienisai isoi iñedicai.

Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

⁸ Nana rana naimie anamo o itatajana jaie llotio.

Iese lloite; iadedi nana naie lloga rafue nia suiñede, jeacinona Adán micori jaie finua jira. ⁹ Jesúsna dane lloiticue. Naimiena uiñoticaí. Eniruemo naimie jaie bil-lamona, Jusiñamui ecimona naimie billa jira, Jusiñamui jaienisai illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiena Jusiñamui abido itatajamona, Jusiñamui naimiena iobitade.

¹⁰ Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicai. Naimie illanomo ico iiticaí. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiena ñnotinodicaina jai raise canorede. ¹¹ Naimie fiodaillamona marebicaidicai. Naimie dibeimo jai cai illa jira, daajena mooredicai. Ie jira naimiedi: "Cue cominidomoi" caina meiruiñeno lloite. ¹² Jusiñamui facaina lloraini micoríai llogacinomona naie rafue uanaicinona uiñoticaí. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci

jaie llotimaci. ¹³ Jesúsna dane ñaitimaci:

Ie comini diga naimiedi Jusiñamuina ñnocana jaite.

Jusiñamui cominina damierie jailla jira, naimacidi jiai

naimie comini ñaitimaci. Naimiaci ñaia isoi, Jusiñamui cominina birui

jaidicai. ¹⁴ Jusiñamuina ñnotinodi cominina jira, cai isoi

naimie illena, Jesúsni comena jaide. Cai fiodailla isoi,

naimie jiai fiodaite. Taife uaina cai ñnoia, jeacino fin-

odicaí. Iemona fiodaicana jaidicai. Jeacino anamona

caina Jesús jai jillotaja jira, Jusiñamuimona Taife uai jai

saide. Jusiñamui dibeimo iñenanomona jai jillodicaí.

¹⁵ Jesús nia fioidañenia, nana cai illa dinori fiodaillana

jaciruicana jaidicai. Jesús jai fiodailla jira, caina jaciruill-

lacino anamona jillobitade. ¹⁶ Jeacino anamo naimiaci

iñena jira, Jusiñamui jaienisaimo ie comecina fa-

cañede; iadedi Abraham micori isoi ñnotinomo naimie

comecina facade. Naimacina naimie jilloitallena,

naimiedi comena jaide. ¹⁷ Comena naimie illena,

Jusiñamui naimiena orede. Cai isoi naimie duere sefuil-

lena, naimiena orede. Cai isoi ramo naimie Taife faia-

mona, naimie fueollena, naimiena orede. Cai illana

raise uiñote. Iemona caina dueruite. Jusiñamui jitaill-

lacino finuana raise uiñote. Ie jira Jusiñamui diga cai

facaina nanoca ñairaimana naimie raise jaide. Ie jira

cai jeacinona oni dotajana Jusiñamuimo jicanote.

¹⁸ Naimie duere sefuilla jira, naimie ramo Taife faia jira,

cai ramo Taife faia isoi, naimie caina canorede. Taife uai naimie ñnoñena jira, caina canorede. Taife uaina cai finoñellena, cai comeciaina ocuiñotade.

Jesús Moisés micori baifemo faite

3 Cue amatiaí, jeacino anamo omoi jai iñena jira, ie dibeimo omoína Jesús jai fetua jira, naimie siño jitona jira, naimiemo omoi comeciaina faca. Naimiena ja ñaiticue. Ie rafuena lloilla, Jusiñamui naimiena orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima.

² Ie Moo cominina naimie raise sedajanona, naimiedi ie Moo uaina ñnuanona, iena finode. Nana Israel cominina naimie sedajanona, Moisés micori Jusiñamui uaina ñnuanona, iena finode. ³ Jusiñamuimona Jesúsni Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúsni Jusiñamui iobide. Cai jillua jira, Jusiñamui cominina jaidicai. ⁴ Buena cai finuamona, naimie cominina jaiñedicai; iadedi naimie caina ie cominina dama itatarede. ⁵ Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise lloite. Naimiemona Jusiñamui ico lloille uaidi uanaicinona uiñoticaí.

⁶ Jusiñamui facaina maijionona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai ñnocana jaia, naimiemo caimare cai ocuiria, Jusiñamui ua cominidicai.

Jusiñamuimona abido cai jaiñellena, bie rafuemona cai fueua

⁷ Jusiñamui Joreño caimo birui lloia, iena cacarei. Ero, Jusiñamui jaie llua cuetatate:

⁸ Omoi jaiagai isoi iñeno. Jofue iñenanomo omoi jaiagai ia, cue uaina ñnoñedimaci.

⁹ "Naimie uaina raise uiñoticaí" raillanona, cuena facicabitimaci.

Cuarenta años cue siño finoca rana cioidimaci; iadedi jaca ñnoñedimaci.

¹⁰ Naimacimo lloticue: "Omoi diga iciriticue. Cue dibeimo omoi illamo omoi comeciaina facañedomoi.

Cue lloga uaido jaiacañedomoi". ¹¹ Omoi diga cue icirilla jira, nainomo uri illena, omoi mo cue lloga eniruemo jaca jaiñeitomoi.

¹² Cue amatiaí, cai jaiagai rafuena cai uiñuamona, cai fueua. Uanai Jusiñamuimona abido omoi jaiñellena, naimie jai lloga rafuena omoi ñnocana jai. Omoimona bu raise ñnoiacañenia, naimiemo llono. ¹³ Jusiñamui rafuena omoi raise ñnollena, nagarui conini omoi comeciaina ocuiñota. Omoimona jeacinona ebiruifellemona, jeacino anamo omoi iñellesa, birui Jusiñamui rafuena raise ñno. Jeacino anamo omoi dane jaia, Jusiñamui rafuena ñnoñeitomoi. Iemona

naimie riicallafue anamo dane iitomoí. ¹⁴ Cristomo cai duilla jira, naimie caina jaca canuanona, cai comeciain marena caimare jaca itataite. Nana cai ille dinori naimiena cai nano inua isoi, cai inocana jaia, marena caimare iiticaí. ¹⁵ Ie jira naimiena ino. Bie jaie cuega:

Jusiñamui lloga uaina birui cacarei.
Jofue iñenanomo cai jaiagai ia, Jusiñamui uaina inoñedimaci
cuega. Naimaci isoi iñeno.

¹⁶ Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise inoñedimaci. ¹⁷ Cuarenta años jofue iñenanomo itimaci; iadedi naimiena naimaci inoñena jira, Jusiñamui naimaci diga icirite. Naimiena inoñena jira, naimaci-mo Jusiñamui llote: “Omoimo cue lloga enruemo jaca jaiñeitomoí” llote. Ie jira jofue iñenanomo naimacimo Jusiñamui jai lloga enruemo jaiñeno fiodaitimaci.

¹⁹ Jusiñamui uaina naimaci inoñena jira, naie Canaán railla enruemo jaca jaiñedimaci. Naimaci comeciain jaca uri illana uiñoñedimaci.

4 Jusiñamui dibeimo raise cai illamona, Jusiñamui cai comeciain birui uri illana jitaide. Naimie lloga uai nia saiñede. Caimona damierie iesee iñellesa, cai jaiagai isoi cai iñellena, abina rairuicana mai cai jailla. ² Jusiñamuidi comini comeciain uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci inoñena jira, iemona buena oñedimaci. ³ Jusiñamuidi cai comeciain uri illana birui caimo jai llote. Cristo ie mare rafuena jai cacadimaci. Naimie uaina cai inua jira, cai comeciain jai uri ite. Cai jaiagai comeciain uri iñede. Moisés micori cuiamona iena uiñoticaí. Cuega:

Naimaci diga Jusiñamui icirilla jira, naimacimo lloga enruemo jaiñedimaci

Comeciain uri illana jaca uiñoñedimaci cuega. Jusiñamuidi nana comini comeciain uri illana jitaide. Enruena naimie finocamo, comini comeciain uri illana jitaide. ⁴ Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeciain caimare uri illamona, siete iruimo jafaici ote cuega. Jusiñamuidi nana comini comeciain uri illana nia jitaide. Moisés micori facaise cai jaiagai comeciain uri illana jitaide; iadedi naimiena naimaci inoñena jira, naimaci comeciain jaca uri iñede. Moisés micori fiodailla mei, bie enruemo Josué micori cai jaiagaina ifode; iadedi naimaci rilla mei, Jusiñamuina naimaci inoñena jira, naimaci comeciain jaca uri iñede. Josué micori illa facaísemona diga años illanona, David micori comeciain uri illana jiaí llote:

Naimie uaina birui omoi cacaia, iena ino llote. Naiemona Jusiñamui cai comeciain uri illana jitaillana uiñoticaí. Naimiena inotnodicaimo naie rafue jai duide. ¹⁰ Jusiñamuina cai inuamona, cai comeciain jai uri ite. Cai comeciain uri illana, jiaie rafuedo jaiñedimaci. Naimiena cai inuamona, naimie illanomo ico iiticaí.

Nana naimie finoca rafuena naimie fuidua mei, nainomo uri iiticaí.

¹¹ Cai jaiagai inoñedimaci. Cai faifiñellena, naimaci isoi cai jaiñena; iadedi Jusiñamui uaina inocana mai cai jailli. Jusiñamuina cai inuamona, naimiedi cai comeciain uri itatate. ¹² Naimiena cai inoñena, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaino riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinauina riire bairetate. ¹³ Jusiñamuimona buna reiriride. Jusiñamui nana caina cide. Nana cai finoca rafuena uiñote. Nana cai comeciaino iticinona uiñote. Ie jira naimie uaina inocana mai cai jailli

Jesúdi cai facaina Jusiñamui diga nanoca ñairaima

¹⁴ Jesúdi naie uaina cai inuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena inocana jaiticaí. ¹⁵ Taife cai ramo faia, cai comeciain raise cai ocuiñoñena, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie inoñede. Iemona Taife ramo faiacinona inoñenana naimie uiñua jira, jeacinona oñede. Caina canorede. “Naimacina cano” ie Moomo llocabite. ¹⁶ Cai facaina ie Moo abimo naimie illa jira, cai comeciaina naimie ocuiñotaiaicana jira, Jusiñamuina jaciruiñeno naimiemo cai jia. Naimie caina due-naillamona, cai jeacinona feitaite. Cai comeciaina jiaí ocuiñotaite.

5 Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticaí. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecaidimaci. Cominina Jusiñamui feiñollena, imaci ñairaima Jusiñamui diga ñaite. ² Nana comini isoi naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui dibeimo raise jaiñedinona fecuise canorede. ³ Comini facaina toiniaina fecauide; iadedi naimiemo jeacino illa jira, naimie facaina toiniaina jiaí fecauide.

⁴ Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñoticaí.

⁵ Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie cuegafuiaimona iena uiñoticaí. David micori Jusiñamui llua na jaie cuega:

Cue Jitodio. Jai o Moodicue cuega. ⁶ Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

⁷ Eniruemo Cristo ia, imana naimie jailla jira, duere sefuide. Naimie fioidaiacana iairei ia, Jusiñamuimo eo jide. Naimie fioidaifena Jusiñamui jillotarede; iadedi Jusiñamuimo ado llote: “Cuenallegi cacaitaño; iadedi cue comeci jitailla isoi finoño. O comeci jitailla isoi fino” llote. Jusiñamui uaina naimie raise inua jira, Jusiñamui naimie jiana cacajano fairiote. ⁸ Naimiedi Jusiñamui Jito; iadedi Jusiñamui naimiena llegi cacatate. Iemona Jusiñamuina inocana jaca jaillana naimie uifote. ⁹ Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena inotinona jillotaite. ¹⁰ Melquisedec micori isoi comini facaina fairaimana jaca illena, Jusiñamuidi naimiena fetode. Melquisedec micori uai jaca saifena jira, naimie ifomo illena, jiaimiena jaca fetofede. Ie isoi Jesús uai jaca saifede.

Cristo dibeimona abido danomo jaiño

¹¹ Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaitaño jira, omoi comeci iena raise jitaifena jira, omoimo iena raise llonidicue. ¹² Cristo rafuena are omoi cacaja jira, iedo omoi raise jaidomoidena, llofueraimana jaidomoi; iadedi iedo nia raise omoi jaiñena jira, jiaimie omoina llofuiana nia jitaidomoi. Cristo dibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena inocana nia raise jaiñedomoi. Eo janorede janosa monoijina jitaicabide. Einamaci isoi guillena nia jitaifede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uifofede. Monoijina jitaide isoide. Janosa monoiji jirua mei, jiaie guille guillamona moonaitaite. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi. ¹³ Janosa monoijina nia jitailla jira, naimie nia moonaiñenana uifotica. Naimie nia abina uifofede. Jusiñamui jitailla isoi marecinona finuana nia uifofede. ¹⁴ Guilledi moonaitimie ie. Ie isoide. Cristo rafuedo raise jaidimiedi Cristo rafuena uifocana jaide. Iemona marecinona finollena, llofuiana uifote. Maraiñedicinona finofellena, llofuiana jiaie uifote.

6 Diga icaiño bie rafuena jai cacadomoi. Cristona nano cai cacaja rafuena raise cai inuamona, jiaie Cristo rafuena raise uifocana mai cai jailla. Cai nano cacaja rafuena cai fueoiacana siadocabiñelli. Cristo dibeimo cana itatañede rafuedo navui jaidica; iadedi cai comeci iuai birui jai meidotica. Cristo dibeimo itatate rafuedo birui jaidica. Jusiñamuina inuamona, naimie dibeimo jaidica. ² Cristo dibeimo bautizajana jai uifotica. Llofueraimana jaillena fetuana jai uifotica. Creyentaina naimaci sedallena, naimacimo cai onolli jonianona, Jusiñamuimo cai jianona, naimaci fetuana jai uifotica. Nana creyentia fioidaillamona jilluana jai inotica. Jusiñamuidi naimiena inofedinona ico jaca duere finollena jai inotica. ³ Naie isoide rafue mare; iadedi iena cai raise inuamona, Jusiñamui jitailla jira, naimie cana canuamona, jiaie Cristo rafuena

fueocana mai cai jailli. ⁴ Uanaicinona omoi comeci uifnuamona, Cristona omoi inuamona, Jusiñamui Joreño omoimo illamona, ⁵ Jusiñamui uaina mare omoi uifnuamona, Cristo uai siñonana omoi uifnuamona, abido danomo omoi jaiñellena, abina rairuicana omoi jai. ⁶ Cristo dibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitaifena jira, Cristo fioidaillana jai jitaifede. Cristona jeare jai finode. Cristo finoca rafuena jamaide. Cristona naimie jitaifena, ¿niese naimie jillobite? Jillobite. Ie jira abido danomo omoi jaiñellena, abirairuicana omoi jai. ⁷ Ero, iena jiaie rafuedo lloiticue. Jusiñamui noci deitacabilla jira, enirue naimie raitacabilla jira, iemo riarasucuanona, iena ie nama raitia, naimena ie llisillana naimie uamona, Jusiñamui iobide; ⁸ iadedi naie eniruemo riarasicoñena, maraiñede. Monaigi cuiraio diga naimena dama sicua, maraiñede. Jusiñamui nainomo noci deitate; iadedi naimena llisillana onide. Naie enirue caimanide. Maraiñede. Ie nama iobiñena jira, iena faionocaide. Naie enirue isoidomoi. Jusiñamuimona mare rafuena cacadomoi. Iena inocana omoi jaia, naimie omoina iobitaite. Iena omoi jitaifena, naimiemona duere sefuitomoi.

Jusiñamui llua jira, cai comeci acuiñocana jaidica

⁹ Cue isiruigaomoi, abirairuillicinona omoimo llotica; iadedi cai llofuicino omoimo duifnenamo cai comeciaina facañedica. Cristona inocana omoi jaillamocai comecina facadica. ¹⁰ Jusiñamui omoina raise uifote. Naimiena omoi isiruillamona, jiaie creyentaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñetomoi. ¹¹ Omoi comeci imona jiaie creyentaina omoi canua isoi, Cristo rafuedo nana omoi ille dinori inocana omoi iocire jaillana jitaidica. Naimie diga ico jaca omoi ille jira, iese omoi jaillana jitaidica. ¹² Cristo rafuedo omoi jaillamona omoi sefuiruifnenana jitaifedica. Jusiñamui lloga uaina inocana jaidino isoi, omoi jaillana jitaidica. Naimiena naimaci inuamona, naimie lloga uai fecuise naimaci ocurillanona, naimie lloga uaina oitimaci. Naimaci isoi omoi jaia, naimie lloga uaina jiaie oitomoi.

¹³ Ero, Jusiñamuidi Abraham micorimo lloga uaina uifotomoi. Naimiedi Jusiñamuina jira, uanaicinona llote. Tainona lloñede. ¹⁴ Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiana eo jebuitaiticue” llote. ¹⁵ Abraham micori naimie lloga uaina inote. Iena suillemo fecuise ocuride. Ie jito Isaac micori, Jusiñamui llua isoi, comuide. ¹⁶ Uanaicino cai llocabillana jiaie comini uifollena, Jusiñamui mamecina llinotica. “Jusiñamui cana cide” llotica. “Uanaicinona cai lloñena, Jusiñamui cana duere finoite” llotica. Ie jira cai lloga uaina buna uaitañede. ¹⁷ Ie isoide. Jusiñamuidi ie finolle rafuena cimo jai llote. Naimie lloga uai meidonillana cai uifnuana naimie jitaide. ¹⁸ Naimiedi Jusiñamuina jira, ie

uai naimie jai llua jira, naimie tainona llonillana uiñoticaí. Ie jira naimie lloga uai naimie finuana uiñoticaí. Naimiena caí ñnuamona, naimie anamo caí illa jira, caí na naimie eenua jira, caí comeciaí ocuiñocana jaidicaí. Naimie illanomo íco caí jaca illemo ocuridicaí. ¹⁹ Naie rafuena Jusiñamui llua jira, caí comeciaí ocuiñocana jaidicaí. Ie lloga uaina naimie finollemo ñnoticaí. Monamo Jusiñamui illanomo íco caí illena eo raise uiñoticaí. Nainomo fiebillena, barco ie lloelluna illemo dotaja isoi, caí comeciaí naganomo iñellena, Jesús caina eenote. ²⁰ Jesús nainomo jai illa jira, naimie muidona nainomo jiaí iiticaí. Caí facaina nainomo ie Moo diga ñaicabite. Caí facaina nanoca ñairaimana jaca ite. Melquisedec micorí ñaia uai saíñena isoi, Jesús caí facaina ñaia uai jaca saíñeite.

Melquisedec micorí illa isoi, Jusiñamui diga ñairaimana Jesús jaide

7 Iena omoi raise uibiñollena, Melquisedec micorí rafuena omoimo lloiticue. Naimie micoridí Salem railla nairai ie illaíma. Naimiedí comini facaina caí Moo Jusiñamui diga ñairaima. Cinco illaímana Abraham micorí anafefitaja mei, ie jofomo Abraham micorí abido billano, naisomo naimie dine Melquisedec micorí bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñoticue” llote. ² Jusiñamui diga ñairaimana Melquisedec illa jira, naimiemo Abraham micorí dajerie rana fecade. Naie cinco illaímana anafefitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micoridí Salem railla nairai illaíma. Melquisedec mamecí oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. ³ Naimie moona, naimie eina, naimie cominina uiñoñedicaí. Naimie jeicaruina uiñoñedicaí. Naimie fiodaillaruaína uiñoñedicaí; iadedí Jusiñamui jito isoi Jusiñamuimona naimie feiñoga uai saíñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

⁴ Ero, caí cominimona Abraham micorí caí jaiagai baífemo faite; iadedí Melquisedec micorí Abraham micorí baífemo faite. Ie jira naimiemo ie décima facaina rana fecade. ⁵ Moisés micorimona Abraham micorí uruai Jusiñamui lloga uaina cacadimaci. Naimacimo Jusiñamui ie sedaja jofu finuana llote. Nainomo maijidinomo nainomo maijiana llote. Abraham micorí uruaiimona Leví railla nairaina fetode. Nainomo maijidino comini facaina Jusiñamui diga ñaiuidimaci. Jusiñamui ocuica rafue naimaci maijia jira, naimaci comini ramona décima facaina rana feiñouidimaci. ⁶ Melquisedec micorimo Abraham micoridí ie rana fecade; iadedí Melquisedec micorí Abraham micorí cominiñede. Leví railla nairai imieñede. Naisomo Abraham micorí dine Melquisedec micorí billanona, Abraham micorimo marecinona llote: “Jusiñamui ona jaca

canoite. O diga jaca iite” llote. ⁷ Melquisedec micorí Abraham micorí baífemo faia jira, naie marecinona naimiemo llote. ⁸ Ero, Melquisedec micorimo Abraham micorí rana fecade; iadedí Melquisedec micorí fiodaillaruaína uiñoñedicaí. Naimie uai saíñena jira, jiaimie naimie ifomo jaca iñede. Comini facaina Jusiñamui diga ñairaimo naimaci ramona décima facaina caí judíuai cominidí fecauidimaci; ia naie ñairaini fiodaicana jaillana uiñoticaí. Naimaci uai sailla jira, jiaino naimaci ifomo meiduidimaci. ⁹ Leví micoridí Abraham jito. Leví micorimona Leví railla nairai comuide. Naimacidí Jusiñamui diga ñairainina jaidimaci. Cominimona décima facaina rana feiñouidimaci. Leví micorí nia comuiñena, Melquisedec micorimo Abraham micorí décima facaina rana fecajamona, Abraham micorí Leví ie usumana jira, Melquisedec micoridí Leví nairai baífemo faiana uiñoticaí. Melquisedec micoridí Jusiñamui diga ñairaini baífemo faiana uiñoticaí. Melquisedec isoi Cristo illa jira, Cristodí Leví baífemo faiana uiñoticaí. Cristodí nana naie ñairaini baífemo faiana jiaí uiñoticaí.

¹¹ Jusiñamui diga ñairaini finouilla rafuedo Jusiñamui jitailla isoi marebicaiñedicaí. Naimaci finouilla rafuedo caí jillobidicaídena, jiaie rafuena jitaíñedicaí. Naie rafuedo caí jillobiñena jira, Jusiñamuidí Cristona orede. Caí facaina Cristo ñairaimana jaillena, naimiena orede. Caina jillobitallena, naimiena orede, jiaie rafuedo caí jillobiñena jira. Jusiñamui Moisés micorimo jaie llua isoi, comini facaina nano ñairaimadí Aarón micorí. Naimiedí Leví railla nairai imie. Naimie jitonaiimona comini facaina ñairainina itimaci. Iena uiñotomoi. Aarón jitonaiimona Cristo iñede. Aarón maijia rafuemo Cristo duiñede; iadedí Melquisedec rafuemo duide.

¹² Comini facaina ñairainina jaillana jai meidua jira, Jusiñamuidí naimaci rafuena jiaí meidote. ¹³ Iena lloiticue. Aaróndí Leví railla nairaimo duide. Daní Leví nairaidí comini facaina ñairainidimaci. Daní naimacidí comini facaina Jusiñamuimo rana fecauidimaci. Cristo naie nairaimo duiñede. ¹⁴ Cristo jiaie nairaimo duide. Judá nairaimo duide. Judá nairaimona Jusiñamui jito comuillana uiñoticaí. Naie nairaimona comini facaina ñairaimana bu jaillana Moisés micorí jaie jaca lloñede.

¹⁵ Cristo billa jira, Moisés micorí lloga rafue meiduaína uiñoticaí. Melquisedec micorí illa isoi, comini facaina ñairaimana Cristo jaca iite. ¹⁶ Moisés micorí lloga rafue isoi, Cristodí ñairaimana jaiñede; iadedí Jusiñamui uaido ñairaimana naimie jaide. ¹⁷ Jusiñamui lloga uaimona iena uiñoticaí. David micorí naimiena jaie cuega:

Melquisedec micorí illa isoi, odí comini facaina ñairaimana jaca iitio cuega. ¹⁸ Comini facaina ñairaimana jaillena Moisés micorí jaie cuega. Naimemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci. ¹⁹ Naiedo jaillamona, Jusiñamui jitailla isoi marebicaiñedicaí. Iedo birui

jaiñedicai. Jiaie rafuemo birui ocuridicai. Cristo finoca rafue muidona, Jusiñamuina cai nabaillamona, Jusiñamui diga birui ñairedicai.

²⁰ Jusiñamui llua jira, Cristo cai facaina ñairaimana jaide. ²¹ Leví micorí jitonaiði imaci jeiciamona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetoñede; iadedi ie lloga uaina jira, Cristo cai facaina ñairaimana jaide. David micorí Jusiñamui llua jaie cuega:

Cue jai llua jira, cue llua finoiticue.

Cristomo lloticue: "Comini facaina ñairaimana jaca iitio"

cuega. ²² Jesús ñairaimana jaca illa jira, naimie jailla rafue Moisés micorí lloga rafue baifemo uaide. ²³ Moisés micorí lloga rafue anamo ailluena ñairainidi itimaci.

Naimaci fiodaicana jailla jira, ailluena ñairaini jitaide, fioidaitino ifomo meidollena. ²⁴ Naimie jaca illa jira, Cristo ñairaimana jaca iite. Naimie ifomo jaca buna meidoñeite. ²⁵ Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui dibeimo iacadinona, naimaci jeacinomona, ua jaca jillotarede. ²⁶ Caina canollena, naimie isoide nanoca ñairaimana jitaidicai. Ie Moo isoi naimiedi mareuidimie. Naimiemo jeacino jaca iñede. Jeacino finouidino dibeimo naimie iñede. Jusiñamuidi ie ecimo naimiena itatate. Ie jira naimie caina canorede.

²⁷ Jusiñamuimo fecallena, naimaci jeacino facaina naimie iba oñellena, Moisés micorí llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiai finodimaci. Cristo naimaci isoiñede. Naimie jitailla jira, comini jeacino facaina naimie fioidailla jira, comini facaina dacaiño fioidaite. Naimaci jeacino facaina naimie dane fioidañeite.

²⁸ Moisés micorí facai ñairainidi jeacinona finocana jaidimaci. Fioidaicana jiai jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

Cristo muidona jiaie rafue birui ite

8 Cristomo ite rafuena lloticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. ² Jusiñamui illanomo naimie illanona, nainomo cai facaina birui ñaicabite. Moisés micorí facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite. ³ Moisés micorí naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fioidaite. ⁴ Moisés micorí jiaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. ⁵ Comini facaina Jusiñamui diga ñaillena, Moisés micorí facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñoticaí. Monamo cai facaina Jusiñamui diga Cristo

birui ñaicabite. Iemo naimie comecina facajanona, Jusiñamui jofona Moisés micorí jiaie niacania, Jusiñamui naimiena llofue: "Monamo iticue; ia cue jofo eniruemo jiai finoitomoí. Sinaí railla anedu navui o ia, ona llofueticue. Ona cue llofuia isoi, cue jofona fino" llofue. ⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micorí facaise ñairainimona cai cacaja rafue baifemo faia jira, Cristodi Moisés micorí facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite. ⁷ Moisés micorí facaina rafuedo jaillamona, Jusiñamui jitailla isoi buna marebi-caiñede. Ie jira Jusiñamui jiaie rafue illena llote.

⁸ Moisés micorí lloga uaina cai jaiagai ñinoñena jira, Jusiñamui jai llote:

Naie cominimo jiaie rafuena ico jiairuido lloticue.

⁹ Naimaci jaiagaimo cue lloga rafuena jiaie lloticue.

Naie facaiseconi Egiptomona naimacina canuanona, naimacina atidicue;

iadedi Moisés micorimo cue lloga rafuedo jaiñedi-maci.

Ie jira naimacina fañonocaidicue.

¹⁰ Naimacimo jiaie rafuena ico jiairuido lloticue.

Iena naimaci uiñuamona, cuena raise ñnoitimaci.

Naimaci Jusiñamuidicuena jira, naimaci cuena sedaitimaci.

Cue anamo raise naimaci illa jira, cue comininitimaci.

¹¹ Nana naimaci cuena uiñoitimaci.

Ie jira naimacimo: "Cai Namana omoi ñno" buna niese lloñeite.

Jamai bue isoidinomona cuena ñnoitimaci.

Jamai bue isoiñedinomona cuena jiai ñnoitimaci.

¹² Naimacina cue duenaillamona, naimaci jeacinona jaca feitaicue

llote. ¹³ Jiaie rafuena Jusiñamui jai llua mona, Moisés micorimo lloga rafue jai saillana uiñoticaí. Moisés micorí lloga rafue caimo jai duiñede. Cristomona jiaie rafuena birui jai cacadicaí.

Hebreos comini Jusiñamui jofona eniruemo jiaie nitimaci. Monamo Cristo birui illanona, Jusiñamui ecimo naimie ite

9 Jusiñamuidi Moisés micorimo diga rafuena jiaie llote. Naie rafuemonona cai fueollena, iena lloticue. Naimiena sedajana llote. Naimie sedalle jofo finuana jiai llote. ² Jusiñamui llua isoi, hebreos comini naie jofona nitimaci. Jedaciede ñiroimona finoca jofona nitimaci. Naie jofo jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce llomenoico joide. ³ Mena cuartos illena ñiroina sebiñoga. Naie baifemo iticuartodi Jusiñamui illano. ⁴ Naie ñiroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruai de guille. Aarón

mícori jiguida nainomo jiaí ite. Jusiñamui uaido naie jiguida dacaiño llisilla jira, nainomo ite. Jusiñamui cuega nofici ibici jiaí ite. ⁵ Cajón emodo ibaillabici di ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruai de. Naie motomo Jusiñamui quenirena baireuide. Naie rafuena raise omoi jai uifua jira, iena omoimo are lloñeiticue.

⁶ Naie isoide rana finodimaci. Iemei Jusiñamui diga ñairainimona damierie nano fo jailla cuartomo nargarui jaidimaci. Moisés mícori llua isoi, nainomo ite rafuena finollena, iedo jaidimaci. ⁷ Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabícimo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenailamona, Jusiñamui naimaci jeacino facaina ibana oñede.

⁸ Jusiñamui Joreño caina llofuiamona, biena birui uifnoticaí. Naie jofonía ia, jamai comini fo jainina jira, Jusiñamui diga, cominidi atona nabairinidimaci. ⁹ Bie rafuena birui nia finodimaci. Moisés mícori lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci. ¹⁰ Jusiñamuina naimaci raise sedallena, Moisés mícoridi diga guille fimaide. Jiruana jiaí fimaide. Naimaci abiaína finollena jiaí llote. Nie isoide guille, nie isoide jirole, niese naimaci abiaí finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

¹¹ Moisés mícori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicaí. Cai comeciái raise jai finobide. ¹² Naimie fiodailla mei, dane jilluanona, Jusiñamui dine monamo naimie abide jaide. Toiniaí diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate. ¹³ Maraiñede rafuena finoia, Moisés mícori llogacino anamo itino Jusiñamuina sedallena, naimie jofomo jainidimaci. Moisés mícori jaie llua isoi, toiniái diailla mei, jobaide toiniái ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede.

¹⁴ Toiniaina fañeno Jusiñamuina birui sedadicaí. Cristo fiodaiaicana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodi Jusiñamui Jitona jira, naimie mo jeacino iñena jira, cai jeacino facaina naimie fiodaillamona, cai comeciaina raise finobitade. ¹⁵ Cristo jai finoca rafue muidona, Cristo monamo jailla jira,

jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina ñnotino ie. Moisés mícori lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiena bu ñnoia, naimie jeacino facaina Jusiñamui birui ibana oñeite. Nana Jusiñamuina ñnotinodi naimie jai llua isoi, naimie diga jaca iitimaci.

¹⁶ Jusiñamui jofonía jaie finua mei, Moisés mícorimo Jusiñamui llote: “Cue lloga rafuena raise finodomoí. Bie jofomo cuena sedallena, faga toiniái dirue diga bie jofona llereca. Nana naiemo ite rana jiaí llereca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicaí.

¹⁹ Ie cominimo nana naimie mo Jusiñamui lloga rafuena Moisés mícori llua mei, faga jurareta dirue diga, faga chivo dirue diga, nana naie lloga rafue ciegabiaina llerede. Cominina jiaí llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede. ²⁰ Jusiñamui jofona dirue diga llerede. Nana nainomo ite rana jiaí llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”. ²² Moisés mícorimo Jusiñamui llua isoi, raise finobillena, nana rana dirue diga llerede. Toiniaí fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés mícorimo lloñede.

Cristo fiodailla jira, Jusiñamui cai jeacinona oni dotade

²³ Jusiñamuidi Moisés mícorimo toiniaina fajana jaie llote. Naie llua finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toiniái baifemo faia jira, monamo cai jaca illena, jeacinona oni dotallena, Cristo fiodaite. ²⁴ Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. ²⁵ Dacaiño cai facaina monamo Jusiñamui dine naimie jaide. Moisés mícori facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uifñede; iadedi toiniaina fajanona, ie diruena uite. ²⁶ Cristo iese itena, nano facaise mona diga icaíño comini jeacino facaina naimie fiodaite. Iese iñena jira, eniruemona birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite. ²⁷ Nana dacaiño fiodaiticaí. Iena uifnoticaí. Fiodailla mei, Jusiñamui uicomo iiticaí. Naimiena cai ñnoia, caina feiñoite. Naimiena ñnoñedinona duere finoite. ²⁸ Dacaiño Cristo jai fiodaillana uifnoticaí. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane

bia, naimiedí ie billemo iocire ocuiritinona monamo Jusiñamui illanomo uite.

10 Moisés micorí facaise naie ñairainidí Jusiñamuimo fecallena, toiniaina fajanona uisoidimaci; iadedí Jusiñamui jitailla isoi, naiemona marebicaiñedi-maci; iadedí Moisés micorí lloga uaimona jeacino cai finuana uiñoticaí. Jusiñamui cai jeacino oni dotajana uiñoticaí. Jusiñamui jaca mareuidimiena uiñoticaí. Jusiñamuina nabaillena janore uiñoticaí. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicaí. ² Naie faga toiniái Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedí, faga toiniaina dane fecañedimaci; iadedí naimacimo jeacino jaca illa jira, faga toiniaina fecauidimaci. ³ Naiena fecauillamona, jeacina finocana naimaci nia jaillana uiñotimaci. ⁴ Toiniaí dirue illa jira, Jusiñamuidí comini jeacinona jaca feitañede. Dama Jesús dirue illamona, Jusiñamuidí comini jeacinona feitate. ⁵ Eniruemo jaie billanona, Jusiñamuimo iena Cristo llote:

Jeacino facaina toiniái fajana jai jitaiñedio.

Ie jira eniruemo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toiniaina jai jitaiñedio.

⁷ Tena cue uiñuamona, eniruemo cue billanona, o jitailla rafuena finoiticue.

O facaina lloraini micoriai iena jaie cuetimaci llote. ⁸ Cristo lluana dane ñaiticue. Cristodí Jusiñamui Moisés micorímo llogacinona ñaite. Jusiñamui jaie llua isoi, naimiemo cominidí jeacino facaina faga toiniaina jaie fecauidimaci. Iena Jusiñamui birui jai jitaiñede.

⁹ Cristodí: "Jusiñamui jitailla rafuena finuaibiticue" llua-mona, Moisés micorímo llogacino jai saillana uiñoticaí. Jiaie rafue birui illana jiaí uiñoticaí. ¹⁰ Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicaí. Jai marebicaidicaí.

¹¹ Nana Moisés micorí llogacinodo jaide ñairainidí nagarui comini jeacino facaina faga toiniaina Jusiñamuimo fecauidimaci; iadedí naie rafue naimaci finuamona, Jusiñamui naimaci jeacinona feitañede; ¹² iadedí dacaiño Cristo fiodaillamona, Jusiñamuidí nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide.

¹³ Nana naimie díbeimo iñedinona naimie emodofillemo naimie birui ocuiride. ¹⁴ Dacaiño Cristo fiodaillamona, naimiena cai ñnuamona, Jusiñamuimona jaca marebicaidicaí. ¹⁵ Jusiñamui facaina lloraíma micorí ciegafuemona Jusiñamui Joreño caina iena uiñotade. Naimie facaina lloraíma micorí Jusiñamui lluana jaie iese cueda:

¹⁶ Hebreos cominimo jiaie rafue ico jairuido lloiticue.

Cue rafuena naimaci uiñuamona, cuena raise ñnoitimaci.

¹⁷ Jiaí cueda:

Naimaci jeacino jaca faitaiticue.

¹⁸ Cristo jai fiodailla jira, jeacina Jusiñamui jai feitaja jira, faga toiniaina naimiemo fecajana dane jai jitaíñede.

Jusiñamuina cai nabaillí

¹⁹ Cue amatiaí, Jesús fiodailla jira, Jusiñamuina jaciruiñeno birui nabairedicaí. Naimie cai Moo jai illanona, naimie díga meiruiñeno jaciruiñeno birui jiaí ñairedicaí. ²⁰ Moisés micorí facaise nanoca ñairaima fo iticuartomo jaillena, sebiñoga iniroi oni díbeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedí Cristo jai fiodailla jira, Jusiñamuina atona birui nana nabairedicaí. Naimie díga birui atona nana ñairedicaí. ²¹ Cristona jai cai ñnuajira, cai facaina nanoca ñairaimana naimie illa jira, ²² cai mare comeciáimona Jusiñamui díga birui cai ñailí. Naimiena eo cai ñnuamona, cai comeciáí jeanillamona, naimie díbeimo cai bautizajamona, naimiena mai cai nabaillí. ²³ Cristo caina jilluana ñnoticaí Monamo naimie díga cai illemo ocuiridicaí. Jusiñamui ñnogamienajira, naie rafuena ñnocana mai cai jaillí. ²⁴ Jiaie creyentiaimo cai comeciáina cai facaja. Conini cai isiruitacana cai jaillí. Coninimo cai mare rafue finocana cai jaillí. ²⁵ Rollena omoimona damierie oficabiñedimaci. Naimaci isoi omoí iñeno; iadedí Jusiñamuina sedallena oficabi. Abido omoí danomo jaiñellena, conini comeciáina ocuiñotallena, oficabi. Jesucristo abido billirui iaírei illa jira, naimiena raise ñnollena, conini omoí comeciáí ocuiñocana mai omoí jai.

²⁶ Cristo finoca rafuena bu uiñua mei, iena naimie ñnoñenia, jeacinona naimie finocana jailla jira, Jusiñamui naimie jeacinona feitañeite. Cristo fiodaillana bu jamaia, Jusiñamui ie jeacinona feitañeite; ²⁷ iadedí Jusiñamuidí naimiena duere finoite. Eo jacirede rafue anamo iite. Iraimo Jusiñamui nana naimie díbeimo iñedinona duere finoite. ²⁸ Moisés micorí jaie cueda: "Jusiñamui llote: 'Menaimie naimiena daje isoi lloillamona, Moisés micorí llogacinona jamaidimiena dueruiñeno meinea' ". ²⁹ Iese duere sefuillana jaie llote; iadedí birui ite lloga rafue bu jitaiñenia, baí duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreño jaie bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena ñnotimiena marebicaitarede. Jusiñamui Joreño naimiena duenaite; iadedí iena naimie jai jamaitaia, iena naimie jai jitaiñenia, Jusiñamui naimiena baí duere finoite. ³⁰ Ero, Jusiñamui jaie llote: "Maraiñedinona bu finoa, ibana oiticue. Cuena ñnoñedinona duere finoiticue" llote. ³¹ Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoí iñellena, Jusiñamui lloga rafuena jamaiñeno.

³² Creyentiaína nano omoí jaillamo dane comeciáina faca. Creyentiaíñedinomona eo duere sefuidomoi; iadedí Cristona ñnocana jaidomoi. ³³ Omoimona damierie marefomo navui duere sefuidomoi. Omoiri jaisitimaci. Omoína jifanododimaci. Omoína jaie finodimaci.

Damieriena meinetimaci. ³⁴ Cárcelmo jonetinona due-naillamona, naimacina canocabidomoi. Cristomo omoi duilla jira, creyentiaifinedino omoi rana bairodimaci; iadedi omoi comeciari nia iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi. ³⁵ Jusiñamuimona iba ico omoi feiñua jira, Cristona nia ñnocana omoi jai. ³⁶ Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia ñnocana omoi jai. ³⁷ Jusiñamui buena llua jira, iese suite:

Cristo abido billirui iairei illa jira, naimiena ñnocana omoi jai.

³⁸ Naimie nia abido biñenia, omoina cue jai marebicaitaja jira, cuena ñnocana mai omoi jailli; iadedi cuena jitaifinedinori iobiñedicue.

³⁹ Naie isoidino jillobiñeitimaci. Naimaci isoi iñedicai. Jusiñamuina ñnocana cai jaillamona, jaca jillobidicai. Ie jira naimiena ñnocana mai cai jailli.

Jusiñamuina ñnocana jaidicai

11 Jusiñamuina cioifedicai; iadedi naimie illana ñnoticai. Naimie lloga uaina ñnocana jaidicai. Naimie lloga uai suillena ñnoticai. Ie lloga uai suillemo ocuridicai. ² Cai jaiagai mona damierie iese ñnocana jailla jira, Jusiñamuimona marebicaidimaci. ³ Jusiñamui finoca rana birui ciodicai; iadedi jai nano dofoconi jaca buena iñede. Naie facaiseconi dama ie uaido Jusiñamuidi eniruena finode. Mona finode. Nana rana finode. Nana rana comuitate. Iena ñnoticai.

⁴ Cai jaiagai rafuena ja lloiticue, naiemona cai fueol-lena. Abel micori Jusiñamuina jai ñnuamona, naimie-mo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Cain raise ñnoñena jira, naimie fecaca rari iobiñede. Iena feiñoñede. Abel micori Jusiñamuina ñnua jira, Jusiñamuimona naimie marebicaide. Abel micori jai fiodaite; iadedi Jusiñamuina cai raise ñnollena, naimie-mona nia fueoiticai.

⁵ Enoc Jusiñamuina jai ñnote. Naimiedi Jusiñamuina eo iobitate. Moisés micori cuegafuaimona iena uifotica. Jusiñamuina ñnuamona, Jusiñamuina eo iobitaja jira, naimie fioidañede; iadedi fioidañeno monamo Jusiñamui naimiena naimiena uite. ⁶ Jusiñamuina cai ñnoñenia, naimiena iobitañedicai. Jusiñamuina cai nabaiaania, naimiena cai raise sedaacania, naimie illana ñnoticai. Naimiena cai nabaiaania, cai jita rail-lano, caina canollena ñnoiticai.

⁷ Noé micori Jusiñamuina jai jai ñnote. Jusiñamui ico suille rafuena naimie mo lloite. Enirue buillena lloite. Iena ñnuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui llua Noé micori ñnua jira, jillode. Noé micori Jusiñamui llua ñnote; iadedi naimie facaise ite comini ñnoñena jira, Jusiñamui ricai llafue anamo itimaci. Jusiñamuina naimie ñnua jira, Jusiñamui uruena

naimie jailla jira, Jusiñamuimona Noé micori marebicaide.

⁸ Abraham micori Jusiñamuina jai jai ñnote. Ie mo eniruemona naimie jaiñillena Jusiñamui naimie mo lloite. Are ite eniruemo naimie jaiñillena lloite. "Jai enirue omo iiticue" Jusiñamui lloite. Abraham micori ñnote; iadedi ie jaillinona uifnoñede. ⁹ Jusiñamui lloga eniruemo Jusiñamuina ñnocana jai. Naie eniruemo ride; iadedi naie enirue naimie mo nia raise duiñede. Chivo itira imona niga iniroimona sebiñoga jofomo naimie jaca ite. Ie jito, Isaac micori, naie isoide jofomo jai ite. Isaac micori jito, Jacob micori, naie isoide jofomo jai ite. Jusiñamuidi nana naimacimo daje isoide rafuena lloite: "Bie enirue omoimo iiticue" lloite. ¹⁰ Abraham micori mare jofona fiñede, naie eniruemo naimie jaca iacañena jira; iadedi Jusiñamui diga monamo jaca illemo naimie ocuride. Monamo Jusiñamui mare finolle illanomo ocuride.

¹¹ Abraham micori aidi Sara micori. Jusiñamuina Sara micori ñnua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiño mo Jusiñamui llua isoi, naiñaiño uruesillana ñnote. ¹² Abraham micori jai eo jionaide; iadedi jitona comuitate. Naimie jtomona naimie nairai eo jebuide. Facadonide ucai isoi jebuidimaci. Facadonide conillie isoi jebuidimaci. Ailluena ucai illa jira, naimaci facadonidicai. Ailluena conillie illa jira, iena facadonidicai. Ie isoide. Eo ailluena Abraham micori uruai illa jira, naimacina facadonidicai.

¹³ Abraham micori, Isaac micori, Jacob micori Jusiñamuina ñnocana jaidimaci. Nana naimacimo Jusiñamui lloga uaina suiñedemo fioidaitimaci. Nia fioidañenia, Jusiñamui llogacinona cacadimaci. Iena ñnotimaci. Ie jira bie eniruemo naimaci jaca illemo comecina facañedimaci; ¹⁴ iadedi monamo jaca illemo comeciaina facadimaci. ¹⁵ Naimaci jai billa eniruemo comeciaina naimaci facadena, nainomo abido jaidimaci; ¹⁶ iadedi jai illanomo comeciaina facadimaci. Jusiñamuina nabillemo, monamo Jusiñamui diga jaca illemo comeciaina facadimaci. Naimiena naimaci ñnua jira: "Jusiñamuidi cai Moo" naimaci raia, Jusiñamui naimaciri meidañede. Ie jira monamo Jusiñamui naimaci illinona jai finode.

¹⁷ Jusiñamuina Abraham micori ñnua jira, ie jitona comuitate. Jusiñamui Abraham micorimo lloite: "O jito Isaacmona o nairai eo jebuite" lloite. Iemei Jusiñamui Abraham micorina facacite. Abraham micori naimiena ñnuana raise uifnollena, facacite. "O jitona fano" Abraham micorimo lloite. Abraham micori Jusiñamuina ñnuanona, ie jito faiacade. ¹⁹ Ie jito fioidaillemona, Abraham micoridi Jusiñamui naimiena jilloitallena ñnote. Isaac micori fioidañede; iadedi fajamona jillode.

²⁰ Isaac micori Jusiñamuina jai ñnote. Naimie fioidaiaania, Jusiñamui ie llogacino finollena ñnuamona, mena ie urue iaiaimamo ie uaina fecade. Lloite: "Jusiñamui llua isoi, jebuicana jaitomico". ²¹ Jacob micori Jusiñamuina jai ñnote. Naimie fioidaiaania, Jusiñamuimo jñanona, ie jiguidamo juita naidaidemo, José

mícori ie mena urue iaímaiaímo marecinona lloste. Jusiñamui ie llogacino finollena ñnuanona, lloste: “Jusiñamui llua isoi, jebuicana jaitomíco. Naimie omícona canoite” lloste. ²² José mícori fiodaícania, ie comínimo lloste: “Jusiñamui omoína canuano, Egiptomona íco jiaíruido omoí jaillena ñnotícue. Omoí jaia, cue illaiciaina omoí diga uíño. Canaán railla eníruemo omoí ria, nainomo cue illaiciaina raino”.

²³ Moisés mícori moo, ie ei diga Jusiñamuina jiaí ñnotíiaímaiaí. Hebreos comíní jebuíñellena, naie fa-caiseconi Egipto illaíma nana hebreos ísaiaína meini-ana lloste. Iaímaiaí jito jeiciaí mei, iaímaiaí uruena daje amani fivui reidíiaímaiaí. Jusiñamuina ñnuanona, naimie maresana eruaiílla jira, jacíruiñeno naimíena jofomo fo reide. Illaíma lluaíma Jusiñamui naimíena jillotajana ñnotíiaímaiaí. Ie jira Faraón jisa anamo comuíde. Faraóní Egipto nairaií illaíma. ²⁴ Moisés mícori Jusiñamuina ñnote. Naimie eimíenamona, naimíedi Faraón jisa ie jítana mamecíreacaiñede; ²⁵ iadedí naimíedi Jusiñamui naimíena ie comínina Egiptomona jillotajana ñnote. Jusiñamui naimie fetua jira, ie comíní díbeimo naimie íacade. Ie comíní diga duere sefuaíacade. Jusiñamuina ñnoñedíno diga ie comecí jamai íobitaíacaiñede. ²⁶ Faraón jisa anamo naimie comuílla jira, naimíemo eo aillue rana íte; iadedí Egiptomona íte ebirede ramo íe comecína eo facañede. Jusiñamui mona íba naimie íco feíñoiacana jira, Jusiñamui jito billemo íe comecína facajano, duere sefuíde. ²⁷ Ie jira Egiptomona Moisés mícori Faraóna jacíruiñeno oní jaide. Jusiñamui naimíena eenuana ñnote. Jusiñamuina cioíñede; iadedí Jusiñamui illana naimie ñnua jira, ñnocana jaide.

²⁸ Jusiñamui íe comínina jillotajana Moisés mícori ñnua jira, Jusiñamui llua isoi, pascua railla rafuena fín-ode. Ie comínimo toíca llauda fallena lloste. Ie dírué nase fuemo jídelena lloste. Naie naío Jusiñamui jaienící nana nano doforanína meinesiñellena, Jusiñamui lluaína fínodímací. ²⁹ Egiptomona naimací billaí mei, jiaíre de railla monaíllai ruica díne jaillena, Jusiñamuina ñnotímací. Jusiñamui Moisés mícorímo lluaína naimací ñnuamona, jínui motodo saferedífo do ruica jaidímací; iadedí Egipto soldaduái daje isoi ruica jaiacadímacímo, nana corobaitímací.

³⁰ Canaán railla eníruemo hebreos comíní rillaí mei, Jericó railla nairai díne ridímací. Jusiñamuina ñnuanona, Jusiñamui llua isoi fínodímací. Siete dígarui Jericó ecímo naimací macarillaí mei, Jusiñamui llua isoi, naie llaígafo ana bíjide. Naie nairaina emodofidímací.

³¹ Naie facaiseconi Jericómo Rahab mícori fiodaíñede. Naiñaiñodí calliredíñaiño. Nana Jericó comíní Jusiñamuina ñnoñena jira, fiodaitímací; iadedí jofue íñenanomo, nia Canaámo hebreos comíní ríñena facaise, Jusiñamui fínoca rafuena naiñaiño fídiano, naiñaiño Jusiñamuina ñnote. Mena hebreos comíní iaímaiana naiñaiño feíñua jira, Jericó nairaina emodofillaí facaise naiñaiño meineñedímací.

³² Diga jiaíe comíní Jusiñamuina ñnocana jaidímací; iadedí nana naimací fínoca rafuena cue cuellena, abí

juanide. Naimacímona damíerie mamecíaina jamai cueítícue: Gedeón mícori, Barac mícori, Sansón mícori, Jefe mícori, David mícori, Samuel mícori Jusiñamui facaina jaie llorainína jiaí eo cueñeítícue. ³³ Jusiñamui naimacína canuamona, ñnotímací. Ie jira damíerie naimací bacauaina emodofidímací. Illaíma isoi jiaíno naimací comínina raise marena sedadímací. Jusiñamui llogacino suíllana cíodímací. Leones naimacína ríia-canamona damíerie jillode. ³⁴ Iraímo usíllamona damíerie jillodímací. Lloebí diga meiniamona damíerie jillodímací. Jiaíno jamai bue isoidíno; iadedí jamai bue isoíñedíno jaidímací. Jobaíme raise fínuamona, jiaíno ímací bacauai soldaduaina judaísítade.

³⁵ Dañaiñorie ríñoníaímona uruaí fiodaíllaí mei, fiodaíllamona Jusiñamui damíeriena jillotade. Illaícomínímona jiaíno duere fiodaitímací. Jusiñamuina fainonocaiacaiñena jira, naimacína meinetímací. Naimací fiodaícania, monamo Jusiñamui diga íco jaca íllena naimací ñnua jira, Jusiñamuina fainonocaiñeno fiodaitímací. ³⁶ Jiaíno duere sefuidímací. Naimacíri jaisítímací. Naimacína jeare ñaitímací. Rao diga naimacína duere fatímací. Damíeriena maíanona, cárcelmo jonetímací. ³⁷ Damíerie nofící diga fairínuamona, meinetímací. Damíerie ramo faitímací. Meínellena, naimacína serrucho diga denaísíte. Damíerie lloebí diga meinetímací. Jiaíno buenídímací. Naimací ínroi jamai ígoí íe. Dueredímací. Naimací ínroi raise íñede. Aíme guísoidímací. Jiaíe comínímona duere sefúsoidímací. ³⁸ Jiaíe comínímona jamai bue isoidímací; iadedí Jusiñamuimona jamai bue isoíñedímací. Damíerie jofonídímací. Ie jira jamai jai jaicaisoidímací. Jofue íñenanomo jaidímací. Eníruemo jamai bíita ínuidímací. ³⁹ Jusiñamuina ñnocana jaidímací. Naimací fínoca rafuemona Jusiñamui comíní naimací illana uíñotícaí. Jusiñamuina ñnotímací; iadedí nana naimacímo Jusiñamui lloga rafue naimací illaí facaise suíñede. ⁴⁰ Jusiñamui jitaílla jira, naimací illaí facaise nana naimacímo lloga rafue suíñede; iadedí naimie jitaílla jira, fiodaíllena Crístona jai orede. Ie comínina bíruí caí jiaí jaillena, Crístona jai orede. Ie jira caí diga danomo monamo Jusiñamuina nabaitímací. Nana naimie lloga rafue jaca suíte.

Jesús fínoca rafuemo caí comecíaina caí facallí

12 Caí jaiagaí Jusiñamuina ñnocana jaíllana uíñotícaí. Ie jira caídí naimací isoi, Jusiñamuina ñnocana bíruí maí caí jaíllí. Marena ríire caí aísíacana, ailluena rana abíñedícaí. Ie isoíde. Jeacínona caí fínoñellena, naimíena raise caí ñnollena, jeacínno fínuacínona maí caí fainonocallí. Nie isoíde rafue caímo ía, Jusiñamui jitaíllacínona fínocana maí duere caí jaíllí. ² Jesús fínoca rafuemo caí comecíaina caí facallí. Caí jeacínno facaina naimie fiodaílla jira, caí comecíaina naimie ocuíñotajanona, Jesúsna ñnotícaí. Cruzmo maraíñedímie isoi fiodaíte. Fiodaíllamona jílluana naimie uíñuamona, naimie fiodaíte. Ie Moo ecímo dane íllena naimie uíñuamona, íocíre fiodaíte. Illaímana naimie íllamona, íe Moo ecímo bíruí íte. Jesúsno

caí começaina facajamona, caimare mai caí jailli.

³Jusiñamui díbeimo iñedínomona Jesús eo duere sefuide. Ie isoi caí duere sefuia, Jesúmo caí começaina facajamona, caí começaina ocuiñotacana mai caí jailli.

⁴Jusiñamui díbeimo iñedínomona duere sefuillamona, Jesús isoi duere nia sefuiñedomoi. Omoína nia meineñedimaci. ⁵Duere omoi sefuia, bie jaie cuega-fuiaina feitañeno. Naimie cominina omoi illamona, Jusiñamui llote:

Cue uruiái, omoína cue duere finoia, cuena nia ñino.

Duere sefuillamona, cuena fañonocaiñeno.

⁶Omoína cue isiruillamona, omoína duere finodicue.

Cue díbeimo omoína raise itatallena, omoína duere finodicue.

Nana cue cominina cue llofuecabillamona, naimacina duere finodicue

llote. ⁷Naimie jitaillacinona caí finollena, caina duere finode. Ie uruiaina caí illamona, caina duere finode.

Ero, nana ie uruiaina isiruillamona, naimaci ie jitaillacinona finollena, naga enirue moe ite moe ie uruiaina duere finocabide. Ie isoide Jusiñamui. Ie jitaillacinona caí finollena, caina duere finocabide. ⁸Caina ñinotal-lena, Jusiñamui caina duere finoñenia, naimie cominiñedicaí. Naimiedi nana ie cominina duere finocabide. ⁹Caí enirue moe ite caí mootiaí caina duere finoia, naimaci uaina ñinoticaí. Ie isoide. Caí Moo Jusiñamui caina isiruillamona, caina duere finoia, naimie uaina caí ñinua. Naimiena caí ñinuamona, monamo naimie diga íco jaca iiticaí. ¹⁰Naimaci comeciái llua isoi, caí enirue moe ite mootiaí dallu caina duere finode. Caí Moo Jusiñamui caina llofuellena, caina duere finode. Naimie illa isoi, mare rafue díbeimo caina itataiacade. ¹¹Jusiñamuimona duere caí sefuia, iena gaiñedicaí. Iena jitaíñedicaí; iadedi naiemona caí fueoia, jeacinona dane caí finoñellena, naimie jitailla isoi marecinona finocana jaiticaí.

Jusiñamui rafuena caí cacaia, iena caí aruiruiñena

¹²Nie isoide ramo caímo jiria: “Jusiñamui caina níbai canoñede” raiticaí. Iemona naimiena fañonocaiacadi-caí; ia iemo caí começaina caí facañena. Jusiñamui rafuena caí sefuirua, duere caí sefuia, nie isoide rafue caímo ia, caí começaina ocuiñocana mai caí jailli. Jusiñamui caina canuamona, naimiena caí raise ñnuamona, caí comeciái ocuiñocana mai caí jailli. ¹³Jiaie rafuedo caí jaiñena; iadedi Cristo rafuedo raise ñnocana mai caí jailli. Iese caí jaia, Cristo rafuedo naimaci jiaí raise jaillena, jiaie creyentiaína canoíticaí. ¹⁴Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite. ¹⁵Jusiñamui caina duenailamona, nana cominina jillotaiacade. Omoimona buna Jusiñamui duenailacinona fañonocailana jitaíñedicaí. Omoimo iese sua, iemona conini gaiñenacino comuirede. Iena jitaíñedicaí. Omoi comeciái daje isoi lloillana jitaídicaí. ¹⁶Jearede rafuena jaca finoñeno. Esaú micori jaie fino-ca rafuena uiñotomoi. Jusiñamui ie moe Isaac micori-

mo mare rafuena suillena llote. Esaú nano doforamiena illamona, ie moe fiódaille mei, Jusiñamui jai lloga rafue ie moe uai diga, ie moe ra diga, naimie feiñoiacade. Naimie moe nai fiódaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo começina facade. ¹⁷Ie amamo ie uaina fecaja mei, ie comeci uai meidote. Naie uai naimiemo dane illana abido jitaide; iadedi ie moe ie amamo jai fecade. Esaú eo eede; iadedi ie moe ie uai naimiemo jai fecanide. Jusiñamui lloga rafuemo Esaú começina facañede. Naimie isoi Jusiñamui rafuena omoi jamaiñeno.

¹⁸Moisés micori facaise caí hebreos cominimo Jusiñamui ie rafuena jaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiaí jitaíbicaide. Nainomo aifi eo ite. Eo boriuide. Eo gurude. ¹⁹Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toñiaí nainomo macaria, nofici diga fairinuamona, naimiena omoi meine” llote. Jusiñamui llua cacajamona, eo jaciruitimaci. Moisés micorimo: “Jusiñamui caímo nia llua jai jitaíñedicaí” llotimaci. ²¹Eo jacirede ra illa jira, nana comini diga Moisés jiaí jaciruite. ²²Sinaí anedumona lloga rafuedo birui jaiñedicaí; iadedi jiaie rafuedo birui jaidicaí. Birui Jusiñamuina atona nabaidicaí. Caí hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicaí. Monamo Jusiñamui ite; iadedi birui naimiena atona nabairedicaí. Caí fiódai, naimie dne jaiticaí, naimie diga jaca caí illena. Nainomo ie jaienisai naimiemo iobillacinona fecacabidimaci. ²³Ailluena comini diga, Cristona birui ñnoticaí. Nana caina Jusiñamui fetuanona, caí mameciaí monamo ite rabenicomo jai cuega. Jusiñamui nana comini começaina uiñote. Naimiena ñnotinomona ailluena jai fiódaitimaci; ia naimie ecimo naimaci joreñuaí jiaí jai itimaci. ²⁴Jesús fiódaiilla jira, Jusiñamuina nabairedicaí. Naimie fiódaiilla jira, caímo jiaie rafue birui ite. Naie rafuena caí ñnuamona, caí comeciái jai marena iticaí. Jiaí caí jeacinona oni dotade. Iena jiaí jai feitate. Abel micori jaie fiódai, naiemona Jusiñamui buna ie jeacinona feitañede; iadedi Jusiñamui Abel micori meinetimie moe ibana ote.

²⁵Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaíno iena jitaíñedimaci. Iena ñnoñedimaci. Ie jira Jusiñamui naimacina duere finode. Cristomona jiaie rafue birui cacadicaí. Bie rafuedi Moisés lloga rafue baífemo faite. Jusiñamui duere finollacinomona buna jillobinide. Caí duere sefuiñellena, Cristo rafuena caí ñnua. ²⁶Moisés micorimo ie rafue llua facaise, Jusiñamui naie eniruena niraídotade. Jusiñamui jiaíruído jiaí llote: “Eniruena dane niraídotaiticaí. Ucuaina, fivuina, jítoma diga, jiaí niraídotaiticaí” llote. ²⁷Naimie lloga uaimona enirue

fuillena uifhoticaí. Monamo ite ra fuillena jiaí uifhoticaí. Nana naie rana naimie fuidoite; iadedi naimiena cai inua jira, naimie caina fuidoite. Ico cai illinona jai finode. Iena naimie fuidoite. ²⁸ Illaimana naimie illa- mona, naimie caina sedaite. Ie jira naimiemo iobil- lacinona cai fecaja. Naimiena cai inuamona, naimiena cai raise sedajamona, naimiena cai iobitaja. ²⁹ Naimie- na inoñedinona Jusiñamui eo duere finolle jira, naimiena jaciruillanona naimiena cai inua.

Jusiñamuina cai iobitaja

13 Dani conini jiaie creyentiana isiruicana omoi jai. ² Abraham micori Jusiñamui jaienisaina uifhoteno jaie nafuete. Jiaie illanomona jiaie creyentiaí bia, naimaci inillino inena jira, naimacina nafue. Jusiña- muimona ibana feifhotomoi. ³ Cristo rafue muidona damerie creyentiaí cárcelmo itimaci. Nainomo omoi jiaí itomoidena, naimacina feitañeno. Naimacina isiruillamona cano. Damerie creyentiaí duere sefua, naimacina jiaí cano. Jiairuido naimaci isoi nibaí duere sefuitomoi. ⁴ Airedimie jiaie riño diga illemo ie comeci- na facañena. Inirediñaiño jiaie iima diga illemo ie comecina facañena. Ie aifede riño diga bu ia, ie inifede iima diga bu ia, marañede. Iena finoñeno. Iena bu finoia, ie jeacino Jusiñamuimo lloñenia, Jusiña- mui naimiena duere finoite. Naiñaiñona jiaí duere finoite. ⁵ Ailluena ucube ollena, iemo nicifeno. Omoi- mo ite ra diga caimare i. Iena Jusiñamui facaina lloñai- ma jaie cuega: "Jusiñamui llote: 'Omoína jaca canoiticue. Omoína jaca fainonocaiñeiticue' llote". ⁶ Naiena cai uifnuamona, cai comeciaina ocuifhoticaí. Jaie cuegafue isoi lloiticaí:

Cai Nama caina canoite.

Ie jira cai comeciái jarire finoñeiticai.

Buena jaciruiñeiticai.

Jiaimie buena caina jaciruitanide.

⁷ Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoi. Cristo díbeimo naimaci illamo omoi comeciaina facajanona, naimaci isoi Jesucristona ino- cana mai omoi jai. ⁸ Naimie jaca inogamierna uifhoticaí. Naimie ie lloga uaina jaie jaca finode. Iena birui fin- ode. Ico iena jaca finoite. Ie jira naimiena cai inua. ⁹ Cristo ieñede rafuedo jaiñeno. Diga jiaie llofuicacino ite; iadedi iedo jaiñeno. Jusiñamui caina canuamona, cai comeciaina birui ocuifhotocana jaiticaí. Moisés micori- mo lloga rafuedo navui jaidicaí. Diga ra fimaide; iadedi naiedo cai jaillamona, cai comeciái raise illena, buena oñedicaí. ¹⁰ Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duiñedimaci. Naie comini fa-

caina ñairaini Cristo rafuemo duiñedimaci. ¹¹ Moisés rafue llua isoi, nanoca ñairaima toiniaina faja mei, naie dírué dacaño naga año fo iticuartomo uite; iadedi naie toi abi naimaci comini illanomona jino uite. Iena jai jitañena jira, nainomo iena jobaide. ¹² Ie isoide. Cristona comini jitañena jira, ie comini nairaimona ji- no uillanona, naimiena meinetimaci. Nainomo jeacino facaina fiodaite, comini comeciaina raise finollena. ¹³ Ie jira Moisés micori lloga rafuena cai fainonocaida, dani Jesucristo rafuedo cai jailli. Naimiena jeare finodi- maci. Caina jeare finoia, naimiena jaca inocana cai jail- li. ¹⁴ Beno jaca cai illemo ocuiriñedicaí; iadedi monamo Jusiñamui diga cai jaca illemo ocuiriñedicaí. ¹⁵ Jesús fino- ca rafue muidona, Jusiñamuimo iobillacinona jaca cai fecaja. Jusiñamuina cai uifnuamona, naimiemo iobil- lacinona jaca cai fecaja. ¹⁶ Marecinona finocana mai cai jailli. Jiaie creyente jitaí raillano, omoi raruiaimona naimiena omoi cano. Iena omoi finoia, Jusiñamui omoi iobite.

¹⁷ Omoi llofuerañi uaina ino. Naimaci anamo raise omoi i. Cristo díbeimo omoína raise itatacadimaci. Iese naimaci finoacañenia, Jusiñamui naimacina duere finoite. Naimaci uaina omoi inoia, Cristo díbeimo caimare maijaitimaci. Naimaci uaina omoi inoñenia, sunaitimaci. Sunailla jira, naimaci llo- fuiacinomona buena oñeitomoi.

¹⁸ Jusiñamui diga omoi ñaia, cai facaina omoi jii. Jusiñamuimona cai comeciái marena illana uifhoticaí. Naimie jitailla isoi, mare rafuena finocana jaiacadicaí. ¹⁹ Omoi dine cue raire illena cue facaina Jusiñamuimo eo omoi jii.

Naimaci marena jaca illana jitaide

²⁰ Jusiñamui conini omoi comeciaina uri itatajana ji- taidicue. Cai Nama Jesús fiodailla mei, Jusiñamui naimiena jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacina feitate. Naimie fiodailla jira, naimie anamo cai illamona, caina raise sedarede. ²¹ Jusiñamui ie jitaillacino omoi finuana canoite. Cristona omoi inuana canoite. Mare rafuena omoi finuana canoite. Jesucristo uaido omoína canoite, naimie jitaillacinona omoi finollena, Jesu- cristomo iobillacinona cai jaca fecajasa. Iena jitaídicaí.

²² Cue amatiaí, bie cartana caimare feño. Eo are ra- fuena cueñedicaí. Janore cueticue. ²³ Cai ama Timoteo cárcelmona jai jino bite. Cue dine naimie raire bia, omoi dine naimiena atiticaí. ²⁴ Nana omoi llofuerañi- mo cue uaina oredicaí. Ua nana creyentaimo cue uaina oredicaí. Italamona bitino imaci uaina jiaí oredimaci. ²⁵ Jusiñamui omoína jaca duenaillana omoi uifnuana jitaídicaí. Mai. Macaibaite.

SANTIAGO

Uaiduacino

1 Caimaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiaimo omoi duillamona, omoi jai judaisilla jira, omoimo cue uaina oredicue.

Ramo omoi jiriadedi, omoi comeciaina mairita

² Amatai, diga ie ramo omoi jiriadedi, eo iobilla.
³ Ramo omoi jiriadedi, Jusiñamui uaina raise omoi ñunana uiñoitomo. Iemona omoi comeciai mairillemona, ñnocana omoi jaitomo. Biena omoi uifua jira, iobilla.
⁴ Mairicana omoi comeciai jaia, omoi comeciadi marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo ñnoitomo; ⁵ iadedi omoimo rafue ia, ñiese nibaiana omoi uiñoñenia, Jusiñamuimo jica. Ie mei omoimo naimiedi abi uiñoñeraciona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite; ⁶ iadedi omoi jicaia, uai ñunana jica. Omoi comeciai ñnoñenia, jicañeno. Comecina ñnoñedimiedi aifi betaja jorai isoide. Naimie comeci naganomo ite. ⁷ Naimiedi Jusiñamuimona ra feiñollemono tainona sedaite. ⁸ Naie isoidimiedi nana naimie illa ñnori ie comeci naganomo iite.
⁹ Naimie ramo jiriadedi, Jusiñamuimona naimie jamai bue isoifiena jira, duerede creyente iobilla; ¹⁰ iadedi ramo jirillamona ie ucubena naimie fafia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite. ¹¹ Jitoma a ia, eo ecasillamona, safia safenaite. Liride. Ie mei jai ebinide. Jai iñede. Ie isoi ucuberedimie safenaite, naimie mairianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feiñotica

¹² Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiema caimare itataite. Jusiñamui jai llote: "Cuen a isiruitinona cue illanomo jaca itataiticue".
¹³ O ramo bu faia, lloñeno: "Jusiñamuidi cuena ramo faite". Maraiñede rafue ñibeimo naimie iñena jira, naimiedi buna ramo jaca faifede. ¹⁴ Cai comecimo naie jitaillacino illa jira, ramo faia uai ñnotica. Naie fa-

caiseconi caimona ebirena jirari, iena finoacadica.

¹⁵ Cai jitailla jira, jeacinona finodica. Jeacinona finocabilanona jaillano, faifitica. ¹⁶ Ero, cue isiruiga amatai, Jusiñamui omoima ramo faitatañena jira, naimiemono da mare rafue billa jira, ñani omoi abina jifueño.

¹⁷ Nana mare rafue cai Moomona feiñotica. Naimiedi monamo ite lligaiñoraniaina jaie finode. Naie radi ñnagarui daje isoi lligaiñoñede; iadedi naimie daje isoifede. Naimie comeci jacanano ñanoconi ñnagarui ite. ¹⁸ Naimie jitailla jira, ie uai lluno, naimie caina ie uruiaina itatate. Ie uruiaimona ñano doforanidica.

¿Nie isoide rafuena finoacadica?

¹⁹ Cue isiruiga amatai, Jusiñamui rafuemo raise cacarei. Ie mei naie uaina uaitaño. Jiai raire iciriño. ²⁰ Icirillamona, Jusiñamuidi cai marena jitailla isoi, buna jaca marebicaiñede. ²¹ Ie jira nana maraiñedicinona oni fañonocai. Jusiñamui uai omoi comecimo fecuise abi iedoño ñnagarui feiñocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede. ²² Cacajamona iena ñnocana jai. Cacajanona iena omoi ñnoñenia, ñani abina jifuetomo. ²³ Bu naie uaina cacajamona ñnoñenia, naimiedi acaraimo eruaidimie isoide. ²⁴ Ie uiecona eruaide. Naimie jailla meinoconi, ie eruailla ie uiecona jai raire faitate. ²⁵ Jusiñamui llogacinona bu eo facajia, iena feitañede. Iena ñnote. Naie uaidi jearedicino ie finuamona naimiema marena itatate. Jusiñamui uaina naimie feitañena jira, iena ñnua jira, naimie comeci caimare ite.

²⁶ "Jusiñamuina sedadicue" raillanona ie comecina facadimiedi jeare ñaia, maraiño ñaia, ñana naimie abina jifuate. Jusiñamuina taino sedade. ²⁷ Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa faiseconi. Jeacinona jiai finoacaiñeite. Jusiñamui ñibeimo iñedino isoi iacaiñeite. Jusiñamui naimie iese sedajia, Jusiñamuimona eo mare.

Nana cominimo comeciaina lloitaicadica

2 Amatai, cai Nama Jesucristo uai eo ebirede. Naimiema omoi ñnua jira, naimacimo daje isoi comeciaino lloillamona, nana cominina daje isoi nafue. ² Ero, omoi roracomo mena ñima bia, ¿nie ñimana ñafueitomo? ñaimie ucuberedimie. Naimiemo oro ie anil-

los ite. Eo mare iniroina jitade. ³ Ucuberedimiemo llotomoi: “Baí bene bancomo raí”. Dueredimiemo llotomoi: “Baí bene naidai. Raiacania, eniruemo raí”. ⁴ Iese omoi lloia, damiena jai raise nafuetomoi; ia damiena jai raise nafueñedomoi. Iaimaiaí iniroimo omoi eruailamona, nafuetomoi. Mare rafuemo comeciaina fa-cañedomoi.

⁵ Cue isiruiga amatiaí, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiena naimaci eo inua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”. ⁶ Ero, Jusiñamui dueredinona nafuete; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomoi. Ucuberedinomona duere sefuicabidomoi; ia ucuberedimiena raise nafuetomoi. Majjitalena, juez dine ucuberedino omoína uitatatimaci, omoína llogdöllena. Dueredino iese omoína finoñedimaci; ia ucuberedinodi iena finocabidimaci. ⁷ Cristomo omoi jainaiaillamona, ucuberedino naimiena jeare jiaí ñaitimaci.

⁸ “Cristo llogacino finodicaí” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofu ecimo itinona isirui, dama o abina o isiruilla isoi”. Iese omoi ia, cuemona mare; ⁹ iadedi nana cominina daje isoi omoi nafueñenia, jeacinona jai finodomoi. Jai Jusiñamui llogacinona inoñedomoi. Jusiñamui llogacinomona jai maraiñeno itomoi. ¹⁰ Nana Jusiñamui llogacinuaimona daje llogacinona omoi inoñenia, Jusiñamuimona nana naie llogacinuaina jai inoñedomoi. ¹¹ Jusiñamui caimo jai llote: “O añede riño diga iñeno. O iniñede iima diga iñeno”. Jiaí llote: “Jiaimiena meineñeno”. O añede riño diga iñedio; iadedi jiaimiena o meineia, nana Jusiñamui llogacinuai jai inoñedio. ¹² Jiaíruido Jusiñamuidi juez isoi omoimo lloite. Omoi comeciaino iticino diese omoimo lloite. Ie jira marena ñaino. Marena i. ¹³ Ero, omoimo naimie lloia, jiaie cominina omoi birui duenañenia, Jusiñamui naie facaise omoína duenañeite. Omoimo riire lloite. Omoína duere finoite; iadedi jiaie cominina birui omoi duenaia, Jusiñamui naie facaise omoína jiaí duenaite. Duere sefuillena omoimo lloñeite.

Jusiñamuina cai inuamona, diga rafuena cai finua

¹⁴ Amatiaí, “Jusiñamuina inoticue” raitimiedi mare rafuena jaca finoñenia, ¿niese naie inoracinodi naimiena jillotaite? Jillotañeite. ¹⁵ Jiaie rafuedo iena lloiticue. Omoimona daje creyente iniroinia, guille iñenia, ¹⁶ naie creyente omoi dine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? ¹⁷ Ero, Jusiñamui omoi inuamona mare rafuena omoi finoñenia, omoi inoracino ieñede. ¹⁸ Omoimona damie cuemo níbaí lloite: “Jusiñamuina raise inoticue”. Jiaimie cuemo níbaí lloite: “Mare rafuena finocabidicue”. Iaimaiaimo lloiticue: “Jusiñamuina

cai raise inoia, mare rafuena finocabiticaí. Mare rafuena cai finuamona, Jusiñamuina cai raise inuana uiñoiticaí”. ¹⁹ Dajede Jusiñamuidi illana inotio. Iena o inuano, mare; iadedi jananiaí iena jiaí inotimaci. Ie jira Jusiñamuina jaciruitimaci. ²⁰ “Jusiñamuina raise inoticue” níbaí nia raitio. Abina raise nia uiñoñedio. Mare rafue o jiaí finoñenia, dama abi o inoracinodi ieñede. ²¹ ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. ²² Abraham micori innote. Mare rafuena jiaí finode. Mare rafue naimie finuamona, naimie jai raise inote. ²³ Iemona Jusiñamui ie llogacino suide. Iena Moisés micori cuete: “Abraham micori Jusiñamuina innote. Ie jira Jusiñamuimona naimie marebicaide”. Jiaí cuete: “Naimiedi Jusiñamui nabaí”. ²⁴ Abraham micori rafuemona daje rafuena uiñoiticaí. Dama ie inoracino diga jaca bu marebicañede; iadedi Jusiñamuina inuano, mare rafuena finuano, marebicaide. ²⁵ Jiaie rafuedo iena lloiticue. Jiaie Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraimaiaina feñote. Naiñaiño nairaidi iaimaiaina meinellena jenodimaci. Meineñellena, naiñaiño iaimaiaina reide. Ie mei iaimaiaina bainino oretate. Mare rafuena naiñaiño finuamona, Jusiñamuimona naiñaiño marebicaide. ²⁶ Ero, bumo ie joreño jai iñenia, cajeñede. Ie isoide. Mare rafue bu finoñenia, ie inoracinodi ieñede.

Cai fuiaimona jeacinodi comuide

3 Amatiaí, omoimona diga comini creyentiaina llofuerainina jaiñeno. Jusiñamuidi juez isoi ico lloite. Llofueraini jiaie comini baifemo uiñuamona, Jusiñamui rafuena naimaci eo raise inoñenia, Jusiñamui naimacina jiaíno baifemo duere finoite. Iese riire naimacimo lluaña jaciruillano, llofuerainina ailluena jaiñeno. ² Nana caidi diga maraiñede rafuena finocabidicaí. Maraiñedinona bu ñañenia, jai marebicaide. Naimie nana ie comeci namarede. ³ Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicaí. ⁴ Riire aifi aillue botena nine uiacade; iadedi eo janorede quilla diga, ie jailla dine piloto botena dataoicaide. ⁵ Ie isoide cai fuiaí. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate. ⁶ Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaiacade. ⁷ Nana rana toiredicaí: ocainaiaí, silliñiaí, ofomaiaí, eniruemo biicaidino, lliciaí. Nana toiredicaí; ⁸ iadedi jaca bu ie fuena namatanide. Cai fuiaí jaca eo maraiñede. Iemona eo maraiñede rafue icabite. ⁹ Cai fuiaí diga cai Namamo, ua cai Moomo, marecinona lloticaí. Caina naimie finuamona Jusiñamuina eruaidi-

caí; iadedí caí fuiái díga naimiēna jeare jiaí ñaiticái.

¹⁰ Caí fuedí dajede; iade marecinona ñaiticái.

Maraiñedicinona jiaí ñaiticái. Amatiái, iese caí ñaiñena.

¹¹ Ero, daje pozomona mare jinui, erirede jinui díga, oñedicái. ¹² Amatiái, higuera railla riaromona aceitunadí comuiñede. Uvas railla riaromona higo railla riaradí jiaí comuiñede. Cuerede jinuiomona mare jinuiina oñedicái. Caí fuiaimona jeacino comuiñellena, caí fuiaina caí namataja.

Ua abí uiforacino

¹³ Omoimona, ¿bu ua abí uifnote? Naimie ua abí uifnoia, naimie marena illamona, iena uifnoitomoí. Abí iedoñeno mare rafuena naimie finoia, naimiemo ua abí uiforacino illana uifnoitomoí; ¹⁴ iadedí naimie abí eo uradoia, dama naimiemo ite ramo comecina facaia, naimie abí uiforacino díga naimie abina iedoñena. Jai tainona llote. Naimie llua isoi iñede. ¹⁵ Naie isoide uiforacino díga Jusiñamuimona iñede. Bie enirue ie. Comini ie. Taife ie. ¹⁶ Comini abina uradoia, daní naimacimo ite ramo comeciaina naimaci facaia, comini uri iñedimaci. Díga maraiñede rafue naimacimo ite. ¹⁷ Jusiñamuimona ite ua abí uiforacino díga mare. Bumo ia, uri ite. Riinide. Comeci jinide. Jiaie cominina duenaita. Mare rafuena finocabide. Cominina raise nafuete. Abí tainona jifueñede. ¹⁸ Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

¿Bue ñellena uri iñedicái?

4 ¿Bue ñellena fuiriruidomoí? ¿Bue ñellena iciriruidomoí? Omoí comeciaino maraiñedicino illa muidona. Omoí comeciaino maraiñeno jitaillacino illa muidona. Naie jitaillacino omoí comeciaino namatacana muidona. ² Rana jitaidomoí. Iena omoí feiñoñena jira, naimaci rana fiñllena, comena meineto-moí. Eo uradoidomoí. Omoí jitailla rana feiñoñena jira, fuiridomoí. Omoí jitailla rana Jusiñamuimo omoí jicañena jira, iena feiñoñedomoí. ³ Jiaicaiño Jusiñamuimo jicadomoí; iadedí raise jicañedomoí. Ie jira iena feiñoñedomoí. Daní omoí jitailla ra feiñollena, omoí comecei jaisillena, jicadomoí. ⁴ Jusiñamuina birui raise jitañedomoí; ia naimie díbeimo iñedinona jai jitaidomoí. Bie eniruemo ite rafuena omoí isiruillamona, Jusiñamuina jai raise nabaiñedomoí. ¿Niese iena uifnoñedomoí? Bu naie rafuena isiruillacina, Jusiñamui díbeimo jai iacaiñede. ⁵ Jusiñamui cuetatagafuina raise facañedomoí. Naiedí caimo llote: "Jusiñamui omoímo jai fecaca Joreñodí omoí comecina eo raise namatacade". ⁶ Caina eo duenaila jira, naimie díbeimo caí raise illena, Jusiñamuidí caina eo canoacade. Jusiñamui cuetatagafuina iena llote: "Jusiñamuidí abí iedotimiēna canoñede; iadedí abí iedoñediēna canode". Naimie díbeimo iacaiñediēna ñaite. Naimie díbeimo iacadimiēna canuana jiaí ñaite.

⁷ Ie jira Jusiñamui anamo omoí i. Naimiēna raise omoí ñno. Taife uaina jitañenanona, naimie uaina oni

caíño. Ie mei omoimona naimie oni jaita. ⁸ Jusiñamuina nabaillena, naimie díne iaire omoí i. Ie mei naimie omoí díne iaireno iite. Jeacinona finorainí, omoí comeciái uaiillaína meido. Naganomo omoí comeciaina facañeno. Omoí comeciaina marena fino.

⁹ Maraiñede rafue omoí jai finuamona, omoí sunai. Jaisiñeno, ie ia omoí jeacino facaina omoí mai ee. Caí-mare iñeno; ia omoí jeacino facaina omoí mai sunai.

¹⁰ Jusiñamui díbeimo abina iedoñeno omoí i. Ie mei naimie omoí comeciaina iobitaite.

Jiaíno jinafomo jeare ñaiñeno

¹¹ Amatiái, maraiñede rafuena naimaci finoiadedí, jiaíno jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise ñnoñede. Jusiñamui uaina naimie ñnoñenamona, Jusiñamui uaina jiaí jamaiñocaide. ¹² Jusiñamuidí maraiñede rafuena finodimiēna duere finoite. Caí jeacinomona caina jillotarede. Caí jeacino facaina caina duere finorede. Ie jira jiaie creyentena jicoñeno.

Íco are caimo suite rafuena uifnoñedicái

¹³ Jiaie rafuena lloiacadicue. Nibaí llotomoí: "Birui jiaie nairaimo jaiticái. Birui caí jaiñenia, íco are jaiticái. Rana fecajamona ucube caí ollena, nainomo daje año iiticaí". ¹⁴ Iese llotomoí; iadedí ñie isoide rafue íco are illena uifnoñedomoí. Caí ille dínoiri uillie illa isoi iticái. Dallu bene iticái. Ie mei jai iñedicái. ¹⁵ Ie muidona omoí llua: "Caí Nama jitaia, ñia iiticaí. Caí Nama jitaia, ñie isoide rafuena finoiticaí". ¹⁶ Iena lloñedomoí; iadedí daní omoí comeciaina facajano llotomoí. Iemona eo abina iedotomoí. Abina ieduadí maraiñede. ¹⁷ Mare rafuena finuana uifnotimiedí mare rafuena finoñenia, jeacino jai finode.

Ucuberedinomo llucino

5 Ucuberedino, daje rafuena omoímo jiaí lloiacadicue. Omoímo ramo jirite. Ja eo duere sefuitomoí. Ie jira cuiri-curi ee. ² Omoí raruiaí ja sabite. Omoí mare ñnoiri ja sabite, íbuisaí guilla jira. ³ Omoí ucube ja ieñeite. Ieñena jira, comini omoí faifillana uifnoitimaci. Abina faifitomoí, iraimo ra boa isoi. ⁴ Ero, ailluena ucube irairuillaí iena jai eenotomoí. Naie facaisedí jai ride. Omoí maijiraíni maijiamona ucubedí omoímo ñia ite. Omoí eniruemo maijdimaci; ia naimacina raise íbañedomoí. Jai eedimaci. Caí nanoca Nama iena cascade. ⁵ Omoí illa dínoiri ailluena raruiaí omoímo ite. Nana omoí comeciái jitailla rafuena finodomoí. Omoí comecei jitailla isoi itomoí. Naie íba ollirui jai ride. ⁶ Maredinona duere finodomoí. Ñie isoide rafuena omoímo finoñediēnaci. Abina riidoñediēnaci; iadedí naimacina meineto-moí. Ie jira Jusiñamuimona ja duere sefuitomoí.

Cai Nama billemo fecuise omoi ocuiri

⁷ Amatiai, cai Nama billemo fecuise omoi ocuiri. Cominidi imaci illimona riaru feiñuana sedadimaci. Noci deillemo fecuise ocuiri dimaci. Ie mei riaru llisillana otimaci. ⁸ Ie isoi cai Nama billemo fecuise ocuiri. Omoi comeciai rucaicueriñeno, cai Nama bille iaire illa jira. ⁹ Duere omoi sefua, Jusiñamui juez isoi omoimo lloi raillano, "Jiaie creyente muidona duere sefuidicue" raiñeno. Jusiñamui omoi illana raise uiñote. ¹⁰ Amatiai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuñedimaci. ¹¹ Naimaci Jusiñamuina fañonocaiñena jira: "Naimaci comeciaidi caimare itimaci" raiticai. Job micorina jiai comeciticai. Naimie jaie ite. Naimie eeñeno duere sefuide. Duere sefuide; ia Jusiñamuina fañonocaiñede. Ie mei ja muidomo ñie isoide cai Nama naimiena finuana uiñotica. Cai Namadi naimiena duenaila jira, naimiena raise canode. Caina jiai due-naite. Ie jira caina jiai canoite.

¹² Cue amatiai, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. "Iena cai llinoia, cai lloga uaina cai finoñenia, Jusiñamui caina duere finoite" raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra

mamecina jamai ebena llinoñeno. Eniruemo ite ra mamecina jamai ebena llinoñeno; iadedi ñie isoide rafuena omoi lluamona, uanaicinona jaca llono. Iese llono, Jusiñamui omoina duere fino raillano.

¹³ Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. ¹⁴ Duidimie ia, naimaci naimieri Jusiñamuimo jillena, creyentaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena. ¹⁵ Finuano jiiia, jilloite. Cai Nama naimiena jillotaite. Naimie finoca jeacinona oni jiai dotajite. ¹⁶ Ie jira coninimo omoi marañedicinona llono. Ie mei Jusiñamuimo coninaina omoi jii, omoi duicomona omoi jilloillena. Jusiñamuimo marebicaidimie jiiia, diga rafuena finorede. ¹⁷ Elana comecitomoi. Jaie ite; ia naimiedi cai isoide. Jusiñamuimo jiiide, noci deiñellena. Ie mei daje amani fiemona abimo atomonado jaca deiñede. ¹⁸ Ie mei dane jiiide, noci deillena. Ie jira noci deide. Ie mei riaru dane sicode.

¹⁹ Amatiai, omoimona damiedi Jusiñamui ie uanaicino dibeimona jaia, dane Jusiñamui dibeimo naimiena bu itataia, eo mare. ²⁰ Iena bu finoia, naimiena ie uañedicinomona itatate. Faiñillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santiagodicue.

1 PEDRO

Tuude cominimo Pedrodi cartana cuete

1 ¿Nigacino? ¿Nie isidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. ² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi ñnollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

Jesucristo diga jaca cai illemo ocuridicai

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, ñnocana cai jaillemo jiaie ocuridicai. ⁴ Omoi ocurillafuedi monamo ite. Faifiñeit-omoi; ia nainomo caimare marena jaca iitomoi. Jusiñamui iese omoina itataite. ⁵ Jusiñamuina omoi ñnua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. ⁶ Ieri iobidomoi; iadedi dallu diga rafuemonu duere sefuidomoi.

⁷ Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena "Mare" llotomoi. Oro eo raifide; iadedi jaca iñede. Ie isoide. Cristona omoi ua ñnuana facacillena, diga rafuemonu duere sefuidomoi. Ñnocana omoi jaillamona, Jesucristo abido bille facaiseconi Jusiñamuidi omoina: "Mare" lloite. Omoi ieo iobite. ⁸ Jesucristona jaca cioiñedomoi; iadedi naimiena jai isiruitomoi. Naimiena jaca cioiñedomoi; iadedi naimiena jai ñnotomoi. Ie jira eo iocire itomoi. ⁹ Cristona omoi ñnuamona, jeacinomona jai jillobidomoi. ¹⁰ Jusiñamui facaina lloraini micoriaidi Jusiñamui omoina jai duenaillana jai llotimaci. Jusiñamui omoina jilluana jai llotimaci. Iena naimaci raise cacaiñenia, naiemo comeciaina facauidimaci. ¹¹ Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiaie llotimaci. Monamo

naimie abido jaillena llotimaci. Bumo iese ico suillena uiñoiacadimaci. Naie facaise illemo comeciaina jiaie facadimaci. ¹² Jusiñamuidi naie rafue naimacimo duifñenana uiñotade. Naimacina naie rafue caimo duillana jiaie uiñotade. Jusiñamui ie Joreña monamona naimacimo oretajanona, ie uaido naimaci llumona, naimie facaina llorainimona bie mare rafuena birui jai cacadomoi. Jusiñamui jaienisai bie rafuena jiaie raise uiñoiacadimaci; ia cai isoi iena uiñoñedimaci.

Naimie jitaillacinona cai finollena, Jusiñamui caina fetode

¹³ Ie jira omoi comeciaina raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñoitomoi. Iemo iocire ocuri.

¹⁴ Jusiñamuina omoi nia uiñoñena facaise dani omoi comeciaina jitaillu rafuedo jaisoidomoi. Naimiena omoi jai ñnua jira, naimiena omoi nia uiñoñega facaise finoca rafuedo birui omoi jaiñeno. Mare uruiacimaci moo uaina ñnotimaci. Jusiñamui uruiacina omoi jai illa jira, naimie uaina ñno. ¹⁵ Jusiñamui ie uruiacina omoi illena, jai omoina fetode. Naimie mareuilla jira, marena omoi i. ¹⁶ Iena naimiedi jai cuetate: "Cue mareuidimiena isoi, marena omoi i".

¹⁷ Cai Moona Jusiñamui illamona, naimiemo birui jiidomoi; iadedi juez isoi nagamiemo ico Jusiñamui llua jira, nana omoi ille ñnori jacruicana omoi jai. Nagamiena ie marañede finoca rafue ñese duere finote; ia marañede rafuena finoñedimiena duere finote. ¹⁸ Omoi einamaci rafuedo jai jaisoidomoi. Naie rafue jamaifue. Naifuemonu Jusiñamui omoina jai jillotate. Ibatajamona omoi jeacinomona jillotañede. Ucubedi raire cueruide. Raire cueruide ra diga omoina jillotañede; ¹⁹ iadedi Cristo ñruedo naimie dacaiño fiodaillamona, omoina jaca jillotate. Cai comini imaci jeacino facaina mare toica llaudana fauidimaci; ia Cristomo jeacino iñena jira, cai jeacino facaina birui dacaiño fiodaite. ²⁰ Caina jilloitallena, enirue nia iñena facaiseconi Jusiñamui Cristona jai fetode. Naimiena omoi uiñollena, birui bene eniruemo Jusiñamui naimiena oretate. ²¹ Cristo muidona Jusiñamuina ñnotomoi. Cristo fiodaite; ia iemona Jusiñamui naimiena jillotate. Ie mei monamo ie ecimo naimiena dane itatate. Ie jira Jusiñamuina ñnotomoi. Omoi fiodaia, dane jilloillemo jiaie jai ocuridomoi. ²² Uanaicinona omoi ñnuamona, omoi comeciaina jai jeanidimaci. Ie muidona jiaie creyentiaina isiruicana omoi jai. Omoi comeciainomona conini omoi isirui. ²³ Jusiñamui comini-

na jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iite. Naie uaido naimie cominina jaca iiticaí. ²⁴ Jusiñamui facaina lloraima micorí iena jaie cuete:

Nana cominidí raiticiaí isoidimaci.

Safia dallu ebirede; iadedí raiticiaí ie safia diga are iñede.

Ie isoide. Diga rafuena finuanona, dallu iticaí.

Are iñedicaí; ²⁵ iadedí Jusiñamui uai jaca ite cuete. Naie uaidí mare rafue. Naie rafuena birui jai cadomoi.

2 Jusiñamui cominina cai illa jira, jiaie cominina gaiñenacinona fainonocai. Nana jifuiacinona fainonocai. Abina caitajacinona feita. Nana abi uradoilacinona feita. Jiaie comini joreñona ñaiñeno. ² Ero, raise moonallena, raise ecairellena, janosa monoi ijina jitaide. Ie isoide. Omoi comeciái raise marena illena, Jusiñamui rafuena jitaídomoi. ³ Cai Nama omoína duenaillana jai omoi uiñuamona, naimie uaina ñnocana jai.

Cristodí jofomo ite nanoca nofici isoide

⁴ Ie cominina raise omoi illena, Jusiñamui rafuena finocana jai. Naimie omoína jai fetode. Naimiemo omoi raise duillana jitaide. Iena omoi raise uiñollena, jiaie rafuedo iena lloiticue. Naimiedí jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofo nillana tainede. Cristodí naie nanoca nofici isoide. Cai nairai Cristona jaie jitaíñedimaci; iadedí Jusiñamuimona naimie maredimiena jira, Jusiñamui naimiena fetode. Caidí jiaie noficiái isoidicaí. Ie jofona nillena isoillena, Jusiñamui caina fetode. ⁵ Naimiena cai jai ñnua jira, naimie cominina jai jaidicaí. Naimie diga jai atona ñairedicaí. Naimie diga jiaie comini facaina jiaí ñaicabiticaí. Naimiena cai raise sedallena, Jesucristo caina canuamona, Jusiñamui jitaillacinona finocana jaidicaí. ⁶ Jusiñamui facaina lloraima iena jaie cuega:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiena jai fetodicue. Naimiedí eo mare.

Naimiena ñnuamona, comini iobitimaci cueda. ⁷ Naimiena omoi ñnoia, Jusiñamui omoína iobitaite. Naimiena omoi ñnoñenia, faífitomoi. Jusiñamui facaina lloraima micorí iena jaie cuega:

Jofona finoraini jitaíñena noficidí nana naie jofomo ite noficiái baífemo jai faiga

cueda. Ie isoide. Cai nairai Cristona jitaíñede; iadedí Jusiñamui naimieri eo iobide. ⁸ Dane cueda:

Nine naimaci macaria, naie noficimona eicaitaillamona, uaitimaci

cueda. Cristona cuete. Cristo uaina naimaci ñnoñenia jira, Jusiñamui llua isoi faífitimaci.

Pedro Jusiñamui fetocanona llofuede

⁹ Jusiñamui jai fetocanodomoi. Naimiemo omoi jai duillamona, naimie diga atona ñairedomoi. Jusiñamui ua cominidomoi. Naimiena omoi nia ñnoñenia, jeacino anamo omoi illa jira, jitaíñedomoi itomoi isoidomoi. Naimiemo omoína jai jillobitade. Naimie anamo jai omoi illamona, useredonomo jai itomoi isoidomoi. Eo mare rafue omoimo naimie finua jira, iena llocana omoi jai. ¹⁰ Jaie Jusiñamui cominiñedomoi; iadedí birui Jusiñamui cominidomoi. Naimie omoína duenaillana jaie uiñoñedomoi. Birui iena uiñotomoi.

Pedro Jusiñamui jitaillacinona finocana cai jaillana llofuede

¹¹ Cue isiruiganodomoi. Jusiñamui illanomo omoi birui jainaíalla jira, eniruemo jaca iñeítomoi. Eniruemo jaca omoi iñena jira, jeacinona finocana jaiñeno. Jeacino omoi comeciaina namataacana jira, iena eburuiñeno, naie anamo omoi i raillano. ¹² Jusiñamuina ñnoñedino motomo omoi illamona, mare rafuena finocana jai. Omoína birui jeare ñaitimaci; iadedí omoi marena illana naimaci uiñuamona, Jusiñamuina ico naimaci ñnoia, naimiemo iobillacinona fecaitimaci. ¹³ Cai Namamo omoi duilla jira, illaicomini anamo raise i. Riaí diga omoi nanoca illaíma uaina ñno. ¹⁴ Naimiacina omoi illaicomini fetua jira, omoi gobernadores uaina ñno. Maraiñede rafue omoi finoa, omoína duere finoitimaci; iadedí mare rafuena omoi finoa, omoi iobitimaci. ¹⁵ Jusiñamuidí mare rafuena omoi finuana jitaide. Iena omoi finua jira, omoína ebena ñaitino uaina llicaitaitomoi. ¹⁶ Jusiñamui anamo cai illamona: "Jiaie illaíma uaina ñnoñeíticaí" raiñeíticaí. Cai enirue illaíma uaina cai ñnoñenia, jeacinona finodicaí. Jusiñamui díbeimo cai illa jira, naimie jitaillacinona finocana cai jailli. ¹⁷ Nana cominimo marena fino. Nana creyentaina isirui. Jusiñamuina jaciruoicaída ñno. Riaí diga omoi illaíma uaina ñno.

Cristo duere sefuilla rafuemona fueoiticaí

¹⁸ Patrón anamo damierie itomoi. Omoi patrón ocuica uaina ñnocana omoi jai. Omoi patrón marena fecuise ocuica, naimie uaina ñno. Naimie raire iciria, naimie ocuica uaina jiaí ñno. ¹⁹ Maraiñede rafuena omoi finoñenia, omoi patrón omoína duere finoa, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare. ²⁰ Maraiñede rafuena omoi finoa, omoi patrómoma duere sefuitomoi; iadedí maraiñede rafuena omoi finoñenia, omoi patrón omoína duere finoa, ibana omoi oñenia, Jusiñamuimona mare. ²¹ Duere omoi sefuia, ibana oñeno. Iese omoi illena, Jusiñamui omoína fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. ²² Naimiedí maraiñede rafuena jaca finoñede. Tainona jaca lloñede. ²³ Comini naimiena jeare ñaitimaci; iadedí naimiedí uai oñede. Naimie duere se-

fuide; iadedi: "Omoïna ico duere finoiticue" raiñede. Naimiedi Jusiñamui naimacina ico raise duere finollena uiñote. ²⁴ Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodicaï. ²⁵ Sedañega toïca llaudaïai isoi jaie ebena jaisoidicaï. Cai sedaraima anamo jai iticaï. Naimiedi cai comeciaina jai eenote.

Pedrodi inirediñaiñuaina, airedino diga llofuate

3 Inirediñaiñuai, omoïmo jai lloiacadicue. Omoï iniñiai uaina ñno. Nibai birui Cristo rafuena ñnoñedimaci; iadedi omoï marena illamona, Cristo ðibeimo naimacina itataitomoï. Jusiñamui uaina omoï ñnuamona, omoï marena illamona, damierie Cristona ñnoitimaci. ³ Dañaiñorie abina eo finocabidimaci, naiñaiñuaina jiaie comini ebinallena. Naiñaiñuai ifotiena eo finocabidimaci. Eo raifide rana jítacabidimaci. Eo ebirede raifide iniroina jítacabidimaci. Naie isoide ra comecina marena itatañede; ia Jusiñamui jitaillacinodo jaillamona, comeci marena ite. Jiaie comini omoïna ebinai raillano, iese omoï iñeno; ⁴ iadedi jiaie comini omoïna ebinallena, omoï comeci marena fino. Omoï iniñiai uaina oñeno. Naimaci jitailla rafuena fino. Omoï comeci iese ia, Jusiñamuimona eo mare. ⁵ Cai jaiagai facaise Jusiñamuina ñnotiñaiñuai iese itimaci. Cue birui llofuia isoi, naiñaiñuai abina jaie finodimaci. Naiñaiñuai iniñiai uaina ñnotimaci. ⁶ Iese Sara micori ie ini Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoï jaia, buena omoï jaciruiñenia, naiñaiño isoi iitomoï. Iemona naiñaiño uruiaina jaitomoï isoitomoï.

⁷ Airedino, omoïmo jai lloiacadicue. Omoï ainiaïmo comeciaina faca. Cai isoi naiñaiñuai mañriñena jira, naiñaiñuaina isiruillamona, naiñaiñuaina marena raise seda. Jusiñamui omoïna duenallamona, naimie cominina jai jaidomoï. Omoïna jai jillotate. Omoï ainiaïna omoï raise sedañenia, Jusiñamuimo daajena raise jñnidomoïco.

Cristo ðibeimo cai illa rafue

⁸ Daje isoi comeciail loicana jai. Coninina duenai. Naga creyentena isirui. Jiaïnona cano. Abina ðedoñeno.

⁹ Omoïna jiaie comini duere finoia, ibana oñeno. Omoïna naimaci jeare ñaia, ibana oñeno; iadedi naimaciri marena ñaïno. Mare rafuena cai finollena, Jusiñamui caina fetode. Iese cai jaia, Jusiñamui ðinena: "Mare" caina raite. ¹⁰ Jusiñamui facaina lloraima micori iena jaie cueda:

Marena uri jaca bu iacania, jeare ñaiñeno.

Tainona lloñeno.

¹¹ Jearede rafue finuana fainonocai. Mare rafuedo jai.

Omoï ecimo itino diga, uri icana omoï jai.

¹² Naimie jitailla rafue omoï finoia, Jusiñamui iena uiñuamona, omoïna raise sedade.

Naimie diga omoï ñaia, iena cacade;

iadedi maraiñede rafue bu finoia, Jusiñamui naimie diga icirite.

¹³ Mare rafuena omoï finocana jaia: "Maraiñede rafuena naimaci finua jira, naimacina duere finoiticaï" rainidimaci; ¹⁴ ia mare rafuena omoï finuamona omoï duere sefuia, Jusiñamui omoïna canoite. Omoïna duere finodinona jaciruiñeno. Jarire iñeno; ¹⁵ ia omoï comeci jitaillamona Cristona seda. Naimiedi cai Nama. "¿Bue ñellena Cristona ñnotomoï?" omoïmo bu jicanoia, uaina raise ono. Fecuisse iciriñeno, uaina ono. ¹⁶ Mare rafuena finocana jai. Omoïna jiaïno jeare ñaia, mare rafuena omoï finocabillamona meidaitimaci. Omoï marena illamona, tainona naimaci lluaana bairenite. ¹⁷ Mare rafuena omoï finuamona, Jusiñamui jitaillamona omoï duere sefuia, dama iese duere sefuitomoï; ia maraiñede rafuena omoï finuamona omoï duere sefuia, omoï muidona. ¹⁸ Cristomo omoï comeciaina faca. Dacaiño cai jeacino facaina naimie fiodaite. Naimie mareuidimie; iadedi maraiñedino facaina fiodaite. Jusiñamui ðibeimo caina itataiacade. Naimiena meinetimaci; iadedi naimie Joreño jaca ite. ¹⁹ Ie Joreño-do naimie jaillanona, jaie fiodaïtino imaci joreñuai eenoranomo ie finoca rafuena lluaide. Naimaci nia fiodaïñenia, Jusiñamuina jaca ñnoñedimaci; ia Cristo ie finoca rafuena naimaci joreñuaimo lluaide. ²⁰ Jusiñamui rafuena jaie ñnoñedimaci. Noé micori facaise Jusiñamuidi naimaci naimiena ñnuamo fecuisse ocuride. Jinuimona jillobillena, Noé micori ie balsana finode. Ocho ðigamie jillobidimaci. ²¹ Ie isoide. Omoï bautizaia: "Jusiñamui ðibeimo jai iticaï" llotomoï. "Jeacinomona jai jillobidicaï" llotomoï. Omoï abimo ite jearenamona jillobiñedomoï; iadedi omoï comeci jai marena ite. Fiodaillamona Jesucristo jillua muidona, jillobidicaï. ²² Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisaï naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

Jusiñamuimona cai feiñoga uai diga, naga jiaie creyentena cai canua

4 Cai isoi naimie illamona, Cristo duere sefuide. Naimie duere sefuide; ia jeacinona finoñede.

Duere omoï sefuia, naimie illamo omoï comeciaina faca. ² Nana omoï ille ðinori comini jitaillacinodo jaiñeno; iadedi Jusiñamui jitaillacinodo omoï jai. ³ Jusiñamuina uiñoñedino isoi jaie bie isoide rafuena finouidomoï; Omoï aiñede riñoniaï diga isoidomoï. Omoï iniñede iñiaï diga isoidomoï. Jearede rafuena ebiruitomoï. Jifairuidomoï. Jiruana ebiruitomoï. Jusiñamui rairuica jiraraina sedauidomoï. ⁴ Naie isoide rafuena omoï jai finoñenia, Jusiñamuina uiñoñedini omoïri rajicaidimaci. Omoïna jeare ñaitimaci. ⁵ Iese itimaci; iadedi Jusiñamui uicomo ico iitimaci. Naimacina duere finoite. Nia fiodaïñedina duere finoite. Jai fiodaïtina jiaï duere finoite. ⁶ Naimaci nia fiodaïñena facaise, Jesucristo rafuena cacadimaci. Jeacino muidona nana fio-

daitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

⁷ Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jillena, iese omoi jai. ⁸ Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire feitaïtomoi. ⁹ Jiaie cominina jafueoicaïda feiñoñeno; ia caïmare feiño. ¹⁰ Creyentiaïna omoi jailla facaise Jusiñamuimona omoi uaina feiñotomoi. Naimie ðibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano. ¹¹ Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina caï iobitallena, nana caï finua rafuemonu Jesucristo mamecido iese caï jailla. Illaïmana naimie illamona, caïna jaca sedade. Naimiemo iobillacinona jaca caï fecacabillasa. Iena jitaïdicue.

Cristo ðibeimo caï illamona, duere sefuiticai

¹² Cue isiruiganodomoi. Eo duere omoi sefuia, rajicaiñeno. Creyentiaïna omoi jailla jira, duere sefuitomoi. Jusiñamuidi Cristona raise omoi ñnuana facacite. ¹³ Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomoi. ¹⁴ Creyentiaïna omoi illamona, omoiina bu jeare ñaïa, caïmare omoi i. Iemona Jusiñamui Joreño omoiimo illana uiñoïtomoi. Naimie: "Mare" omoiina raite. ¹⁵ Jiaïnodï cominina meinetimaci. Rana fiïðimaci. Maraiñede rafuena finodimaci. Naimacimo duide rafuena abimo oñeno. Naie isoide rafuena bu finoa, duere sefuite. Iena omoi finoñeno. Naie isoide rafuena omoi finuamona omoi duere sefuillana jitaïñedïcue. ¹⁶ Creyentiaïna omoi illamona omoi duere sefuia, ieri meiruiñeno; iadedi creyentiaïna omoi illamona, iobillacinona Jusiñamuimo feca. ¹⁷ Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina caï illamona, caïna janore duere finoite; iadedi naimie cominiñedinona caï baifemo eo duere finoite. ¹⁸ Jusiñamui facaina lloraïma micori iena jaie cuega: "Mareuidinodï niadedi jillobiñedimacimo, ¿ñiese começiaina jearedinodï jillobitimaci? ¿Ñiese maraiñedïnodï jillobitimaci? Nibai jaca jillobiñeitimaci" cuega. ¹⁹ Iena omoi uiñuamona, mare rafuedo jai. Jusiñamui jitaïllamona duere omoi sefuia, mare rafuedo jai. Jusiñamui caïmo finuana omoi uiñuamona, naimie anamo raise i. Naimie omoiina raise eenoite. Ie lloga uaina jaca finoite.

Pedro creyentiaïna nia llofuate

5 Creyentiaïna llofueraini, omoiimo rafuena lloiacadicue. Cuedi jiaï llofueraimadicue. Cristo fiodal-

lana ciodicue. Naimie ebire abido bia, jiaie creyentiaï diga iena cioitïcue. Iese cue illamona, omoiimo lloiacadicue. ² Omoi anamo ite creyentiaïna raise seda. Naimacina raise llofue. Jiaïmie railla jira, llofueñeno; iadedi omoi jitaïlla jira, llofue. Rana ollena llofueñeno; iadedi iocire llofue. ³ Omoi anamo itinona riire llofueñeno; iadedi mare rafuedo omoi jaïllamona, naimacina llofue. ⁴ Caï creyentiaï nanoca sedaraïmadi Cristo. Naimie abido bia, naimiemona ibana feiñoïtomoi. Naimie diga jaca iïtomoi.

⁵ Conirueni, omoi llofueraini uaina raise ñno. Coninimona abina ðedoñeno. Jusiñamui facaina lloraïma micori iese jaie cuega:

Bu abina ðedoia, Jusiñamuimona maraiñede; iadedi bu abi ðedoñenia, Jusiñamuimona mare. Jusiñamui naimiena duenaite cuega. ⁶ Iese illa jira, caï Jusiñamui siñona jira, naimie anamo abina ðedoñeno mai raise omoi i. Iemona naimie jitaïlliruido omoiina iobitaite. ⁷ Nie isoide rafue ia, Jusiñamui omoiina canocabillana omoi uiñuamona, omoi começiï jarire finoñeno. Naimie omoiina eenoite.

⁸ Ebena jaiñeno. Jeacino finuamo abina rairui. Taife caïna ramo faicabite. Janallari ie rille jenua isoi, Taife omoiina jenocabide. Jeacino omoi finuana jitaide. ⁹ Naimie ra faïa uaina ñnoñeno; ia Cristona ñnocana jai. Omoi duere sefuilla isoi, nana jiaie creyentiaï duere sefuidimaci. Iena omoi uiñuamona, omoi começiï ocuiñocana jai. ¹⁰ Caï Jusiñamui caïna eo duenaite. Cristomo jai caï duilla jira, Jusiñamui illanomo ðco jaca iiticaï. Dallu birui duere caï sefuia, Jusiñamui caï começiaina raise finoite. Caï começiaina raise ocuiñotaite. ¹¹ Illaïmana naimie illamona, caïna jaca sedade. Naimiemo iobillacino caï fecacabillasa. Iena jitaïdicue.

Naga creyentiaïmo carta oria rafue

¹² Silvanona uiñotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedï raise ñnogamie. Omoi ðine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caïna duenaïllana omoi uiñuamona, bie rafuena ñnocana jai.

¹³ Babiloniamo ite creyentiaï omoi ðine imaci uaina oredimaci. Naimacina Jusiñamui jai fetuamona, creyentiaïna jaidimaci. Marcos ie uaina jiaï orede. Cristomo naimie jai duilla jira, naimie cue jïtona eruaid. ¹⁴ Conini omoi isiruillamona, nana creyentiaïna eo caïmare uaido. Cristomo jai omoi duilla jira, naimie omoi começiaina uri itatajana uiñocana mai jai. Macaïbaite. Pedrodicue.

2 PEDRO

Pedro creyentiaimo carta orede

1 ¿Nigacino? ¿Nie isoidomoi? Bie carta omoimo oredicue. Simón Pedrodicue. Jesucristo díbeimo maijiamona, ie rafuena llotícue. Cuená oretajamona, ie lloga uaina fínodicue. Cai isoi jái ñnotomoi. Cai Jusiñamui marena illa jira, Jesucristo marena illa jira, Jesucristo omoína jillotaja jira, jái ñnotomoi. Jusiñamui mona cai isoi omoi illa jira, bie carta omoi díne oredicue. ²Jusiñamuina omoi uifnuamona, cai Nama Jesús omoi uifnuamona, iaimaiaí omoína duenaillana uifnocana jai. Iaimaiaí omoi uri itatajana uifnocana jai.

Creyentiaí marena illa rafue

³Jesús siñona illamona, bene cai marena illena, naimiedí nana rafue caimo jai iga. Naimiena cai uifnocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode. ⁴Naimie iese illamona, eo mare rafuena caimo jai llote. Jiaie rafue baífemo faite. Bie rafue muidona jeacinomona jillobidicai. Cai comeciái jaie jitailla jira, faíficana jaidicai; iadedí naimie rafuena cai ñnuamona, naimie illa isoi, icana jaidicai. ⁵Jesucristona jai ñnotomoi. Naimiemo omoi duillamona, mare rafuena finocana jai. Jusiñamui jitaillacinona fínocana jai. Iemona abina uifnocana jai. ⁶Jearede rafue fínocana jaiñeno; iadedí omoi comeciaina eeno. Iena ocuifnocana jai. Jusiñamuina sedacana jai. ⁷Jiaie creyentiaína isiruicana jai. Nana comínina isiruicana jai. ⁸Naie isoidicínona jitaídomoi. Iedo omoi raise jaia, cai Nama Jesucristona eo raise uifnocana jaitomoi; ⁹iadedí iedo omoi jaiñenia, abina nia raise uifnoñedomoi. Omoi jeacinomona jai jilluana jiaí jai feitatomoi. Mare rafuena fínocana jaillena, omoi jeacinomona jillobidomoi. Iena feitañeno. ¹⁰Cue amatiaí, naie isoidicínona fínocana jai. Iemona Jusiñamui omoína fetuana raise uifnoítomoi. Abído danomo jiaí jaiñeitomoi. ¹¹Iese omoi jaia, cai Jilloitaraimana naimie illamona, cai Nama Jesucristo ie illanomo omoína eo marena feiñoite. Nainomo naimie anamo jaca iitomoi.

¹²Ie jira bie isoide rafuena díga icaiño omoimo lloitícue. Bie rafuena uifnotomoi. Bie rafue uanaicínona jai raise uifnocaidomoi. ¹³Cai Nama Jesucristo cuemo jai llua jira, raíre cue fiodaillena uifnotícue. Nia cue fiodaíñenia, bie rafuena omoimo díga icaiño lloitícue. Iese omoimo cue lloia, cuemona mare. ¹⁵Bie rafue omoi raise nagarui uifñollena, omoína birui canoítícue.

Cue fiodaílle mei, nagarui bie rafuena omoi feitañenana jitaídicue. Ie muidona bie rafuena jai cueticue.

Pedro Cristona ebirenana jaie ciode

¹⁶Jamai rafue omoimo lloñedicai. Omoína jifueiacaiñedicai. Cai Nama Jesucristo siñonana lloticai. Naimie abído billena jiaí lloticai. Naimiena ebirenana jaie ciódicai. ¹⁷Eníruemo naimie jaie ia, anedu muidomo naimie díga jaidicai. Jusiñamui nainomo jiaí illa jira, naie illano mare. Naie facaise Jusiñamui llua cacadicai. Jusiñamui naimiena iobitaíacade. Ebire llote: “Bimie cue isiruiga Jito. Naimieri iobidicue”. Iena jaie cai ciuanona, birui naimie siñonana lloticai. ¹⁹Naiemona Jusiñamui facaina jaie lloraíní micoriaí lloga rafue suillena jai raise uifnoticai. Naimaci lloga rafuemo omoi comeciaina faca. Lamparín jitiředinomo lligaiñua isoi, naie rafue cai comeciaina uanaicínona uifnotade. Monairaí cuduna cai cioia, iaírei monaílle ua illana uifnoticai. Ie isoide. Cristo dane baíreia, iena raise uifnoticai. Jusiñamui facaina lloraíní micoriaí rafuena cai uifnuamona, uanaicínona ua uifnoticai. ²⁰Biena uifnoticai. Dani comeciáimona Jusiñamui facaina lloraíní micoriaí naimaci lloga uaina llofueñedimaci. ²¹Dani naimaci comeciái jamai facajamona naie rafuena oñedimaci; iadedí Jusiñamui Joreño naimacimo illamona, naimacina iena uifnotajamona, Jusiñamui rafuena jino llotimaci.

Pedro tainona llofuerainina llote

2 Cai jaiagai facaise tainona llofuerainí itimaci. Birui ie isoide. Omoi motomo tainona llofuerainí iitimaci. Jusiñamui rafuena raise llofueñeitimaci; iadedí naie rafuemona omoína itataíacanitimaci. Naimaci facaina Jesucristo fiodaite; iadedí: “Jesucristo cai Nama” raiñeitimaci. Naimaci fínolle rafue muidona, raíre ebena faífitimaci. ²Naimaci jearede rafuedo ailluena comíní jaitimaci. Naimaci muidona, ailluena comíní Cristo rafuena jearuitimaci. Cristo rafue uanaicínó; ia iese lloñeitimaci. ³Ucube ollena, naimaci tainona llofuiacínodo omoína jifueiacanitimaci; iadedí Jusiñamui riícaíllafue anamo jai itimaci. Jusiñamui naimacina íco duere fínoite.

⁴Naimie ecimo ite jaienisaímona damierie jeacino jaie fínua jira, Jusiñamui naimacina jai oni dotade. Naimie riícaíllafue anamo naimaci jai illamona, naimacimo ite uai jai íñede. Jitiředinomo jai itimaci. Naimacina duere fínoite, nana comíní Jusiñamui díne illírui ia. ⁵Jusiñamui Noé micorí facaise ite comínina

jaie duere finode. Noé micorí Jusiñamui ie mare rafuena naimacimo lloste; iadedi Jusiñamuina ñnoiacañedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. ⁶ Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua. ⁷ Sodomamona Jusiñamui Lot micorina jillotate. Lot micorí maremie. Eo jearede rafuena naie nairai finua jira, Lot micorí comeci jarire ite. ⁸ Naimaci motomo naimie illamona, nagarui naimaci marañede rafue naimie ciuamona, naimie comeci uri iñede. ⁹ Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faiamona jilloitajana uiñote. Jusiñamui naimiena ñnoñedino naimie ricaillafue anamo illana jiai uiñote. Ico naimacina duere finoite.

¹⁰ Jearede jitaillacino finocabinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaina jaciruiñeno jeare ñaitimaci. ¹¹ Jusiñamui jaienisai uai naimaci baifemo faite; iadedi Jusiñamui illanomo naimaci illamona, bie tainona llofuerainina jeare ñañedimaci. ¹² Ocainai ai abina raise uiñoñena muidona, cai rillena naimacina fati cai. Bie tainona llofueraini ocainai ai isoidimaci. Naimaci raise uiñoñega rafuena jeare ñaitimaci. Ocainai ai faifilla isoi, faifitimaci. ¹³ Jiaie cominina naimaci duere finua dinori duere sefuitimaci. Birui ite rafuena nagarui eburuitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci eburuilla jira, raise conini diga nabairinidomoi.

¹⁴ Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise ñnoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci. ¹⁵ Cristo rafuena fainonocaillanona, jiaie rafuedo birui jaidimaci. Balaam micorí rafuedo jai jaidimaci. Balaam micorí Beor micorí jito. Ucube ollena, Balaam micorí uanaicinona jaie lloiacañede; iadedi jiaie rafuena llollena, jiaie nairai dine jaide. ¹⁶ Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micorí jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

¹⁷ Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeci daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiñedinomo jaca iitimaci. ¹⁸ Jamai ñaia diga abina iedotimaci. Uaññede rafuemonona, como Cristomo ñnotinona ramo faitimaci. "Jearede rafue finuana mare" raitimaci. ¹⁹ "Cai jitailla rafuena finoredicai" raitimaci. Iese raitimaci; iadedi jeacino anamo jai itimaci.

Jeacino finocana naimaci jailla jira, ie anamo jai itimaci. ²⁰ Cai Nama Jesucristo. Naimiedi cai jilloitaraima. Naimiena naimaci jaie ñnuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci. ²¹ Cristo rafuena jaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fainonocaillamona, eo jai fodo jaidimaci. ²² Cai comini iena iese llocabitimaci; "Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide". Cristo rafuemonona danomo abido jaidinodi daje isoidimaci.

Pedro cai Nama Cristo dane billena llofuede

3 Cue isiruiganodomoi. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeci raise facajana jitaidicue. ² Jusiñamui facaina jaie lloraini micorai lloga rafuena jai uiñotomoi. Cai Nama caina oretajanona, ie lloga rafuena omoimo jai llotica. Naimie muidona jillobidomoi. Bie rafuemo omoi comeci facajana jitaidicue. ³ Biemo nano omoi comeci facajana faca. Cristo nia abido biñena, Cristo rafuena uaitatino iitimaci. Naimaci jitailla rafuedo jaitimaci. ⁴ Jicanoitimaci: "¿Ñiese Cristo nia abido biñede? Enirue finua facaise mona nana ra daje isoi comucana jaide. Cai mootiai jai fiodaicana jaidimaci. Cristo jaca biñeite". ⁵ Iese raitimaci; iadedi iese iñede. Jaie suide rafuemo comeci facacañedimaci. Jusiñamui jaie lluamona, ie uaido mona finode. Enirue jiai finode. Jinuimona iena finuamona, jinuimona eniruedi bairedo. ⁶ Jinui diga Jusiñamuidi Noé micorí facaise cominina jaie fuidode. ⁷ Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena ñnoñedinona iese duere finoite. Ie uai jai llote; ia nia suiñede.

⁸ Cue isiruiganodomoi. Biena feitaño. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide. ⁹ Damierie comeci facadimaci: "Are suiñena jira, cai Nama ie lloga uaina ñibañeite". Iese cai Nama iñede; iadedi comini naimiena ñnuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede. ¹⁰ Firirañima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite. ¹¹ Bie rafue suillena uiñotica. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa. ¹² Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite. ¹³ Naimie jai llua isoi, jiaie mona, jiaie enirue diga illena sedadica. Nainomo

Jusiñamui jitailla isoi marena jaca iiticaí. Nainomo mare rafue finocana jaiticaí.

¹⁴ Cue isiruiganodomoí. Bie rafue nia suiñena jira, naimie abido nia biñena jira, jeacino finoñeno i. Uri icana omoí i. Iese omoí ia, naimie abido bia, omoína: "Mare" raite. Omoiri iobite. ¹⁵ Raíre abido caí Nama biñenia, naimiedi comini naimiena iñnuamo ocuride. Iena uiñoticaí. Caí isiruiga ama Pablo, bie isoide rafue omoímo navui cuete. Cristo naimiena uiñotaga rafue diese cuete. ¹⁶ Nana naimie cartaiáimo bie isoide rafuena cuete. Naimie cartaiáimo diga rafue ite. Dajerie

rafue irirede. Cristo rafuena raise uiñoñedino, Cristona raise iñoñedino iena tainonana llofuecabitimaci; iadedí iemona faificana jaidimaci. Jiaie Cristona cuega-fuiaína tainonana llofuecabitimaci.

¹⁷ Bie rafue birui uiñotomoí. Iena omoí uiñuamona, jearede rafue finocabidino rafuedo jaiñeno. Abido danomo omoí jaiñellena, iemona abina rairui. ¹⁸ Caí Nama caí duenaillana uiñocana jai. Naimiedi caí Jilloitaraima. Naimiena omoí uiñocana jaillamona, naimiena nabai. Naimiena birui caí iobitajasa. Naimiena ua jaca caí iobitajasa. Mai. Macaibaite. Pedrodicue.

1 JUAN

Jusiñamui diga cai jaca illena, Juan cuete

1 Cue uruiaina omoi isoilla jira, omoimo cartana oredicue. ¿Nie isidomoi? Nano dofoconi itimiena lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadica. Naimiena ciodica. Naimiena jia jeadica. Caina Jusiñamuina uiñotade. Jusiñamui diga cai jaca illena, jia caina llofue. ² Jusiñamui dinena billanona, iimana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodica. ³ Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jia jitaidicue. ⁴ Omoi comeciai caimareficailena, omoimo bie rafuena cueticue.

Jusiñamuidi jaca mareuidimiena jira, useredino ite isoide

⁵ Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, useredino ite isoide. Naimie comecidi jaca jeanina jira, jitiredino iñede isoide. ⁶ “Jusiñamuina nabaidica” cai raia, iadedi jeacina finocana cai jaia, tainona llotica. Uanaicnodo nia jaiñedica. ⁷ Jusiñamui jeacino jaca finoñede. Naimie isoi jeacino finoñeno cai jaia, coninina nabaidica. Jesucristo fiodaillamona, naimie diaillamona, Jusiñamui cai jeacina oni dotade. Iena feitate. ⁸ “Caimo jeacino jaca iñede” cai raia, dan cai abina jifuetica. Uanaicnodo nia jaiñedica. ⁹ Naimiemo cai finoca jeacino cai lloia, Jusiñamui cai jeacina dotaite. Nana cai marañedimiona dotaite. Naimie ñnogamiena jira, naimie maremiena jira, iese finoite. ¹⁰ “Omoimo ite jeacino” Jusiñamui llote; iadedi: “Jeacino finocabiñedica” cai raia, “Jusiñamui tainona llote” raitica. Iemona naimie uaina jai uaitatica.

Cai facaina riidotimiedi Cristo

2 Cue uruai isoi cue mamecaomoi. Jeacino finocana omoi jaiñellena, omoimo birui cueticue. Jeacina omoi finuana jitaiñedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiena jira, cai facaina caina riidoite. ² Cai jeacino facaina naimie fiodaite. Iemona Jusiñamui riicaillifue anamona jillobidica. Jesucristo cai facaina fiodaite; ia nana comini facaina jia fiodaite. ³ Jusiñamui llogacina cai ñnuamona, naimiena cai uiñuana

jai uiñotica. ⁴ “Naimiena uiñoticue” raitimiedi ie llogacina uiñotica, naimiedi tainona lloraima. Uanaicnona uiñotede; ⁵ ia Jusiñamui llogacina ñnotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñotica. ⁶ “Cristona nabaidicue” raitimiedi, Cristo isoi, mare rafuena finoite.

Cristo rafuedo jaidomoi

⁷ Cue isiruiganodomoi. Creyentaina omoi jailla faicase bie rafuena cacadomoi. Ie jira jiaie rafuena birui omoimo cueñeticue; ⁸ ia naicnona abido dane lloiticue. Cristo iedo jaide. Iedo jia jai jaidomoi. Jeacino anamo omoi jaie illamona, jitiredino itomoi isidomoi; ia Cristo rafuena omoi jai uiñuamona, useredino jai itomoi isidomoi. ⁹ “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitiredino naimie nia ite isoide. ¹⁰ Jiaie creyentena bu isiruia, Cristo rafuedo raise jaide. Iedo naimie jaia, jiaimiena jeacina finotañete; ¹¹ iadedi jiaie creyentena bu enoia, jitiredino nia ite isoide. Jeacino anamo nia ite. Uisnidimie ie jaillinona raise uiñotena isoi, Jusiñamui dine rillena raise uiñotede. Ie isoi abina uiñotede.

¹² Cue uruai isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

¹³ Einamaci, Jusiñamuina are omoi jai ñnuamona, omoimo bie cartana cueticue. Naimie nano dofoconi jaca ite. Conirueni, jeacina finoñellena omoi comeciaina ocuiñuamona, Jusiñamui uai omoi comeciaino raise itabillamona, marañedimiena omoi jai anafetitaja jira, omoimo bie cartana cueticue. Naimiedi Taife. Uruiai, Jusiñamui uaina omoi como ñnuamona, omoimo bie cartana cueticue. ¹⁵ Omoi eimo marañede rafuena eburuñeno. Iena bu eburua, cai Moo Jusiñamuina isiruñede. ¹⁶ Cai comeciaino ite marañede jitaillacnodi Jusiñamui ieñede. Cai uisido ebire jaide rafuedi Jusiñamui ieñede. Raruiai diga, abi ieducinodi Jusiñamui ieñede. ¹⁷ Jusiñamui ieñede rafue jaca fuite. Naie isoide rafuedo jaidinodi jia faifitmaci; iadedi Jusiñamui jitaillacnona finodimie Jusiñamui illanomo jaca iite.

Cristona abi caitadino rafue

¹⁸ Cue uruai isidomoi. Jesucristo abido billirui iaiei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairadi-

maci. Iemona Jesucristo abido billirui iairei illana jai uiñotomoi. ¹⁹ Cai creyentiaí motomo nano itimaci; ia Cristo díbeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caimona naimaci jailla jira, Cristomo naimaci duiñenana jai uiñoticaí. ²⁰ Jesucristomona Jusiñamui Joreño jai omoi feiñua jira, nana omoi Jusiñamui díbeimo ite rafuena jai uiñotomoi. ²¹ Ie jira uanaicinona bu llofueia, iena uiñotomoi. Uanañedicinona bu llofueia, iena jiaí uiñotomoi.

²² Tainona llofuerainina ja cueiticue. “Cristo cai jil-loitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini. ²³ Cristona ñnoñedinodi Jusiñamuina jiaí ñnoñedimaci. Cristona ñnotino Jusiñamuina jiaí ñnotimaci. Jusiñamui Joreño omoimo illamona, iena jai uiñotomoi. ²⁴ Ie jira creyentiaína omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jiaí raise nabaitomoi. ²⁵ Jusiñamui caimo jai llua isoi, naimie díga jaca iiticaí. ²⁶ Omoína damierie jifueiacana jira, bie rafuena jai cueiticue. ²⁷ Jusiñamui Joreño jai feiñotomoi. Omoína Jusiñamui rafuena naimie uiñotaja jira, jiaie rafuena llofuerainina jai jitañedomoi. Jusiñamui Joreño uanaicinona omoína uiñotacabide. Naimie omoína uiñotaja isoi, Cristona nabaicana omoi jai. ²⁸ Cristo íco abido biite. Omoi jacinañellena, naimiena omoi meiruiñellena, naimiena birui raise omoi nabai. ²⁹ Jusiñamui mareñena cai uiñuamona, nana mare rafuena finocabidino naimiemo duillana jiaí uiñoticaí.

Juandi Jusiñamui cominina llua rafue

3 Jusiñamui caina isiruillamona, naimie cominina jai jaidicaí. Iemo omoi comeciaina facajana jitaídicae. Naimiena naimaci uiñoñena jira, Jusiñamuina ñnoñedino cai uiñooga rafuena jiaí raise uiñoñedimaci. ² Ero, birui Jusiñamui cominidicaí. Cristo dane bia, cai illena nia raise uiñoñedicaí; ia naimie illa isoi cai íco illena jai uiñoticaí. Íco naimiena cai cioillemona, iena raise uiñoiticaí. ³ Iemo cai ocuirillamona, naimie mareña illa isoi, cai comeciái mareña itataja. ⁴ Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode. ⁵ Jusiñamui ñnena Cristo billanona, ñmana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino díbeimo naimie jaca iñede. ⁶ Naimiena nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiena nia raise uiñoñede. ⁷ Cue uruiaí isoidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoína jifueñellena, abina rairui. Jesucristo jaca mareñie. Mare rafuena finocana cai jaia, naimie isoi mareniticaí; ⁸ ia jeacino finocana bu jaia, Taífemo duide. Nano dofomona Taífedí jeacino finocana jaide. Ie jira Jusiñamui Jito bite, Taífe rafuena anafetitallena. ⁹ Naimiemo Jusiñamui uai illamona,

Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide. ¹⁰ Iemona Jusiñamui díbeimo itinona raise uiñoticaí. Taífe díbeimo itinona jiaí raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jiaí duiñede.

Coninina cai isiruilla rafue

¹¹ Creyentiaína omoi jailla facaise: “Coninina isirui” raillana cacadomoi. Jiaie creyentiaína nia omoi isiruiñenia, Jusiñamuimo nia duiñedomoi. ¹² Caín micorimona cai fueua. Naimie ie amana isiruiñena jira, Taífe naimiena ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finouede. Uradoillamona ie amana meinete. ¹³ Ie isoide. Jusiñamui jitailla rafuena birui cai finuamona, Jusiñamui díbeimo iñedinodi caina enoidimaci. Ieri jacinañeno. ¹⁴ Cristona nia cai ñnoñena facaise jeacino anamo cai illa jira, Jusiñamuimona fiódaitino isoidicaí. Jiaie creyentena cai isiruiña, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite. ¹⁵ Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede.

¹⁶ Cristomona cai fueua. Naimie jitailla jira, cai facaina fiódaita. Iemona jiaie creyentiaína cai isiruillana uiñoticaí. Ie jira naimaci facaina naimaci ramo jiriñellena fiódaitaciticaí. ¹⁷ Jiaie creyentiaína cai isiruillamona, naimacina canoiticaí. Omoimo ra ia, jiaie creyentemo ra iñenia, naimiena omoi canoñenia, Jusiñamuina raise isiruiñedomoi. ¹⁸ Cue uruiaí isoidomoi. “Jamai uaido jiaie creyentiaína isiruiticaí” cai raiñena; iadedi cai finocana rafuemona naimacina cai canua.

Jusiñamuimo jaciruiñeno jñredicaí

¹⁹ Jiaie creyentiaína isiruicana cai jaia, Jusiñamui cominina cai illana raise uiñoticaí. Jusiñamui muidona cai comeci uri ite. ²⁰ Cai comecimo iticinona uiñoticaí. Siñonamiena jira, Jusiñamui iena jiaí uiñote. ²¹ Cai comecimo jeacino iñenia, Jusiñamuimo jaciruiñeno jñredicaí. ²² Naimie llogacinona cai ñnoia, naimie jitaillacinona cai finoia, naimiemo cai jicaca rafuena birui feiñoticaí. ²³ Naimie Jito Jesucristo cai ñnuana jitaide. Cristo llua isoi, coninina cai isiruillana jiaí jitaide. ²⁴ Naimie llogacinuaina cai ñnoia, naimiena nabaidicaí. Caina jiaí nabaide. Naimie Joreño caimo illamona, naimie caina nabaillana jai uiñoticaí.

Juan tainona llofuerainina llua rafue

4 Omoína isiruiticae. Naga llofueraima uaina ñnoñeno. Ailluena tainona llofueraini birui illa jira, Jusiñamuimona naimaci feiñooga uaina ñca naimacina facaci: ² “Jusiñamui ñnena Jesucristo billanona, ñmana jaide” naimaci lloia, Jusiñamuimona naimaci uaina otimaci; ³ ia “Jusiñamui ñnena Jesucristo biñede” naimaci lloia, Jusiñamuimona naimaci uaina oñedimaci.

Cristona abina caitadimie mona naimaci uaina otimaci. Naimie billena jai fididomoi. Comini comeciaina feidocana birui jaidimaci. ⁴ Ero, Jusiñamuimo jai cai duillamona, Jusiñamui caimo ite. Taino llofueraini dibeimo omoi jaiñena jira, naimaci llofuiana oñedomoi. Naie taino llofueraimimo Taife ite; ia Jusiñamui Taife baifemo faite. ⁵ Naie tainona llofueraini Jusiñamuina ñnoñedinomo duidimaci. Naimaci ecimo ite rafuena llofuecabitimaci. Jusiñamuina ñnoñedino naimaci llofuiana ebiritimaci. ⁶ Jusiñamuimo jai duidicai. Jusiñamuina ñnotino cai llofuiana cacaacadimaci; ia Jusiñamuina ñnoñedino cai llofuiana cacaaciñhedimaci. Iemona Jusiñamui uaina llofueraina uiñoticaí. Iemona tainona llofueraina jiai uiñoticaí.

Jusiñamui caina isiruilla rafue

⁷ Omoína isiruiticue. Coninina cai isiruilla. Jusiñamui caina isiruillamona, caina jiaínona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci. ⁸ Jusiñamuimo cai duillamona, caina jiaínona naimie isiruitaja jira, jiaínona isiruiñedimiedi Jusiñamui rafuena nia uiñofede. ⁹ Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticaí. Ie finoca rafuemonona Jusiñamui caina isiruillana jai uiñoticaí. ¹⁰ Jusiñamuina cai isiruillana ñaiñedicue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacina feitate. Iemona isiruillana raise uiñoticaí. ¹¹ Caina Jusiñamui isiruilla isoi, coninina cai isiruilla. ¹² Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uiñoticaí. Naimiena isiruicana jiai jaidicai. ¹³ Naimie Joreño caimo itatajamona, naimiena cai nabaillana uiñoticaí. Caina naimie nabaillana jiai uiñoticaí. ¹⁴ Bie rafuena jiai uiñoticaí. Jusiñamui ie Jitona eniruemo jaie oretate. Naimiena ñnoñedinona jilloitallena, naimiena oretate. Naimie Jitona ciodicai. Ie jira iena birui lloticaí. ¹⁵ “Jusiñamui Jitodi Jesús” llotimiedi Jusiñamuina nabaide. Jusiñamui naimiena jiai nabaide. ¹⁶ Ie jira Jusiñamui caina isiruillana uiñoticaí. Caina jiaínona naimie isiruitade. Iedo cai jaillamona, caina nabaide. Naimiena jiai nabaidicai. ¹⁷ Iemona Jusiñamuina isiruicana jaiticaí. Naimie uicomo ico nana cai ille facaise naimiena jaciruiñeiticaí. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñedicai. ¹⁸ Jusiñamuina cai isiruia, naimiena jaciruiñedicai. Eo raise naimiena cai isiruia, ¿niese naimiena jaciruiticaí? Naimiena cai jacirua, naimie caina duere finuana jaciruiticaí. Jusiñamuina jaciruitimiedi Jusiñamuina nia raise isiruiñede. ¹⁹ Nano Jusiñamui caina isiruilla jira, caidi naimiena isiruiticaí. ²⁰ “Jusiñamuina isiruiticue” raitimiedi jiaie creyentena enoia, jai taino lote. Creyentena cide; ia naimiena isiruiñede. Jusiñamuina cioñede. ¿Niese ie cioñenamiena isiruite? ²¹ Jusiñamui iena caimo jai lote: “Cuenta isiruitimie jiaie creyentena jiai isiruite”. Ie jira coninina isirui.

Taife ie rafuena anafefitaticai

⁵ Jusiñamuimona Jesús billana cai ñnoia, Jesús cai jilloitaramana cai ñnoia, Jusiñamui cominina jaidicai. Jusiñamuina cai isiruia, nana naimie cominina jiai isiruiticaí. ² Jusiñamuina cai raise isiruia, naimie llogacinuaina cai ñnoia, naimie cominina jiai isiruiticaí. ³ Jusiñamuina cai isiruia, naimie llogacinuaina jiai jai ñnoticaí. Naimie uai raise inuamona, iena finollena sefuiruiñedicai. ⁴ Jusiñamui dibeimo itinodi Taife ie rafuena anafefitaticai. Cristona cai inuamona, Taife ie rafuena anafefitaticai. ⁵ Jesúdi Jusiñamui Jitonana cai inuamona, Taife rafuena anafefitaticai.

Jesucristodi Jusiñamui Jito

⁶ Jesucristona dane ñaiticue. Naimiedi Jusiñamui Jitona ñnoticaí. Naimie bautizajamona, naimie fiodaillamona naimiedi Jusiñamui Jitonana uiñoticaí. ⁷ Ua-naicinona naimie uiñuamona, Jesucristo bautizaja facaise Jusiñamui Joreño caina iena jiai uiñotade. ⁸ Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uiñoticaí. ⁹ Jesús bautizaja facaise “Jesúdi cue Jito” Jusiñamui caimo lote. Jesúna comini lloia, iena feiñoticaí. Comini llua baifemo Jusiñamui llua faia jira, Jusiñamui llua jiai ua feiñoticaí. ¹⁰ Jesúdi Jusiñamui Jitonana cai inuamona, cai comeciái daje isoi lloide; ia Jusiñamui ie Jitona llua ñnoñedinodi: “Jusiñamui taino lote” raitimaci. ¹¹ Biena ñaiticue. Jusiñamui naimie diga caina jaca itataiacade. Naimie Jitona cai inuamona, iese caina jai itatate. ¹² Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca iñeitimaci.

Jusiñamui caina raise uiñote

¹³ Jusiñamui diga ico omoi jaca illena omoi raise uiñollena, bie cartana jai cueticue. ¹⁴ Jusiñamuina cai inuamona, naimiena jai jaciruiñedicai. Naimiemo cai jiaia, naimie jitailla isoide rafuena cai jicaia, naimie cainacaajana raise uiñoticaí. ¹⁵ Iese cai jiaia, naimie jaca fairuana jiai uiñoticaí. ¹⁶ Jiaie creyente jeacino finuana omoi cioia, naimie facaina Jusiñamuimo jia. Iemona Jusiñamui dibeimo naimiena dane itataitomoi. Jusiñamui rafuena jamaidimie facaina omoi jiaana lloñedicue. Naimie faificana jaiacade. ¹⁷ Jusiñamui llogacinona bu ñnoñenia, jeacino jai finode; ia naimie facaina omoi jiaia, Jusiñamui iena feitaite. Faificana jaiacadimie facaina omoi jiaana lloñedicue. ¹⁸ Jusiñamui comini jeacina finocana jaiñhedimaci. Naimemona Cristo caina eenote. Ie jira Taife caina duere finonide. ¹⁹ Jusiñamuimo jai duidicai. Naimie anamo jai iticaí; ia naimiena ñnoñedino Taife anamo jai itimaci. ²⁰ Jusiñamui Jito jaie eniruemo billana uiñoticaí. Iemona caina nanoca Jusiñamuina uiñotade. Naimiena cai inuamona, nanoca Jusiñamuimo jai duidicai. Jesucristomo jiai jai duidicai. Ie jira Jusiñamui diga ico jaca iiticaí. ²¹ Cue uruai isidomoi. Daje rafuena nia lloiticue. Jirarai-

mona abina rairui. Jusiñamui ieñede rafuedo omoi
jaiñeno. Mai. Juandicue.

2 JUAN

Uanaicinona coninina cai isiruilla

1 Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiamo cue uaina jiaí oredicue. Jusiñamui ona jai fetuamona, Cristo ie uanaicinona cue uiñua jira, omoína isiruiticue. Nana naie uanaicinona uiñotínodi omoína isiruitimaci. ² Naie uanaicinona cai uiñua jira, omoína isiruiticai. Iena uiñocana jaca jaiticai. ³ Cai Moo Jusiñamui ie Jito Jesucristo diga, caina jaca duenaite. Iaimaiaí caina jaca uri itataite. Uanaicinona cai uiñuamona, iaimaiaína cai isiruillamona, iese iiticaí.

⁴ Caimo cai Moo llua isoi, uanaicínodo o uruiamona dajerie jailla jira, iobidicue. ⁵ Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñoticaí. Coninina cai isiruillana ñaiticue. ⁶ Iena ñaiacadicue. Coninina cai isiruillanona, Jusiñamui llogacinona ñnocana jaidicaí. Cristona nano omoí ñnoia, Jusiñamui lluacinona cacadomoí. Coninina cai isiruillana cacadomoí.

Diga taino lloraini ite

⁷ Diga taino lloraini illa jira, iena ñaiticue. Jesucristo monamona jai billanona, ñimana jaiñenana llofue-

cabitimaci. Bu iese llofueia, cominina jifuate. Naimiedi Cristona abi caitadimie. ⁸ Cristo rafuedo omoí jailla jira, Jusiñamuimona buena omoí faifiñellena, omoí abina rairui. Jusiñamuimona ñbana feiñoitomoí. ⁹ Cristo llogacinona bu faínonocaia, Cristo rafuedo bu jaiñenia, Jusiñamuina ua uiñoñede; iadedi Cristo rafuedo bu jiaia, cai Moo Jusiñamuina uiñote. Ie Jitona jiaí uiñote. ¹⁰ O jofomo Cristo rafuedo jaiñedimie bia, Cristo rafuena cue llofuia isoi naimie llofueñenia, naimiena nafueñeno. “Jusiñamui ona canuamona, marena o jai” lloñeno. ¹¹ “Marena jai” o lloia, naimie marañede rafue facaina jai itio.

Rafuena nia lloiacade

¹² Diga rafue ite omoimo cuellena; iadedi aillue cartana cueñeiticue. Omoí dine raire cue illemo ocuridicue. Danomo cai rillamona ñaiticaí, cai comeциаí caimarecaillena. ¹³ O dine o euiño uruaídí imaci uaina oredimaci. Naiñaiñodi Jusiñamui fetocañaiño. Mai. Juandicue.

3 JUAN

Gayo mare rafue finocana jaide

1 Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uifua jira, ona isiruiticue. **2** Cue isiruigamiedio. Nana o fnua rafue marena jaillana jitaidicue. O ecairenana jiaí jitaidicue. O comei marena illana jai uifoticue. **3** Cue dine dajerie creyentiaí bite. Uanaicinodo omoi jaillana llote. Cristo rafuedo omoi jaillana llote. Ie jira iobidicue. **4** Uanaicinodo omoi jailla jira, eo iobidicue. Cue muidona Cristona omoi fnua jira, cue uruiaidomoi isoidomoi. Uanaicinodo omoi jailla jira, eo iobidicue. **5** Cue isiruigamiedio. Naga icaiño jiaie creyentiaina o canoia, eo mare. Nia o uifnoñega creyentiaí o illanomo ria, naimacina o canoia, ua eo mare. **6** Naie isoide creyentiaina o isiruillana jiaí fididicue. Rollena creyentiaí ofia, ona marena ñaitimaci. Naimaci jaillinomo naimaci jaia, naimacina o canoia, Jusiñamui jitailla isoi, ua eo mare. **7** Naimie rafue llua muidona, jai macaritimaci. Jusiñamuina uifnoñedinomona jaca buena feiñoñedimaci. **8** Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

Diótreres marañede

9 O dine ite creyentiaimo cartana jai oredicue. Diótreresna janore ñaiacadicue. Naimiedi eo uicoidimie. Naimiedi cue uaina uifnoiacañede. **10** O dine cue ria, naimie finoca rafuena omoimo lloiticue. Cuenajear ñaite. Jiaie illanomona bite creyentiaina feiñoiacañede. Naimaci feiñuana rairuide. Roracomo naimaci bia, naimacina jino dotade.

11 Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uifnoñede.

Demetrio marena ite

12 Nana creyentiaidi Demetriona marena ñaitimaci. Uanaicinodo naimie jaide. Iese naimiena jiaí ñaiticai. Cai lluacinodi uanaicinona uifnotio.

Rafuena nia lloiacade

13 Diga rafuena cueiacadicue; iadedi cueñeiticue. **14** Raire ona cue cioillemo ocuridicue. Ie mei ñaiticoco. **15** Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

JUDAS

Judadî Jusiñamui fetocanomo cartana orede

1 Cue nabaiñiaî, bie carta omoi dine oredicue. ¿Nie isoidomoi? Judadicue. Ie rafuena lollena, Jesucristo dibeimo jai maijdicue. Jacobo cue ama. Jusiñamui omoîna jai fetuana cue uiñuamona, bie cartana oredicue. Cai Moo Jusiñamui omoîna isiruite. Jeacinona omoi finoî raillano, Jesucristo omoîna jai sedade. ²Jusiñamui omoîna eo duenaillana omoi uiñocana omoi jaillana jitaîdicue. Naimie omoi comeciaina raise uri itatajana omoi uiñocana omoi jaillana jitaîdicue. Naimie omoîna eo isiruillana omoi uiñocana omoi jaillana jitaîdicue.

Tainocinona llofueraini ite

³Cue isiruigano, omoîmo Jusiñamui caina jai jillotaja rafuena iocire cueiacadicue; iadedî jiaie rafue birui illa jira, omoîmo cueticue. Jusiñamui mona cai feiñoga rafuena omoi eo riiduana jitaîdicue. Naie rafuena Cristo oretaganomona cacadicai. Naie rafuena meidonidicai. Ieconî duide. Jusiñamui jiaie rafuena lloñeite. ⁴Caimo ite rafuena omoi eo riiduana jitaîdicue. Cai creyentiaî motomo dajerie tainocinona llofueraini illa jira, iena jitaîdicue. Uanaicinona llofuecana naimaci illamo cai comeciaina facadicai; iadedî Jusiñamui jitaillacinona fñoñedimaci. “Jusiñamui caina duenaillamona, jeacino fñocana cai jaia, cai jeacinona oni dotaite” llofuecabitimaci. “Cai jeacino facaina caina duere fñoñeite” llofuecabitimaci. “Jeacino fñocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere fñoiticue” Jusiñamui jaielote. Naimie duere sefuillacino anamo jai itimaci.

⁵Iemona omoi raise fueollena, bie rafuemo omoi comeciaina faca. Bie rafuena navui llofueticai. Iena raise cacadomoi; iadedî iena dane uibiño. Iena lloiticue. Ero, bie eniruemo naimaci billena, Egip-tomona Jusiñamui cai jaiagaina bitatate. Naimiena naimaci ñnoñena jira, bie eniruemo riñedimaci; iadedî Jusiñamuidî jofue iñenanomo naimaci fiodaillena lloite. Iemona naimaci fiodaitimaci. Ie isoide. Naimiena birui omoi ñnoñena, omoîna duere fñoite. ⁶Ero, bie rafuemonona omoi fueua. Jusiñamui ecimo ite jaienisaimona dajerie imaci illanona jaie jitaîñedimaci. Naimie isoi iacadicimaci. Naimaci illano naimie ecimo jaie itimaci. Naimaci jitailla rafuena naimaci finollena, naimie ecimo illana fainonocaidimaci. Iemona naimie naimacina jai oni dotade. Naimie illanomo dane iñeitimaci.

Naimacimo ite uai jai iñede. Naimie riicaillafue anamo jai itimaci. Naimie dine nana comini illirui ia, naimacina duere fñoite. Naimacimona omoi fueua. Jeacinona Jusiñamui dibeimo itino finoia, Jusiñamui naimacina duere fñoite. ⁷Ero, bie rafuemonona omoi fueua. Sodoma railla nairaî micoriaî maraiñedicionona jaie eo finouidimaci. Gomorra railla nairaî micoriaî daje isoidimaci. Nainomo ianori ite nairaiaî daje isoidimaci. Naimaci aiñede riñoniaî diga itimaci. Naiñaiñuait iñede iñiaî diga itimaci. Coninina aifiedotimaci. Iemona Jusiñamui naimacina jaie duere fñode. Nana naimaci illanona raise jaie jobaitate. Naimacimona omoi fueua. Jusiñamui nana jeacinona finodinona duere fñoite.

⁸Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaina jeare ñaitimaci. ⁹Miguelna mameciredede jaienicî isoi iñedimaci. Miguel Jusiñamui nanoca jaienicî. Moisés micori fiodailla mei, Miguel Moisés micori abina raiacade. Taife diga Moisés micori abina uaitate. Taife Moisés micori abina bairoacade. Miguel iena jiaî jitaide. Miguel Taife diga riire ñaite; iadedî Taifena jeare ñaiñede. Miguel ie comecina facañede: “Cuemo ite uai Taifena oni oretallena”; iadedî naimiemo lloite: “Jusiñamui ona duere fñoite”. ¹⁰Naie taino llofueraini iese iñedimaci. Jusiñamui jaienisaina jeare ñaitimaci. Ocainiaî imaci comeciâ uiñuacinodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci. ¹¹Caînicî isoi naimaci illa jira, Jusiñamui naimacina duere fñoite. Jusiñamui jitailla rafuena Caînicî micori finoacaiñena jira, ie ama micori diga icirite. Icirillamona Caînicî micori ie ama micorina jaie meinete. Caînicî micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere fñoite. Balaam micori isoi naimaci illa jira, naimacina duere fñoite. Ucube ollena, Balaam micori uanaicinona jaie lloñede; iadedî cai juduaî cominina jeacinona fñotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere fñoite. Moisés micori uaina Coré micori ñnoñena jira, Jusiñamui naimie micorina meinete. Jusiñamui uaina naie taino llofueraini ñnoiacaiñena jira, jiaî faifitimaci. ¹²Dani omoi nabairillamona danomo omoi guia, naie taino llofueraini jiaî bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite

jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riarra isoidimaci. Llisilla facaise riarra llisiñenia, maraiñede. Riarra llisiñenia, iena oni aiñodicaí. Maraiñena jira, safenaite. Naimaci maraiñena jira, naie taino llofueraini jiaí safe-naitimaci. ¹³ Naie taino llofueraini jearede rana finocabidimaci. Eo bagode monailai isoidimaci. Monailai eo bagoia, monailai fuemo jearede rana oni ñaicosite. Ucuaina eruailamona naiona caí macarillana uiñoticai; iadedi ucudu ana feia, caí macarillana raise uiñofedicaí. Naie taino llofueraini ana fede ucudu isoidimaci. Comini unacina uiñotañedimaci. Naimaci llofuiacinomona Jusiñamui jitailla rafuedo caí raise jailana uiñofedicaí. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

¹⁴ Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: "Ero, caí Namadi ie ailluena jaienisaí diga biite, ¹⁵ nana naimiena ñinoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite" llote. ¹⁶ Naie taino llofuerainidi creyentiaina sedarainina uaitaside. Jusiñamuina jeare ñaíoidimaci. Dani naimaci jitailla rafuena finouidimaci. Eo abina biriuidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

Cristona ñnotinomo llucino

¹⁷ Cue isiruiga amatiaí, caí Nama Jesucristo ortagano jai llogacinona omoi comeci. ¹⁸ Raitimaci: "Jesu-

cristo nia abido biñena facaiseconi naimie uaina ñinoñedino jaca iitimaci. Naimaci jearede jitaillacinodo jaitimaci" raitimaci. ¹⁹ Naie taino llofueraini comini comeciá daje isoi lloillana itatañedimaci. Jusiñamui díbeimo iñede rafuena gaidimaci. Jusiñamui Joreño naimacimo iñede.

²⁰ Cue isiruigano, naimaci isoi omoi iñeno; iadedi Jusiñamui rafue ñnocana mai omoi jai. Naie rafuedi mare. Jusiñamui Joreño omoina canuacinodo Jusiñamuimo omoi jii. ²¹ Jusiñamui omoina isiruillacinona uiñocana omoi jai. Jusiñamui ecimo caí jaca illemo fe-cuise ocuri. Caína caí Nama Jesucristo duenailla jira, naimie ecimo jaca iiticaí. ²² Diga comini naie taino llofueraini rafuedo jaidimaci. Iemona dajerie Jusiñamui uaina raise nia ñinoñedimaci. Naimacimo llono: "Mai ñino. ²³ Dajerie cominina Jusiñamui duere sefuillacinomona jillote". Taino llofueraini rafuedo naimaci jailla jira, niadi faífitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruoicaida duenaí.

Jusiñamuimo iobillacinona caí fecacabillasa

²⁴ Jusiñamuidi omoina jeacinona finoñenana itatarede. Naimie uicomo omoina ico itataite. Omoina jeacinona omoi jaca finoñedena nainomo itataite. Nainomo iocire iitomoí. ²⁵ Jusiñamuidi jaca dajede. Caí facaina caí Nama Jesucristo fiodaillamona, caína caí jeacinomona jai jillotate. Jusiñamuimo iobillacinona caí fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaié jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.

APOCALIPSIS

Jesucristo ico suille rafue lluana cueticue

1 Jesucristona cueticue. Juandicue. Jesucristo facaina mañicabidicue. Ie dibeimo itinomo iena Jesucristo lollena, Jusiñamui naimiena bie rafuena uiñotade. Jiairuido ico ebena suille rafuena uiñotade. Cuen a iena uiñotallena, iena cuemo lollena, ie jaienici cue dine oretate. ²Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jiai jai cueticue. ³Bie ico suille rafuena ado facacabidinodi caimare iitimaci. Biena cacacabidino iena ñnuamona, caimare iitimaci. Bie rafue suillirui iairei illa jira, iemo raise cacarei.

Siete creyentiai illanuaimo bie carta oredicue

⁴Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaidicue. Iena omoi uiñollena, biena cueticue. Jusiñamui ie Joreño diga, Jesucristo diga, omoina duenaicabide. Omoina uri itatacabite. Iena omoi uiñocana mai omoi jai. Jusiñamui jaie jaca ite. Birui naimie jaca ite. Ico jaca iite. Ie Joreño naimie abimo illamona, omoina bie rafuena raise cacataite. Iena ñnotaite. ⁵Ie Moo uaina raise ñnuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodaiñena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade. ⁶Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaicue.

⁷Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaie meinete nairaidi naimiena cioitimaci. Duere sefuillana jacinaillamona nana comini eecuitimaci. Iese jaca suite.

⁸Cai Nama Jusiñamui cuemo llote: “Jaca bue nia iñena, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iticue. Siño jitudicue”.

Juan Cristona ciode

⁹Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iitica. Naimie cai comeciaina ocuiñotajamona iemo birui ocuiridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uasimo birui iticue. Cárcelmo illa isoi duere sefuillena, illaicomini bene cuena birui oredimaci. ¹⁰Jusiñamuina cue sedajamona, naimie Joreño cuena namatajamona, inñenamona nicañrilla isoi cue jinafo dine damie ado lluana cacadicue. Trompeta isoi ie uaidi ficirede. ¹¹Cuemo llote:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfi-amo, Laodiceamo. Diese illanuaimo oreta —llote.

¹²Cuemo llotimiena cue cioillena, jinafo dine erodaticue. Siete oromona finoca lamparñiai ciodicue. Naga lamparñi ie oromona finoca rairacomo raide.

¹³Naie lamparñiai motomo ñmana eruaidimiena ciodicue. Naimiedi Cristo. Areroina jitate. Oromona finoca cinturóna jitate. ¹⁴Naimie ifotirai userede ñiroi isoi eo userede. Naimie uisi irai boa isoi eruaide.

¹⁵Naimie eillidi bronze eo dua isoi quenirede. Naimie uai aillue ille tua isoi eo ficirede. ¹⁶Ie nabeillimo siete ucuduna llide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiñua isoi.

¹⁷Naimiena cue ciuamona, naimie uicomo fiodaitimie isoi ana uaidicue; iadedi ie nabeill digu cuena jetajamona raite:

—Cuen a jaciruiñeno. Siño jitona cue illamona, jaie jaca iticue. Ico jaca iticue. ¹⁸Jaie fiodaiticue; iadedi naiemona jaie jillodicue. Jaca iticue. Dane fiodaiñeiticue. Cue uai siñona jira, comini fiodailliruina lloticue. Cuen a ñnoñedino fiodailla mei, naimiaci joreñuai illinona jiai lloticue. ¹⁹O como ciua rafuena cueno. Omo cue ja llolle rafuena cueno. O ciolle rafuena jiai cueno. ²⁰Ailluena rafue omo lloticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofuerañi isoide. Bie siete lamparñiaidi bie siete illanomo ite creyentiai isoide. Bie creyentiaina ja ñaiacadicue —raite.

Cristo Efesomo ite creyentiaïmo lloga rafue

2 Cristo cuemo llote:

—Efesomo ite creyentiaïmo lllollena, nainomo ite llofueraïmamo cue lluana cueno: “Cue nabeillimo siete ucuduai ite. Siete oromona finoca lamariniaï motomo iticue. Omoïna ñaiticue. Omoï llofueraïma cue anamo ite. Omoï motomo cue illamona, cuena nabaidomoï. ² Omoï motomo cue illa jira, omoï illana raise uiñoticue. Omoï comeciaï ocuiñocana icirifeno itomoï. Maraiñedicinona finoraini diga nabairiñedomoï. Omoï motomo damierie ‘Cristo oretagacaï’ raitinona facacia-mona, naimaci tainona llorainina uiñotomoï. ³ Omoï comeciaï ocuiñocana jaicabidomoï. Cue muidona duere sefuidomoï; iadedi iena sefuiruiñedomoï. Cuena ñnocana nia jaidomoï. ⁴ Iese itomoï; iadedi omoï abi rafue cuemona birui janore ite. Creyentiaïna omoï nano jailla facaise cuena eo isiruitomoï; iadedi birui iese cuena isiruiñedomoï. ⁵ Iemo omoï comeciaïna faca. Cue dibeïmo dane raise i. Cuena omoï nano isiruilla facaiseconi omoï illa isoi, cue jitaillacinona birui omoï fino. Cue dibeïmo omoï comeciaï dane raise iñenia, omoïna duere finoiticue. Iemona omoï lamparín oni uiticue. Omoï creyentiaïna ñaiticue. Cue dibeïmo raise omoï iñenia, jiaïruido omoï illanomo creyentiaï iñeïtimaci. ⁶ Omoïna marecinona jiaï lloiticue. Nicolaítas rail-la comini finoca rafuena gaiñedomoï. Iena jiaï gaiñedicue. Eo maraiñede rafuena finocana jaidimaci. ⁷ Jusiñamui Joreñomona cue lloga rafue ite, omoï creyentiaï iena. Bie rafue bu cacajia, iena jiaï ñnua. Cuena raise ñnotinomo Jusiñamui illanomo ite riarana iiticue. Ie lllillemona jaca iitimaci” cueno.

Cristo Esmirnamo ite creyentiaïmo lloga rafue

⁸ Cristo cuemo llote:

—Esmirnamo ite creyentiaïmo lllollena, nainomo ite llofueraïmamo cue lluana cueno: “Jaie jaca iticue. Eniruemo jaie cue ia, fiodaiticue; iadedi naiemona jai jillodicue. Jaca iiticue. ⁹ Cue cominina omoï illa jira, duere sefuidomoï. Omoï duerenana uiñoticue. Benomo dueredomoï; iadedi Jusiñamui mona duenidomoï. Naimie dine ico omoï ia, buerenitomoï. Damierie omoïna jeare ñaiana uiñoticue. Naimacidi judíuai comini; iadedi cue dibeïmo iñedimaci. Taife anamo itimaci. ¹⁰ Ico omoï duere sefuiua, jaciruiñeno. Taife cárcelmo omoïmona damieriena itataite. Abido danomo omoï jaillena, iese omoïna duere finoite. Diez digarui duere sefuitomoï. Omoï ille dinori cuena ñnocana omoï jai. Duere sefuillamona bu fiodaia, cue diga jaca iite. ¹¹ Jusiñamui Joreñomona cue lloga rafue ite, omoï creyentiaï iena. Bie rafue bu cacajia, iena jiaï ñnua. Jusiñamuidi cuena raise ñnotinona naimaci jeacino facaina ibana oñeite. Iraimo faifiñeïtimaci; ia Jusiñamui dine jaca iitimaci” cueno.

Cristo Pérgamomo ite creyentiaïmo lloga rafue

¹² Cristo cuemo llote:

—Pérgamomo ite creyentiaïmo lllollena, nainomo ite llofueraïmamo cue lluana cueno: “Nagafebei eo jairede lloebi cuemo ite. ¹³ Omoï illana uiñoticue. Taife anamo itino motomo itomoï; iadedi cuena ñnocana nia jaidomoï. Omoïmona Antipas micorina navui meinetimaci. Naimie micoridi cue rafuena raise llofueuide. Naie facaise cuena fainonocaiñedomoï; ¹⁴ iadedi cuemona janore rafue omoï diga birui ite. Omoïmona damieredi Balaam micori llofuiacinodo jaidimaci. Balaam micori Balac micorimo jaie llua jira, omoï jaiagai jeacino finodimaci. Balac cominimo omoï jaiagai diga nabairillena llote. Ie jira omoï jaiagai jiraraimo fecaca guillena naimaci diga guitimaci. Iemei naimacimona ainiaïna otimaci. Jusiñamuina ñnoñedinomona ainiaïna otimaci. Naiemona jearede rafue comuide. Omoïmona birui damierie iese isoidimaci. Cuena ñnoñedinomona ainiaïna otimaci. ¹⁵ Omoïmona damierie nicolaítas rail-la llofuiacinodo jiaï jaidimaci. Naimaci llofuiacinodi uanaiñedicino. ¹⁶ Naie llofuiacinomona eneno mai omoï i. Iedo jaiñeno. Naie llofuiacinodo jaidinomo: ‘Omoï comeciaï iuai dane meido’ llono. Iena naimaci finoñenia, cue dibeïmo naimaci raise iacaiñenia, cuemo ite lloebi diga cuena ñnoñedinona duere finoiticue. ¹⁷ Jusiñamui Joreñomona cue lloga rafue ite, omoï creyentiaï iena. Bie rafue bu cacajia, iena jiaï ñnua. Judíuai jaiagaimo maná railla guille cue illa isoi, cuena raise ñnotinomo monamo jai ite maná isoi iiticue. Bi-ena ñaiticue. Imaci comeciaïna ocuiñotajacinona iiticue. Cue cominina naimaci illamona, naimacimo userede nofinina jiaï iiticue. Nainomo mameci ite. Dani naina feiñotino naie mamecina uiñoitimaci” cueno.

Cristo Tiatiramo ite creyentiaïmo lloga rafue

¹⁸ Cristo cuemo llote:

—Tiatiramo ite creyentiaïmo lllollena, nainomo ite llofueraïmamo cue lluana cueno: “Jusiñamui Jitona cue illanona, bie rafue omoïmo lloiacadicue. Cue uisi irai isoi boode. Cue eilli bronze eo dua isoi quenirede. ¹⁹ Omoï finoca rafuena uiñoticue. Jusiñamuina omoï isiruillana uiñoticue. Jiaie cominina omoï isiruillana uiñoticue. Cuena omoï ñnuana uiñoticue. Jiaie creyentiaïna omoï canocabillana uiñoticue. Duere sefuidomoï; iadedi omoï comeciaï ocuiñuana uiñoticue. Navui iese icana jaidomoï. Birui bai lliai jaidomoï; ²⁰ iadedi cuemo omoï diga rafue ite. Omoï motomo maraiñede riño ite. Jezabelna ñaiticue. Naiñaiñona omoï oni dotañena jira, cuemo omoï diga rafue ite. ‘Jusiñamui rafuena jino llua uai cuemo ite’ naiñaiño llote. Uanaiñedicinona llofuecabilla jira, omoïmona damieriena jifuate. Jearede rafuena llofuecabite. Omoï aiñede riño diga illana llofuate. Omoï iniñede iima diga illana llofuate. Jiraraimo fecaca guille guillena llofuate. Iena guilla jira, omoïmona damierie naie jiraraina sedade. Iese naiñaiño llofuecabite. ²¹ Naiñaiño comeci iuai meidollena are sedadicue; iadedi naiñaiño naie jearede rafuena fainonocaiacaiñede. ²² Naiñaiño duere sefuillena, naiñaiñona duitaiticue. Naimaci comeciaï iuai naimaci meidoñenia, naiñaiño llofuiacinodo jaidinona

jiaí eo duere finoiticue. ²³ Naiñaiño díbeimo itinona meineiticue. Nana creyentiaídi nana cominí comeciaí iuaillaína cue uiñuana jiaí uiñoitímací. Nana cominí comeciaí facajacinona cue uiñuana jiaí uiñoitímací. Ie jira omoí finolle rafue díese cuemona duere sefuitomoi. ²⁴ Jezabel llofuaiacinodo jaiñedínomo ja lloiticue. Taife come uiñoñega rafuena uiñote. Iena nia uiñoñedomoi. Omoímo jiaíe rafuena lloñeiticue; ²⁵ iadedí cue nia abido biñenia, cuemona omoí uiñoga rafuena ñnocana mai jai. ²⁶ Cue Moomona cue uaina feiñoticue. Cuen a raise ñnuamona, abido cue bia, cue jitaillacinona finocabidínomo cue uaina iiticue. Naie facaise cue uai díga cue anamo ite nairaiaína raise sedaitímací. ²⁷ Naimacina riire raise sedaitímací, cue jitailla rafue naimací finollena. Iena naimací finoñenia, naimacina duere finoitímací, lloedosi díga, nogo eo llailla isoi. ²⁸ Cuen a ñnotinomo monairaí cuduna jiaí iiticue. ²⁹ Jusiñamui Joreñomona cue lloga rafue ite, omoí creyentiaí iena. Bie rafue bu cacajia, iena jiaí ñnua” cueno.

Cristo Sardimo ite creyentiaímo lloga rafue

3 Cristo cuemo llote:

—Sardimo ite creyentiaímo llollena, nainomo ite llofueraímamo cue lluaña cueno: “Jusiñamui Joreño cuemo ite. Naimie Joreño omoína canocabide. Omoína sedacabide. Siete ucuduái cuemo jiaí ite. Omoí llofueraímama ñaitícue. Omoí finoca rafuena uiñoticue. ‘Cristona raise ñnoticaí’ raitomoi; iadedí omoí comeciaímona raise iñedomoi. ² Cue díbeimo raise dane i. Cuen a dane raise ñnocana jai. Cuen a jai faínonocaiacadomoi. Jusiñamui omoí finoca rafueri iobiñede. ³ Cue rafuena jaie cacajamona, iena ñnotomoi. Iedo dane jai. Omoí comeciaí iuaina dane meido. Cue díbeimo dane raise omoí iacaiñenia, fiñraíma bainino billa isoi, omoína duere finollena, ebena biitícue. Omoí díne cue billíruina uiñoñeitomoi. ⁴ Omoímona damierie jearede rafuena finocana jaiñedímací. Jusiñamui mona naimací comeciaí marena jira, cue díne naimací illena, userede ñniraina jitaítímací. ⁵ Cuen a ñnocana jaidínodi userede ñniraina jitaítímací. Cuemo ite rabenicomona naimací mameciaína doñeiticue. Cue illanomo jaca iitímací. ‘Naimacídí cue cominí’ cue Moomo lloiticue. Naimie jaíenisaimo iena jiaí lloiticue. ⁶ Jusiñamui Joreñomona cue lloga rafue ite, omoí creyentiaí iena. Bie rafue bu cacajia, iena jiaí ñnua” cueno.

Cristo Filadelfiamo ite creyentiaímo lloga rafue

⁷ Cristo cuemo llote:

—Filadelfiamo ite creyentiaíma llollena, nainomo ite llofueraímamo cue lluaña cueno: “Mareuidimiedícue. Uanaicinona jaca llotícue. David micorí jitona cue illamona, illaimana cue illa jira, siño uai cuemo ite. Ie muidona cue jitailla díese cominína feiñoticue. Jusiñamui illanomo naimací illena, naimacina feiñoticue. Cue jitailla díese cominína feiñoñedicue. ⁸ Omoí finoca ra-

fuena uiñoticue. Omoína cue canua jira, jaca buna cue rafuena omoí lluaña itatanide. Jamaí bue isoidomoi; iadedí cue rafuena ñnocana jaidomoi. Cuen a janoñedomoi. ⁹ Omoí díne damierie Taife anamo itímací. Naimacídí judíuai; iadedí cue díbeimo iñedímací. Tainona llocabítímací. Ero, omoí díne naimacina cue bitatajamona, omoína cue isiruillana uiñoitímací. Cue díbeimo naimací jailla mei, cuemo iobillacinona fecaitímací. ¹⁰ Nana cuena ñnoñedinona ico eo duere finoiticue. Iemona cuena naimací ñnoñenana uiñoticue. Omoí duere sefuiñellena, naie facaisemona omoína jillotaitícue. ¹¹ Eniruemo ebena abido biitícue. Cuemona ibana omoí feiñoñeni raillano, cue díbeimo ñnocana omoí jai. Cue díbeimo raise omoí jaíñenia, cuemona jiaímie omoí facaina ibana feiñoite. ¹² Cuen a raise ñnotino comeciaína ocuiñotaitícue. Cue illanomo jaca iitímací. Cuemo naimací duilla jira, cue jiaíe mamecina naimací abimo cueitícue. Jusiñamui mamecina naimací abimo cueitícue. Jusiñamui illano mamecina naimací abimo cueitícue. Naimie illanodi comue Jerusaléna mameciredede. Naimiemona, monamona ico ana biite. ¹³ Jusiñamui Joreñomona cue lloga rafue ite, omoí creyentiaí iena. Bie rafue bu cacajia, iena jiaí ñnua” cueno.

Cristo Laodiceamo ite creyentiaímo lloga rafue

¹⁴ Cristo cuemo llote:

—Laodiceamo ite creyentiaímo llollena, nainomo ite llofueraímamo cue lluaña cueno: “Siño Jitodícue. Cue lloga uaina jaca finocabidícue. Uanaicinona jaca llocabítícue. Cue uaido Jusiñamui nana finode. Nana comuitate. ¹⁵ Omoí finoca rafuena uiñoticue. Cue rafuedo jaillana nia faínonocaiñedomoi; ia cue rafuedo eo raise jaiñedomoi. Janore ñnocana jaidomoi. ¹⁶ Omoí finoca rafuena cue gaiñena jira, cuemona omoína oni dotaitícue. ¹⁷ ‘Ucuberedicaí’ raitomoi. ‘Raruiaíredicaí. Nana caí jitailla ra caímo ite’ raitomoi. Cuemona iese iñedomoi. Cuemona dueredomoi; ia iena uiñoñedomoi. Cuemona caímare iñedomoi. Cuen a omoí raise ñnoñena jira, uisínidíno isoidomoi. Taimiedomoi isoidomoi. ¹⁸ Ie jira omoína dajerie rafuena llofueitícue. Cuemona omoí eo duerena jira, omoí comeciaí raise iñena jira, omoímo fiebidicinona cuemo jica. Cuemona ono. Omoí duenillena, cuemona eo mare oro isoide rana ono. Omoí taimieñelle isoíñellena, cuemona omoí meiruiñellena, userede ñnirói isoide ra cuemona ono. Omoí uisína cioille isoillena, cuemona manue ono. Omoí comeciaína ñaitícue. Cuen a raise omoí ñnoia, buena omoí comeciaímo fiebiñeite. ¹⁹ Cue isiruigano cue díbeimo raise illena, naimacímome riire llocabítícue. Cue uaina naimací ñnollena, naimacina jiaí duere finocabidícue. Ie jira cue díbeimo raise omoí i. Jeacino omoímo ia, iena faínonocai. ²⁰ Ero, nase tutícue isoidícue. Bu cuena cacajia, cue fo billena cuena uaidoia, nasena bu econoia, fo jaitícue. Naimiena nabailanona, naimie díga guitícue. Omoí comeciaína ñaitícue. Cue rafuena omoí cacaja mei, iena omoí ñnoia, cuena feiñoitomoi. Iemona coniní nabaiticaí.

²¹ Eniruemmo cue Moo jitailla rafuena jaie cue fuidua mei, naimie ecimo abido jai iticue. Cueri naimie iobillamona, illaimana cue illamona, naimie ecimo jai iticue. Ie isoide. Cuen a raise inotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue. ²² Jusiñamui Joreñomona cue lloga rafue ite, omoi creyentiai iena. Bie rafuena bu cacajia, iena jiai inua” cueno.

Juan Jusiñamui illanomo ciua rafue

4 Dallu illanona monamo cue eruaia, jiaie rafuena ciodicue. Nainomo Jusiñamui illanomo econoga nasena ciodicue. Ailli cue diga ñaitimiedi cuena uaidote. Naimie uai trompeta isoi ficirede. Llote:
—Monamo bi. Jiairuido suille rafuena omo acataiticue.

² Jusiñamui Joreño anamo cue illamona, nicairilla isoi Jusiñamui illanona ciodicue. Nainomo naimie ana rail-lana ciodicue. ³ Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciode. Cornalina railla noficina eruaide. Cornalina jiairede. Naie illano ecimo ameona ciodicue. Aмео mocorena jira, esmeralde railla noficina eruaide. ⁴ Naie illano ecimo veinticuatro rairabici jiai ite. Nainomo userede iniroina jitanonona veinticuatro einamací ana raidimaci. Naimaci ifogimo oromona finoca nuicirai ite. ⁵ Jusiñamui illanomona boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode. ⁶ Jusiñamui illano uicomo vidriona eruaide joraina ciodicue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite. ⁷ Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide. ⁸ Nagamiiaimo seis iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotimaci:

Mare, mare, mare.

Cai siño Nama Jusiñamuidi eo mareuidimie. Jaie jaca ite. Birui ite. Ico jaca iite.

⁹ Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia, ¹⁰ naie veinticuatro einamací Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona, ¹¹ rotimaci:

Cai Nama Jusiñamui, ona eo iobitaiacadicaí.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidicaí.

Juan Jusiñamui illanomo ferinoga rabe illana ciode

5 Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo

cuega rafue jai ite. Siete nitaca ra illamona, naie rabe raise ibaibide. ² Jusiñamui ie nanoca jaienici ado llua cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

³ Monamo itinomona, enirue itinomona, jai fioidaitinomona, bummo ie uai iñede, naie rabe oni econollena. Naie rabe facanidimaci. ⁴ Jaca bummo naie uai iñena jira, eo eedicue. ⁵ Naie facaise naie veinticuatro einamacimona damie cuemo llote:

—Mai eeño. Judá nairai ie Leónna mameciredimiedi iena econorede. Naimiedi David micori comini imie. Ie dibeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

⁶ Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreña jai orede. ⁷ Naie facaise Jusiñamui ie nabellimona naie rabena ote. ⁸ Iena naimie ua mei, naie cuatro cajedino, naie veinticuatro einamací diga, naimiema sedallena, naimie uicomo ana bitadatimaci. Nagamiemo guitarana eruaide arpa ite. Nagamiemo oromona finoca copa ite. Naga copamo camare soride ra boode. Naie radi Jusiñamuimo comini jiacino mamecido ite. ⁹ Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fiodailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

¹⁰ Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jiairuido eniruemmo ite cominina sedaitimaci.

Ie jira naie rabena oni suiñoredio.

¹¹ Iemei dane eruaillamona, naimie ecimo eo ailluena Jusiñamui jaienisaia ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide. ¹² Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiema eo abina uifotajamona, naimiema jiai iobitaiacadicaí.

Naimiema cai inuanona, naimiemo iobillacinona fecacacacicaí.

¹³ Iie facaise nana comini, nana Jusiñamui comuitaga ra diga, llua cacadicue. Monamo itino, enirue itino,

jai fioidaitino, monaillaimo itino lluana cacadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca fecacadicai. Caina jaca sedallesa.

¹⁴ Naie cuatro cajedino raitimaci:

—Ie isoi jiaí lloiacadicaí.

Ie facaise naie Llauda isoidimiena sedallena, naie veinticuatro einamací ana bitadatimaci.

Juan siete nitaca ra oni suiñuana ciode

6 Toica Llauda isoidimie iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi guraa uai isoi lluana cacadicue. Naimie llote:

—Mai bi.

² Naimie llua mei, userede caballo billana ciodicue. Caballo emodo itimiemo sicuira ite. Illaimana jira, naimie ifogimo nuicirai jide. Ie bacauai anafefitallena, oni jaide.

³ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁴ Naimie llua mei, jiairede caballo billana ciodicue. Caballo emodo itimiemo are lloebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

⁵ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitrede caballo billana ciodicue. Aime guille facaise illa jira, caballo emodo itimie onollimo ra facaradi ite. ⁶ Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui majjia ua ucube diese raifide. Iemona llomenicono finoia, dacaiño guille raifi ite. Tres kilos cebada ie core darui majjia ua ucube diese raifide. Iena damie oia, iemona llomenicono finoia, dacaiño amani guille raifi ite. Illimo riará nia ite; ia iena ñballena ucube baiñede. Ie muidona aime guitimaci —llote.

⁷ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁸ Naimie llua mei, lliái usereoides caballona ciodicue. Ie emodo itimie mamecidi Fiodaitadimie. Jusiñamui uai naimiemo illa jira, naimie jailla mei, ailluena fioidaitino itimaci. Jobairillemona, aime guillemona, duicomona, riirede ocainaiñomona fioidaitimaci. Atuedo meinetasiñeite; iadedi eo ailluena meinetasiite. Riaí uaimona ie cuarta facaina comini fioidaitimaci.

⁹ Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicaí” naimaci llua jira, Jusiña-

muina ñnoñedino naimacina meinetimaci. Jai fioidaillamona naimaci joreñuái Jusiñamui illanomo jai itimaci.

¹⁰ Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Niruido caina meinetinona duere fñoitio? ¿Niruido ibana oitio?

¹¹ Jusiñamui cominina illamona, naimacimo Jusiñamuidi userede areroína jitallena fecade. Llote:

—Janore jisa seda. ñbana nia oñeiticue. Cue ñbeimo omo majjia isoi, cue cominina nia meineitimaci. Naimacina meinia mei, ñbana oiticue.

¹² Iemei Llauda isoidimie jiaie nitaca ra oni suiñuana ciodicue. Suiñuanona, aillue ñuisaño suide. Jitoma eo jitreñeficaide. Fivuidi ñruena eruaide. Jiairede. ¹³ Riirede aifi riará ana llutaja isoi, monamona eniruemo ucuaí llude. ¹⁴ Ferinoga rabe oni uilla isoi, mona iñebicaide. Naga anedu, naga uiasi ñiga jiaí oni jaide. ¹⁵ Ie jira illaí comini, jamai bue isoiñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci.

¹⁶ Anedumo llotimaci. Noficimo llotimaci:

—Caina ñballena, cai emodomo ana uai. Jusiñamui riicaillafuemono caina reirita. Llauda isoidimie riicaillafuemono caina reirita. ¹⁷ Iaimaiaí riicaillarui jai ite. Naiemona buna jillobinide —llotimaci.

Juan ailluena Israel comini Jusiñamui sello ñiga nitajana ciode

7 Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiaí beicimo itiaimaaiaí. Aifi biñellena itimaci. Ie muidona monaillai ñne aifi iñede. Aifi iñena jira, amenaiaí nirairiñede. Eniruena monaillai ñiga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaímo ado llote:

³ —Eniruena aifi ñiga maraiñeno nia finoñeno. Mon-aillaina maraiñeno nia finoñeno. Amenaiaína maraiñeno nia finoñeno. Jusiñamui ñbeimo itino uiecuai itofiaí sello ñiga nia cai nitañenia, eniruena maraiñeno finoñeno.

⁴ Ailluena comini sello ñiga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci. ⁵ Judá micori cominimona doce mil ite. Rubén micori cominimona doce mil ite. Gad micori cominimona doce mil ite. ⁶ Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite. ⁷ Simeón micori cominimona doce mil ite. Leví micori cominimona doce mil ite. Isacar micori cominimona doce mil ite. ⁸ Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

Juan ailluena comini userede iniroina jitajana ciode

⁹ Naie facaise ailluena cominina ciodicue. Ailluena jira, naimacina facadonicue. Naga nairaiaimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite. ¹⁰ Ado llotimaci:

Bie Llauda isoidimie jaie fiodaillamona, cai jeacinomona Jusiñamui caina jai jillotate.

¹¹ Naie facaise nana Jusiñamui jaienisaí naimie ecimo naidaillana ciodicue. Naie veinticuatro einamací ecimo, naie cuatro cajedino ecimo jiaí naidaidimaci. Naie facaise Jusiñamui uicomo ana bitadajanona, naimiena sedadimaci. ¹² Raitimaci:

Bie comini isoi omo iobillacinona jiaí fecaacadicaí.

Odi mareuidimiedio. Abina eo uiñotio. Odi jaca siño jitodio.

Ie jira iese lloticaí.

Ona jaca cai iobitajasa.

¹³ Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

¹⁴ Uai oticue:

—Uiñohedícue. Cuemo llono.

Naimie uai ote:

—Bimacidi eo duere sefuilla facaise Jusiñamuina ñnohedino meinegano. Naimaci iniroina jai jocatorimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiaí ñaiticue. Llauda isoidimie fiodailla jira, naimaci comeciái jai jeanide.

¹⁵ Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite. ¹⁶ Dane duere sefuiñeitimaci. Nana naimaci jitailla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. ¹⁷ Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eeñeitimaci. Dane sunaiñeitimaci.

Juan Llauda isoidimie iraié nitaca ra oni suiñuana ciode

8 Toica Llauda isoidimie iraié nitaca ra oni suiñuana, media hora monamo tii raíñoicaide.

² Iemei siete Jusiñamui jaienici naimie uicomo illana ciodicue. Nagamiemo daje trompetana fecade. ³ Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodí oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina ñnotino jiacino Jusiñamuimo jaide. ⁴ Jobaillam-

ona Jusiñamui uicomo a jaide. Nana Jusiñamuimo jiacino diga a jaide. ⁵ Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶ Iemei naie siete jaienici naimaci trompetas fillana llinote. ⁷ Damie ie trompetana fite. Filla jira, monamona janorede hielo, boode ra diga, dirue diga, eniruemo uaide. Atuedo enirue boofede; ia ailluena boode. Riaí uaimona ie tercera facaina boode. Nainomo nana amenaiaí boode. Nainomo nana raiticño boode.

⁸ Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. ⁹ Iemona monaillai diruena jaide. Atuedo iese jaiñede; ia ailluena iese jaide. Riaí uaimona ie tercera facaina diruena jaide. Ie muidona ie tercera facaina lliciaí fiodaite. Nainomo ite botemona ie tercera facaina jiaí anabaite.

¹⁰ Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniaí, ie tercera facaina jorainiaí diga erifecaide. ¹¹ Ie muidona naie ucudu Ajenjona mameciredo. Riaí uai oni dobaiñuamona “Eriredimie”. Iemona jinui erifecaide. Iena jiruamona, ailluena comini fiodaítimaci.

¹² Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

¹³ Iemei jaienici ado cuirioillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

9 Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. ² Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitirefecaide. ³ Uilliemona fioduaina eruaillanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci. ⁴ Raiticño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci. ⁵ Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite. ⁶ Iese ico suaia, eo duere comini sefuilla jira, fiodaillana jitaitimaci. Naimaci abina meineacanitimaci. Fiodaicanititimaci; ia fiodaínititimaci.

⁷ Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci.

⁸ Naimaci ifotie arena illanona, riño ifotiena eruaide. Naimaci isiduai leones isiduaina eruaide. ⁹ Naimaci abiaimo ico isoi ra ite. Lloemona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci.

¹⁰ Naimaci omacai acaido isoide. Naie diga maillanona, cinco fivui cominina duere finoitimaci. ¹¹ Naimaci illaimadi naie ana ifona sedadimie. Judíuai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodimie. ¹² Daje duere sefuilla rafue jai fuite. Mena nia suiñede.

¹³ Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fueo cuatro maiga jaienicina suiño —llote. ¹⁵ Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riaí uaimona ie tercera facaina meinetimaci. ¹⁷ Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocrede. Daje facaise borarede. Caballos ifogiai leones ifogiaina eruaide. Naimaci fue-mona boode radi, uillie diga, azufre boa isoi jino bite. ¹⁸ Naimaci fue-mona bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

²⁰ Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, bronce-mona, noficimona, amenamona finoca jiraraiaina nia sedaacadimaci. Naie isoide radi cajeñena jira, jaca cioiñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena seda-cabidimaci. ²¹ Conini meinecabitimaci. Aimaniai dine jaicabidimaci. Naimaci aiñede riño, naimaci iniñede iima diga icabitimaci. Rana fiicabidimaci. Jeacinona finocana nia jaidimaci.

Juan Jusiñamui jaienici, econoga rabenico diga, billana cide

10 Ie facaise Jusiñamui illanomona eniruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide. ² Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide. ³ León eo irilla isoi, ado llote. Naie facaise siete gurua ñaia isodino uai cacadicue. ⁴ Naimaci lluana cacaja mei, iena cueiacadicue; iadedi monamona damie cuemo llote:

—Naie lluana lloñeno. Iena cueñeno.

⁵ Naie jaienici ie nabei onolli mona dine ñuitajanona, ⁶ Jusiñamui llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monaillai nainomo ite ra diga jiai finodio. Cue baifemo o faia jira, uanaicinona cue lluana uiñotio. O lloga uaina jaca suite. ⁷ Iraie jaienici ie trompeta ja fiite. Filla mei, bie facaise Jusiñamui ie facaina lloraini micoriaimo jaie lloga rafue suite. Comini naie rafue jaie raise cacaiñedimaci; ia iena ja raise cacaitimaci —llote.

⁸ Monamona cuemo ailli llotimie dane llote:

—Jaienici onollimo econoga ite rabenicono llinaui.

⁹ Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Ciifo isoi o fueo iena cacaitio; iadedi o jebemo erirede ra isoi iena cacaitio.

¹⁰ Llinua mei, iena guiticue. Ciifo isoi naimerede rana cacadicue; ia guilla mei, erirede ra isoi cue jebemo ite.

¹¹ Cuemo dane llote:

—Omo cue llole rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

Juan menamie Jusiñamui rafuena lluana cacade

11 Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca. ² Cue jofo eci-mo ite taibirina facañeno. Naie illano judíuaiñedinomo jainaiaide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. ³ Naie facaise menamiemo cue uaina iiticue. Iaimaiaí cue llole rafuena daje amani años abimo atomonado lloitiaiamaiaí. Comini comeci iuai meiduana iaimaiaí jitailla jira, sunaillamona, ebinide iniroina jitaitiaiamaiaí —llote.

⁴ Iaimaiaí mena olivos railla riara mamecido itiaiaiaiaí. Enirue Namana Jusiñamui illanona, naimie uicomo mena ite lamparín ie rairaco mamecido itiaiaiaiaí.

⁵ Iaimaiaina duere bu finoacania, naimiena meineitiaiamaiaí. Iaimaiaí fue-mona boode ra billanona, naimiena meinetaiamaiaí Iaimaiaina duere finodino iese fiodaitimaci. ⁶ Iaimaiaí Jusiñamui rafue llole facaiseconi noci deitañellena, iaimaiaimo Jusiñamui uai iite. Jinui diruena jaitallena iaimaiaimo uai iite. Iaimaiaí jitaicabilla facaise, diga isoide rafue finuamona cominina duere finoitiaiamaiaí; ⁷ iadedi Jusiñamui rafue iaimaiaí llua mei, eo ana ite ifomona ocainana eruaillanona, Taife jino biite. Jino billanona, iaimaiaí diga fuirite. Iaimaiaina anafefitaja mei, iaimaiaina meineite. ⁸ Raiafomo joneñeitimaci; iadedi iaimaiaí abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitaifena jira, Sodoma jaie ite nairai isoidimaci. Egipto jaie ite nairai jiai isoidimaci. Jerusalémo Jesúsna jaie jiai meinetimaci. ⁹ Raiafomo ia-

maiaj joniana rairuitimaci. Darui amani abi atomonado ailluena comini, naga nairaiaimona iaiaiaia jibuisabitimaci. ¹⁰ Nana eniruemo ite comini iaiaiaia fiodaillari iobitimaci. Iaiaiaimona comini duere sefuilla jira, iaiaiaia jai fiodailla jira, iobitimaci. Rafuena finuanona, dan coninina rana fecaitimaci. ¹¹ Darui amani abi atomonado illanona, fiodaillamona iaiaiaia Jusiñamui dane jillotaite. Ie muidona naidaitiaiaia. Nana iaiaiaia ciodio eo jacinaitimaci. ¹² Naie facaise monamona damie iaiaiaia uaiduana cacadiamaia. Llote:

—Bene mai bi.

Ieconia iaiaiaia enoidimacidi uillie motomo monamo iaiaiaia jaillana cioidimaci. ¹³ Naie facaise aillue ñuisaño suide. Ie jira janore facai Jerusalén goide. Ria uaimona ie décima facai goide. Naiemona siete mil comini fiodaitemaci. Fiodañedino jacinailamona:

—Jusiñamuidi ua siño jito —lloitemaci. ¹⁴ Mena duere sefuilla facaise jai fuite. Nia daje suiñede; ia raire suite.

Juan iraietrompeta fillana cacade

¹⁵ Naie facaise jiaie jaienici ie trompetana fite. Monamo itino ado llotimaci:

Jusiñamui, Cristo diga, illaima isoi, eniruemo ite cominina biruimona jaca sedaite.

Naie comini naimie anamo raise iitimaci.

¹⁶ Naie veinticuatro einamacidi Jusiñamui ecimo illanona, naimie uicomo ana bitadajanona naimiena sedadimaci. ¹⁷ Llotimaci:

Jusiñamui, cai Nama, omo iobillacinona fecacacadi. Siño jitodio. O jitailla rafuena jaca finodio.

O uaido bie cominina jai sedadio.

¹⁸ Ona naimaci ñnoñenamona, o diga iciritimaci; iadedi naimacina emodofidio.

Bie facaise jai fiodaitemo jillotajamona, ona naimaci ñnoñena jira, naimacimona ja ibana oitio.

Jearede rafuena naimaci finua jira, naie facaise ona ñnoñedinona duere finoitio.

O dibeimo maijidino, o facaina lloraini, nana ona ñnotino omona ibana feiñoitimaci.

Nibaí jamai bue isoidimaci.

Nibaí jamai bue isoiñedimaci; iadedi omona ibana feiñoitimaci.

¹⁹ Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Ieconia boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

Juan daje riñona, eo aillue jaio diga, ciode

12 Naie facaise monamo daje riñona ciodicue. Naiñaiñona cue ciuamona, Jusiñamuidi eniruemo itinomo ico suille rafuena cue uiñuana jitaide. Naiñaiño inroidi jitema isoi bairede. Naiñaiño eilli anamo fivui ite. Naiñaiño ifogimo nuicirai isoi doce ucuduai ite. ² Jai uruesite. Jocoacana jira, como isirede. ³ Ie facaise monamo jiaimiena ciodicue. Naimiedi Taife.

Naimie illamona jiaie rafue suillena uiñoticue.

Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Ria uaimona naimiedi dragón. ⁴ Naimie omaca diga ailluena ucuaina eniruemo ana butade. Ria uaimona ie tercera facaina butade. Ie uruena gutallena, riño uicomo naidaita naiñaiño jocollena sedade. ⁵ Naiñaiño imana jocode; ia jaio naimiena gutañede. Nana nairaia naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiena uite. Ie ecimo Jusiñamui naimiena itatate. ⁶ Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

⁷ Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisa diga jai fuiridimaci. Jusiñamui jaienisa illaima mamecidi Miguel. ⁸ Naimaci dinena emodofidimaci. Jaio ie jaienisa anafefilla jira, Jusiñamui illanomo naimaci illano jai iñede. ⁹ Eniruemo jaiona eruaidimie ie jaienisa diga dotadimaci. Naie jiodi Taife. Satanás. Jaiona Taife jai jaillanona, eo ailluena cominina jai jifue. ¹⁰ Monamo damie ado lluaana jai cacadicue:

—Jusiñamui lloga uai jai suide. Ie cominina raise jillotote. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise ñnoñenia, jeacinona bu finoia, Jusiñamui uicomo birui naimie finocabilla isoi, Taife caina llogidoñeite. ¹¹ Toica Llauda isoidimie naimaciri fiodailla jira, naimie rafuena naimaci llua-mona, Taifena emodofidimaci. Fiodaitimacina, naie rafuena llocana jiacadimaci. ¹² Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitimaci. Naimie eo icirite. Nainomo naimie are iñellena uiñote. Naimie icirillamona eniruemo itino eo duere sefuitimaci —llote.

¹³ Eniruemo jaiona eruaidimie dotajamona, naiñaiñona duere finollena, naimiedi imana jai jococa riñona racade. ¹⁴ Naimiemona jilloillena, Jusiñamui mena iaico, majaiño iaico isoi, naiñaiño ite. Feianona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide. ¹⁵ Ie facaise jaiona eruaidimie fuemona eo ailluena jinui bite. Ille isoi tote, naiñaiñona corobaitallena; ¹⁶ ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobañede. ¹⁷ Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino ñnotino diga, nana “Jesúmo duidicaí” raitino diga, jobairiacade.

Juan mena riirede ocainana ciode

13 Naie facaise monaillai fuemo cue naidailanona, daje riirede ocaina monaillaimona billana ciodicue. Naimiemo diez sigai ite. Naga sigaimo

nuicirai raide. Naimiemo siete ifogiai ite. Ie ifogiaimo Jusiñamuina jeare ñaia mameci ite. ² Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimiedi ie siño uaina fecade. ³ Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicaillamona, nana eniruemo ite comini naimie dibeimo jaidimaci. ⁴ Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

⁵ Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade. ⁶ Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite.

⁷ Taife uai naimiemo illa jira, Cristona eniruemo ite inotino diga jobairite. Naimacina emodofide. Iemona nana comini naga nairaiaimona naimie anamo itimaci.

⁸ Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo enruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena inotino mameciaina naie rabenicomo jai cuete. Naimie illanomo jaca illena, naimaci mameciaina cuete.

⁹ Omoi jeforena jira, raise fueollena, bie rafuemo cacarei. ¹⁰ Duere sefullena, naie facaise cárcelmo Cristona inotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona inotino comeciai ocuiñocaida inocana jailla.

¹¹ Naie facaise jiaie riirede ocaina enruemona billana ciodicue. Toica Llauda isoi naimiemo mena sigai ite. Aillue jaio isoi ñaite. ¹² Monailaimona bite ocaina uai enruemona bite ocainamo jiai ite. Ie uai diga, nana cominina monailaimona bite ocainana sedatate. ¹³ Eo siño rafuena finocabite. Comini cioillena, monamona eniruemo boode ra ana bitatate. ¹⁴ Siño rafuena finuamona, Taife jitailla jira, eniruemo itinona jifuate. Iena naimaci sedallena, cominina monailaimona bite ocaina joreño finuana ocuide. Monailaimona bite ocaina lloebi diga navui bofiamona jai jillode. ¹⁵ Joreño finua mei, enruemona bite ocaina iena ñaitatate. Iena bu sedañena, ocaina naimiena meiniana ocuide.

¹⁶ Nana cominimo naimie númerona cuetatate. Número cuetatañena, naimie mamecina cuetatate. Ie nabeillimo cuetatañena, ie uiecomo cuetatate. Jamai bue isoidinomo cuetatate. Jamai bue isoiñedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo inedinomo cuetatate. ¹⁷ Iese bumo inenia, rana ibanide. Rana fecanide. Bie mamecidi bie ocaina ie mameci. Mamecina cuetatañena, naimie ie númerona cuetatate. ¹⁸ Iena raise cacaillena, iemo omoi comeciaina faca. Abina uiñotimie bie númerona uiñoite. Come

mamecido iite. Bie númerodi seiscientos sesenta y seis.

Juan 144,000 comini ruana cacade

14 Naie facaise Jerusalémo Sion railla anedu muidomo Toica Llauda isoidimie naidaillana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cueda. ² Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue. ³ Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini enruemona naimaci dibeimo inedinomona jai jillodimaci. ⁴ Bie ciento cuarenta y cuatro mil comini jearede rafuena eburuiñedinomaci. Llauda isoidimie rafuena inocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena. ⁵ Cristo rafuedo jeacinona finocabiñeno raise jaidimaci.

Juan daje amani jaienai rafue lluaana cacade

⁶ Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide. ⁷ Ado llote:

—Jusiñamuina inuanona naimiena seda. Naimiemo iobillacinona feca. Naimiemo inoñedinona ja duere finoite. Monana, enrue diga, monailai diga, ille diga, naimie finua jira, naimiena seda.

⁸ Jiaie jaienici billanona llote:

—Babilonia railla nairai illano eo aillue; iadedi ja inite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamo jai itino isoi, Jusiñamuimona duere sefuitimaci.

⁹ Naie facaise jiaie jaienici billanona, ado llote:

—Monailaimona bite ocainana bu sedaia, ie joreña bu sedaia, ie uieco itofemo, ie onollimo ocaina cuetataga ra bumo ia, ¹⁰ Jusiñamui riicaillafuemonona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci. ¹¹ Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodañeno jaca duere sefuitimaci —llote.

¹² Bie rafue suille facaise Jusiñamui lloga uaina raise inuanona, Jesús dibeimo raise illanona, comeciai ocuiñocana naimaci jailla.

¹³ Iemei monamona Jusiñamui joreño llote:

—Biena cueno: "Biruimona Jesúna inuamona, meineganodi caimare itimaci. Jesús dibeimo naimaci

illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

Juan Jusiñamui eniruemo itinona duere finua rafuena cacade

¹⁴ Naie facaise monamo cue eruaia, userede uilliena ciodicue. Uillie emodo Cristo raide. Iimana eruaide. Naimie ifogimo oromona finoca nuicirai ite. Ie onollimo jairede lloebi ite. ¹⁵ Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ol-lena. Jai einaitite —llote.

Iese llote; ia cominina duere finollena ñaite. Naimaci duere finua facaisena ñaite. ¹⁶ Jaienici llua isoi, ie lloebi diga Cristo cotade. Nana iena finode. Cominina duere finode. ¹⁷ Jusiñamuina sedajanomona naie facaise jiaie jaienici bite. Naimie onollimo jairede lloebi jiaie ite.

¹⁸ Iecon Jusiñamuimo jobaisollanomona jiaie jaienici bite. Eniruemo boode ra dotaja uaidi naimiemo ite. Lloebiredimiemo ado llote:

—Jai einaila jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite.

¹⁹ Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicaillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

Juan siete jaienisaí cominina duere finoacana ciode

15 Naie facaise monamo jiaie rafuena ciodicue. Ieri eo rajicaidicue. Iena cue ciuamona, Jusiñamuidi eniruemo itinomo suille rafuena cue uiñuana jitaide. Siete jaienisaína ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie riicaillifue saite.

² Aillue joraina eruaide rana jiaie ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona, ³ jai emodofilla jira, Moisés micori ie ruana rotimaci. Moisés micori Jusiñamui facaina jaie maijuide. Jeacinomona naimaci jiaie jai jillua jira, Toica Llauda isoidimie ie ruana jiaie rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairaí o anamo jai itimaci.

⁴ Cai Nama, nana comini ona jaciruillamona, ona ñnoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

⁵ Jusiñamuina sedajanomo dane eruaidicue. Ie fo iticuartomo ciodicue. ⁶ Naiemona siete jaienisaí billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade. ⁷ Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite. ⁸ Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaímo ite rafue nia suiñena jira, Jusiñamuina sedajanomo buna fo jainide.

Juan eniruemo copas oni totajanona ciode

16 Ie sedajanomona Jusiñamui naie siete jaienisaímo ado llote:

—Cue riicaillafue omoi copamo illa jira, eniruemo itinona duere finollena, omoi copas oni tota.

² Daje jaienici iena finode. Eniruemo ite cominina duere finode. Monailaimona bite ocaina cuetataganona jiaie duere finode. Ocaina joreño sedadinona duere finode. Naimaci abiaimo jodollaiaína comuitate. Iemona duere sefuidimaci.

³ Iemei jiaie jaienici ie copa oni totajamona, monaillaina duere finode. Nana monaillaidi fiodaitino dirue isoi jaide. Eo jearedena eruaide. Nana nainomo ite cajedino fiodaitimaci.

⁴ Iemei jiaie jaienici ie copa oni totajamona, nana illiaí, nana jorainiaí diga, duere finode. Diruena jaide.

⁵ Naie facaise nana jinuina sedacabide jaienici llote:

—Jusiñamui, o jaca mareuidimiedio. Ona ñnotinona eniruemo itino meinia jira, o facaina llorainina naimaci meinia jira, naimacina o raise uiñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷ Jusiñamuimo caimare soride ra jobaisollanomona jiaie jaienici llote:

—Cai Nama Jusiñamui, ua siño jitodio. Naimaci fino-cabilla isoi naimacina jai duere finodio.

⁸ Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci. ⁹ Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uiñotimaci; ia naimie díbeimo naimaci comeciaí iuaina meidoiacaíñedimaci. Jeacinona finuana fainonocaiacaíñedimaci. Naimiemo iobillacinona fecacaiñedimaci.

¹⁰ Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitireficaide. Eo duere sefuillamona, comini imaci ifena ainitimaci. ¹¹ Duere sefuillamona, Jusiñamuina jeare ñaitimaci. Naimaci abiaimo ite jodollaiaí isirede; iadedi naimaci comeciaí iuaina meidoñedimaci. Jeacinona finuana fainonocaiñedimaci.

¹² Naie facaise jiaie jaienici ie copamona ie duere sefuillicinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairai illaicomini, imaci soldaduai diga, ruica dine raise birenitimaci.

¹³ Naie facaise aillue jaio fuemona, monaillaimona bite ocaina fuemona, naimie facaina lloraima fue-mona, daje amani jananiai billana ciodicue. Nagamie-mona daje janaba bite. Nai jananiai jerocina eruaide.

¹⁴ Taifemona bite. Siño rafuena finocabite. Nana illaicomini, imaci soldaduai diga uaidollena, naimacina or-eite. Danomo ofillena illaicominina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uiñoitimaci. ¹⁵ Armagedón railla illanomo ofitimaci. Naie illano mamecidi juduiai uai mameci. Ieconicai Nama cuemo llote:

—Fiiriraima isoi ebena biiticue. Cue billemo ocuridimie iocire iite. Cue billemo naimie ocuria, cue bia, naimie cue jitaillacinona finuamona, naimie meiruiñeite.

¹⁷ Naie facaise jiaie jaienici jafaici dine ie copamona ie duere sefuillicinona totade. Ieconicai ie sedajanomona Jusiñamui llote:

—Bie duere sefuillicino diga, cominina cue duere finoacanacino ja fuite.

¹⁸ Ieconicai boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede. ¹⁹ Iemona nanoca nairai illano daje amani facaina goide. Nana jiaie illanuai jiai goidimaci. Jusiñamuidi Babilonia railla nairaina raise uiñuamona, nana ie riicaillafuemona iena eo duere finode. ²⁰ Naie ñuisañomona naga uiasi jai cioiñena. Naga anedu jiai cioiñena. ²¹ Monamona noci deilla isoi, hielu jiai ana jurude. Naga hielu cuarenta kilos ñibai merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

Juan eo marañede riñona duere sefuillana ciode

17 Naie facaise naie siete copas diga ite jaienisa-mona cue dine damie billanona cuemo llote:

—Cue diga bi. Eo marañede riño duere sefuillana omo acataiticue. Monaillai emodomo naiñaiño jai raide isoide. Naiñaiñodi nanoca nairai illano mamecido ite. Nana illaicomini naie nairai anamo itimaci.

² Naiñaiñona sedajamona, naiñaiño diga, illaicominidi jearede rafuena finocabidimaci. Naiñaiñona nabaillamona, eniruemo ite comini jearede rafuena eo ebiritimaci —llote.

³ Nicairilla isoi, jaienici cue joreña uillanona, jofue iñenanomo cue joreña uite. Eo jiairede riirede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiai ite. Diez sigai jiai ite. ⁴ Naie riño jiduirede ñiroi, jiairede ñiroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie

diga ie abi eo finobide. Naiñaiño onollimo oromona finoca copana uite. Nainomo eo marañede jearede rafuena finocana uite isoide. ⁵ Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodicue. Cuumona eo jearede rafue comucana jaicabide. Cuumidona comini jearede rafuena finocabide”.

⁶ Naiñaiñodi ailluena Jusiñamuimo duidinona, ailluena ua Jesúna ñnotinona meinetajana eo ebiruite. Naiñaiñona cue cioia, eo rajicaidicue. ⁷ Jaienici cuemo jicanote:

—¿Bue ñe rajicaidío? Naiñaiñomo ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue. ⁸ Naie ocaina navui ite; ia birui jai iñede. Ico eniruemona, eo ana ite ifomona, dane biite; iadedi faifite. Ieri Jesucristona ñnoñedino rajicaitimaci. Jesucristona naimaci ñnoñena jira, monamo Jusiñamuidi ie rabenicomo enirue nia finoñena facaise naimaci mameciaina jaca cueñede. Naimie illanomo jaca iñeitimaci. ⁹ Ocaina rafuena omo ja lloiticue. Jusiñamui ona uiñotajanona iena cacaitio. Bie siete ifogidi siete anedu mamecido ite. Riño nainomo raide. ¹⁰ Ie siete ifogidi siete illaicomini mamecido ite. Naimacimona cinco illaicomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dal-lu sedaite.

¹¹ Ifomona bite ocainana dane lloiticue. Cominina jiai sedaite; ia bie siete illaicomini sedajacinomo duite. Cominina naimie sedaja mei, naimie faifite. ¹² Ie diez sigaidi diez illaicomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci.

¹³ Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci. ¹⁴ Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiñena jira, naimacina emodofite. Ie cominina naimie fetode. Naimiñena ñnotimaci. Jai emodofitimaci —llote.

¹⁵ Jaienici nia llote:

—Riño monaillai emodomo raillana ailli ciodio. Monaillaidi nana comini mamecido ite. Naga nairai mamecido ite. ¹⁶ Naie diez illaicominidi, ocaina diga riñona enoitimaci. Naiñaiñona duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño ñnirina oni dotatajanona, naiñaiño taiñaiñona iite. Naiñaiñona meineitimaci. Ie llicisina riitimaci. Ja muidomo iraimo naiñaiñona dotaitimaci. Iese naiñaiñona duere finuanona, naiñaiñona fuidoitimaci. ¹⁸ Bie riñodi nanoca nairai illano mamecido ite. Naie nairai anamo nana eniruemo ite illaicomini iitimaci —llote.

Juan Babilonia railla nairai illano goilla rafuena ciode

18 Ie facaise monamona jiaie jaienici ana billana ciodicue. Naimie uai siño. Naimie uai siñona jira, eniruena lligaiñote. ² Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai ifnedimaci. Nainomo Taife jaisenisa birui itimaci. Jananiai nainomo birui itimaci. ³ Nia goifenía, bie nairai jeacinona eo finuamona, nana nairaia iena eburitimaci. Bie nairaina nabaillamona, nana illaicomini jearede rafuena jiai finocabidimaci. Jearede rafuemonona nana rana fecaraini bie nairaimona ailluena ucubena ganacabidimaci —llote.

⁴ Naie facaise monamona damie llote:

—Cue comini, bie nairaimona birui mai eneno oni i. Jeacinona omoi fino raillano, naie facaise omoi duere sefui raillano, birui eneno mai oni i. ⁵ Bie nairai jeacino eo finocana jaidimaci; iadedi iena Jusiñamui uifnuamona, naimacina jai duere finoacade. ⁶ Jusiñamui, naimaci finua diese ibana ono. Naimacina ua eo duere fino. ⁷ Jeacino finuamona iobidimaci. Iemonona abi iedotimaci. Jeacino finuana eo eburitimaci. “Illai-cominidica. Nana cai jitailla ra caimo ite. Feciño isoi duere jaca sefuiñeiticai” comeciaina facadimaci; ⁸ iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fioiditimaci. Naimaci jofue boote. Jusiñamui siño jitaona jira, naimacina raire fuidoite —llote.

⁹ Bouamona uillie naimaci cioia, sunaillamona, naie nairai diga nabairite illaicomini eo eeditimaci. ¹⁰ Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

¹¹ Naimaci rana naie nairai jai oñena jira, rana fecaraini eo sunaillamona eo eeditimaci. ¹² Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronze, lloona, mare nofici, ¹³ guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci. ¹⁴ Sure illamona lloitimaci:

—Caimona omoi comeciiai jitailla rana ja oñeitomoi. Omoi eburuiga rana ja oñeitomoi.

¹⁵ Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eeditimaci. Sunaitimaci. ¹⁶ Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga eburitimaci. Eo raifide abina finolle rana eo eburitimaci. Oromona finoca ra, perlamona finoca rana eo eburitimaci; ¹⁷ iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijiuidino diga, nainomo jaidino diga, botedo rana fecaraini diga, ¹⁸ aaremona uilliena ciuamona, naie nairai bouana fidiano, lloitimaci:

—Naie nairai nana jiai nairaia baifemo navui faite. Jiaie nairai ie isoi ebinide.

¹⁹ Sure illamona, naimaci ifogimo imuicina faianona, eeditimaci. Lloitimaci:

—Bie nairai eo duere sefuide. Bie nairaimona boteredinodica navui ailluena ganadica. Bie nairai jai raire fuite.

²⁰ Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹ Naie facaise jiaie jaienico siño uai illanona, eo aillue nofici llinuanona, monaillaimo iena faite. Llote:

—Bie nofici dane cai cioifena isoi, Babilonia railla nairai dane ifneite. Jusiñamui iena eo riire fuidoite. ²² Nainomo buna dane roñeite. Buna guitarrana eruaid arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberifneite. Llomeniconona finollena, buna dane maijiñeite. ²³ Nainomo naiona lamparina dane boñeite. Rafue dane ifneite. Eo caimare iobitaja rafue dane ifneite. Iraisifneitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaia navui jifuecabidimaci. ²⁴ Naie nairai ailluena Jusiñamuina ifnotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

19 Ie facaise monamo eo ailluena comini ado llua-na cacadicue. Jusiñamuimo lloitimaci:

Ona cai iobitajasa. Caina jai jillotatio.

O uai ebirede. Odi siño jitodio.

² O anamo itinona raise uifnuamona, uanaicinona o uifnuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena ifnotate.

Ailluena o facaina maijidinona jai meinetade;

iadedi iba jai otio.

³ Iemei dane lloitimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —lloitimaci.

⁴ Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiena sedadimaci. Lloitimaci:

—Omoi llucino mare. Ie isoi jiai lloiacadica. Jusiñamuina cai iobitajasa.

⁵ Jusiñamui illanomona damie llote:

Nana cai Jusiñamuina facaina maijidoi iobitajasa.

Nana naimiena ifnotino naimiena iobitajasa.

Jamai bue isoidino naimiena iobitajasa.

Jamai bue isoiñedino naimiena iobitajasa.

Juan Toica Llauda isoidimie aina ua rafuena cacade

⁶ Naie facaise monamo eo ailluena comini llua-na cacadicue. Ailluena jinui surua isoi ficirede. Eo gurucabilla isoi ficirede. Lloitimaci:

Caí Nama Jusiñamuina caí iobitajasa.
 Naimie siño jito. Nana cominina birui jai sedade.
⁷ Eo iobidicaí. Naimiemo iobillacinona eo caí fecajasa.
 Llauda isoidimie ie aina ua rafue facaise jai suide.
 Naiñaiño jai finobide.
⁸ Mare iniroi naiñaiño jai ite. Eo userede.

Quenirede. Jeanide
 llotimaci. Iese iniroina llotimaci; ia Cristo, ie comini di-
 ga, jaca illena ñaitimaci. Ie ai diga, ini ie riño jaca caí-
 mare illa isoi, nana naimie comini diga, naimie caí-
 mare jaca iite. Naie mare iniroidi, Jusiñamui jitaill-
 lacinona finuamona, naimie ñnotino imaci mare finoca
 rafue isoide.

⁹ Jaienicí cuemo llote:

—Biena cueno: “Llauda isoidimie aina ua rafue dine
 uaidoganodi caimare iitimaci”. —Iemei llote:

—Jusiñamui iena llua jira, uanaicinona omo lloticue.

¹⁰ Jaienicí uicomo eillimo ana bitadaticue, naimiena
 sedallena; ia cuemo llote:

—Dama ite. Cuen a sedaño; ia dama Jusiñamuina
 seda. Jesús ie ñbeimo itinona uanaicinona jai uiño-
 tade. Ie jira naga o diga naimiena ñnotino isoi, Jusiña-
 mui facaina jaiñaiñidicue. Naga Jusiñamui facaina
 maiñidimie Jusúna llocabite. Ie muidona dama Jusiña-
 muina seda.

Juan userede caballo emodomo itimien a cide

¹¹ Naie facaise mona ecorillana ciodicue. Nainomo
 userede caballona ciodicue. Naie emodomo itimiemo
 mena mameci ite. ñnogamiena mameciredede. Ua-
 naicinona llocabitimien a jaiñaiñidicue. Naimacina
 raise uiñuamona, naimie ñbeimo iñedina duere
 finollena, naimaci diga jobairite. ¹² Naimie uisidi irai
 isoide. Illaimana jira, naimie ifogimo ailluena nuicirai
 ite. Naimiemo cueda mamecina buna uiñoñede. Dama
 naimie iena uiñoñede. ¹³ Naimie jítaca iniroi ie ñbeimo
 iñedino ñruemo mutaca. Jusiñamuina naimie uiñotaja
 jira, Jusiñamui Uairedimien a mameciredede. Naimiedi Je-
 sucristo. ¹⁴ Naimie jinafona soldaduái isoi Jusiñamui fa-
 caina itino monamona billana jaiñaiñidicue. Eo mare
 userede jeanide iniroina jítadimaci. Userede caballuai
 emodomo itimaci. ¹⁵ Eniruemo ite nairaiñina emodofil-
 lena, naimie fuemo jairedede lloebi ite. Naimacina emod-
 ofilla mei, naimacina naimie jitaillacinona finotallena,
 naimacina eo riire sedaite. Jusiñamui siño jitona jira,
 naimie riicallifue anamo itinona eo duere finoite.

¹⁶ Naimie iniroimo, naimie ñdaimo jai cueda: “Nanoca
 Illaima. Nanoca Nama”.

¹⁷ Naie facaise jaienicí jítoma lligaiñuanomo ciodicue.
 Nana inoniaina uaidote:

—Llicisina mai riabi. Jusiñamuidi ailluena cominina
 ja meiniamona rille eo iite. ¹⁸ Naimacina emodofillam-
 ona, ailluena llicisi ja iite. Ailluena cominina ja
 meineite. Illaicomini itimaci. Soldaduái illaicomini iti-
 maci. Caballuai itimaci. Caballuai emodomo
 jaicabidino itimaci. Diga comini ite. Jamai bue isoidino
 itimaci. Jamai bue isoñedino itimaci. Patrones anamo

itino itimaci. Patrones anamo iñedino itimaci. Naimaci
 llicisi mai riabi —llote.

¹⁹ Naie facaise monaillaimona bite riirede ocainadi
 eniruemo illaicomini diga ofide. Naimaci soldaduái jaiñaiñidicue.
 Userede caballo emodomo itimie diga,
 naimie ñbeimo itino diga jobairiacadimaci. ²⁰ Userede
 caballo emodomo itimie ie ñbeimo itino diga naimaci-
 na emodofide. Ocainana gaitadimaci. Naimie facaina
 tainona lloraímana jaiñaiñidicue. Naie lloraímana
 ocaina uai diga cominina jifuecabite. Siño rafuena
 finuamona, ocaina cuetataga ra itinona, ie joreñoña
 sedadinona jifuecabite. Naie iaimaímana gaitaja mei, eo
 boode iraimo iaimaímana cajena dotadimaci. Azufre
 boa isoi irai boode. ²¹ Caballo emodomo itimiedi ie fue-
 mo ite lloebi diga iaimaímana soldaduaina meinete.
 Jaienicí llua isoi, inoniaí naimaci llicisina ritimaci.
 Iemona eo monidimaci.

Juan mil años Taife maiana cide

20 Naie facaise monamona jaienicí billana
 ciodicue. Eniruemo eo ana ite ifo llave naimiemo
 ite. Aillue lloeo ie onollimo ite. ² Aillue jaiona eru-
 aidimien a gaitade. Naimiedi Taife. Riabi uaimona Sa-
 tanás. Jaiñaiñidicue dragón. Mil años iese illena lloeo diga
 naimien a maite. ³ Ana ite ifomo naimien a dotade.
 Llave diga ifona ñbaide. Cominina ramo fañellena,
 naimacina jeacinona finotañellena, naimie uaina
 itatañede. Mil años cominina jifuenide. Mil años fuilla
 mei, dallu naimien a jino oretate, cominina ramo fail-
 lena.

⁴ Ie mei monamo diga jueces illanuaina ciodicue.
 Jusiñamui uai diga nainomo itinodi marañede rafue
 finodinomo jamai duere sefuillacinona llotimaci. Ie fa-
 caise jai meiganona jaiñaiñidicue. Eo duere sefuilla
 facaise “Jesús cominidicaí” naimaci llua jira, Jusiñamui
 uaina naimaci llua jira, naimaci ifogiaímana jaitajanona,
 naimacina meiganodimaci. Monaillaimona bite
 ocainana sedañedimaci. Ie joreñoña sedañedimaci. Ie
 cuetataga ra naimaci uiecomo, naimaci onollimo
 iñede. Navui fiodaitimaci; ia iemona bie facaise jai jillo-
 bitimaci. Imaci abiaí diga Jusiñamui naimacina jil-
 lotaite. Cristo diga mil años eniruemo itinona sedaiti-
 maci. ⁵ Naimacidi nano jillodino. Naie mil años nia
 fuiñenia, jiaie jai fiodaitino nia jilloñeitimaci; ia mil
 años fuilla mei, jilloitimaci. ⁶ ¡Nano jillodino caimare
 marena iitimaci! Dane fiodañenamona Jusiñamui il-
 lanomo jaca iitimaci. Fañiñeitimaci. Cominina seda-
 janona, comini Jusiñamuina raise uiñollena, comini
 Cristona raise uiñollena, naimacina canoitimaci. Cristo
 diga mil años naimacina sedaitimaci.

⁷ Bie mil años fuilla mei, Jusiñamuidi ana ite ifomona
 Taife jino oretate. ⁸ Nana eniruemo ite nairaiñina ji-
 fuaibite. Gog railla illaicomina, Magog railla nairaiñaiñidicue.
 Gog railla illaicomina, Magog railla nairaiñaiñidicue. Eo ailluena
 naimaci illa jira, conillena caí facadonina isoi, naimaci-
 na facadonidicue. Jusiñamuina ñnotino diga jobairil-
 lena, ofitimaci. ⁹ Danomo ofillanona, Jusiñamuina
 ñnotinona ciribitaitimaci. Jerusaléna, Jusiñamui isiruiga

nairaina, ciribitaitimaci. Naie facaise monamona boode ra billanona, jobairiacadinona fuidoite.

¹⁰ Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocaínana jaie dotade. Naimie facaina tainona lloraima jaie dotade. Nainomo ua jaca duere sefuitimaci

Juan aillue rairabicina ciode. Nainomona Jusiñamui duere finollicinona lluaña cacade

¹¹ Naie facaise aillue userede rairabicina ciodicue. Illaímmana naimie illamona, nainomo Jusiñamuina jiai ciodicue. Naimie siño illamona, mona enirue diga jai iñede. ¹² Naie facaise Jusiñamui uicomo nana fioidaitino naidaillana ciodicue. Jamai bue isoiñedino itimaci. Jamai bue isoidino itimaci. Naimacimo juez isoi Jusiñamui lollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cuega. Iemei Jusiñamui jiaie rabenicono jibuide. Naimie diga jaca ille comini mameciai nainomo jai cuega. Naimaci mameciai nainomo iñenia, naimaci finoca rafue diese Jusiñamui naimacimo duere sefuillena llote. ¹³ Monaillaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite. ¹⁴ Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci. ¹⁵ Monamo ite rabenicomo cueñega comini mameciai diese itinona iraimo dotaite.

Juan comue monana, comue enirue diga ciode

21 Birui ite mona, birui ite enirue diga jai iñede. Monaillai jiai jai iñede. Iemei comue mona ciodicue. Comue eniruena jiai ciodicue. ² Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede. ³ Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci. ⁴ Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiodañeitimaci. Sunañeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunañeitimaci —llote.

⁵ Jusiñamui llote:

—Ero, nana ra comuena birui finoiticue. Cue llucino uanaicinona jira, cue llucinona cue finua jira, bie rafuena cueno.

⁶ Iemei cuemo llote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iticue. Jaca siño jitudicue. Naimaci illena comini jinuina eo jiroacana isoi, cuena inotino comeciaino eo caimare itataiticue.

ibatañeno cue diga illena, naimacina jaca itataiticue.

⁷ Cueno raise inotinona iese itataiticue. Jaca naimaci Jusiñamuiniticue. Naimaci jaca cue comininitimaci.

⁸ Jiaño jaca eo boode iraimo jaca itimaci. Azufre boa isoi irai booite. Naiemona jaca jilloñeitimaci. Cuemona eneno jaca itimaci. Diese nainomo itimaci: abido danomo jaidino, cuena raise inoñedino, jearede rafue finocabidino, cominina meinetino, añede riño diga icabitino, iniñede iima diga icabitino, añinai, jiraraina sedacabidino, tainona llocabitino —llote.

Juan comue Jerusaléna llote

⁹ Naie facaise naie siete jaienisaimona damie cue dine bite. Naie jaienisai imaci copamo cominina duere finollicinona navui ite isoide. Naimie cuemo llote:

—Cue diga mai bi. Ima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

¹⁰ Nicairilla isoi, Jusiñamui Joreño cue joreño eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare. ¹¹ Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruaila jira, enefebecodo ciode.

¹² Ie llaigafo eo a ite. Eo jedaciede. Doce nasiai ite. Naga nasemo daje jaienicite. Israel micori uruai mameciai naie nasiamo cuega. Doce uruai illa jira, naga naserie daje mameci cuega. ¹³ Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beici dine eruaide llaigafomo daje amani nase ite. ¹⁴ Naie llaigafo anamo doce nofici ite. Nainomo Toica Llauda isoidimie ie doce llofueoicaigano mameciai cuega.

¹⁵ Cue diga ñaite jaienicimo oromona ra facara ite. Naie nairai facallena ite. Ie nase, ie llaigafo diga, facallena ite. ¹⁶ Naie nairaina naimie facajamona, nagafebei daje isoi illana uinoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. ¹⁷ Ie llaigafona jiai facade. Sesenta y cuatro metros a ite. Comini facaja isoi, jaienicite iena facade.

¹⁸ Ie llaigafo jaspe railla noficimona finoca. Bie nairai difai oromona finoca. Enefebecodo ciode. ¹⁹ Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede. ²⁰ Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafo anamo ite noficiaino doce diga ite. ²¹ Ie doce nasiaidi perlas. Userede. Naga nase daje perlamona finoca. Bie nairai naisuaidi difai oro. Enefebecodo ciode.

²² Bie illanomo Jusiñamuina sedajanona cioñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, ia-

maiaí uicomo sedaiticaí. ²³ Jusiñamui siñona jira, nainomo cominí jitomana jitaiñeitimaci. Fívuina jitaiñeitimaci. Jusiñamui, Llauda isoidimie diga, iena lligaiñoite. ²⁴ Nana cominí iaímaiaína nabaicana jaitimaci. Nana illaicominí iaímaiaí dine billanona, iaímaiaímo iobil-lacino jaca fecaitimaci. ²⁵ Bie nairai nasiaí jaca íbaiñeite. Nainomo naionadí jaca íñeite. ²⁶ Iaímaiaímo iobillacinona fecallena, nana cominí nainomo biitimaci. ²⁷ Nainomo jeacino jaca íñeite. Jearede rafue finodino nainomo biñeitimaci. Tainona llorainí biñeitimaci. Daní Llauda isoidimie ite rabenicomo cuega mameciaí itinodí nainomo biitimaci. Bie rabenicomo Jusiñamui illanomo jaca iitino mameciaí jai cuega.

22 Naie facaise jaíenici cuena daje ille acatate. Nainomo ite jinui jiruamona cominina jaca itataite. Uifínide. Jusiñamui, Llauda isoidimie diga, illanomona tote. ² Nanoca naiso motodo tote. Nagafebelle dine jaca itataite amenaiaí ite. Naga fívuí llisillamona, naga fívuí llisilla ite. Ie íbiaí illamona, cominí caímare marena itimaci. ³ Jeacino nainomo íñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie cominí naimiena jaca sedaitimaci. ⁴ Naimiena marefodo cioitimaci. Naimiemo naimaci duillamona, naimaci uiecuai itofiaímo naimie mameci cueite. ⁵ Nainomo naionadí íñeite. Lamparína jitaiñeitimaci. Jitomana jitaiñeitimaci. Cai Nama Jusiñamui naimacina lligaiñoite. Illaicominí isoi jaca iitimaci.

Juan Jesucristo billirui iaírei illana cacade

⁶ Jaíenici cuemo llote:
—Bie lluacínodí uanaicino. Naimie facaina llorainimo ie rafuena llollena, ie uaina itatate. Naimiena ñnotinona íco suille rafuena ja uifñotaiacade. ⁷ “Raire biitícue” Cristo llote.
Bie rabenicomo ite íco suille rafuena ñnotinodí caímare iitimaci.
⁸ Juandícue. Bie rafuena cacadícue. Iena ciodícue. Iena cue cacaja mei, iena cue cíua mei, iena cuemo acataga jaíenici uicomo ana bitadatícue. Naimiena sedaacadícue; ⁹ íadedí cuemo llote:
—Dama ite. Cuena sedaño. O diga, naimie facaina llorainí isoi, bie rabenicomo ite llogacínona ñnotino isoi, naimie díbeimo jiaí maijídícue. Dama Jusiñamuina seda. ¹⁰ Bie rafue suillirui iaírei illa jira, iena jino llono. Iena uifñota. ¹¹ Bie rafuena bu ñnoñenia, naimie jitailla

jira, maraiñede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie ñnoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

¹² Jesucristo cuemo llote:

—Ero, raire biitícue. Naimie finoca rafue díese nagamiemo íbana fecaitícue. ¹³ Jaca bue nia íñenia, jaie jaca itícue. Nana rana finodícue. Nana ra cue uaido icana jaide. Nana rana fuilla mei, jaca iitícue. Jaca siño jítodícue. ¹⁴ Naimaci ñnirina naimaci jocoia, caímare iitimaci. Naimaci comecina ñaitícue. Ie jeacínona oni dotacamie jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; ¹⁵ ia naimacina jeacínona naimaci faínono-caíñenia, Jusiñamui illanomo maraiñede rafuena fino-cabidíno, aíma dine jaicabidíno, aíñede riño diga ícabitíno, íniñede íima diga ícabitíno, cominina meinetino, jiraraina sedacabidíno, tainona llocabitíno duiñeitimaci. ¹⁶ Creyentiaina bie rafuena uifñotallena, cue jaíenici o dine jai oretatícue. David micorí ie jítodícue. Monairacudu bairia isoi, Jusiñamui jitaillacinona cue finollena, baireitícue —llote.

¹⁷ Bie facaise Jusiñamui Joreñodí, Cristo jai oga aí rail-la cominí diga, naimiena nia ñnoñedinona uaidote:

—Bie rafuena mai cacarei. Iena mai ñno. Iena bu ñnoia, jiaímiemo iena lluai: Iena mai cacarei. Iena mai ñno.

Jiroacadimie llotícue:

—Mai jiruaíbi. Bie jinua raifíñede. Biena o jiroacania, jaca iitio. Iese llotícue; ia ie comecina ñaitícue. Bie rafue ñnuana ñaitícue. ¹⁸ Bie íco suille rafue ite rabeniconona bu facajia, naimiemo rafuena lloiacadícue. Bie rafue baífemo bu lloia, bie rafuena bu meidoia, bie rabenicomo ite duere fínuacino isoi, Jusiñamui naimiena duere finoite. ¹⁹ Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabeniconona jaca cueñeite. Comue Jerusalémo jaca duiñeite. Naiena jai llotícue.

²⁰ Cristo raite:

—Bie rafue jaca suite. Ua raire biitícue.

Iena raire suillena jiaí jitaídícue. Cai Nama Jesús raire billena eo jitaídícue. ²¹ Naimie duenaillacínona nana Jesucristona ñnotino uifñocana jaillana jitaídícue. Macaíbaite. Juandícue.